

本
艸
綱
目

商務印書館發行

第八冊

本
草
綱
目

商務印書館發行

三月印行 國難後第一版

(四四六)

本草綱目八冊

每部定價大洋叁元伍角

外埠酌加運費匯費

上海商務印書館謹啓

註冊布下忱統祈

原式寧

版

啓

想荷製書

用

境艱

詞意

蒙

三十

附

公

刷

九

日

編輯者 李時珍

重訂者 張紹棠

發行者兼印務 上海河南路商務印書館

發行所 上海及各埠商務印書館

三六〇二上

大

本草綱目

拾遺卷六

木部

響豆

池北偶譚樂安有孫公者年九十強健如四五十歲人自言生平惟服響豆每歲槐子將熟時輒令人守之不令鳥雀啄落既成即收作二枕夜聽其有聲者即響豆也因棄其餘如是數月而得響豆所在每樹不過一枚每歲不過服一粒如是者數十年無他術也

顏氏家訓庾肩吾常服槐實年七十餘目看細字鬚髮猶黑抱朴子云槐子服之令人補腦髮不白而長生殆即此歟

明目悅顏色開心志強筋骨補血髓

紀曉嵐先生姑妄聽之云響豆者槐實之夜中爆響者也一樹祇一顆不可辨識其法槐始花時即以絲網胃樹上防鳥鵲啄食結子熟後多縫布囊貯之夜以爲枕聽無聲者即棄去如是遞枕必有一囊作爆聲者取此一囊又多分小囊貯之枕聽如初得一響者則又分二枕如是漸分至僅存二顆再分

枕之則響豆得矣。

木蛇

百草鏡云木蛇似蛇有鱗甲內紋黃色如菊花瓣亦奇物也。

治狗咬

通香木

邊志木長數尺出塞外以沸湯沃之取其汁洗衣服及灌一切花卉灑屋宇壁經年香氣不滅燒之能降天神香氣達數百里契丹珍之。

治奇疾人不知名者服之即愈焚之辟瘟疫穢氣邪祟。

月櫻皮

者色紫爲上救生苦海櫻欄皮每歲只生十二瓣逢閏月多生一瓣惟此瓣中間有界紋爲異按小辨云櫻每月生一片歲生必十二片唯當閏月之年值所閏之月則此一片僅有其大半亦不家有櫻園每歲臘盡剝之歷驗此無中氣之徵也據此則閏月櫻皮無全瓣者○石室奇方櫻欄

四年則生半片歲長十二節閏月增半節。

血症郭大林云煨存性研陳年者尤佳服二三錢試過效驗王巽初云用一瓣燒存性作二服亦可。

南天竹

卽楊桐。今人多植庭除。云可辟火災。綱目木部南燭條。載其枝葉功用。云苦平無毒。止泄除腫。強筋益氣。久服長生不饑。變白卻老。并引上元寶經言。服草木之王氣。與神通。食青燭之精。命不復殞。皆謂指此。而於其尋常日用功用。概不著錄。至其所引附方。亦僅取聖惠方中之治風疾及誤吞銅錢而已。餘亦未之及焉。故悉補之。○王聖俞云。烏飯草乃南燭。今山人寒食挑入市賣。與人家染烏飯者是也。南天竹乃楊桐。今人植之庭除。冬結紅子。以爲玩者。非南燭也。古方用烏飯草。與天燭。乃山中另有一種。不可以南天竹牽混。此說理確可從之。明目烏鬚。解肌熱。清肝火。活血散滯。食物宜忌云。南燭葉味苦

性平。從新云。苦酸。瀟平。

子。名紅

杷子

治八角蟲。同水銀搗爛。擦之卽除。亦可浸酒去風痹。從新云。南燭子酸甘平。強筋骨。益氣力。

圓精駐顏。

子白色者。名玉珊瑚。

小兒天哮三奇方。

用經霜天燭子。臘梅花各三錢。水蛭蟻一條。俱預收。臨用水煎服。一劑卽愈。

下疳久而潰爛。名蠟燭疳。

不藥良方。紅杷子燒灰存性一錢。梅花冰片五釐。麻油調搽卽愈。

陰莖泄。

慈航活人書。紅杷子燒灰存性一錢。加冰片五釐。麻油調搽。

三陰瘡。

文堂集驗。南天竹隔年陳子。取來蒸熟。每歲一粒。每早晨白湯下。

解砒毒。劉霞裳云。凡人食砒垂死者。用南天竹子四兩。搗水服之立活。此方劉在松江府署親試驗者。如無鮮者。即用乾子一二兩煎湯服。亦可。

葉。洗眼。去風火熱腫。眵淚赤痛。及小兒疳病。取其葉煎湯代茶服。○卻疫仙方。行篋檢祕。凡人稍覺頭疼身體酸困。便即感冒寒邪。急宜服此藥發散。毋使傳經。變成時疫。此方經驗多人。神效異常。用烏梅紅棗各三枚。燈心三十根。南天竹葉三十片。芫荽梗三段。無芫荽以蔥白三節代之亦可。甘草麥冬各三錢。小柴胡

二錢。水二鍾。煎一鍾。不拘時溫服。微汗即愈。

療癰初起。百草鏡。南竹葉威靈仙。夏枯草。金銀花各四兩。陳酒四壺。隔水煮透。一日三服。半月除根。每服藥酒。須吞丸藥。○丸藥方。殭蠶一斤。炒研。砂糖和丸。桐子大。每次吞一錢。

今人畫眉籠中。置之。可去烏風。○作筯。可治膈食膈氣。

查克木

宦遊筆記。塞外有查克木。叢生。樹高五尺許。無皮。枝幹清翠可愛。葉似三春之柳。然質甚堅。並無柔條垂絲。頗耐霜雪。若伐以爲薪。著火即燃。形似炭。有紅焰而無烟。置徑寸於爐中。歷一二日乃燼。惟生於瀚海沙磧之地。遇大風根株即拔。因入土未深。是以天扎無經久者。○西北域記。查克木產推河。似絲柳而不垂。無皮耐霜雪。色青時入爐即燃。數日乃燼。然大者拱。高者尋。風斯拔之。何者。地沙且鹹。根難

據而易朽也。

治產難。臨蓐之時。握其木。易產。心痛。燒灰服之。

綠盆子

邊志出遼東。樹高丈餘。其葉兩兩相對。開花如盞大。黃色。花謝結實。亦兩兩相對。大如木瓜。綠色。春生夏熟。人不可食。誤食之。入口即齒落如屑。舌黑如漆。滿口裂碎。血出如水。終日不能食。經旬方止。又能碎骨如泥。彼處橐駝初生。取以潤其蹄。則千里可行。否則不能行。其性剛利如錐。舉而刺之。利如刀鋸。凡作角器。必用此。

性烈有大毒。能腐骨碎齒。入外科方術家用。

丁香油

百草鏡。丁香油出南番。乃用母丁香榨取其油。色紫。芳香辛烈。番人貯以琉璃器。蓋偶不密。即香達於外。粵澳門多有之。○藥性考。丁香油出西番。○氣味甘辛。性大熱。透關竅。驅寒力更速於丁香。治胃寒痛。或滴少許入煎藥。或以油塗臍上痛處。○暖丹田。除水瀉。塗暖臍膏貼。解蟹毒。以一滴同薑湯服。措牙。治口臭。○藥性考云。壯陽煖腎。疝痛陰寒。○按齊民要術。雞舌香即母丁香。時珍所謂雄爲丁香。雌爲雞舌香也。丁香中雌者獨大。而可取油。雄者細小。不中榨取。予內兄朱放。隴會宦於粵。據云。丁香油

亦近時始有。其性熱而淫。凡衣飾器物。經染其氣。數日不滅。近日豪貴家。多珍之。爲房帷用。以色紫同玫瑰。滴水中攪之。散而復聚者。爲真。僞者曰樟木油。色稍淡。紫中帶黃黑色。氣辛烈。觸鼻作樟腦氣。滴沐器洗衣。或入香佩。可以辟汗。不入藥用。綱目於丁香下。附丁香皮及根枝。不及油。或其時尚未有。卽有亦未行入中土也。

塗臍散。臍痞。受寒胃痛。好酒和服。

金御乘云。胃寒呃逆。嘔吐甚者。用丁香油擦透中脘。痛痹擦痛處。皆立效。試過極驗。祝穆試效方。治療癰。化核膏用之。取其香烈直透經絡。辛以散結滯耳。

檀香油

藥性考。出粵中。舶上帶來。

味苦除惡。開胃。止吐逆。

肉桂油

百草鏡。粵澳洋船帶來。色紫香烈。如肉桂氣。或云肉桂脂也。或云桂子所榨。未知孰是。

性熱氣猛。入心脾。功同肉桂。

傳信方。治各種瘡。用燈草一莖。約長三四寸。以水稍潤。再以肉桂油塗之。貼背脊風府穴下。至肺俞止。

外以綿紙條封之。須臨發前一二時爲之。或先一日更妙。貼後次日發瘡更重。嗣後漸減。蓋風寒暑溼。盡爲提挈而然也。

水安息

出廣中。洋舶帶來。波斯交趾皆有之。形如荔枝而大。外有殼包裹。皮色亦如鮮荔枝。開之中有香。如膠漆黃褐色。氣甚馥郁。此物如開用不盡者。須連外殼置盆中。方不走溢。否則遇五月黃梅時。其汁自滿。溢出殼外。雖殼內所存不過少許。亦會溢出。亦一異也。綱目安息香本條所言皆乾者。云是樹脂。集解下引葉廷珪香錄云。有如錫者。謂之安息油。卽是此種。瀕湖又未詳其功用。今時頗行。故采補以備用。其殼有絲毫裂縫。油卽走溢。須以灑青熬化滴之。○百草鏡云。安息香有水旱二種。水安息難得。焚其香。旁置水盂試之。其香烟投水中。還結爲香。惟分兩稍減耳。○五雜俎云。安息香能聚鼠。其烟白色如糝。直上不散。

辛平無毒。通心神。除邪魅。辟蠱毒。止心痛。下鬼胎。入心經。通腎氣。尤益房帑。故龜靈劑用之。以興陽。反魂丹用之以救急。然大耗真氣。凡氣虛挾火者不可服。忌見火。○藥性考。水安息香辛苦性溫。除風寒。霍亂。煖腎與陽。治心腹蠱氣。血淋遺精。鬼交鬼孕。薰勞瘵。

辟瘟丹。陳杰回生集。用紅棗二斤。茵陳切碎八兩。大黃切片八兩。水安息五錢。合爲錠。每晨焚之。

種子二方。周氏家寶潮腦飛升白霜一兩。麝香二錢。枯礬三錢。龍骨三錢。良薑三錢。五倍子二錢。明雄二錢。水安息母丁香酥合油各五錢。官桂三錢。輕粉二錢。紫梢花二錢。大山茨菰三錢。共爲細末。煉蜜爲丸。桐子大。蠟丸封固。月信後納一九。次日再納一九。種子如神。并治血淋白帶陰瘡陰蝕楊梅瘡毒等症。

又方。真川附子一箇。重一兩二三錢者。山茨菰四錢。此二味要重便浸透。焙乾研末。川烏八錢。五倍子三錢。此二味同研末。水安息五錢。生蟾酥八錢。此二味同研。不麻草烏五錢。明雄五錢。此二味同研末。官桂五錢。母丁香八錢。同研末。酥合油五錢。真鴉片三錢。同研末。紫梢花三錢。蛇牀子一兩。倭硫黃五錢。輕粉五錢。右藥爲末。同白芨五錢煎水。合前藥打成錠。每行時用津磨少許。搽莖首。能治精滑并久不生子。且能解毒。遇瘡不染。若早午晚各搽一次。久不斷。更有神效。與前方男婦同用更佳。或再加入參五錢尤妙。

穿腮起管年久不愈。許氏方。用水安息搽之。管化毒愈。

夜蘭

嶺南雜記。產粵道旁小樹也。狀如木蘭。亦類紫薇。高一二尺。葉大如指頭。頗帶藍色。葉老則有白篆文如蝸涎。名鬼畫符。葉下有小花如粟米。至晚香聞數十步。恍若芝蘭。又名蚊驚樹。暑月有蚊。折此樹逐

之即驚散。○粵語。夜蘭木本高尺許。葉如槐。花如粟米。至夜則芳香如蘭。折之可以辟蚊。插門上。蚊不敢入。一名蚊驚樹。有病。取其葉生啖。或煎水。即吐痰數日而愈。葉上有篆文如符。又名神符樹。○關涵嶺南隨筆。夜蘭生羅浮幽谷中。有香無形。與肉芝同爲神物。與此名同物異。○敏按粵志。步驚木。以嫩葉和米數粒微炒。煎湯飲之。可愈嘔瀉寒痰。花有幽香。步行遇之。往往驚爲蕙蘭。故亦曰步驚。永安人以嫩葉乾之。持入京師作人事。核其功用形狀。或即夜蘭歟。

黎椒白胡椒 山胡椒 馬思答吉

治一切風寒諸病。取葉煎湯服。少頃大吐痰涎。或行路侵寒暑。吐瀉危篤。採數葉嚼。或吐或不吐。病即愈。

邊州聞見錄。川椒故有名。產自黎大所城隅者尤香烈。大小必雙。肉理細密。罅裂而子不墮。俗呼抱娃子椒。○四川志。各州縣多出椒。惟茂州出者最佳。其殼一開一合者尤妙。

性同川椒。入藥尤效。

按黎椒近日亦罕有真者。外方所得。俱屬彼土人。以他產僞充。其功效亦僅與川椒相埒。據劉少府揭清云。真者含一二粒口中。可辟瘴毒。解魚蝦食毒。更可爲導淫具。彼土中有一種生惡瘡。妓女人不敢近。惟吞黎椒三粒與之接。則無害。次日便出椒。內盡包其毒。不入人臟腑也。故真者彼土亦珍貴之罕。

有出售於外者。

白胡椒

通雅云廣舶胡椒有一種玉椒色白味獨辛於他椒今寧波洋貨店頗多其色如雪以內外通白者爲上。皮白內黃者劣。解魚蝦毒。入房術用。○蓬萊李金什言洋舶帶來白胡椒據彼中人云卽用胡椒之嫩者。生去其皮曬乾卽如白玉色。非別有他種。物理小識。胡椒出番國。亦是蔓生。有白色者。或曰卽畢澄茄。

胃痛。百草鏡。用大紅棗去核七箇。每箇內入白胡椒七粒。線紮好。飯鍋上蒸七次。共擣爲丸。如綠豆大。每服七丸。溫滾水下。如壯實者。用十九。服後痛止。而胃中作熱作饑。以粥飯壓之卽安。此寒食痰飲皆治。

治九種心疼。葉天士方。丁香去頂蓋。廣木香。雄黃。巴豆去油淨。白胡椒。各三錢。枳殼。紅花。五靈脂。各一兩。共爲細末。好酒發爲丸。如菜子大。候乾收貯瓶內。每服八釐。唾津送下。忌生冷油膩。半月除根。

白痧藥。種福堂方。白胡椒一兩。牙阜一錢。火消檀香末。明礬。丁香。蟾酥。各三錢。北細辛。二錢。冰片。麝香。各五分。金箔量加。

山胡椒

百草鏡。雲南木邦土司。出一種山胡椒。色黑顆大。主止痛破瘀。

馬思答吉

五雜俎。出西域。似椒而香酷烈。彼土以當椒用。主開胃消食。破積除邪。

金剛纂

滇志。金剛纂花黃而細。土人植以爲籬。又一種形類雞冠。○湧幢小品。金剛纂生天目。其樹長不滿三四尺。多屈曲。雖春夏亦無葉。每觸其枝。曳裾不前。夷緬國有是種。相傳到其末漬水。水必毒。飲者立死。曰人瘴。又能借之爲誘淫之法。○張洪使緬錄。緬地有木曰金剛纂。狀如椶櫚。枝幹屈曲。無葉。剉以漬水。暴牛馬令渴極而飲之。食其肉必死。○劉魁若程賦統會。雲南大侯州出金剛纂。青色如刺桐。最毒。

○滇記云。金剛纂碧幹而蝟芒。孔雀食之。其漿殺人。以爲草者誤。今曲江建水石屏處處有之。性有大毒。入丹術家用。丹房本草。金剛纂純陽草也。伏硫與柳葉藤同用。其功最神。

鍛樹皮

本草補。泰西有鍛樹。呂宋亦有之。其色紅。狀如杜仲。初因人取樹皮包切肉數瓣。抵家合成一片。始知其皮能合肉接骨也。因名曰鍛樹。本草人參條下所載椴木音賈。而此鍛音斷。不同。或係二種。當與有識者辨之。敏按根葉與烏血柏相似。而大如團扇。有鉅齒。初生時可裹餅餌蒸食。霜後鮮赤若丹楓。照

巖谷其皮柔韌如麻皮烏喇之人采以治繩作魚網入水不濡又可爲烏鎗火繩中國所無也

治折傷胎疝一切損傷肉破骨斷取皮搗碎煎酒服又以渣敷患處完好如初幼兒患疝由於胎中得者此因皮開裂腸入腎囊疼痛難忍亦能戕命此葉久貼皮膜裂處自然復合永無患矣但非幼童之年則不可治方用鍛樹皮或搗爛或削片以油潤溼黏布上貼患處外以布牢繫腰間或半年三箇月方愈

黃葛樹川槿皮

邊州聞見錄蜀多黃葛宜賓學宮前騎牆樹而生根未至地已合抱此樹以某月種每歲必某月始芽入藥用根皮藥肆中多取其皮以代川槿○峨嵋山志嘉樹在羅目縣東南三十里陽山江旣兩樹對植圍各二三尺上引橫枝巨二丈相援連理陰庇百夫其名曰黃葛號嘉樹蘇子由詩予生雖江陽未省到嘉樹卽此○益部談資黃葛樹葉似桂稍大團欒蔭數畝冬春不凋幹則擁腫根皆蟠露土上至於石崖之側則全欲不藉土生者夔之梁方最多惜無材用○按王阮亭居易錄雲南多黃果似海棠稍大者香如佛手甘肥如梨多津液蜀產者樹而不結實其皮類川槿亦能愈癬今曰黃葛或音之譌耳

治疥癬取其根皮煎湯浴之

川槿皮

生川中。色紅皮厚。而氣猛烈。產孟獲城者。只一株。傳爲武侯遺植。殺蟲如神。生剝其皮。置蟻其上。卽死。今亦罕有。他省產者。名土槿皮。薄而氣劣。不得混施。今川人多用黃葛皮代之。以售他處。○通雅。真川槿皮。切斷。中有絲。白茸如杜仲。○羣芳譜。川槿色紅。氣厚力優。

癬瘡。楊起簡便方。癬瘡不愈。以川槿皮煎湯。用肥阜去核及內膜。浸湯時時擦之。或以汁磨雄黃搽。

尤妙。又見不藥良方。

頑癬多年不愈。○活人書。川槿皮二錢。輕粉五分。斑蝥七箇。大楓子七粒。河井水共一鍾。煎半。露一夜。筆蘸塗之。○又方。川槿皮四兩。輕粉雄黃各四錢。百藥煎四餅。斑蝥一錢。巴霜錢半。大黃二兩。海桐皮二兩。研如粉。陰陽水和。抓損敷之。必待自落愈。

荷葉癬。活人書。川槿皮切片。海桐皮檳榔各二錢。輕粉錢半。紅娘子五分。陰陽水浸一二日。用鵝翎掃上。如癢。以竹片刮破。搽此藥。夜露三宿。更妙。

遍身頑癬。大楓子四十九枚。川槿皮二兩。斑蝥去翅足五箇。川椒一錢。輕粉二錢。杏仁三錢。海桐皮二錢。共末。河井水各一盃。浸一夜。鵝翎蘸汁搽之。

癬瘡不愈。不藥良方。川槿皮煎湯。取肥阜去核及肉膜。浸湯內。時時搽之。

牛皮癬癩。毛世洪經驗集。川槿皮一斤。勿見火曬燥。磨末。以好燒酒十斤。加榆麵四兩。浸七日。爲度。不時蘸酒搽擦。二三十年者。搽一年。斷根。如無川槿。土槿亦可代之。○治頑癬。種福堂方。川槿皮。海桐皮。尖檳榔。樟冰。苦參。黃蘗。白芨。各二錢。雷丸一錢五分。大楓子。杏仁。各二粒。木鼈四箇。用火酒浸七日。將穿山甲刮癬。少碎。以酒搽之。卽愈。○五仙散。經驗廣集。治久年頑癬。牛皮癬。神效。紅粉霜五分。明礬。川槿皮。杏仁。各一錢。蜜陀僧三錢。爲末。津調抹。一日三次。三日全愈。

粉刺。孫台石方。川槿皮一兩。硫黃二兩。杏仁二兩。去皮尖。輕粉二錢。樟腦五錢。麝香少許。爲末。雞子清調。早洗晚搽。

祕傳雄鼠骨散。治牙落。可以重生。用雄鼠骨一具。生打活。雄鼠一箇。剝去皮雜。用鹽水浸一時。炭火上炙。肉自脫落。取骨炙燥。入衆藥內。同研爲末。香附。白芷。川芎。桑葉曬乾。地骨皮。川椒。蒲公英。青鹽。川槿皮。旱蓮草。共爲末。擦牙。百日復出。固齒。無不效。

土漆

玉環志。皮如桃樹皮。黏著人手。卽發腫。若刀瘡見血。搽此皮敷之。卽止。

止金瘡出血。

水團花

李氏草秘。生溪澗近水處。葉如蠟梅樹。皮似大葉楊。五六月開白花。圓如楊梅。葉皮皆可用。

治金刃傷。年久爛腳瘡。搗皮葉罨上。一宿即癒。草

麻樞果

治胎疔。毛世洪經驗集。凡小兒初生發疔。止見啼哭。不見病形。延至一周兩歲。始知是疔。諸醫不效。用

麻樞樹上之鴛鴦果一對。其果連樹枝取下。可辨真假。一對果可治三人。荔枝核七枚。杵碎。平地木三

錢。同煎飲。即瘥。亦不復發。

千張紙木蝴蝶

木實也。出雲南廣南府。形似扁豆。其中片片如蟬翼。焚灰用。

治心氣痛。

按千張紙。演志以為木實。據程豹文言。千張紙乃仙人掌草。曬乾。其中心層層作羅紋捲心。折之如通

草狀。故名。此物用七張燒灰酒服。可治胃脘痛。楊桐崗云。蘇州有之。狀如通草。約手掌大。曾用入丸中。

可治浸淫惡瘡。今並存其說。以俟考。本草綱目。雜草內有宜南草。即此。形狀亦同。云主邪。小兒女以緋

絹袋盛。佩臂上。辟惡止驚。而不知其可服食也。

木蝴蝶

出廣中。乃樹實也。片片輕如蘆中衣膜。色白似蝴蝶形。故名。四邊薄而明。中心微厚。不甚明透。似有子。壁錢白膜狀。治肝氣痛。用二三十張。銅銚上焙燥研細。好酒調服。○貼癰疽。項秋子云。木蝴蝶出廣西。儼如蝴蝶。中心如竹節。色更白。凡癰毒不收口。以此貼之。即愈。

治下部溼熱。

風葉

稗史。郴之桂陽縣產風葉。充茗飲。能愈頭風。故名。亦可浸酒。性微熱。前人志記不載。性微熱。追風活血。可浸酒服。

拔爾撒摩

坤輿圖說。木名。出白露國。此樹生脂膏極香烈。可入藥。

傅金刃傷。一晝夜肌肉復合如故。塗痘不癢。塗屍千年不腐。

楓果即路通

即楓實。一名楸子。乃楓樹所結子也。外有刺毬如栗殼。內有核多孔穴。俗名路路通。以金箔貼之。村嫗簪於髮。云可明目。宜老。出浙臨安縣。署後安樂山者。名錢墳楓果。最佳。焚之香郁。可燻衣辟瘴疫。綱目。楓脂香載其木皮。不及其實之用。今補之。宜於焚燒。未有入湯液之用。其果冬月即孕。楓蠶子於中。交

春內生蠶。每果中有一箇。立夏後乃化蛾飛去。入藥取無蟲陳久者用。○槐西雜志。楓香果出雲南者。焚之殺鬼去邪。辟瘴溼。

辟瘴卻瘟。明目除溼。舒經絡拘攣。周身痹痛。手腳及腰痛。焚之嗅其烟氣。皆愈。熏衣被。可除蚤。敏按楓果去外刺。皮肉圓如蜂窠。即路路通。其性大能通十二經穴。故救生苦海。治水腫脹用之。以其能搜逐伏水也。

治癩。德勝堂傳方。楓木上毳十箇。燒灰存性。白砒五釐。共末。香油搽上即愈。

臟毒。古今良方。路路通一箇。煨存性。研末。酒煎服。

咬人狗草

臺灣府志。咬人狗其木甚鬆。手掐之便長條迸起。可為火具。木高丈餘。葉長大似烟葉。有毛刺。刺入

毛孔甚癢。搔之發紅痛。一晝夜乃止。

治癩癧。蓋海使
桂錄

附刺暈。李氏草祕。其樹形似烏柿。有刺。刺人即暈。故名。

治癰腫定疼。取樹腦葉入醬板鹽花。罨發背癰疽腫毒。痛甚者罨上即止痛。不問已未潰。罨至愈。

桂子桂丁
桂耳桂根

學圃餘蔬有一種四季開花而結實者此真桂也閩中最多常以春中盛開凡桂四季者有子此真桂也江南桂八九月盛開無子此木樨也○臨海志唐垂拱四年三月月桂子降臨海芳香有桂氣味食之和暢宋紹定閒舒某於天台山得月桂子二升大如樟子無皮色似白玉紋如雀卵中有仁嚼之作芝麻氣以之雜菊入囊爲枕有散佚石縫中者旬日輒出樹葉柔長經冬猶在種入盆中久之亦失所在。

性溫味辛平肝煖胃胃脘寒痛甚宜○藥性考甘辛溫中煖胃平肝益腎散寒止噦。

桂丁

百草鏡云形如吳茱萸出廣西交趾乃肉桂子也治心痛辟寒邪胃痛百草鏡桂丁研細酒下三錢。

桂耳

出開化山中乃多年老樹蒸出茸也面紅色土人採得以治血疾。

治一切血症及吐血。

按綱目分桂爲五種曰桂即今所謂交桂曰牡桂今廣桂曰箇桂俗呼木犀曰天竺桂浙中山桂也有子如蓮曰月桂四季有花者此桂子乃天竺桂子也綱目失載主治若月桂則固載其子矣曰桂丁乃

廣桂之子。綱目亦不言其主治。至於桂耳。則各桂皆有之。性亦略同。綱目皆不載。悉爲補之。○和霽園夜談隨錄。呂司馬季弟琪。從司馬官嶺南署中。有小院頗幽靜。舊有古井在軒右。井畔有二老桂。大合抱。值夏夜。月光甚皎。琪納涼軒下。聞井中有聲不絕。凭欄窺之。見井水白如銀。中有紅丸。大如彈子。約數十百點。光明如火。向上競相跳躍。漸躍漸高。去欄僅尺餘。琪驚白司馬。次日。命夫隄下。探之無他異。得桂子數十粒。鮮赤如新。琪卽戲以井水服之。日七枚。七日而盡。蓋適取得四十九枚也。後琪壽至九十九歲。無疾而逝。平原董太史曲江與琪善。親見而誌之。○敏按。今月桂子如蓮葯。鮮者色青。乾之淡黑色。呂琪所見。大如彈丸。鮮赤如新。當別是一種。考天地運度經云。太山北有桂樹七十株。天神青要玉女三千守之。其實赤如橘。人食之。一年可以上昇。或是此種。惜琪公所服止四十九枚耳。故得壽。

桂根

陳年入土最深者。入藥用。

貼牙痛。可斷根。卽取桂樹根上皮用。

學齋帖。花中惟巖桂四出。予謂土之生物。其數皆五。故草木花皆五。惟桂乃月中之木。居西方地。四乃西方金之成數。故花四出而金色。且開於秋云。

榿木

似檜亦名水松。抱木生者性韌。皮同乘鮮。剝創造履。俗稱抱香履。潮州頗多。能治溼腳氣。辟邪風。

樟皮梨

此香樟樹皮也。綱目有樟材樟腦樟節。而皮與子皆不及焉。今山人率以皮子治病有效。因急補之。樹皮以年久老樟者爲佳。治天行溫疫。溼毒流注。浴疥癬。洗腳氣。

心疼

玉局方。香樟樹皮。取時去面上黑色者。用內第二層皮。搗碎煎湯服。卽止。永不再發。

刑杖傷

神錦方。樟樹皮用老酒燉出味。調老公雞冠血食。止痛散血立效。

霍亂上吐下瀉

傳信方。樟樹皮一把。水煎溫服。立止。

腳上生瘡

家寶方。此瘡個個如小筆管。大者用樟樹葉牙咬熟。略搽拔毒丹。外貼樟樹葉。連換卽愈。

敏按樟木綱目言辛溫香竄。性能除溼。故山居人患病多宜之。象山縣志。萬曆中邑大疫。有一道人教人取千年老樟樹皮煎飲可愈。并言樹老久飲霜雪。其性轉清涼。可消疫氣。此卽藏器所云。樟木能治惡氣中惡鬼注之意。

樟梨

卽樟樹子也。出處州府遂昌縣福羅塢仙人壩周公園。大者爲貴。小者次之。予友黃慶春與一遂昌人

相善。其人饋以樟梨。云可治心胃腕疼。服之立效。卽香樟子也。較他產者略大。蓋千年樟樹所結。故效如神。葉南郊自處州回。詢以樟梨。據云。此非子。乃千年樟樹所結於枝極閒者。如瘤然。土人以形似梨。故名之。然則此乃樟瘤也。然與予所見又不類。姑並存其說。以俟再考焉。

磨塗腫毒。治中酒心胃疼。皆效。

榕鬚

藥性考。榕葉似大麻。子如冬青。枝幹拳曲。木本稜凹。不成材器。而結奇香。其脂與漆相似。可以貼金。膠物勝於楮脂。○嶺南雜記。榕樹閩廣最多。他省則無。故紅梅驛以北無榕。大者蔭十餘畝。離奇古怪。備木之異。然體曲不中梁柱。理斜不中材用。質虛不中薪爨。莊子所謂以不材而壽者也。漳浦黃石齋先生有榕頌。其木年久者常結伽南香。焚之致鶴。植於水際。其子可以肥魚。細枝曝乾。束爲炬。風雨不滅。其脂乳可以貼金。接物。與漆同。其鬚可入藥用。○說文。以鬻爲古松字。六書故以古松字爲鬻。而鬻爲南方之榕。通雅云。榕當別出。狀木始於稽含。分字始於戴侗。柳宗元詩。榕葉滿庭鶯亂啼。後山叢談言。蔡州壺公觀有大木。四垂傍出。人莫能識。張歊閒人嘗至蔡。爲余言。乃榕木。此木無用。惟枝上垂根。曝之可作火繩。以發炮。又可染黑。贊寧志所云。倒生木不死樹。橫枝生根。下地如柱。卽榕無疑。粵志榕之怪在根。自上生下。語曰。榕木倒生根。○粵志。榕葉甚茂盛。柯條節節如藤垂。其幹及三人圍抱。則枝上

生根連綿拂地得土石之力根又生枝如此數四枝幹互相連屬無上下皆成連理其樹可以倒插以枝爲根復以根爲枝故一名倒生樹幹中空不堅無所用離之木也其象如離之大腹其中空處常產香木炎精所結往往有伽南焉粵人以其香可來鶴子可肥魚多植於水際其樹脂可以貼金接物與漆相似性畏寒踰梅嶺則不生故紅梅嶺有數榕爲炎塞之界有紅白大葉小葉數種○按泉州府志榕有二種一種矮而盤桓其鬚著地復生爲樹一種名赤榕上聳廣大二種蔭最寬廣入藥用有鬚者

固齒義復方止牙痛取榕根鬚摘斷入竹管內將鹽塞滿以泥封固火煨存性爲末擦牙搖動者亦堅竹管不用

棚七樹

治腹中虻痛救生苦海用棚七樹柴內取之燒灰研細酒下或滾水下三錢且能除根破傷風百草鏡棚七樹刮去外面粗皮取內白皮搗爛酒煎服渣和白麵搗敷患處自愈

柏瘻

百草鏡老樹生此其狀如瘤柏性西指乃稟西方兌金之氣故能平胃土而治胃痛亦取其氣相攝服耳

治胃痛。

柏子殼

綱目有柏實無子殼。近時奇功散用之。

解砒霜如神。集驗良方奇功散用柏子殼三錢。炒紅土三錢。同研爲末。用雞子清調服。服後作一寒顛卽愈。重者不過兩服。

松毬松皮

此卽山松所結卵毬。初青久則裂作鱗甲形。片片四開而墜。兒童拾之。盈筐攜入市。貨與茶爐代炭。能益茶味。入藥取青嫩者。綱目松下列松實。云見果部。不知果部乃海松子。出關東。與山松異。山松毬內老亦有子。細如粟米。不中食品。

白點風。家寶方。先以蔥花椒甘草三味煎湯洗。再以青嫩松毬。蘸雞子白硫黃同磨如粉。搽止。八九次除根。

松皮膏

色如琥珀。出西域伊犁等處。西域聞見錄。烏魯木齊乾隆四十年改爲迪化州。其土人取松皮爲膏。謂之松樹膏藥。

性溫。治血。一切虛怯勞瘵。婦女血枯血閉諸症。服之有效。

陳海曙家有此膏。自西域帶來。黑如漆。上蓋松皮一塊。云其松皮厚者二三尺。卽此皮所熬。曾以治勞嗽。十日病減。又十日而病痊。又十日而生肌。漸復如舊。每服三錢。空心白水調下。服一月。無不愈者。○槐西雜志。田耕野官涼州鎮時。攜回萬年松一片。性溫而活血。煎之色如琥珀。婦女血枯血閉諸症。服之多驗。親串家遞相乞取。久而遂盡。後予至西域。乃見其樹。直古松之皮。非別一種也。土人煮以代茶。亦微有香氣。其最大者。根在千仞深澗底。枝幹直出山脊。尙高二三十丈。皮厚者二尺有餘。奴子吳玉保嘗取其一片爲牀。意直盤古時物。萬年之名。殆不虛矣。

羅漢松實

物理小識。羅漢松闊瓣厚葉。樹老結實。長四五分。底平上銳。色紫黑。乾之可入藥。本草綱目所未載也。○永寧僧云。羅漢松葉長者名長青。能結實。葉短者名短青。不結實。其結實儼如佛。大者如雞子。小者如豆。味甘可食。

味甘補腎。其香益肺。治心胃痛。大補元氣。

汪連仕采藥書。羅漢松一名金錢松。又名徑松。其皮治一切血。殺蟲瘴癘。合蘆薈香油調搽。

金松

物理小識。出台州。垂條結子如碧珠。三年子乃一熟。每歲生者相續。璀璨其間。

子治腸風。

山西柏油松油

其色黑若紫者。係此油脚也。其氣若松香。竹箸挑之。懸絲不斷者真。

殺壁蝨。凡人家牀。凡板壁患此者。以油滴縫內。其蝨盡死。又搽禿瘡。

治癬。集驗良方。真柏油四兩。黃蠟一兩。雄豬膽一箇。斑蝥三錢。川椒去目并閉口者三錢。先將斑蝥

川椒二味研末聽用。次將生柏油入砂鍋內熬極熟。似有生烟之狀。然後將蠟入油內鎔化。再將豬膽

汁傾入。即離火。將斑蝥川椒二味末子拌入。用竹節急急攪勻。將藥放在滾水盆上。浸三日。去火毒。然

後入瓷罐內。封固聽用。○治諸般癬。多年近日癩毒。生柏油一瓶。塗患處。後用年老枯桑柴火熏烤。內

有毒蟲即死。待好即止。如一次倘不瘳。再熏即愈。○又癬方經驗廣集。真柏油調輕粉塗上。起泡。泡消

即愈。○治狗癬疹。同壽錄。用柏油不拘多少。鐵杓內熬。次下鴉鴿糞雞糞同和。加香油少許。擦之。

治頭面耳上黃水瘡。活人書。真柏油真香油各二兩。同熬成膏。搽上如神。

赤遊丹。醫林集秘。蜒蝨十條。土蛛窠五六箇。出草屋老壁內。柏油。舊漆器上刮下漆少許。共搗。以柏

油調搽患處。立愈。

松油

其取油法。以有油老松柴截二三寸長。劈如燈心粗。用麻線紮把。如茶杯口大。再用水盆一箇。內盛水半盆。以盃一隻坐於水盆內。用簾一塊蓋於盃上。中挖一孔如錢大。再以紮好松把直豎放於席孔中間。以火點著。少時。再以爐灰週圍上下蓋緊。勿令走烟。如走烟。其油則無。候溫養一二時。其油盡滴盃內。去灰簾。取出聽用。一名瀝油。

治疥瘡久遠不愈。百藥不效。以此油新浴後擦之。或加白礬末少許和擦。更妙。

茶油即枰樹子油

乃枰樹子油也。豫省閩粵皆食茶油。而不知為枰樹子油。俗呼茶油。實非茶子之油也。煎熬不熟。食之令人瀉。

味甘性涼。氣腥色綠。潤腸清胃。殺蟲解毒。不宜生食。燃燈益目。抹髮解腫。

枯餅

藥性考云。餅能浣衣。除垢最潔。燒灰敷瘡。亦可下積。洗風瘙癢。可用皮葉。

杉木油

經驗廣集。有取杉木油法。用紙糊盃面。以杉木屑堆盃上。取炭火放屑頂燒著。少時。火將近紙。即用鐵

筋抹去。燒數次。開盤看。卽有油汁在盤內。
治一切頑癬。先用穿山甲刮破。用羊毛軟筆蘸油塗上。甚加疼痛。停半日再塗。癬自結痂而愈。如已破者。不必刮癬。藥極多。都不及此真神方也。

清明插簷柳

清明日插在屋簷下。枯柳枝朝南者。入藥。物類相感志。清明楊柳。能止醬醋之潮溢。甜瘡。濟世良方。以清明插過柳枝。燒存性一錢。銀硃七分。共研。再入飛礬一分。傅之。小兒胎火不尿。濟急方。凡初生小兒。小便不通。乃是胎中熱毒未化。不可用寒涼金石之劑。只須取清明插簷柳枝。朝南者一握。煎湯服之。卽尿。大人小便閉。服之亦效。○治尿梗。周子象方。用清明插屋簷下。枯柳一大把。折碎煎湯。傾坐桶內。被圍住熏。片時卽通。再內服。白濁。盧復芷園臆草。清明所插柳條煎之。治白濁。蓋勢爲肝苗。柳爲卯木。同類也。渾濁之色。清明之氣。相待也。用藥恰好有如此。

下痢後成醃魚水。此險症也。慈惠小編。用清明人家插簷柳。取葉來煎湯。下如止可救。起病不多日。下醃魚水。年少者。方可治。老者難治。少者勞傷之症。肉而化成血水。平和調理。可以挽回十分之二三。老者血氣久成衰弱。故成此症。神仙難治。

柳樾柳屑

此乃柳花未放時其枝垂下如樾形所謂柳蕊也淡黃色若俟花出則無用矣綱目有柳華無柳樾別錄乃有柳實或卽此歟

明目驅風壯筋骨堅牙齒岫嶼神書有柳樾牢牙法以柳樾措牙去其宜露諸風不生明目駐顏黑髮聰耳壯筋力益壽輕身○急救方柳樾陰乾爲末日用擦牙去風明目烏髮固齒久用不徹可咀金石

柳屑

卽空心柳樹中屑也

治濕氣腿腫慈幼筏淮陰卑濕民多粗腿偶得一法治之甚效用空心柳樹中屑取出篩細入鍋內炒熟以臭泔水灑濕又炒加麵少許拌勻趁熱取起敷腿上海水出再炒敷數次自愈

柳葦

陳氏筆記云柳樹上葦也煎服治心痛

種柳

俗名西河柳性最透發綱目種柳下云其枝葉消痞解酒毒利小便不及治疹瘡之用○宏治紹興府志種俗呼西河柳其葉甚細似桐而香天將雨水則生花試之多驗○本草匯種柳甘得土氣鹹得水

氣。故能解血分之毒。消痞利便。是其本功。近世往往以治痧疹。熱毒不出。用爲發散。不知本自何氏。○本草乘雅之檉柳。繆仲淳本草經疏廣之以治痧疹。此不獨取其能通。又取其象形。疹亦三顯三隱。三而三之。合爲九。烹以應九藏也。○芷園臆草。檉一歲三開花。一日三眠起。自成一家人。不與四時之生長收藏相流行。超五行而純二氣。無殺機而唯生機者也。且雨以陰陽氣和而作。先知之應。從可知矣。第氣魄渺小。未可以大道載。靈樞陰陽二十五人之外。有陰陽五人。此當屬陰陽和平之人。又當啓陰陽自和之汗也。

逢原云。檉柳獨入陽明。故其功專發麻疹。兼解酒毒。去風。煎湯洗浴。風症身癢效。

性平疏散。驅風解表。治斑疹麻瘡不出。經驗方。或因風而閉者。俱用西河柳葉。同櫻桃核煎湯洗之。卽透出。○救生苦海。草痧藥方用之。又肝天青蓮散用之。○急救方。治小兒痧疹不出。喘嗽煩悶。躁亂。用西河柳葉風乾爲末。水調四錢。頓服。立定。○疹後痢。從新用西河柳葉爲末。砂糖調服。○疹發不透。喘嗽悶亂。西河柳煎湯去渣。半溫。用芫荽蘸水擦之。但勿洗頭面。並忌夜間洗之。蓋痧疹晝發而夜斂也。乳母及兒。仍以西河柳煎服。

酒積成病。良方集要。西河柳晒乾爲末。每服一錢。溫酒送下。

桑瘦鐵扇子。
桑葉滋。桑楮袖。

百草鏡。桑老則樹生瘰。其壯如瘤。用刀斫下。陰乾入藥。

去風痹諸濕。浸酒用。治胃痛。百草鏡

鐵扇子

百草鏡。桑葉採過二桑者勿用。止採過頭葉。其二葉力全。至大雪後。猶青於枝上。或黃枯於枝上。皆可用。須經大雪壓過。次日雪晴採下。線穿懸戶陰乾。其色多青黑色。風吹作鐵器聲。故名鐵扇子。冬至後採者良。

治腸風目疾。咳嗽盜汗。百草鏡。洗一切天行時眼。風熱腫痛。目澀眩赤。取鐵扇子二張。用無油茶盪一隻。

要有蓋者。置鐵扇子於中。以滾水沖半盞。蓋好。候湯溫。其色黃綠如濃茶樣。爲出味。然後洗眼。拭乾。隔

一二時。再以藥汁盪隔水頓熱。再洗。每日洗三五次。即愈。此水一盞。可洗三四十人。養素圖驗方

中年眼目昏花。眼科要覽。復明散。用經霜雪桑葉。葉須臘月在樹不落者。同甘菊。側柏。葉。荆芥。穗。桑

白皮。如有眵淚。加艾葉。蒼朮。發癢。加赤芍。川椒。爲粗末。等分。和勻。煎湯熏洗。惟紅腫者不可洗。

風眼下淚。不藥良方。臘月不落桑葉。煎湯。日日溫洗之。或加入芒消少許。

桑椹

乃多年老桑。斂被翦伐嫩條。其枝頭長成如拳者是也。

治膈症。梁侯瀛集驗方。用老桑柘樹燒紅存性。爲末。好酒送下。卽愈。

桑葉滋

鮮桑葉摘開。其葉筋有白汁。名桑葉滋。又名桑脂。綱目桑葉載其用最廣。獨未及此。

性微寒。味苦。有天絲入眼。以此點之。

山海草函。桑葉滋點眼。治蜈蚣咬。

治乳癰。集聽。用桑葉不拘頭二葉。摘取半段。取後半段。脂三分。黃藥八錢。水煎乾。止用三分。飯鍋蒸

一次。夜露一宿。塗患處。雖爛見骨者。亦能收口平復。

小石瘡。今人呼爲紫馬疔。錢岐經驗單方云。小石瘡。採二蠶桑葉。滴下滋。水點上。愈。○消瘰癧。秋泉祕

方。用蝌蚪一錢。蛇蛻泥球包煨爲末。三分。鬼饅頭滋乾一錢。桑滋乾一錢。乳香沒藥各三分。麝香一分。

共爲細末。飯和搗爲錠。臨用時。再取鬼饅頭滋化開。以雞翎搽患處。過宿卽消。

桑油

萬氏家抄。有取桑油法。鮮桑木槌碎。裝入瓶內。用一瓶蓋口。倒埋土中。糠火煨之。油自滴下。貯罐聽用。

治小兒身面爛瘡。輕粉雄黃各五錢。豬膽一個。滑石一兩。硫黃五錢。穿山甲十五片。炙鳳凰。退燒存性。

五錢。爲末。用桑油豬膽汁調。絹包擦之。

伽楠香

今俗作奇楠。乘雅作奇南。棧香。棧木速香名。而廣人亦呼奇南爲棧。名同而香異也。粵海香語。伽楠雜出海上諸山。凡香木之枝柯竅露者。木立死而本存者。氣性皆溫。故爲大蟻所穴。大蟻所食石蜜遺漬其中。歲久漸浸。木受石蜜氣多。凝而堅潤。則成伽楠。其香木未死。蜜氣未老者。謂之生結。上也。木死本存。蜜氣膏於枯根。潤若錫片者。謂之糖結。次也。歲月既淺。木蜜之氣未融。木性多而香味少。謂之虎斑。金絲結。又次也。其色如鴨頭綠者。名綠結。摺之痕生。釋之痕合。按之可圓。放之仍方。鋸則細屑成團。又名油結。上之上也。伽楠本與沈香同類。而分陰陽。或謂沈牝也。味苦而性利。其香含藏。燒乃芳烈。陰體陽用也。伽楠牡也。味辛而氣甜。甘香勃發。而性能閉二便。陽體陰用也。然以洋伽楠爲上。產占城者。剖之香甚輕微。然久而不減。產瓊者。名土伽楠。狀如油速。剖之香特酷烈。然手汗沾濡。數月卽減。必須濯以清泉。膏以蘇合油。或以甘蔗心藏之。以白萼葉莖之。瘞土數月。日中稍暴之。而後香魂乃復也。占城者。靜而常存。瓊者。動而易散。靜者。香以神行。動者。香以氣使也。藏者。以錫爲匣。中爲一榻。而多竅。蜜其下。伽楠其上。使薰炙以爲滋潤。又以伽楠末養之。他香末則不香。以其本香返其魂。雖微塵許。而其元可復。其精多而氣厚故也。尋常時勿使見水。勿使見燥。風黴濕土則藏之。否則香氣耗散。○本草乘雅云。奇南與沈同類。因樹分牝牡。則陰陽形質臭味情性各各差別。其成沈之本爲牝爲陰。故味苦厚。性

通利。臭含藏。燃之臭轉勝。陰體而陽用。藏精而起亟也。成南之本爲牡爲陽。故味辛辣。臭顯發。性禁止。能閉二便。陽體而陰用。衛外而爲固也。至若等分黃棧品成四結狀。肖四十有二則一矣。沈香有四十二品。第牝多而牡少。獨奇南世稱至貴。卽黃棧二等。亦得因之以論高下。沈本黃熟。固坎端。棧透。淺而材白。臭亦易散。奇本黃熟。不唯棧透。而黃質邃理。猶加熟色。遠勝生香。燕炙經旬。尙襲襲難過也。棧卽奇南。渡重者曰金絲。其熟結生結。蟲漏脫落四品。雖統稱奇南結。而四品之中。又有分別。油結糖結蜜結綠結金絲結。爲生爲熟。爲漏爲落。井然成秩耳。大都沈香所重在質。故通體作香。入水便沈。奇南雖結同四品。不唯味極辛辣。著舌便木。願四結之中。每必抱木。曰油曰糖曰蜜曰綠曰金絲。色相生成。跡迥別也。奇南一品。本草失載。後人僅施房術。及佩圍繫握之供。取氣臭尙爾希奇。用其形味。想更特異。沈以力行行止爲用。奇以力行止行爲體。體中設用。用中具體。牝牡陰陽互呈。先後可默會矣。○宦遊筆記。伽楠一作琪璠。出粵東海上諸山。卽沈香木之佳者。黃蠟沈也。香木枝柯竅露。大蟻穴其竅。蟻食石蜜。歸而遺香其中。歲久漸漬。木受蜜氣。結而堅潤。則香成矣。香成則木漸壞。其旁草樹咸枯。有生結者。紅而堅。糖結者黑而軟。瓊草亦有土伽楠。白質黑點。今海南人取沈速伽楠於深山中。見有蟻封高二三尺。隨挖之。則其下必有異香。南中香品不下數百種。然諸香賦性多燥烈。薰燒日久。能令人髮白血枯。惟伽楠香氣溫細。性甚益人。而范石湖桂海香志。獨不載及。詎不使寶鴨金猊之間。少一韻事乎。但佳者

近亦難得。○陳讓海外逸說。伽楠與沈香並生。沈香質堅。彫剔之如刀刮竹。伽楠質軟。指刻之如錐畫沙。味辣有脂。嚼之黏牙。其氣上昇。故老人佩之。少便溺焉。上者曰鶯歌綠。色如鶯毛。最爲難得。次曰蘭花結。色微綠而黑。又次曰金絲結。色微黃。再次曰糖結。黃色者是也。下曰鐵結。色黑而微堅。皆有膏膩。匠人以雞刺木雞骨香及速香雲頭香之類。澤以伽楠之液。屑僞充之。○物理小識云。奇南與沈同類。自分陰陽。沈牝也。味苦性利。其香含藏。燒更芳烈。陰體陽用也。奇南牡也。味辣沾舌。麻木。其香忽發。而性能閉二便。陽體陰用也。其品有綠結。油糖蜜結。金絲虎斑等。鋸之其屑成團。舶來者佳。○東西洋考。交趾產奇南。以手爪刺之。能入爪。既出。香痕復合。又有奇楠香油。真者難得。今人以奇楠香碎片漬油中。蠟熬之而成。微有香氣。此僞品也。

黎魏會仁恕堂筆記。東埔寨。日本支國也。夜中不睹奎宿。國人多騎象。產奇楠。其取奇楠之法。國人先期割牲。密禱。卜有無。走密林中。聽樹頭有如小兒語者。便急數斧而返。遲則有鬼搏人。隔年始一往。取先上王及三儂。讀如馬。彼國專政之將軍也。重加洗剔。視上者留之。厚酬其值。次者下者。乃聽別售也。○查浦輯聞。

榕樹千年者。其上產伽楠香。

金立夫言。盛候爲粵海監督時。須上號伽楠入貢。命十三洋行於外洋各處購求。歲餘竟無佳者。據云。惟舊器物中。還有所謂油結。色綠。摺之痕生。釋之漸合者。今海外諸山。皆難得矣。卽占城所產。香氣輕。

微久而不滅。冬寒香藏。春暖香發。靜而常存者。是蜜結。嗅之香甜。其味辛辣。入手柔嫩。而體輕。爲上品。今時亦罕有。其熟結。生結。蟲漏。脫落。四結之中。每必抱木。曰油。曰糖。曰蜜。曰綠。曰金絲。其生結者。紅而堅。糖結者。黑而軟。或黃或黑。或黃黑相兼。或黑質白點。花色相生。成蹟迥別也。現在粵中所產者。與東莞縣產之女兒香柑。似色淡黃。木嫩而無滋膩。質粗鬆者。氣味薄。久藏不香。非香液屑。養不可。不足寶貴。其入藥功力亦薄。識者辨之。味辛性斂。佩之縮二便。固脾保腎。入湯劑能閉精固氣。故房術多用之。不知氣脫必陷之症。可以留魂駐魄也。瀕湖綱目香木類三十五種。質汗返魂。尙搜奇必備。而獨遺此何歟。○藥性考。伽楠味辛。下氣辟惡。風痰閉塞。精鬼蠱着。通竅醒神。邪風追卻。十香返魂丹中。配藥以香。中帶辛辣。紅堅者佳。其次黑軟。至虎斑金絲。皆雜木性下品也。

特迎香

藏奇南香。以錫匣貯蜜蘇合。鑿竅爲隔。則潤。若枯者。用白蓴葉。莖之。瘞土數月。卽復。日中少暴。尤香。忍溺法。物理小識。伽楠糖結未作膏。貼會陰穴。則溺不出。

五雜俎。出弱水西。形如雀卵。色頗淡白。焚之辟邪去穢。鬼魅避之。博物志。載漢武帝焚西使香。宮中病者盡起。徐審得鷹嘴香。焚之。一家獨不疫疾。卽此類歟。辟邪去疫。安魂魄。定驚悸。

氣結

出交趾真臘占城瓊海等處。單斗南云。此乃伽楠香樹中空腹內所結。藉伽楠芬烈之氣。得日月雨露之精。凝結而成。故名氣結。形亦同香塊。而酥潤鬆膩。不甚堅大。約伽楠得其質。此得其魂。亦如天生黃出湯泉。爲硫氣熏結而成者。然頗難得。世不多見。

治噎隔。用一二釐。酒磨服下。嚙卽開。

飛沈香

查浦輯聞。海南人採香。夜宿香林下。望某樹有光。卽以斧斫之。記其處。曉乃伐取。必得美香。又見光從某樹飛交某樹。乃雌雄相感。亦斧痕記取之。得飛沈香。功用更大。

此香能和陰陽二氣。可升可降。外達皮毛。內入骨髓。益血明目。活絡舒筋。

方輿志。生黎居五指山。山在瓊州山中。所產有沈香。青桂香。雞骨香。馬蹄棧香。同是一本。其本頗類椿及檉柳。葉似橘。花白。子若檳榔。大如桑椹。交州人謂之密香。欲取者先斷其積年老根。經歲皮幹朽爛。而木心與枝節不壞者。卽香也。堅黑沈水者爲沈香。細枝堅實不爛者爲青桂。半沈半浮者爲雞骨。形如馬蹄者爲馬蹄。粗者爲棧香。

地蠟香

黃夢珠輪絕句云石火平分地蠟香註云地蠟香出哈密可辟蚤蝨

金雞勒

查慎行人海記西洋有一種樹皮名金雞勒以治瘡一服即愈嘉慶五年予宗人晉齋自粵東歸帶得此物出以相示細枝中空儼如去骨遠志味微辛云能走達營衛大約性熱專捷行氣血也

治瘡 澳番相傳不論何瘡用金雞勒一錢肉桂五分同煎服壯實人金雞勒可用二錢一服即愈
解酒 煎湯下咽即醒亦澳番傳

臭梧桐臭牡丹

生人家牆砌下甚多一名芙蓉根葉深綠色大暑後開花紅而淡似芙蓉外苞內蕊花白五出瓣尖蒂紅霜降後苞紅中有實作紫翠色○百草鏡云一名臭芙蓉其葉圓尖不甚大搓之氣臭葉上有紅筋夏開花外有紅苞成簇色白五瓣結實青圓如豆十一月熟藍色花葉皮俱入藥○周廷園云臭梧桐一年三月十月兩次作花若葉無紅筋搓之不臭者非○學圃餘疏臭梧桐者吳地野產花色淡無植之者淮揚間成大樹花微紅者縉紳家植之中庭或云後庭花也獨閩中此花鮮紅異常能開百日名百日紅花作長鬚亦與吳地不同園林中植之灼灼出矮牆上至生深澗中與清泉白石相映永嘉人

謂之丁香花。

汪連仕采藥書。秋葉俗呼八角梧桐。味臭。又名臭梧桐。取根皮搗汁如膠。爲土阿魏。能寬筋活血。化痞消癥。

羣芳譜。臭梧桐生南海及雷州。近海州郡亦有之。葉大如手。作三花尖。長青不彫。皮若梓。白而堅韌。可作繩。入水不爛。花細白。如丁香而臭。味不甚美。遠觀可也。人家園內多植之。皮堪入藥。采取無時。敏按臭桐與梧桐有家野之別。家生者成樹而高大。野生者本小不成樹。不過三四尺。花色粉紅。亦無大紅純白者二種。俱可入藥。功用亦相近。

治獨脚楊梅瘡。洗鵝掌風。一切瘡疥。煎湯洗汗斑。濕火腿腫。久不愈者。同菴閩子浸酒服。并能治一切風濕。止痔腫。煎酒服。貼臙瘡。搗爛作餅。加桐油貼。神效。

半支風。百草鏡。取葉連根掛於風頭廊下。吹乾。將葉燒灰入瓶內。每早服三錢。酒吞。○又邢虎臣驗方。用臭梧桐葉并梗。曬燥磨末。共二斤。用白蜜一斤爲丸。早滾水下。晚酒下。每服三錢。驗過神效。

治半邊頭痛。用川椒五錢。臭梧桐葉二兩。先將桐葉炒黃。次入椒再炒。以火酒灑在鍋內。拌和取起。捲在綱內。紮在痛處。吃熱酒一盃。取被蓋頸而睡。出汗卽愈。

一切內外痔。○急救方。用臭梧桐葉七片。瓦松七枝。皮消三錢。煎湯熏洗。神效。

花。治風氣頭風。集聽凡頭風用臭梧桐花陰乾燒灰存性爲末每服二錢臨臥酒下三服無不愈。

止痢。必效方用隔年臭梧桐花煎湯服即愈。

葉。消腫脹疝。救生苦海臭梧桐葉一百片煎湯服三四次。

柱心疝。華玉先試效之方臭梧桐葉每歲用一片共歲若干葉若干清水洗葉用無灰白酒煎服。

外痔。黃氏醫抄用臭梧桐葉煎湯洗數次愈。

梧桐酒。經驗廣集治內外一切乳毒用臭梧桐春夏取頭三個秋冬取根搗爛絞汁對陳酒熱服取

汗爲度神效。

豨桐丸。濟世養生集此丸治男婦感受風濕或嗜飲冒風內濕外邪傳於四肢脈絡壅塞不舒以致

兩足軟痿疼痛不能步履或兩手牽絆不能仰舉凡辛勞之人常患此症狀似風癱服此丸立能全愈

用地梧桐俗謂臭梧桐不論花葉梗子曬乾切碎爲末一斤豨蒼草炒磨末八兩二味和勻蜜丸如桐

子大早晚以白滾湯送下四錢忌食豬肝羊血香茹等物或單用臭梧桐二兩煎湯飲以酒過之連服

十劑其痛即瘥或煎湯洗手足亦可。

莖中蟲。治風毒流注。

臭牡丹

葉形與臭梧桐相同。但薄而糙。氣亦臭。五月開花成朵。一蒂百花。色粉紅。

洗痔瘡。治疔。赤水元珠。蒼耳。臭牡丹。各一大握。搗爛。新汲水調服。瀉下黑水即愈。

一切癰疽。淳安陳老醫云。用臭牡丹枝葉搗爛。罨之立消。

脫肛。祕方集驗。先將臭梧桐葉煎湯洗。後將浮萍草末搽上。不脫矣。應昌按。梧桐二字疑牡丹之誤。否則此方宜列入臭梧桐諸方。

之內。惜不得原書正之。

木八角 草八角

木高二三尺。葉如木芙蓉。八角有芒。其葉近蒂處有紅色者佳。秋開白花細簇。取近根皮用。○唐王周

金盤草詩註。金盤草生甯江巫山南陵林木中。其根一年生一節。人採而服。可解毒也。其詩云。今春從

南陵得草名金盤。金盤有仁性。生在林木端。根節歲一節。食之甘而酸。風俗競採掇。俾人防急難。巴中

地虺毒。解之如走丸。巨葉展六出。軟幹分長竿。搖搖綠玉活。裏裏香荷寒。世云酷暑月。鬱有神物看。天

之產於此。意欲生民安。云云。味詩意。則似今之草八角。其性又能解蛇毒也。

苦辛温。有毒。治麻痺風毒。打撲瘀血停積。其氣猛悍。能開通壅塞。痛麻立止。虛人慎用。

草八角

藥鑑。出於潛昌化深山中。葉角仰上。色黃。獨莖一葉。五六月開花。雙朵成對。粉紅色。下垂。根圓而不長。

俗名孩兒撐傘。○百草鏡云。草八角高尺許。根生疙瘩。獨莖一葉。入秋開花。只有兩朵相對。粉紅色。又名紅孩兒。結子紅色。成對。如孩兒也。其根可以消毒。入藥。得草本者良。根治癰毒。餘功同木八角。○葛祖方。性溫。治骨內之風。

按八角金盤有草木二種。木本者。其葉尖角仰起如盤之狀。葉背色黃。故曰金盤。草本者。葉尖角不仰。葉背不黃。微有分別。此藥性熱力猛。有毒。咀之味麻。雖壯實人亦宜少用。服藥後忌魚腥猪羊牛馬等肉。犯之令人癲狂。惟白菜菘。應昌按。菜字疑菘字之訛。否則菜字下當補一菘字。可解。入藥用近根皮。酒煎服。取汗即愈。力弱者發戰作吐。病亦愈。咸孔昭云。木八角之鬚。乃麻黃。未知確否。

鳥不宿

俗名老虎草。又名昏樹。晚娘棒。梗赤。長三四尺。本有刺。開黃花成穗。其根下蟲。治風毒流注神效。○綱目有櫛木名。鵲不踏。與此別。

性熱。追風定痛。有透骨之妙。治風毒流注。風痺。跌打勞怯。合保生丸。治虛勞如神。下胎催生。汪連仕采藥書。鳥不宿又名鳥不踏。又名刺根。白皮。性溫。行血追風。治紫雲風。大麻風。筋骨疼痛。濟世良方。婦人將產時。以鳥不宿莖葉剉碎一大把。加甘草一錢。酒水各半煎。一大鍾服之。易產。且產後無病。其葉如杏葉。而枝梗有刺。鳥不可宿。故名。又名石米刺。

跌撲。百草鏡。烏不宿根皮鮮者一錢。乾者七分。加入藥中。煎服取汗。極妙。
難產。家寶方。烏不停葉一兩。甘草五錢。好酒二盃。煎一盃。或一次二次服。卽產。
敏按救生苦海云。茨梧桐。又名晚娘棒。多生山塢。最高者四尺許。皮色如桑。細者大如大指。老者大如甘蔗。若根曲而皮色紫者。非也。取根去泥。剝其白皮。搗汁。用二鍾。加米醋一鍾。清水半鍾。和勻。口中噙咽。可治雙單蛾。若喉閉。用鵝毛攪之。卽開。噙咽如前。吐出痰涎三四盃。卽能飲食如常。此乃以色紫者爲非晚娘棒。或同名而物異耶。存以備考。

破布葉

廣東通志。從肇慶新橋而上。人烟寥落。山路多歧。乃三縣交界之區。舟人及此險地。卽燃夢香。客皆酣臥昏迷。遂被啓鑰。易貨財以礫塊。封識宛然。若枕間置水一盃。則迷藥皆渙散矣。又有藥名破布葉。可解行者歌曰。身無破布葉。莫上夢香船。按廣志註。夢香船中。以胡蔓草合香焚之。人卽迷悶。解夢香毒能醒迷。

肇慶志。破布葉出陽江陽春恩平。狀如掌而綠。嶺南舟人多用香烟及毒水迷悶過客。以此草煎湯服之。立解。

天成沙

生蘇木中劈破取之。但難得。須囑染坊陸續收存。不拘多少入藥用。
治卒心痛。救生苦海。以天成沙溫酒和服。治心痛神效。

淡竹殼

此乃淡竹嫩時所苞箨解下者是。綱目竹條止載慈竹箨。而淡竹略焉。不知其性能去目翳。功同熊膽。故爲補之。

此君丹治醫。一草亭眼科方。用淡竹殼不拘多寡。以布拭去毛。燒灰存性。每藥一錢。加麝香三五釐。同搗細末。點在醫上。最妙。

桃絲竹二黃

李氏草祕。諸癰瘡疔爛久不愈。用桃絲竹刮取二黃爲末。敷之。○降痰火。煎服。功勝淡竹茹。○治蛇咬天蛇毒。

王安採藥方。治發背不長肉。取桃竹茹作餅貼之。○血崩。取竹青炒末。水調服。

桃竹筍。治六畜瘡癰內蛆。煎湯洗之。卽絕。草○白濁。煎服卽愈。草

桃竹筍殼。治楊梅瘡。煨灰酒調服。王

竹衣

此乃金竹內衣膜。劈竹取鮮者入藥。

治喉啞勞嗽。張景岳古方因陣。治一切勞瘵痰嗽。聲啞不出。難治者。服之神效。用鮮竹衣一錢。竹茹彈子大一丸。卽金竹青皮也。刮取之。竹瀝卽取金竹燒取。麥冬二錢。甘草橘紅各五分。白茯苓桔梗各一錢。杏仁七粒。去皮尖研。水一鍾半。加竹葉十四片。煎七分。入竹瀝一盃。和勻服。

枸橘

今之臭橘。山野甚多。實小殼薄。枝多刺而實臭。人多棄之。綱目枸橘條下。葉刺核樹皮俱收。而其實獨略。葉天士家抄本草。有主治。特錄出補之。入藥陳者佳。○橘錄。枸橘色青氣烈。小者似枳實。大者似枳殼。近時難得枳實。人多植枸橘於籬落間。收其實。剖乾之。以和藥。味與商州之枳。幾逼真矣。療子癰及疝氣。俱取整個枸橘。煨存性。研末。陳酒送服。

解酒毒

蓬厚

胃脘結痛。取枸橘實煨存性。酒服方寸匕。內傷諸痛。以實醋浸熬膏貼。須久貼方不復發。以其力能破氣散熱也。

葉底紅

乃小木也。生山土。長不過一二尺。葉如石楠。四月生蕊。五六朶成簇。垂如脂麻鈴樣。花作青白色。六七

月結小子如天竺子。霜後色紅。儼如天竺子而大。俗呼矮脚樟。以其似樟葉而本短也。山人每掘之入市。售作盆玩。又名葉下紅。○李氏草祕。葉下紅一名平地木。長五六寸。莖圓。葉下生紅子。生山隕等處。治吐血。楊春涯經驗方。葉底紅即矮脚樟。用二兩洗淨。木槌搗爛。猪肺一個洗血淨。將葉入肺管內。河井水各三盃煮爛。至五更去葉。連湯食之。一二次愈。多食絕後患。

陶殿元語予云。某撫軍得宮傳祕方。治吐血勞傷。怯症垂危。久嗽成勞。無不立愈。曾經試驗多人。用平地木葉乾者三錢。猪肺連心一具。水洗淨。用白湯焯過。以瓦片挑開肺管。將葉包裹。麻線縛好。再入水煮熟。先吃肺湯。然後去藥食肺。若嫌味淡。以清醬蘸食。食一肺後。病勢自減。食三肺。無不愈者。但所用乃平地木。與葉下紅有別。或一類相同。其性本通耶。

治偏墜疝氣。李氏草祕。搗汁沖酒服半盃。屢效。

茶樹根

綱茶葉。經霜老茶葉。

綱目。茶子茶油俱載。惟茶根及爛葉經霜老茶葉未收。故補之。

口爛。救生苦海。茶樹根煎湯代茶。不時飲。味最苦。食之立效。

爛茶葉

此乃泡過殘茶。積存磁罐內。如若乾燥。以殘茶汁添入。愈久愈妙。

治無名腫毒犬咬及火燒成瘡俱效如神搗爛似泥敷之乾則以茶汁潤溼抹去再換敷五六次全愈。
救生
苦海

痘毒。家寶方用泡過茶葉曬乾為末五倍子各等分雞子清調敷。

諸毒努肉不退。保和堂祕方硫黃研細末敷上即退再用後收口藥爛茶葉五錢烏梅三個燒灰共為末敷上即收。

經霜老茶葉

治羊癩瘋。家寶方用一兩為末同生明礬五錢為細末水法丸硃砂作衣每服三錢白滾湯送下三服全愈。

好吃茶葉。家寶方即以茶葉入肉汁湯內飯鍋上蒸吃二三次即不喜吃。

雨前茶

產杭之龍井者佳蓮心第一旗鎗次之土人於穀雨前採撮成茗故名三年外陳者入藥新者有火氣清咽喉明目補元氣益心神通七竅性寒而不烈以其味甘益土消而不峻以其得先春之氣消宿食下氣去噫氣清六經火。

下疳。外科全書雨前茶麻黃各一錢五分用連四紙方七寸許用鉛粉錢半擦紙上鋪前二藥捲成

筒子。火灼存性。研細。加冰片各一分。研勻用之。

偏正頭風。醫方集聽。升麻六錢。生地五錢。雨前茶四錢。黃芩一錢。黃連一錢。水煎服。○又治頭風。百發百中。赤白首烏各一兩。真川芎一兩。藁本二錢。細辛一錢。蘇葉一錢。此散邪方也。風寒甚者。可加川芎活川烏服。以此散邪。不愈。便進後方。真雨前茶四錢。赤白首烏各二錢。北細辛四分。米仁一錢五分。炒牛膝八分。大川芎一錢五分。甘草五分。煎藥時。令病者以鼻引藥氣。服後宜密室避風。至重者。四帖全愈。加金銀花二錢更效。若生過楊梅瘡者。加土茯苓四兩。煎湯煎藥。肚脹。集聽。凡人肚脹。不思飲食。用五虎湯治之。核桃。川芎。紫蘇。雨前茶。以上藥先煎好。好時。加老薑砂糖在湯內。卽服。

三陰瘡。集聽。真雨前茶三錢。胡桃肉五錢。敲碎。川芎五分。寒多加胡椒三分。未發前入茶壺內。以滾水沖泡。乘熱頻頻服之。吃到臨發時。不可住。

不論新久諸瘡。慈航活人書。白芥子一兩。炒爲末。雨前茶和服一撮。瘡久者。不過二次卽愈。遠年痢。鳳聯堂驗方。臭椿皮一兩五錢。雨前茶錢半。扁柏葉二錢五分。烏梅棗頭各二枚。酒水各一盞。煎好。緩緩服。恐泛。

五色痢。慈惠編。陳年年糕。陳雨前茶。冰糖。茉莉花。共煎湯一盞。服之立愈。

消痰止咳膏。米白糖一斤。猪板油四兩。雨前茶二兩。水四盃。先將茶葉煎至二盃半。再將板油去膜切碎。連苦茶米糖同下。熬化聽用。白滾湯沖數匙服之。

治痞。蜈蚣一條。用頂好細茶葉煎服。以身癢爲度。醫學指南。又家寶方。治痞。陳年雨前茶一兩。枳殼三錢。水煎。渣再煎。次日服。

傷寒無汗。彙集。用白糖雨前茶。入水熬數沸。服下。汗出卽愈。加生薑。又治紅白痢疾。

療猪癩羊兒瘋。陳氏筆記。用晉礬一斤。雨前茶一斤。爲末。茶汁米飲爲丸。每服四十九丸。發日前用二服。茶送下。

風痰痢病。○生白礬一兩。細茶五錢。爲末。蜜丸。桐子大一歲十九。茶湯下。大人五十九。久服。痰自大便中出。斷病根。指南

風眼爛皮。眼科要覽。甘石童便淬七次。黃連汁淬七次。雨前茶淬七次。出火氣。入冰麝研勻點。

頭風滿頂作痛。家寶方。川芎七錢。明天麻三錢。雨前茶一錢。酒一盃。煎六分。渣再用酒一盃。煎四五分。晚服。過夜卽愈。

楊梅瘡。雄黃四兩。雨前茶四兩。生芝麻四兩。共爲細末。黃米磨細。粉糊爲丸。桐子大。每早白湯下三

錢。家寶

上清丸。蘇薄荷二兩。雨前茶白礪砂各七錢。烏梅肉貝母訶子各三錢。冰片三分。煉蜜爲丸。

風寒無汗。發熱頭痛者。用核桃肉葱白雨前茶生薑等分。水一鍾。煎七分。熱服。覆衣取汗。

氣虛頭痛。不藥良方。用上春茶末調成膏。置瓦盞內覆轉。以巴豆四十粒。作二次燒烟薰之。曬乾播

細。每服一字。別入好茶末。食後絞白湯服之。立愈。

肩背筋骨痛。醫學指南。槐子核桃肉細茶葉脂麻各五錢。入磁罐內。二盃熬一半。熱服。神效。

五虎湯。治外邪在表無汗而喘者。麻黃三錢。杏仁去皮尖三錢。石膏五錢。甘草一錢。細茶一撮。有痰

加二陳湯。生薑葱水煎熱服。加桑白皮一錢。尤效。醫學指南

千盃不醉。乾葛橄欖細茶等分。爲末。逢半酣時。以茶服下。

普洱茶

出雲南普洱府。成團。有大中小三等。雲南志。普洱茶在車里軍民宜慰司北。其上產茶。性溫味香。名

普洱茶。○南詔備考。普洱茶出茶。產攸樂革登倚邦莽枝蠻耑慢撒六茶山。而以倚邦蠻耑者味較勝。

味苦性烈。解油膩牛羊毒。虛人禁用。苦瀼。逐痰下氣。刮腸通泄。

按普洱茶大者。一團五斤。如人頭式。名人頭茶。每年入貢。民間不易得也。有僞作者。名川茶。乃川省與

滇南交界處。土人所造。其餅不堅。色亦黃。不如普洱茶清香獨絕也。普洱茶膏黑如漆。醒酒第一。綠色者

更佳。消食化痰。清胃生津。功力尤大也。物理小識。普雨茶蒸之成團。狗西番市之。最能化物。與六安同。
按。普雨即普洱也。

普洱茶膏能治百病。如肚脹受寒。用薑湯發散。出汗即愈。口破喉癩。受熱疼痛。用五分噙口。過夜即愈。受暑擦破皮血者。研敷立愈。

悶痞。百草鏡云。此症有三。一風閉。二食閉。三火閉。惟風閉最險。凡不拘何閉。用茄梗伏月採。風乾。房中焚之。內用普洱茶二錢煎服。少頃盡出。費容齋子患此。已黑黯不治。得此方試效。

研茶

粵志。東莞人以脂麻諸油。雜茶葉煮煎而成。

去風溼。解除食積療飢。

龍脊茶

出廣西。亦造成磚。

除瘴解毒。治赤白痢。

安化茶

出湖南。粗梗大葉。須以水煎。或滾湯沖入壺內。再以火溫之。始出味。其色濃黑。味苦中帶甘。食之清神。

和胃

性溫，味苦微甘。下膈氣，消滯，去寒癖。

湘潭縣志：茶譜有潭州鐵色茶，卽安化縣茶也。今京師皆稱湘潭茶。

雪茶

出滇南，色白，久則色微黃。以盞烹滄，清香迥勝。形似蓮心，但作玉芽色耳。○平萊仲云：雪茶出麗江府屬山中，雪地所產，色白味甘，性大溫，祛寒疾如神。

甘苦性溫，治胃氣積痛，療痢如神。

敏按：雪茶出雲南永善縣，其地山高積雪，入夏不消，雪中生此，本非茶類，乃天生一種草芽，土人采得炒焙，以其似茶，故名。其色白，故曰雪茶。己亥臘過餘杭，往訪劉挹清少府，啜雪茶，云帶自雲南，茶片皆作筒子，如蜜筒菊蕊瓣樣，詢所主治，因言此茶大能煖胃，凡嚴寒冰凍時，啜一盞，滿腹如火，若患癆損及失血過多之人，腹胃必寒，最忌食茶，惟此茶不忌，乃相與烹滄食之，果入腹溫煖，味亦苦冽香美，較他茶更厚。

大觀茶論：白茶自爲一種，與常茶不同，其條敷闌，其葉瑩薄，崖林之間，偶然生出，非人力所可致。有者不過四五家，生者不過一二株，所造止於二三鎊而已。芽英不多，尤難蒸焙，湯火一失，則已變而爲常

品須製造精微。運度得宜。則表裏昭澈。如玉之在璞。它無與倫也。○東溪試茶錄。白葉茶。民間大重。出於近歲。園焙時有之地。不以山川遠近。發不以社之先。芽葉如紙。民間以爲茶瑞。

武彝茶

出福建崇安。其茶色黑而味酸。最消食下氣。醒脾解酒。○單杜可云。諸茶皆性寒。胃弱者食之多停飲。惟武彝茶性溫。不傷胃。凡茶癖停飲者宜之。

治休息痢。救生苦海。烏梅肉。武彝茶。乾薑。爲丸服。

松蘿茶

產徽州。本經逢原云。徽州松蘿。專於化食。○秋燈叢話。北賈某。貿易江南。善食猪首。兼數人之量。有精於岐黃者見之。問其僕曰。每餐如是。已十有餘年矣。醫者曰。病將作。凡藥不能治也。俟其歸。尾之北上。將以爲奇貨。久之無恙。復細詢前僕曰。主人食後。必滿飲松蘿數甌。醫爽然曰。此毒惟松蘿可解。悵然而返。

姚希周經驗方云。凡患眼服羊肝者。忌服松蘿茶。以沙苑蒺藜煎湯代茶。

消積滯油膩。清火下氣除痰。

病後大便不通。吳興錢守和慈惠小編。用松蘿茶葉三錢。米白糖半鍾。先煎滾。入水盃半。同茶葉煎至

一盃服之卽通神效。

治頑瘡不收口。或觸穢不收口。梁氏集驗。上好松蘿茶一撮。先水漱口。將茶葉嚼爛。敷瘡上一夜。次

日揭下。再用好人參細末。拌油胭脂塗在瘡上。二三日卽愈。

羊兒瘋。集效方。好松蘿茶末八兩。生礬末四兩。米粥搗爲丸。臨發日清晨及常日。各服三錢。米湯下。

水臄氣臄。彙集。服此藥。忌鹽醬。一服立消。活魚一尾。重七八兩。去鱗甲。將肚剖開。去腸淨。入好黑

礬五分。松蘿茶三錢。男子用蒜八片。女七片。共入魚腹內。放在磁器中。蒸熟。令病人吃魚。連茶蒜皆食。

更妙。從魚頭吃起。就從頭上消起。如從魚尾吃起。卽從脚上消起。立效。

繡毬風。活人書。五倍子炒。松蘿茶各五錢。研末。茶和敷。

黃病。劉羽儀驗方。生脂麻八合。好松蘿五合。砂仁二合。以上三味。先將脂麻研細。再另將茶葉烘脆。

研。再將砂仁研。各爲細末。和勻。每日常服。如年久病深者。服到黃退乃止。如因好食茶葉者。成黃。此方

不可用。

一切頭風兼熱者。王站柱不藥良方。萹荻爲細末。用猪膽汁拌過。嗜鼻中。作嚏立愈。如兼溼者。以瓜

蒂松蘿茶爲末。嗜鼻中。出黃水立愈。

治五癭。醫學指南。破結散。用海蛤通草昆布海藻洗膽草枯礬松蘿茶各三分。半夏貝母各二分。麥

麵四分爲末。酒調服。日三次。忌鯽魚猪肉。

治痢疾神方。核桃五個。帶殼敲碎。松蘿茶生薑糖各三錢。用水三盞煎。如紅痢用紅糖。如白痢用白糖。如紅白相兼。用紅白糖各一錢五分。煎服。重者連渣服。

五臟驗方。松蘿茶研末。雞毛管炒研各等分。每服二錢。白湯下。二十服全愈。忌鹽百日。

半身不遂。祕方集驗。白糖槐豆子化皮紅谷子松蘿茶各五錢。水三鍾。煎一鍾服。出汗卽愈。十日後。

方可出門。

小兒牙疳。同壽錄。松蘿茶花椒去目。烏龍尾。食鹽各一錢。童便一鍾。水一鍾。煎湯漱口。口內含之。不

可嚙下。

白濁。古今良方。車前草五六科。陳松蘿茶一二錢。燈心一二十根。三味煎服。止後。宜服水陸二仙丸以固之。

除瘟救苦丹。專治一切瘟疫時症。傷寒感冒。不論已傳未傳。百發百中。有力者宜脩合以濟人。陰德最大。李炳文經驗廣集。天麻麻黃松蘿茶綠豆粉各一兩二錢。雄黃硃砂甘草各八錢。生大黃二兩。共爲細末。煉蜜爲丸。彈子大。收磁器內。勿令洩氣。遇症。大人每服一九。小兒半丸。涼水調服。出汗卽愈。重者連進二服。未汗之時。切不可飲熱湯食熱物。汗出之後。不忌。

治爛眼皮方。種福堂方。用挂金燈淨殼。每殼一個。摻入研細透明綠膽礬二釐。或用殼十個或二十個。裝套好。外用淨黃泥包裹好。勿洩氣。炭火煨至中間殼將成黑灰。存性。放地上。用盃蓋熄火。將中間灰研細包好。放土地上一夜。出火毒。每用灰少許。放在茶杯內。以冷松蘿茶浸之。用薄棉紙蓋在茶面上。俟茶滲出紙面上。將此水洗眼皮。每日五六次。二三日即愈。

烏鬚方。吉雲旅抄。王守副家傳。烏鬚藥甚驗。用五倍子二錢。阜礬四分八釐。青鹽六分。紫銅末一分。五釐。榆香末六分。松蘿茶三錢。共爲末。蒸透用。

六安茶

張處士逢原云。此茶能清骨髓中浮熱。陳久者良。○年希堯經驗方。有異傳。終身不出天花法。用金銀花揀淨七兩。六安茶真正多年陳者三兩。共爲粗末。沖湯代茶。每日飲數次。終身不出天花。雖出亦稀。極驗。○千銀不易方。稀痘丹。用新拋羊屎一粒。六安茶一錢。甘草節二分。燈心二十七寸。赤黑綠豆各二十一粒。珍珠一分。銀簪一枝。洗淨油氣。水二盃。煎八分。溫服。

太上五神茶。經驗廣集。治傷風咳嗽。發熱頭痛。傷食吐瀉。陳細六安茶一斤。山查蒸熟。麥芽紫蘇陳皮厚朴乾薑俱炒各四兩。磨末。磁器收貯高燥處。大人每服三錢。小兒一錢。感冒風寒。葱薑湯下。內傷薑湯下。水瀉痢疾。加薑水煎。露一宿。次早空心溫服。

消疽膏 廣集治一切疽仙方。松香官粉細六安茶各三錢。蓖麻仁去皮四十九粒。爲末。先將蓖麻搗爛。然後入藥末搗成膏。如乾少加麻油搗勻。攤青布上。貼患處。再以棉紙大些蓋好。紮住。七日全愈。
普陀茶

定海縣志。定海之茶多山谷野產。又不善制。故香味不及園茶之美。五月時重抽者。曰二烏。苦溼不堪。產普陀山者。入藥不可多得。

治血痢肺癰。

江西峽片峽

宦遊筆記。出贛州府寧都縣。製法與江南之峽片異。茶疏。峽茶不炒。飯蒸熟。然後烘焙。此指江南者言耳。出江西者。大葉多梗。但生曬不經火氣。槍葉舒暢。生鮮可愛。其性最消導。貯飯一甌。以茶泡之。經半日。飯不加漲。而消少許。故飽食者宜飲此茶。別有一種極細炒峽。乃採之他山。炒焙以欺好奇者。反非其真。然則茶亦不可以貌取也。花鏡。峽片產吳興。似茶而實非茶種。味苦。性刻利。消宿食。降火利痰。虛人禁用。以其能峻伐生氣。

羅峽

茶疏。長興羅峽。疑卽古人顧渚紫筍也。介於山中。謂之峽。羅氏隱焉。故名羅。西吳枝乘。湖人於茗不數

顧渚而數羅峴。顧渚之佳者。其風味已遜龍井。峴稍清雋。然葉粗而作草氣。嘉靖長興志。羅峴在互通山。西土地廟後。產茶最佳。吳人珍重之。凡茶以初生兩前者佳。惟羅峴立夏開園。梗粗葉厚。微有蕭。著之氣。還是夏前六七日。如雀舌者。最不易得。然廟後山西向。故稱佳。總不如洞山南向。獨受陽氣。專稱仙品。只數十畝而已。凡茶產平地。多受土氣。故其質濁。羅茗產高山巖石。純是風露清虛之氣。故可尚。○長物志云。浙之長興者佳。價亦甚高。今所最重。荆溪稍下。採茶不必太細。細則芽初萌而味欠足。不必太青。青則茶已老而味欠嫩。惟成帶葉綠色而團厚者爲上。不宜以日曬。炭火焙過。扇冷。以箬葉襯罌貯高處。蓋茶最喜溫燥。而忌冷溼也。

味甘。氣香。性平。滌痰清肺。除煩消臃脹。
治咳嗽祕方。醫學指南。用川貝母茶葉各一錢。米糖三錢。共爲末。滾湯下。

水沙連茶

產臺灣。在深山中。衆木蔽虧。霧露濛密。晨曦晚照。總不能及。色綠如松蘿。每年通事於各番。議明入山焙製。

性極寒。療熱症最效。能發痘。

紅毛茶

臺灣志草屬也。黃花五瓣。根如瓜子。亦五瓣。根如藤。創取曬。或遇時氣不快。熬茶飲之。卽愈。治時氣腹脹。或悶鬱不舒。

角刺茶

出徽州。土人二三月採茶時。兼採十大功勞葉。俗名老鼠刺。葉曰苦丁。和勻同炒焙成茶。貨與尼菴。轉售富家婦女。云婦人服之。終身不孕。爲斷產第一妙藥也。每斤銀八錢。

味甘苦極香。兼能逐風活血。絕孕如神。

藥茶

范石湖集。脩江出藥茶。蓋石楠樹葉也。毛文錫茶譜云。湘人四月採楊桐汁作飯。則必採石楠芽作茶。乃能去風。

治頭風。

雲芝茶

宦遊筆記。山東蒙山在蒙陰縣城南三十里。高二十里許。周圍約三百餘里。產茶曰雲芝茶。土人售於市曰蒙山茶。然絕非茶類。乃山石中所生石衣。如苔蘚之屬。土人掬而沃之。冒登茗薺。○五雜俎。蒙山在蜀雅州。其中峯頂尤極險穢。蛇虺虎狼所居。得採其茶。可蠲百疾。今山東人以蒙陰山下石衣爲茶。

當之非矣。然蒙陰茶性冷。可治胃熱之病。性寒。能消積滯。綱目有石蕊。云性溫。不言消積滯。

紅花茶

出粵西。似紅花嫩苗為之。土人製以贈客。宋鄒道鄉有詩。

消膈滯宿食。辟烟嵐瘴氣。

烏藥茶

出東莞。以脂麻。薷油。雜茶為汁煎之。

去風溼。破食積。療飢。陳昌按。烏藥茶與前研茶製。遺主治皆同。未知是一是二。

瀘茶

四川通志。瀘州出。通呼為瀘茶。

味辛性熱。飲之可以療風。

瘧茶

閩志。出福寧府。

治瘧。

樂山茶

茶譜。鄂州樂山出茶。黑色如韭。○又云。出鄂州東山。名東山茶。色黑如韭。性與韭相反。食之已頭痛。

拾遺卷七

藤部

雞血藤膠

產猛緬。去雲南昆明計程一月有餘。乃藤汁也。土人取其汁。如割漆然。瀘之殷紅。似雞血。作膠最良。近日雲南省亦產。其藤長巨。蔓地上。或山崖。一莖長數十里。土人得之。以刀斫斷。則汁出如血。每得一莖。可得汁數升。彼處有店市之。價亦不貴。乾者極似山羊血。取藥少許。投入滾湯中。有一線如雞血走散者。真。○雲南志。順寧府出雞血藤。熬膏可治血症。○滇遊雜記。雲南順寧府阿度里地方。有一山。縣巨數十里。產藤甚異。粗類棹梁。細似蘆葦。中空如竹。剖斷流汁。色赤若血。故土人名之為雞血藤。每歲端陽日。攜帶釜飯入山。斫取熬煉成膏。泡酒飲之。大補氣血。與老人婦女更為得益。或不飲酒者。早晚用開水化服。亦能奏效。○按順寧刊售藥單云。順寧府順寧縣阿度香山產此。又云。阿度吾里萬名山寺而生。伐之中。通細數汁。凝如脂。煮之有香者。真。或云。兩種。糯者為雌。放者為雄。應昌附注。

壯筋骨。已酸痛。和酒服。於老人最宜。○治老人氣血虛弱。手足麻木癱瘓等症。○男子虛損不能生育。及遺精白濁。○男婦胃寒痛。○婦女經水不調。赤白帶下。○婦女乾血勞。及子宮虛冷不受胎。○陸象咸云。曾見婦人合藥服之。多年不育者。後皆有子。○滇志。雞血藤膠治風痛溼痹。性活血舒筋。患在上部。飽食後服。在下部。空心酒服。不飲酒者。滾水調服。其色帶微綠。有清香氣。酒服亦能興陽。尤明府佩云。此膠治跌打如神。其太夫人一日偶閃跌傷臂。痛不可忍。用山羊血參三七治之。多不驗。有客教服此膠。沖酒一服。其疾如失。其性捷走血分可知。

順寧土人加藥料煎熬雞血膏。其煎膏之時。忌有孕婦看見。決熬不成。亦神物也。統治百病。能生血和血。補血破血。又能通七孔。走五臟。宣筋絡。治婦人經水不調。四物湯加減。八珍湯加元胡索爲引。婦女勞傷氣血。筋骨酸痛轉筋。牛膝杜仲沈香桂枝佛手乾木瓜穿山甲五加皮砂仁茴香爲引。大腸下血。椿根皮煎湯送下。男子虛弱。八味加減爲引。服此膠忌食酸冷。

吾杭龔太守官滇。帶有雞血藤回里。予親見之。其藤皮細潔。作淡黃色。切開中心起六角棱。如菊花樣。色紅。四圍仍白色。乾之。其紅處輒突出二三分許。竟成紅菊花一朵。亦奇物也。聞其藤最活血。暖腰膝。已風痠。戊申。長兒景炎在四川敘州府。與滇之昭通接界。因囑其往覓此藤。所寄來者。外形不殊。而中心惟作小紅點。乾之亦不突起。據來書云。實金沙江土司山所得。然與龔太守所帶來者絕不相類。

豈此藤亦有二種耶。附記於此。以俟考。○辛亥予在臨安。患臂痛。胡春熙明府長君名什曾。宦滇南歸里。蒙贈雞血藤膠。皆方塊。每塊一二兩不等。外塗以屨灰作白色。剖視其內。皆黑色如膏藥膠狀。云風癱痺痛有效。其外灰見水即脫去。據言其藤產騰越州銅壁關外新街所屬地。遍山谷皆是。新街守弁每歲輒命卡兵斫取熬膏。除餽遺各上司及僚友外。餘剩者轉市客商。販入中土。藉沾微利。以爲守資。渠所有即售自彼處也。外必以屨灰飾之。庶久藏不壞。因帶歸以示兒子景炎。則又全非其所見。景炎曾館昭通大關司馬白公家。見其所藏雞血藤膠。猩紅成塊。儼如赤玉。光潤可愛。今胡公所贈。內作黑色。或係年久色黯。抑係新街所產與大關有別。惜不能親歷其地。爲之細核。附筆於此。以俟後之君子考訂焉。

七金藤

性溫無毒。治中風痰迷。半身不遂。左癱右瘓。不省人事。痰涎上壅。攻心作咽。用一錢。白湯磨下。○小兒急慢驚風。大者五分。小者一二分。白湯磨下。立效如神。

鹿角藤

一名白毛刺。汪連仕方云。木本藤也。刺長傷人皮肉。立腫疼不休。又名不薪木。山人不斫。性大熱。氣臭。打痞積。治風氣如神。皆用根搗。共香糟卷之。

葉 蒸酒服能鑽筋透骨。

子 食之大能醉人。

買麻藤

職方典出肇慶綠樹而生有子味苦可食山行斷取其汁飲之可以止渴。○粵志買麻藤其莖多水渴者斷而飲之滿腹已餘水尚淋漓半日性柔易治以製履堅韌如麻故名言買藤得麻也。

治蛇咬 鮮者乾者俱效。

紅木香 紅皮藤

一名廣福藤又名紫金皮立夏後生苗枝莖蔓延葉類桂略尖而軟葉蒂紅色咀之微香有滑涎根入土入藥用須以水洗淨去外粗皮取內皮色紅者用之入口氣味辛香而涼沁如龍腦治風氣痛傷力跌撲損傷胃氣疼痛食積痧脹等症俱酒煎服紫金錠中必不可少。

雷頭風腫痛貼痛法紫金皮獨活赤芍白芷菖蒲葱頭煎濃如膏調敷藥到立止如神。

汪連仕云金谷香今人呼緊骨香即紅木香一名木臘正名紫金皮土產者功淺入膏用行血散氣。

紅皮藤

朱煥齋任城日鈔錢塘門外道姑橋下有紅皮藤凡患半肢風及大癩風者取藤四兩浸無灰酒一大

壺入鍋內隔湯煮三炷香。取起飲酒。量好者以醉爲度。每酒一盃。入藥酒三四匙。陸續飲至藥酒完。則風氣自愈。其風從指甲縫中出。對指尖以竹紙鋪几上驗之。紙能吹動。卽是指尖風出也。

雷公藤

生陰山脚下。立夏時發苗。獨莖蔓生。莖穿葉心。莖上又發葉。葉下圓上尖。如犁耙。又類三角風。枝梗有刺。○物理小識。犁頭刺藤。其葉三角如犁頭。多在籬邊生。可治瘰癧。亦可截瘡。一名霹靂木。方勝板。倒金鉤。烙鐵草。倒掛紫金鉤。河白草。犁尖草。括把草。龍仙草。魚尾花。三木棉。出江西者力大。土人採之。毒魚。凡蚌螺之屬亦死。其性最烈。以其草烟熏蠶子。則不生。養蠶家忌之。山人採熏壁蝨。

治臟脹水腫痞積。黃白疽。瘡疾久不愈。魚口便毒。癩痺跌打。除壁蝨。莖燒牀下。一切毒蛇傷。萬病回春。云。凡被蛇傷。用板扛歸。不拘多少。此草四五月生。至九月見霜卽罕有。葉尖青如犁頭尖樣。藤有小刺。子圓如珠。生青熟黑。味酸。用葉搗汁酒調。隨量服之。渣罨傷處。立愈。

白火丹。救生苦海。用雷公藤五錢。平地木三錢。車前四錢。天青地白葉三白草各三錢。煎服。○又洗方。雷公藤河白草煎浴。

水腫脹。救生苦海。平地木三錢。雷公藤五錢。車前草四錢。天青地白草三錢。路路通五個。打碎煎服。重者十服愈。

坐板瘡。秋泉家秘。烏賊骨五錢。雷公藤三錢。共爲細末。擦之。乾則以菜油調敷。
汪連仕方。蒸龍草卽震龍根。山人呼爲雷公藤。蒸酒服。治風氣。合巴山虎爲龍虎丹。入水藥魚。人多服
卽昏。

治翻胃噎膈。瘧疾。吐血便血。喉痹。食積心疼。虛飽腹脹。陰囊腫大。跌打閃肭。發背疔瘡。乳癰。產後遍身

浮腫。王安采
藥方。

藤黃

綱目主治條下。祇言點蛀牙自落。無他治也。張石頑云。藤黃性毒而能攻毒。故治牙蟲蛀齒。點之卽落。
毒能損骨傷腎。可知。葉氏得宜本草云。服藤黃藥忌喫烟。按三黃寶蠟丸。黎峒丸。俱用藤黃。以其善解
毒也。有中藤黃毒者。食海蜇卽解。○百草鏡。藤黃出外洋及粵中。乃藤脂也。以形似筆管者良。大塊者
名牛屎藤黃。不佳。入藥取色嫩純明者。用水蒸化。濾去渣。盛瓷器內。隔水煮之。水少時再添煮乾。以三
炷香爲度。以帛紮瓷器口埋土中。七日取出。如此七次。曬乾用。○粵志。廣中產黃藤。熬汁。卽藤黃也。性
最寒。以青魚膽和之。治眼疾。間有白者。葉如土茯苓。身小而長。外有籜包。以莖浸水洗目。並無腫痛。
性酸澀。有毒。治癰疽。止血化毒。斂金瘡。亦能殺蟲。治刀斧木石傷。及湯火傷。竹木刺入肉。一切諸傷。
神效膏。用真麻油一觔。藤黃八兩。白蠟八兩。先將油入銅鍋。次將藤黃搥碎熬透。以麻布濾去渣。加

入白蠟。至滴水成珠爲度。貯瓷罐。其膏夏老冬嫩爲宜。敷之即能止疼止血。收口取效如神。○金不換。

治跌打刀傷。

〔蘇州周慎庵傳〕藤黃一兩。研細末。麻油四兩。白蠟五錢。黃蠟一兩。將二蠟入麻油

內。銅杓熬化。取起。放地上。一人徐徐下藤黃末。一人不住手攪勻。以盡爲度。即成膏。敷於患處。用油紙攤貼。綢帕縛好。一二日即愈。

治一切無名腫毒。風氣膏。

王站柱不藥良方。藤黃四兩。白蠟八兩。小磨麻油十二兩。先將油煎熟。將

成珠。入水不散。再加黃白攪勻。瓷瓶收。面上仍以麻油養之。臨用攤貼。○祝氏效方。一筆消。用大黃

二兩。藤黃一兩。明礬蟾酥各五錢。麝香乳香沒藥各二錢。用蝸牛搗爛作錠。遇小癰毒未出癩頭。以此

醋磨新筆蘸藥圈外。愈圈愈小。圈毒消盡而止。○又一筆消方。治一切癰腫。雄黃膽礬砂藤黃銅

綠皮消草烏各一兩。麝香二錢。爲細末。和蟾酥爲條。如筆管大。金箔爲衣。用時以醋磨濃。新筆蘸藥。塗

毒四圍。數次即愈。○消毒散。治癰疽癰毒。及初生多骨疽。良方彙選。大黃一兩。芙蓉葉曬乾爲末。

五倍子各一兩。麝香冰片各三分。藤黃三錢。生礬三錢。共爲末。米醋調成如厚糊。塗於多骨疽之四週。

中留一頭如豆大。以醋用鵝翎不時掃之。若不掃。任圍則無益。一日夜即內消。其餘癰疽。亦以此敷之。

神效。又方。雄黃二兩。麝香三錢。藤黃一兩。人中白五錢。硃砂白芨生白蘇各二錢。蟾酥一兩。共研末。

用廣膠三錢。烱化。和藥末爲錠。遇毒。將此藥磨醋水塗之。○消毒方。治一切無名腫毒。及對口發背。

救生苦海。用滴花燒酒磨藤黃敷。不住手敷之。不至半日即消。○無回丹。治一切疔癰腦疽。衆妙方。用鱸藤黃雄黃大黃各一兩。蟾酥麝香各二錢。血竭甲片炒各五錢。醋磨塗。立效。○移毒方。救生苦海云。如毒生在肢節穴道險要處。不成漏症。即爲廢人。須用此藥。只塗半圈。即移過一邊。用白芨白蘇三七五倍子大阜角山茨菰藤黃各等分。俱剉薄片。除藤黃餘皆入砂鍋內水浸一日。煎汁傾出。入水再煎。如此數次。濾淨熬膏。以藤黃將水蒸烱加入。攪勻再熬。入盃曬乾。用時以雞蛋清磨出濃汁。新筆蘸塗。又方。藤黃銀硃等分。醋和敷。趕毒至他處出膿。如用穀樹汁調。可搽癬。一二次即消。○大提藥方。圍毒初起。凡對口發背惡疽。四五日即消。良方彙選。雄黃藤黃麝香各一錢。硃砂三分。蓖麻肉三錢。紅昇丹一錢五分。先將蓖麻研如泥。後和各藥研爛。用象牙匣封藏。外以虎皮包之。方不泄氣。種福堂提藥方。治諸毒不起。敷之立起。藤黃雄黃各三錢。蟾酥紅藥各二錢。冰片麝香各一錢。蓖麻肉一兩。先將蓖麻肉去皮。打如魚凍水。入諸藥打成膏。瓷罐收貯。勿令洩氣。或云。宜紅藥三錢。冰片蟾酥勿用。止加麝香三分。辰砂一錢。又黃提藥方。鬱金雄黃藤黃各二錢。牛黃蟾酥硃砂冰麝各五分。巴豆肉八錢。蓖麻肉一兩。共搗爛瓷瓶貯。遇症放膏藥上少許貼之。治一切惡毒。未成可消。已成用之化腐。疔毒更妙。諸毒圍藥。祝氏效方。南星炒四兩。五倍子炒黑。白芨炒各二兩。藤黃薑黃炒各一兩。共爲細末。醋調塗。重者加牛黃一錢。鹿茸五錢。又種福堂方。無膿即消。有膿即潰。五倍子一兩。白芷

六錢。藤黃百草霜各三錢。生半夏生南星白芨陳小粉飛麵各四錢。共爲末。紅醋調敷。○箍毒。活人書。五倍子略焙一兩。藤黃四兩。銅青少許。小粉炒八兩。作錠。用時醋磨塗。○一切無名腫毒。藤黃五錢。五倍子二兩。白蜜葱頭各一兩。用米醋調團患處。留頂勿敷。○五色蟾酥墨。能立消腫毒。雄黃銀硃膽礬韶粉藤黃銅綠礪砂各一兩。麝香一錢。共爲末。蟾酥爲條。如筆管大。水磨塗。

疥瘡。吳興楊氏便易良方。銀硃。蜒蚰。白甘菊。人中白。芋根。內白心。雄黃。藤黃。大黃。共搗敷上。卽退。

坐板瘡。仙遺拾珠。藤黃搗碎。用雄豬網油。青布一長條。將藤黃摻在網油之上。青布捲成條子。線紮緊。浸菜油內一夜。火燃取滴下油。杯積埋土中。一夜出火毒。塗瘡卽效。

五黃散。治一切頑癬。雞脚大黃。硫黃。雄黃。薑黃。藤黃。各等分。爲細末。菜油調塗患處。七日勿洗浴。全愈。

金氏離洞膏。治膿瘡如神。萬應油五兩。藤黃一兩五錢。淨黃蠟二兩。共熬黑棧色。攤貼。熬萬應油法。香油六十兩。以十六兩官秤作準。淨桃枝一兩。柳枝一兩。槐枝一兩。桑枝一兩。葱一兩。男髮四兩。花椒五錢。蓖麻二兩。馬前四兩。萹茺五錢。桂枝一兩。白芷二兩。夏浸三日。冬七日。春秋五日。然後熬至渣枯。去渣。每觔生油。熬熟汁得八折。此油凡一切膏藥。可作地子。

金鎖銀開

百草鏡云。俗名鐵邊箕。處處山野有之。葉似天薑多葉。又似土茯苓葉。但差狹小耳。藤生。或緣石砌樹上竹林內亦有之。非海金沙也。其根黑色。兩旁有細刺如邊箕樣。故名。入藥用根。敏按。今俗所用治一切喉症。金鎖銀開。乃天蕎麥之根。形如纍丸。黏結成塊。產山上者。皮黃。汙泥中者。皮黑。與百草鏡所言各別。或名同而物異耶。○李氏草祕。天蕎麥亦名金鎖銀開。形若蕎麥。治乳癰風毒。入諸散毒藥內。取根二分。生薑一分。水煎服。愈。治敗血久病不痊。又洗痔血。皆佳。○李氏草祕又云。小青草藤上蔓。有倒摘刺。細如稻芒。開粉紅花。生藍子。葉似蕎麥。又名野蕎麥。煎洗痔漏之聖藥。治白濁用根。搗汁沖酒服。

喉中風火。○孫玉庭云。其根專治喉閉。故得此名。喉風喉毒。用醋磨漱喉。涎痰去而喉閉自開矣。

痰核癰癧。不拘何等癰疔結核初起者。梁湖陳府祕方。用金鎖銀開須鮮者。將來搗汁沖酒服。其莖葉用白水煮爛。和米粉作餅餌食之。不過二三服立消。若破爛者。以梁上烏龍尾揉去粗屑。納瘡中外。貼膏藥。亦服根汁。喫餅餌五六次。自結痂而愈。

洗痔漏。治蛇傷木蛇毒。搗汁和酒服。草

汪連仕采藥書。金鬚斜。俗呼金鎖銀開。其苗柔而堅性不斷。今名象毛。力能軟堅化痞。合米醋搗汁。置口能開鎖纏喉風。雖枯根亦可透鎖喉。

乳藤

粵志。乳藤蔓如懸鉤倒挂。葉尖而長。斷之有白汁如乳。婦人產後以藤搗汁和米作粥食之。乳瀝自通。○初生嫩條可食。其大實曰冬榮子。大如柚子。中有瓢。瓣瓣相疊。白如猪脂。炙食皆甘美。身懷數日。香不減。秋末冬初開。采以相餉。矜為服食之珍。行血通乳。志○李氏草祕。乳汁藤。生山麓林中。高二三尺。葉似蒲萄子。藍色一叢。根皮掐之出汁如乳。為諸乳毒癰瘡中之聖藥。

排膿散毒。生肌止痛。消腫益血。痛不可忍者。罌之即止。已成未成。已潰未潰。始終皆不可少。李氏草祕汪連仕草藥方。乳門草即乳汁草。又名土爛爛。性寒涼。行乳汁通氣。而能入血分。根止痢疾。細藤者即遍地金。又名雞盲草。合雞肝蒸服。專治小兒一切疳眼。

蝙蝠藤

此藤附生岳壁喬木。及人牆茨側。葉類蒲萄而小。多歧。勁厚青滑。絕似蝙蝠形。故名。

治腰痛癩癧。

腰疼。澹寮試效方。用蝙蝠藤二兩。老人用三兩。酒煎服。二劑即痛止。不可再服。若多服一劑。腰反傾倒不支。

皆治藤。

蔓延牆壁間。長丈餘。葉似泥藤。中暑者以根葉作粉食之。虛損者雜豬胃煮服。

無根草

采藥錄。此草無根無葉。生在柴草上。纏結而生。名無根金絲草。色有紫有黃。○百草鏡。無根金絲草一名大焰草。卽兔絲苗也。生毛豆莖上者佳。此草與女蘿相似。以色黃如金而細如線者真。若色紅紫粗類燈心者。名女蘿。又紫背浮萍。亦名無根草。與此別。○藥鑑。無根金絲草莖細而赤。無葉無根。惟有青色細蠶。附於莖際。蔓延極長。多纏草木上。其性涼。味微甘。利水治溼熱。三四月採。○李氏草祕。纏豆藤一名豆馬黃。無葉有花。子卽兔絲子。最治血。解豆瘡毒。難產。酒煎服。

藥性考。金絲草無根葉。用苗。此藥功在涼血散血。故治癰疽腫毒諸症。味苦性寒。吐衄崩便。欬咯諸血。服之能止解諸藥毒。瘡癤疔癰惡瘡。○臺志。利水通淋。○葛祖方。治狐臭。騷氣。辟汗。愈瘡。○百草鏡。治癰淋濁痢。帶下黃疸。預解痘毒。敷紅絲疔。

消毒保嬰丹。王之才醫便。凡小兒未出痘瘡者。每過春分秋分日服一丸。其痘毒卽漸消化。若只服一二次者。出痘稀少。若服三年六次者。永不出痘。此方屢驗。萬勿輕視。纏豆藤一兩五錢。其藤八月收取。毛豆莖上纏繞細紅絲。採取陰乾。以此爲君。妙在此藥上。黑豆三十粒。赤豆七十粒。山楂肉一兩。新升麻七錢五分。生地黃荊芥防風川獨活甘草當歸各五錢。連翹七錢五分。黃連赤芍藥桔梗各五

錢牛蒡子一兩。硃砂另研。甘草同煮過去。甘草一兩五錢。苦絲瓜二個。各長五寸。隔年經霜者妙。燒灰存性。右藥爲極細末。砂糖拌勻。共擣千餘下。丸如李核大。每服一丸。濃煎甘草湯化下。其前項藥預辦精料。遇春分秋分。或正月十五日。或七月十五日。修合。務在虔誠。忌婦人雞犬貓孝服見之。合藥須淨室焚香。向太陽祝藥云。神仙真藥。體合自然。嬰兒吞服。天地齊年。吾奉太上老君急急如律令勅。一氣七遍。

慈惠小編。治小便不通。諸藥無效。○金絲草一握。同韭菜根頭煎湯洗小肚。卽通。金絲草多附黃豆芽上。無根無葉。細絲如椶色。近水灘諸樹上皆有之。

麥裏藤

各麥地皆有。臨安縣鄉間尤多。四月採之。莖纏麥上。葉類神仙對坐草而略尖。微有毛。葉對節生。莖細節微紫。葉小者佳。葉大者無力。

跌撲。張氏傳方。以乾者一錢。酒煎服。

白毛藤

亦名天燈籠。又名和尙頭草。白毛藤生人家牆壁上。莖葉皆有白毛。八九月開花藕合色。結子生青熟紅。烏雀喜食之。○百草鏡。白毛藤多生人家園圃中。牆壁上。春生冬槁。結子小如豆而軟。紅如珊瑚。霜

後葉枯。惟赤子纍纍。綴懸牆壁上。俗呼毛藤果。採其藤乾之浸酒。云可除骨節風溼痛。

止血淋瘡疝氣。汁滴耳中。止膿不乾。入藥內。保腫毒不大。治癰疽。用煮牛肉精者食之。○清溼熱。治黃

疸水腫。小兒蛔結腹痛。○採藥志云。性熱活血。追風生血。治鬼箭有效。

風痛。楊氏驗方。桑黃二兩。白毛藤二兩。切碎。用紹興原蠶酒六斤。煎三炷香。每日服一飯盃。

黃疸初起。百草鏡。白毛藤。神仙對坐草。大茵陳。三白草。車前草。各等分。白酒煎服。

大氣胖。不藥良方。用白毛藤。無灰酒服。

天毯草

一名盒子草。俗呼盒兒藤。好生水岸道旁。苗高三四尺。葉如波斯。花有小絨。五月結實為毯。毯內生黑

子二片。生時青。老則黑。每片渾如龜背。又名龜兒草。丹術家取其汁伏硫汞。根伏雌雄。○百草鏡。鴛鴦

木籠。一名水荔枝。盒兒藤。葉長尖。有鋸齒。生水涯。蔓生。秋時結實。狀如荔枝。色青有刺。殼上中有斷紋。

兩截相合。藏子二粒。色黑如木籠而小。孫氏丹方。盒子草子及葉有小毒。蔓生岸旁。葉尖花白。子中有

二片。如盒子。綱目。附於槿藤後。花實根形。俱不甚詳。

性有小毒。主蠱毒及蛇咬。搗敷瘡上即愈。

疳積初起。百草鏡云。鴛鴦木籠三錢。煎服愈。

敏按此草似預知子。近時人罕用。而吳氏遵程著從新。以預知子爲近日所無。直不知卽天蓴草也。世不用。而草醫又易以他名。

松蘿

山川志出武當山。生高峯古木上。長者丈餘。

治蛇虎傷。湯火烙傷。及頑瘡等症。藥性考松蘿甘平。能平肝氣。順怒痰熱。溫瘧吐痢。頭風頭瘡。瘦瘤結聚。亦能探吐膈痰。去熱。

松上寄生

利水導痰。除胸中熱。

楓上寄生

汪連仕云。吊殺糊猴。一名上樹糊猴。又名鐵角猴兒。乃楓樹上風木藤。至年遠。結成連珠傀儡。能追風。不換時刻。酒蒸服。加金雀根土。當歸。石牀花根。石竈。治癱瘓。勾急之要藥。

蛇菁藤

職方典產福寧。莖細。葉如猴耳。

治喉齒百病。

李頭藤

職方典產福寧其藤腐朽者可代香用。

止嘔血活經絡。

龍鬚藤

粵東小錄藤產東莞微細如髮直起數丈無一節常飛越數樹如千百游絲牽綴紅者名紅龍鬚紫者名紫龍鬚有五色然生無根蒂以穢物投之即消釋不知所去土人以其液和細土石灰塗覺糖釜其堅如鐵雖猛火不裂其花與子皆入藥。

浸酒服補筋骨祛風解毒能循脈絡無微不至。

藥性考五色龍鬚藤細如髮生無根蒂挂樹長發。

臭藤根

草寶云此草二月發苗蔓延地上不在樹間係草藤也葉對生與臭梧桐葉相似六七月開花粉紅色絕類牽牛花但口不甚放開搓其葉嗅之有臭氣未知正名何物人因其臭故名爲臭藤其根入藥本年者細小二三年者大如菜菔可用○李氏草祕云臭藤一名卻節對葉延蔓極臭煎洗腿足諸風寒溼痛拘攣不能轉舒如神○汪氏藥錄臭蒲萄蔓延而生子如蒲萄而臭治風又云野蒲萄氣重味臭

功能敗腸胃之癰。

治療癰。用根煎酒數服自愈。未破者消。已潰者斂。

治風痛腸癰。跌打損傷。流注風火。瘡毒。散鬱氣。洗疔。合紫蘇煎湯。汪遵仕方

黃練芽

今呼黃連芽。一名黃樾頭。春初采嫩芽。小兒生食之。取其清香可口。味帶苦澁如黃連。故名。亦可以鹽湯焯食。漉出曝乾爲鹽菜。暑月食之。○百草鏡。此物藤生。引蔓大樹上。葉如桑寄生。尖長柔滑。頗光潤肥厚。二三月枯枝生芽。淡紅色。如椿芽。生食苦中帶甘。入口生津。安徽人家多醃以爲菜。與芹芽椿芽蘆芽並重。○藥性考云。葉似槐而尖。嫩時揉乾代茶。勝茗。木甚細膩。苦中帶甘。味如橄欖。鹽食酸甜。解喉痛咽哽。消熱醒酒。舌爛口糜。嚼汁可解。

味苦澁。性寒。解暑。止渴。利便。食物宜忌生津明目。清積熱。解毒。類

敏按。方以智物理小識。黃棟頭一名回味。俗呼黃連頭樹。分葉如椿。大者合抱。春采其葉。味苦而甘。皮可合香入藥。治痢及霍亂。綱目遺此未收。如方氏所云。則木也。與百草鏡所云互異。或地土有不同耶。抑其物本有二種耶。並存俟考。

木龍藤

周益生家寶方藤出錢塘橫山喜沿人家牆壁及石崖上土人多識之

治肺癰吐癰腸癰脇癰四症搗汁老酒沖服冬月以酒搗取汁二盃服立效

萋油按萋即扶留藤

萋即蒟也嶺南人取其葉合檳榔食今人名檳葉用其葉封固曬半載收貯待用可留數十年非獨疏積滯消瘴癘治病亦夥惟西洋人有之

治手足紅腫或疹以萋葉油揉擦用布包裹滴耳治耳痛刀傷刺傷以棉花浸萋油貼裹傷處又治背癰及癩毒貼之初起者即解散已成即速潰膿亦可敷貼楊梅毒瘡漏痔以上俱泰西應振鐸本草補

花部

梅花梅梗

綱目載梅花無治方止言點湯煮粥助雅致而已食物宜忌云梅花味酸澇性平並無主治殆亦不知梅花之用入藥最廣而功效亦最大○百草鏡梅花冬蕊春開其花不畏霜雪花後發葉得先天氣最足故能解先天胎毒有紅白綠萋千葉單葉之分惟單葉綠萋入藥尤良採能不犯人手更佳含苞者力勝性寒或曰平味酸澇清香開胃散鬱煮粥食助清陽之氣上升蒸露點茶止渴生津解暑滌煩○談撰卉木皆感春氣而生獨梅開以冬蓋東方動以風風生木故曲直作酸則酸者木之性惟梅之味

最酸。乃得氣之正。北方水爲之母。以生之則易感。故梅先衆木而華。癸辛雜識。梅花無仰開者。蓋亦自能巧避風雪耳。驗之信然。粵志。惟嶺南梅花最早。冬至雷動地中。則梅開地上。蓋其時火之氣不足於地。而發其最初之精華。故梅開。水之氣上足於天。而施其最初之滋潤。故雪落。雪洩也。從肅殺之中。洩其一陽之精。以爲來春之生生者也。雪深則水氣足。梅早則火氣足。火氣足而爲天地陽生之始。陰殺之終。使萬物皆復其元。梅之德所以爲大。天地一陽之復。不可見。見之於梅。又其得氣之先也。韶州梅長至已花。臘月復開尤盛。有於舊蒂而作新花者。其地屬嶺北。故梅以臘以正月開。氣盛則開而又開。瓊州梅有六出者。予謂梅五出者也。五陽數也。冬至一陽始復。梅吐花得陽之先者。今六出乃得陰數矣。蓋以地氣而變。苦於嚴寒。故不用五而用六。同於雪花也。以梅爲體。以雪花爲用。人見其六而不見其五。藏五在於六之中。猶河圖之五在十中也。河圖之一生水。梅得水氣之先。故花於冬至與雪同時。雪者水氣所凝。梅者水形所結。卦皆屬坎。水在天而凝雪。水在地而發梅。水之數六。寒極則雪花與梅皆六出。應其數也。

花微酸。瀉無毒。清頭目。利肺氣。去痰壅滯。上熱。本草原始安神定魂。解先天痘毒。凡中一切毒。

治瘰癧。雞蛋開一孔。入綠萼梅花將開者七朵。封口。飯上蒸熟。去梅花。食蛋。每日一枚。七日全愈。唇上生瘡。赤水玄珠。白梅瓣貼之。神效。如開裂出血者。卽止。

紫金錠。宜端午日製合。飛硃砂。紅芽大戟。處州山茨菇。千金霜。川文蛤淨粉草。河車。以上六味各二兩。珍珠琥珀。明雄黃。冰片。陳金墨。各五錢。梅花蕊。西牛黃。各一兩。川麝香四錢。右各藥爲末。乳篩極細。以糯米粉糊杵爲丸。研用。

稀痘神方。白梅花蕊三錢。採飽綻者。須預備曬乾。生地黄三錢。當歸三錢。生甘草一錢。臍帶小兒自己落下時。去灰或蟻。用新瓦炙存性。研末極細。同煎濃汁。濾清熬膏。作一日喫完。小兒永不出痘。萬病回春。載尹蓬頭混元丹。治小兒諸虛百損。用梅花合混元衣。注梅花解痘先天之毒。

九仙奪命丹。集聽云。又名十聖丹。治七十二般無名腫毒惡瘡。流注火痹等症。硃砂三錢。雄黃乳香沒藥。冰片。血竭各二錢。石膽礬。銅青。麝香。枯礬。熊膽。飛過黃丹各一錢五分。蜈蚣。蚯蚓。殭蠶各二條。微炒黃色。去嘴。梅花一升。寒水石。牛黃。蟾酥。白官粉。礪砂各一錢。全蠍九個。蝸牛七。以上廿三味爲末。研極細。以硃砂一錢五分爲衣。其修合之法。先將蟾酥用乳汁化開。共爲丸。如丸不起。略加麵糊。如桐子大。每服一九。令病人口嚼生葱一根咽下。又嚼一根極爛。吐在手心上。裹藥。用滾熱老酒吞下。量冷暖時候。蓋被出汗。如病人不能嚼。人代嚼之亦可。如無汗。再服一九自愈。凡諸毒醫遲。毒走攻心。必不可救。若汗來遲。以熱酒催之。不可以手摸摩患處。如癢。以舊木梳梳之自止。

稀痘。集聽。用綠萼梅花七朵。須預養於花瓶內。春分日摘花半開者。只用淨瓣搗爛。白糖三匙。滾水

服之毒卽全消。免出痘矣。小兒滿月後卽可服。

梅花點舌丹。集驗治一切疔毒及惡瘡初起。天行瘟毒。咽喉腫痛等症。輕者二粒。重者四粒。先用無根水送下。次取一粒噙於舌下化之。乳香去油二兩。珍珠豆腐煮過。麝香水飛熊膽各六分。沒藥去油。京牛黃苦葶。麝砂。硼砂。蟾酥。人乳。泡血竭。雄黃。水飛各二錢。片腦一錢。另研沈香一錢。白梅花陰乾一錢二分。共爲細末。用人乳汁化蟾酥丸黍米大。金箔爲衣。

預稀痘疹。不藥良方。每年臘月清晨。摘帶露綠萼梅蕊一百。加上白糖。搗成小食。啗食之。

三花丹。赤水玄珠。將出痘之時。用此能稀痘。梅花。桃花。梨花。取已開未開。盛開者。陰乾爲末。等分。兔腦爲丸。雄黃爲衣。用赤小豆。黑豆。黑豆湯送下。

梅桃丹。赤水玄珠。治痘已出未出。不起不發。隱在皮膚。並治麻症斑症。用梅花一兩。桃仁。辰砂。甘草各二錢。絲瓜五錢。爲末。每服五分。參蘇湯下。

痘不問前後。凡黑陷咬牙寒戰。用梅花六錢。穿山甲一兩。仙露脾五分。麝香一錢。爲末。每服三五分。咬牙寒戰。加人牙二三釐。內托散送下。

青梅散。錫山衣。德堂稀痘良方。用生青果核七個。打碎去仁。曬乾。研極細末。不宜火焙。又不宜沾生水。再用玉蝶梅花二十一朵。去蒂。共白蜜兩茶匙。搗濃。恰交春分時。與小兒服。永不出痘。卽出亦不過。

三粒此方傳自江甯王培德家已九世無痘瘍之兒真異方也。

二氣丸 新安汪偉公先生傳其家親友凡小兒服此丸永不出痘其方即前稀痘神方臍帶曰坎氣梅花先天之氣故名二氣丸。

七仙丹 張琰種痘新書治痘氣血兩虛灰白水泡癢場等症黃芪二兩人參一兩甘草五錢紫河車

一兩梅花一兩五錢鹿茸一兩天靈蓋一個共爲末每服八九分用內托散煎湯送下氣實者加山查陳皮各五錢。應昌按天靈蓋即或有益亦不可用况二方功效全不在此乎。

二花散 種痘新書云能起五陷黃蠟梅花素心者尤良陰乾不拘多少去毛殼罐盛聽用桃花陰乾山查去核炒爲末小絲瓜陰乾爲末陳皮去白人參黃芪炙甘草炙硃砂紫河車酒洗去筋蒸焙乾鹿茸酒酥炙穿山甲取首尾四足者炒仙靈脾去四弦刺酒焙人牙火煨韭汁焯七次天靈蓋洗淨去酥各爲末用○按綱目梅花條下並無主治而於蠟梅花下亦僅言解暑生津而已不知蠟梅亦並非梅種其主治亦廣不僅治痘也。

龍腦骨 種痘新書云治痘出未透心狂見鬼陷伏等症用梅花不拘多少曬乾爲末加冰片少許共研爲末以豬心血和勻爲丸狂譫者燈心湯引紫陷者以紫草煎湯調之加酒數茶匙化下。

絕痘 楊春涯驗方用南方綠萼梅蕊未放探藏風乾逢四時八節節前一日用雞蛋一個打孔入蕊

紙糊好。飯上蒸熟。喫數次。永不出痘。卽出。亦不過數粒。

解痘毒。劉氏得效方。立春前後三日。採紅梅蕊。半含半開者一鍾。去蒂。仍安鍾內。磁碟蓋住。一週時。足氣汁升上。用新掃盆。未經五辛者。搗研如泥。捏成餅樣。加明礞砂水飛一錢。勻摻於上。緩緩研勻。再加白蜜少許。丸如彈子。曬半乾。金箔爲衣。遇四絕日。每服一九。甘草湯下。忌鐵器葷腥。服過一九後。當日晚間。微微發熱。次日遍身發出細瘰。是其驗也。○種福堂方。梅花丸。治痘疹有起死回生之功。又換痘丹中。梅蕊犀角麻黃膏並用。

朱禹功仙傳稀痘方。赤豆黑豆菜豆各一兩。研末。入新竹筒中。削皮留節。鑿孔入藥。杉木塞緊。用蠟封固。臘月浸廁中一月。取出風乾。每藥配梅花片三錢。每服一錢。以經霜絲瓜藤筋煎湯下。神效。

千里梅花丸。途中備用。醫學指南。用枇杷葉。乾葛末。百藥煎。烏梅肉。臘梅花。甘草。各等分爲末。用蠟化開。投蜜。每蠟一兩。加白蜜二錢。和藥末。搗二三百下。丸如雞頭實大。夏月長途。含化一九。津液頓生。寒香滿腹。妙不可言。

梅梗

諸梅樹皆可用。以綠萼者佳。凡梅有氣條青翠色。此條無葉。止光梗出枝罅。薛徵君生白曾言。用以通上下膈氣有效。此氣條而非梗也。用梗以帶葉成枝者入藥。綱目梅部載梅實及核仁根葉。獨不及梗。

保產神效方。道聽集云。凡婦人三月久慣小產。百藥不效者。以梅梗三五條煎濃湯飲之。復飲龍眼湯。無有不保者。

雪荷花雪芝
雪裏花

產伊犁西北及金川等處大寒之地。積雪春夏不散。雪中有草。類荷花。獨莖亭亭。雪間可愛。戊戌春。予於史太守處親見之。較荷花略細。其瓣薄而狹長。可三四寸。絕似筆頭。云浸酒則色微紅。彼處土人服之。爲助陽要藥。憶舊遊詩話。雪蓮花千年不化。元雪深處有之。形似蓮花。高可丈許。取以釀酒。倍增春色。蓋陰極而陽生之意耳。亦產巴里坤等處。西北域記。雪蓮產積雪中。一莖並蒂。浸酒色碧。性熱。人稱其功同仙茅枸杞。而不知其禍乃同砒鴆也。蝦蟆比蓮尤甚。予甥屠潤南自哈密回。帶有雪荷花。因訪其功效。據言其地有天山。冬夏積雪。雪中有蓮。以產天山峯頂者爲第一。然不可得。山腰次之。其生也有雌雄。土人採乾之。成對以市。性大熱。能補陰益陽。老人陽絕者。浸酒服。能令八十者皆有子。性大熱。治一切寒症。此物產於極冷之地。乃陰極陽生故也。朱排山柑園小識。雪蓮生西藏。藏中積雪不消。暮春初夏。生於雪中。狀如雞冠。花葉逼肖。花高尺許。雌雄相並而生。雌者花圓。雄者花尖。色深紅。性大熱。能除冷疾。助陽道。豪家爭致之。以治房中之藥。溧陽銷夏錄。塞外有雪蓮。生崇山積雪中。狀如今之洋菊。名以蓮耳。其生必雙。雄者差大。雌者小。然不並生。亦不同根。相去必一兩丈。見其一

再覓其一無不得者。蓋如菟絲茯苓一氣所化氣相屬也。凡望見此花。默往採之則獲。如指以相告。則縮入雪中。杳無痕迹。卽劇雪求之。亦不獲。草木有知。理不可解。土人曰。山神情之。其或然歟。此生寒極之地。而性熱。二氣有偏勝無偏絕。積陰外凝。而純陽內結。坎卦以一陽陷二陰之中。剝復二卦以一陽居五陰之上下。是其象也。然浸酒爲補劑。多血熱妄行。或用合媚藥。其禍尤烈。蓋天地陰陽均調。萬物乃生。人身之陰陽均調。百脈乃和。故素問曰。亢則害。承乃制。自丹溪立陽常有餘陰常不足之說。醫家失其本旨。往往以苦寒伐生氣。張介賓輩矯枉過直。遂偏於補陽。而參耆桂附流弊。亦至於殺人。是未知易道扶陽。而乾之上九亦戒以亢陽有悔也。嗜慾日盛。羸弱者多。溫補之劑。易見小效。堅信者遂衆。故余謂偏伐陽者。韓非刑名之學。偏補陽者。商鞅富強之術。初用皆有功。積重不返。其損傷根本則一也。雪蓮之功不補患。亦此理矣。

治痘不起發。及悶瘡悶痘。止用一瓣。入煎藥中。立效。屢試皆驗。陳海曙云。

雪芝

南中紀聞。衡岳間有之。乃冰霰所結。歲久蒸積而成。產陰崖絕壁間。晶瑩如玉。懸挂峻坂。非攀蘿捫級。不可攝取。

療肺疾。降火清心。

雪裏花

朱楚良在鎮海。土人有采雪裏花者。冬月嚴寒。此花始生。在招寶山龍潭旁。環渚而發。苗甚短小。如六月雪狀。高不過二寸許。每雪時開白花如豆大。土人采得。乾之入藥。

敷痔漏。以雪裏花為末。溼者乾摻。乾者麻油調搽。一二度。其痔即消縮。

水仙花子

能去風。澤肌膚。潤毛髮。治五心煩熱。嘈雜不甯。同荷葉芍藥為末服。

催生蘭

粵志一名報喜蘭。風蘭之族。並非風蘭也。花如蠟梅而色紅紫。香味亦同。每莖作七八枝。懸樹間。勿侵地氣。遇有吉事則開。寤生者以花懸戶上即生。○關涵嶺南隨筆。報喜遇吉事始開。種法以空為根。以露為命。與風蘭同。

主催生

珠蘭

藥性考。珍珠蘭味辛。窸茶香郁。其根有毒。可磨敷癰瘤。今名雞爪蘭。花經云。真珠蘭一名魚子蘭。枝葉似茉莉花。發長條細蕊。與建蘭同時。香亦相似。而濃郁過之。好清者取其蕊焙茶尤妙。但性毒。止可

取其香氣。故不入藥。張篁王云。中條山有老道士。教人治狐魅。有一女子為雄狐所祟。教以用珠蘭根。搗爛置牀頭。俟狐來交時。塗其莖物上。狐大嗥竄去。次日野外得一死狐。道士云。此根狐肉沾之。即死。性能毒狐。尤捷效也。

建蘭花 葉根

建蘭有長葉短葉闊葉諸種。其花備五色。色黑者名墨蘭。不易得。乾之可治瞽目。能生腦神。治青盲。最效。紅花者名紅蘭。氣臭濁。不入藥。黃花者名蜜蘭。可以止瀉。青色者惟堪點茶。或蜜浸。取其甘芳。通氣分。素心者名素心蘭。入藥最佳。蓋建蘭一莖數花。實蕙而非蘭也。綱目以薰草為蕙。即今零陵香。於蘭草下正誤條。申言蘭草可佩。乃孩兒菊。古名都梁香是也。且斥寇氏丹溪二家所解蘭草。混入世俗之蘭花為非。而以蘭花為幽蘭。與蘭草迥異。然何以不立幽蘭一條。不能無缺略之憾。因急補之。

素心建蘭花。乾之可催生。除宿氣。解鬱。蜜漬青蘭花。點茶飲。調和氣血。寬中醒酒。閩小記。建寧人家以蜜漬蘭花。冬月點茶。

芳香如初摘

葉。丹溪云。建蘭葉稟金水之氣。而似有火。不知其能散久積陳鬱之氣。甚有力。今時醫用以通舒經絡。宜洩風邪亦佳。○本草匯云。蘭葉稟金水清芬之氣。似有火。獨走氣道。入西方以清辛金。不獨開胃清肺消痰。善能散積久陳鬱之結氣。今人但賞花香。不知用葉。亦缺典耳。況藥味載內經甚少。蘭獨擅

名。所謂治之以蘭。除陳氣也。故東垣方中每常用之。與藿香、枇杷葉、石斛、竹茹、橘紅、開胃氣之神品。入沈香、鬱金、白蔻、蘇子、蘆根汁。下氣開鬱。治噎膈之將成者。產閩中者力勝。江浙諸種力薄。辛平甘寒。陰中之陽。入手太陰。足陽明經。亦入足太陰厥陰經。生津止渴。開胃解鬱。潤肌肉。調月經。養營氣。本經主利水道。因其走氣道。故能利水消渴。除胸中痰癖。殺蠱毒不祥之氣者。蓋肺主氣。肺氣鬱結。則上竅閉而下竅不通。胃主納水穀。胃氣凝滯。則水穀不以時化。而爲痰癖蠱毒不祥之氣。辛平能散結滯。芬芳能除穢惡。則上症自除。本草

按綱目蘭草條不指幽蘭。而本草匯草部有蘭草。所言皆指建蘭。卽瀕湖所云幽蘭是也。今從其說補之。

根。名土續斷。治跌打和血。物理小識。幽蘭建蘭根甘。宜入藥。其花可煎。葉以浸油。黑髮。又云。都梁蘭根名土續斷。當是此也。○五雜俎。蘭根食之能殺人。忌內服。

治痰嗽後吐血。○劉羽儀經驗方云。先痰嗽後吐血而氣急者。用天冬、麥冬、生地、白芍、紫苑、山梔、桑皮、地骨皮等藥。如氣急去天冬。加真蘇子。取蘭花根搗汁沖服。尤妙。○江夏程雲鵬著慈幼筏。痘門載清地散花飲。凡痘見標三日。此方主之。有夾疹者。加蘭花根。額上灰滯色。加菊花、蘭花、梅花。或蘭花根亦可。又玉液春膏飲中。治背漿不足。加酒炒土蘭花。

草蘭

葉短而狹小。春花者名春蘭。秋花者名秋蘭。皆一幹一花。有一幹數花者名九節蘭。其萼中無紅斑點。色純者名草素。尤香。入藥以一幹一花者良。

根。治瘋狗咬。行篋檢祕。取根四兩。水淨入黃酒二盃。煎成一盃服完。其毒即從大小便化血而出。

玫瑰花

有紫白二種。紫者入血分。白者入氣分。莖有刺葉如月季。而多鋸齒。高者三四尺。其花色紫。入藥用花瓣。勿見火。○百草鏡云。玫瑰花立夏前採。含苞未放者。陰乾用。忌見火。

氣香性溫。味甘微苦。入脾肝經。和血行血。理氣治風痺。○藥性考云。玫瑰性溫行血。破積損傷。痰痛。浸酒飲益。

治吐血玫瑰膏。救生苦海。用玫瑰花一百朵。初開者去心蒂。河水二盃。煎半。再用河水一盃。煎半。去渣和勻。共有盃半。復煎至一盃。白糖一觔。收成調膏。不時服之。

噤口痢。用玫瑰花陰乾煎服。

治乳癰。玫瑰花七朵。母丁香七粒。無灰酒煎服。自愈。

腫毒初起。百草鏡。玫瑰花去心蒂。焙爲末。一錢。好酒和服。

乳癰初起。鬱症宜此。百草鏡。玫瑰花初開者。陰乾燥者。三十朵。去心蒂。陳酒煎。食後服。

肝胃氣痛。用玫瑰花陰乾。沖湯代茶服。

新久風癩。百草鏡。玫瑰花去淨蕊蒂。陰乾三錢。紅花全當歸各一錢。水煎。去渣。好酒和服七劑。除根。永不再發。

吐紅。集聽。用玫瑰花。不拘多少。去蒂。搗汁。熬膏。貯瓶內。每早空心茶匙挑四五匙。白滾水沖服。一二日即愈。

少林拳經。玫瑰花能治跌打損傷。

風癩藥酒。救生苦海。用白槿花大紅月季花玫瑰花去蒂各一兩。鬧羊花五錢。風茄花五朵。龍眼肉北棗肉各一兩。紹酒五壺。浸封七日。隔水煮之。罈上置白米一撮。米熟成飯爲度。取出。每服二三杯。蓋暖臥。避風。即愈。

保真丸。朱排山柑園小識。保真丸。能通經絡。和百脈。壯腰腎。健脾胃。加飲食。健步履。除一切痼疾。能固真元。用玫瑰花去蒂摘瓣。以竹紙糊袋裝之。薄攤曬乾。取淨末一觔。不宜見火。此花色能益血。香能補氣。妙難盡述。補骨脂一觔。淘淨泥土。用芪朮苓甘各五錢。煎汁一盃。拌曬。以汁盡曬燥炒。兔絲子一觔。用芎歸芍生地各五錢。煎汁去渣。以汁煮兔絲子。俟吐絲爲度。曬乾炒。胡桃仁六兩。連皮搗如泥。杜仲四兩。鹽水炒去絲。韭子四兩。淘淨微火炒。各爲細末。煉蜜爲丸。如桐子大。每晨空心白湯服四錢。忌

羊肉蓼薑並諸血。一方加魚膠四兩。男婦共服。可以種子。極效。或加鹿角膠枸杞子。

金雀花

一名黃雀花。似六月雪而本高。正二月開花。色黃。根有刺。根入藥。○花鏡。金雀花枝柯似迎春。葉如槐。而有小刺。仲春開黃花。其形尖。旁開兩瓣。勢如飛雀。可愛。其花鹽湯焯過。控乾入茶供。○百草鏡。金雀花生山土中。雨水時開花。色黃而香。形酷似雀。白花者名銀雀。最難得。其莖有白點。花後發葉碎小。葉下有軟刺。取根入藥。去外黑皮及內骨用。別有霞雀花。更不可得。○嘉興府志。金雀一名飛來鳳。鹽浸可以點茶。○成化四明志。金雀兒花產奉化。○丁未。余館奉化。劉明府署。時明府幼孫患痘不起。發醫用金雀花。詢其故云。此藥大能透發痘瘡。以其得先春之氣。故能解毒攻邪。用花。

性平。和血祛風。入肝脾二經。亦入乳癰用。百草鏡。跌撲傷損。以金雀花乾者研一錢。酒下。根。治跌打損傷。又治咳嗽。煖筋骨。療痛風。性能追風活血。兼通血脈。消結毒。○濟世良方。金雀根搗汁。和酒服。渣罨傷處。治跌打損傷。

金蓮花

廣羣芳譜。出山西五臺山。塞外尤多。花色金黃。七瓣兩層。花心亦黃色。碎蕊。平正有尖。小長狹。黃瓣環繞其心。一莖數朵。若蓮而小。六月盛開。一望徧地。金色爛然。至秋花乾不落。結子如粟米而黑。其葉綠。

色瘦尖而長。五尖或七尖。○五臺山志。山有旱金蓮。如真金。挺生陸地。相傳是文殊聖蹟。○張壽莊云。五臺山出金蓮花。寺僧採摘乾之。作禮物餉客。或入寺獻茶。盡中輒浮一二朵。如南人之茶菊然。云食之益人。查慎行人海記。旱金蓮花五臺山出。瓣如池蓮較小。色如真金。曝乾可致遠。有分餉者。以點茶。一甌置一朵。花開沸湯中。新鮮可愛。後屢從出古北口外。塞山多有之。開花在五六月間。一入秋。莖株俱萎矣。○金蓮花出五臺山。又名旱地蓮。一名金芙蓉。色深黃。味滑苦無毒。性寒。治口瘡喉腫。浮熱牙宜。耳疼目痛。煎此代茗。

明目解嵐瘴。

軒疔瘡。大毒諸風。山海草函

佛桑花

粵語佛桑枝葉類桑。花丹色。名朱槿。一名福桑。又名扶桑。重臺者曰愛老。多以為蔬。綱目木槿後有扶桑條。止載外治。故補之。

吳震方嶺南雜記。扶桑粵中處處有之。葉似桑而略小。有大紅淺紅黃三色。大者開泛如芍藥。朝開暮落。落已復開。自三月至十月不絕。佛桑與扶桑正相似。而中心起樓。多一層花瓣。今人以扶桑佛桑混一。非也。紗緞黑退變黃。搗扶桑花汁塗之。復黑如新。

潤容補血。

粵語美顏潤血。陳述齋錄語朱槿花燕醋食之。粵中婦女多以此美容。

敏按。兩粵瑣語。載朱槿與佛桑皮微有異。云朱槿

一名日及。亦曰舜英。葉如桑。光潤而厚。高止四五尺。而枝婆娑。自仲春花至仲冬。一叢之上。日開數百朵。朝開暮落。色深紅。五出。大如蜀葵。瓣捲起。勢若飛颺。層出如樓子。有蕊一條。比瓣稍長。上綴金屑。日光所燦。疑有火焰。粵女多種之。插枝卽生。蘇子瞻詩。焰焰燒空紅佛桑。謂朱槿也。然佛桑又有殷紅水紅黃紫各色。比朱槿差小。稱小牡丹。四時有花。白者以爲蔬菜。甜美可口。女子食之尤宜。據陳述齋所云。則佛桑與朱槿一類。而二物。要其功用。亦不甚遠。故粵語以爲卽朱槿。今並附錄其功用。以補李氏所未備。

寶珠山茶

雲溪方以落地花仰者爲貴。山茶多種。以千葉大紅者爲勝。入藥。○百草鏡。山茶多種。惟寶珠入藥。其花大紅四瓣。大瓣之中。又生碎瓣極多。味瀉。二三月採。陰乾用之。若俱是大瓣。千葉者名洋茶。不入藥。單瓣者亦不入藥。羣芳譜。寶珠山茶可代鬱金。研末麻油調。塗湯火灼傷。

味微辛甘。性寒。破血消癰。跌打吐血症用之。又治腸風瀉血。湯火傷。鼻衄。灸瘡。均焙研七朶。空心酒服。○百草鏡云。涼血破血止血。瀉劑也。消癰腫。跌撲。斷久痢。腸風下血。崩帶血淋。鼻衄吐血。外敷灸瘡。

赤痢。救生苦海。用大紅寶珠山茶花陰乾爲末。加白糖拌勻。飯鍋上蒸三四次服。鼻中出血。何明遠方。千葉大紅山茶花。二三月採。陰乾。用時取五六朶。煎服卽止。又張氏必效方。

鼻衄。用寶珠山茶。大紅者。焙研三五錢。砂糖滾水和服。

吐血咳嗽。不藥良方。寶珠山茶。瓦焙黑色。調紅砂糖日服。不拘多少。

又方。寶珠山茶十朵。紅花五

錢。白芨一兩。紅棗四兩。水煎一盃服之。渣再服。紅棗不拘時。亦取食之。

蔣儀藥鏡拾遺賦。山茶花。吐血衄血腸風下血之良將。

宋春暉云。曾見有人患乳頭開花欲墜。疼痛異常。有教以用寶珠山茶焙研爲末。用麻油調搽立愈。

痔瘡出血。汪子明方。用寶珠山茶研末沖服。

粉團花

附根

有大小二種。其花千瓣成簇。大者曰玉粉團。初青後白。小者曰洋粉團。青色轉白。白後轉紅藍色。入藥

用大者。

性寒。熏臭蟲。同水龍骨雷公藤和燒熏之。立除。百草鏡

洗腎囊風。姚伯玉方。用粉團花七朵。水煎洗。○良方集要。用蛇牀子牆上野苧瑯球花。煎湯洗之。

根。治喉爛。傳效方。取入土內者好。醋磨以翎毛蘸掃患處。涎出愈。

玉簪花

綱目玉簪條。載根葉之用。獨不言其花。今人取其含蕊實鉛粉其中。飯鍋上蒸過。云能去鉛氣。且香透

粉內婦女以勻面無黥痣之患。其葉乾之。需壁。絕跡。

花性微毒。治小便不通。彙集方玉龍散中用之。

治癖第一靈丹。寶誌遺方。鮮玉簪花三百朵。為泥。母丁香六兩。沈香四兩。冰片三錢。麝三錢。山西城磚十二兩。共為末。用真麻油三觔半。熬熟。陳年石灰半觔。滴水成珠。為度。候冷。收瓷罐內。黃蠟封固。埋土內。二十一日取出。敷患處。自愈。此藥可久貯。勿使洩氣。

治杖破。玉簪花。手排熟。貼傷處。

清涼膏。張卿子祕方。貼疔瘋毒。大黃。黃柏。黃連。黃芩。鬱金。皮消。白芨。獨腳蓮。天花粉。玉簪花。共研細末。雞子清調敷。留頂。又二香。追毒飲。治肚心癰。羌活。連翹。紫蘇。甘草。白芷。防風。銀花。天花粉。肉桂。黃芪。乳香。木香。沈香。芍藥。生地。枳殼。黃芩。柴胡。前胡。茯苓。玉簪花。水煎。食後服。

山海草函。玉簪花入韶粉內。敷疔瘡。蛀梗。

玉龍散。治小便不通。用玉簪花。蛇蛻。各二錢。丁香一錢。共為末。每服一錢。酒調送下。醫學指南

玉蘭花

瀕湖綱目。辛夷集解下。惟云有花白者。人呼為玉蘭。並不另立主治。即辛夷亦用苞蕊。不及其花之用也。今采龍柏藥性考補之。

性溫香滑消痰益肺和氣蜜漬尤良。

痛經不孕。良方集要。玉蘭花將開未足。每歲一朶。每日清晨空心。水煎服。

丁香花

未詳形狀。藥性考。

味辛微溫。審茶弔露。清利頭目。

紫茉莉

此草二三月發苗莖。逢節則粗如骨節狀。葉長尖光綠。前銳後大。小暑後開花。有紫白黃三色。又有一本五色者。花朝開暮合。結實外有苞。內含青子成簇。大如豌豆。久則黑子。內有白粉。宿根三年不取。大如牛蒡。味微甘。類山藥。陳扶搖花鏡。紫茉莉一名狀元紅。本不甚高。但婆婆而蔓衍易生。葉似蔓菁。○按紫茉莉入夏開花。至深秋未已。白花者香尤酷烈。其花見日即斂。日入後復開。亦不經久。一日即萎。西人有食之者。去其外皮。鹽漬以佐饌。云能去風活血。無濁淋等症。然其性秉純陰。柔中帶利。久食恐骨軟。陽虛人尤忌之。性惡鐵。凡取用忌鐵器。

根治乳癰白濁。花可浸酒。子名土山奈。取其粉。可去面上癩瘡粉刺。性寒。藥性考。

野薔薇

百草鏡山野與家種無異。但形不大。花皆粉紅色。單瓣。無千葉者。春月山人採其花。售與粉店。蒸粉貨。售爲婦女面藥。云其香可辟汗。去黧黑。○花鏡野薔薇一名雪客。葉細而花小。其本多刺。蔓生。籬落間。花有純紅粉紅二色。皆單瓣。不甚可觀。但香最甜。似玫瑰。人多取蒸作露。採含蕊。拌茶亦佳。患瘡者。烹飲卽愈。六研齋筆記。通元子服餌法。春時服薔薇嫩頭。一月卽可。每日服信三釐。漸增至一分。卽可入水。坐臥不病。如是經年。卽可蠟塗身體。挾利刀。潛遊江湖。劫睡龍之珠。得珠而行空自如。觸石無礙。三界入寰。可縱浪矣。此飛仙之業也。而始於嚙薔薇頭。談此於客。未有不胡盧而笑。

花治瘡。○伍涵芬讀書記。白野薔薇花。拌茶煎服。可驅瘧鬼。○婦人鬱結吐血。○劉克中云。香烈。大耗真氣。虛人忌服之。

根治肺癰。吐膿痰。酒煎服。口瘡煎湯漱口。○子名石珊瑚。治產後軟癱。○婦人禿髮。用薔薇嫩枝。同猴薑煎汁刷之。

秋海棠

嶺南隨筆。海棠本無香。惟清遠歸猿洞秋海棠。肇慶羅羊峽春海棠。其香特盛。○羣芳譜。一名八月春。草本。花色粉紅。甚嬌豔。葉綠如翠羽。此花有二種。葉下紅筋者爲常品。綠筋者開花更有雅趣。○大觀錄。秋海棠亦名斷腸草。其根葉有毒。犬馬食之卽死。浸花水飲之害人。○漳州府志。秋海棠歲每生苗。

其莖甚脆。葉背作紅亂紋。云是相思血也。相傳昔人有以思而噴血階下。遂生此。故亦名相思草。其花一朵謝。則旁生二朵。二生四。四生八。具太極象。雅豔異常。○花鏡。秋海棠一名八月春。爲秋色中第一。本矮而葉大。背多紅絲。如胭脂。作界紋。花四出。以漸而開。至末朵結鈴子。生極枝。花嬌冶柔媚。其異種有黃白二色。一名斷腸花。○周開鄩云。秋海棠俗傳其花中黃心。有大毒。人食多死。予一日悞食此。驚惶一夜。倉卒旅邸。無藥可解。但委命聽之而已。次日亦無恙。丁憲榮云。秋海棠葉初生山左。小兒爭采食之。味微酸生津。能益唇色。如塗朱然。則其無毒可知。○藥性考。海棠喜背陰而生。故性寒。凡大熱症可用。

味酸。性寒無毒。和蜜搽面。澤肌潤肉。其幹搗汁。治咽喉痛。藥性考百草鏡云。擦癬殺蟲。用葉花浸蜜。入婦人面藥用。○物理小識。白銀以烏梅三葉酸。秋海棠葉皆可。

海棠蜜。救生苦海。紅秋海棠採花去心。白蜜拌勻。蒸曬十次。令化爲度。冬月早晨洗面後敷之。能令色豔。并治吹花癬疥。○慈航活人書。有製海棠蜜法。上白蜜一大杯。紅秋海棠現取花片。用拌入蜜內。將花略搗爛。日日曬。或蒸數次。自爛如泥。其蜜色如海棠。或加入好芙蓉粉少許。光絕可愛。且免面皮凍裂。

茶菊城頭菊。金鈴菊。金菊。菊頭。菊米。菊根。

茶菊較家菊朵小多心有黃白二色杭州錢塘所屬良渚檜葬地方鄉人多種菊爲業秋十月采取花挑入城市以售黃色者有高腳黃等名色紫蒂者名紫蒂盤桓白色千葉名千葉玉玲瓏徽人茶舖多買焙乾作點茶用常中丞安宦遊筆記鳳凰山產菊花不甚大蒂紫味甘取以點茶絕佳又浙省城頭一帶產菊名城頭菊皆生城上石縫中至秋開花花小於茶菊香氣沁腹點茶更佳此則茶菊之野生者味性不同臨安山中所產一種野菊名金鈴菊花小如豆與城頭菊彷彿山入多采入藥舖作野菊花用實與野菊又不同野菊食之瀉人而鈴菊又不作瀉野菊瓣疎此則旁瓣密爲別也瀕湖綱目菊分家野而此數種獨未言及今杭俗以茶菊作餉遺客爲用最廣予故不惜觀縷言之兼補瀕湖所未備焉○百草鏡云甘菊卽茶菊出浙江江西者佳形細小而香產於亳州者不可用白而微臭近日杭州寬橋安徽池州紹興新昌唐公市湖北缺州皆產入藥用陰乾者去蒂以白朮枸杞子地骨皮爲使反河鮑及無鱗魚園菊花大不入藥止可裝枕去風其根治疔腫卻效○羣芳譜一名真菊一名家菊一名茶菊花正黃小如指頂外尖瓣內細萼柄細而長味甘而辛氣香而烈葉似小金鈴而尖更多亞淺氣味似薄荷枝幹嫩則青老則紫實如葶藶而細種之亦生苗人家種以供蔬茹凡菊葉皆深綠而厚味極苦或有毛惟此葉淡綠柔莖味微甘咀嚼香味俱勝攝以作羹及泛茶極有風致○萬歷嘉善縣志花黃梗紫爲甘菊最良野菊叢生花小性涼家菊花大氣弗聚矣○黃茶菊以紫蒂爲佳明目去

風。搜肝氣。治頭暈目眩。益血潤容。入血分。○食物宜忌。黃菊花即甘菊花。苦微甘。性平。益肺腎。去風除熱。補血養目。清眩運頭風。○白茶菊。千葉者佳。通肺氣。止欬逆。清三焦鬱火。療肌熱。入氣分。其根治疔腫喉疔喉癰。○海甯出茶菊。名金井玉欄杆。其花心黃邊白。點茶絕佳。○聖惠方云。黃甘菊雖能燥溼祛風。亦能助火泄氣。

性平。專入陽分。治諸風頭眩。解酒毒疔腫。

撲打損傷。○王阮亭居易錄云。四川提督吳英說。昔得撲打損傷祕方。雖重傷瀕死。但一絲未絕。灌下

立甦。其方以十一月采野菊花。連枝葉陰乾。用時取一兩。加重便無灰酒各一盃。同煎熱服。

紅絲疔。立效驗方。以白菊花葉無白者。別菊亦可。冬月無葉取根。加雄黃錢許。蜒蚰二條。共搗極爛。

從頭敷至絲盡處爲止。用絹條裹緊。隔夜即清。真神方也。

城頭菊

朱排山柑園小識。杭城石罅生菊。枝葉極瘦小。九月開花如豆。香而且甘。雍正初。禁人採取。以充貢品。宮闈以作枕。城上之菊。旣爲野生而味甘。亦一異也。蘇頌圖經云。有一種開小小花瓣。下如珠子。謂之珠子菊。豈卽此歟。

明目。去頭風喉痹。癩毒涼血。其枝葉鮮者。生搗罨疔瘡。并服其汁。兼治蛇咬瘰癧。梅瘡眼癩。煎洗天泡。

瘡亦效。

金鈴菊

百草鏡云。采花乾之作枕。除頭風目疾內熱。洗風火眼。止熱瀉。搗罨一切腫毒。諸蟲咬螫。有效。胃虛便滑無實熱者忌用。以其苦寒傷胃能作瀉也。○羣芳譜載金鈴菊花小如鈴。其幹長與人等。凡菊葉皆五出。此葉獨尖長七出。花與葉層層相間。不獨生於枝頭。此乃家種金鈴菊。非野生金鈴菊也。然功用要亦彷彿。

金箭頭

馬伯州菊譜。花長而末銳。枝葉可茹。名金箭頭。又名風藥菊。專治頭風。較他菊十倍。

菊米

處州出一種山中野菊。土人采其蕊乾之。如半粒棗豆大。甚香而輕圓黃亮。云敗毒散疔。去風清火。明目爲第一。產遂昌縣石練山。

菊根

張介賓本草正云。白菊根善利水。搗汁和酒服之。大治癰閉。

瘰癧未破。醫學指南。採野菊根搗爛。煎酒服。渣塗上自消。不消自破。

睡蓮

廣志。睡蓮布葉數重。葉如荇而大。花有五色。當夏晝開。夜縮入水底。晝復出。與夢草晝入地夜即復出。相反。廣州有之。諺曰。毋佩睡蓮。使人好眠。綱目。蔬部載睡菜。而睡蓮獨遺。故補之。○張翮大觀錄。綽菜。夏月生於池沼之間。葉類茨菰。根如藕條。食之令人思睡。又名暝菜。○嶺南雜記。睡蓮菜一名瑞蓮。花瓣外紫內白。榦如斂股。心似雞頭。以水淺深為短長。日沈夜浮。必雞鳴采之。始得出高州。

佩之多好眠。廣志。清香爽脆。消暑解醒。嶺南雜記。

瑞香花

粵語。乳源多白瑞香。冬月盛開如雪。名雪花。刈以為薪。雜山蘭芎藭之屬燒之。比屋皆香。其種以攀枝為上。有紫色者香尤烈。雜衆花中。花衆往往無香。皆為所奪。一名奪香花。乾者入藥用。綱目芳草內瑞香條。止載其根。治急喉風。用白花者。研水灌之。亦不言其花之功用。故補之。

稀痘。治乳岩初起。

藥性考。瑞香花。醃糖饒芳甘。清利頭目。齒痛宜含。

子午蓮

綱目水草部。入蘋。以為此即大葉之蘋也。古人以為食品。祭用蘋蘩。即此。今浙人呼為子午蓮。生水澤。

陂蕩中葉較荷而小。缺口不圓。入夏開白花。午開子斂。子開午斂。故名。采花入藥。治小兒急慢驚風。煎湯服用。七朶或十四朶。杭城張子元扇店。施此救人多年矣。

桃金娘

粵志。草花之以娘名者。有桃金娘。叢生野間。似梅而未微銳。似桃而色倍賴。中莖純紫。絲綴深黃。如金粟。名桃金娘。八九月實熟青紺。若牛乳狀。產桂林。今廣州亦多有之。粵歌云。攜手南山陽。采花香滿筐。妾愛留求子。郎愛桃金娘。○花鏡。金絲桃一名桃金娘。出桂林郡。花似桃而大。其色更賴。中莖純紫。心吐黃鬚。鋪散花外。儼似金絲。八九月實熟青紺。若牛乳狀。味甘。可入藥用。如分種。當從根下劈開。仍以土覆之。至來年移植便活。

花。行血。

子。味甘入脾。養血明目。

假素馨

出廣中。青藤仔花也。○粵語。青藤仔葉長三四寸。多芒刺。莖大如指而堅韌。人家日用之。猶北地之用柳條。

煎湯洗瘡疥良。

千金花

此即千金草花。千金草即本經蘭草。今所呼孩兒菊省頭草是也。二月宿根再發。紫莖素枝。赤節綠葉。對節生。光澤有歧。嫩時可採可佩。八九月漸老。枝頭成穗。作花紅白狀。似難蘇。久之花瓣轉白。絨裂如毳。毳中有子一粒。絨著子上。色黑味苦。臭香氣裂。即千金花也。瀕湖綱目僅載其葉之用。本草乘雅云。以千金花煮酒。臭類木香。苦甚黃連。用治滯痢。獲效頗捷。予故採其說入花部。以補所未備。花氣香味苦。浸酒治滯下。以其能開辟不祥。利水道。宜氣四達之功耳。乘雅

梧桐花

山海草函。治杖丹癩頭湯火傷。

金鳳毛

汪連仕云。今人呼翠翎草。翠遠如翎。細葉塌地而生。與翠雲草鳳尾不同。敏按此種即萬蘿。今人編竹為亭臺。植之盆中。秋開大紅小花者。是也。

治耳疔痔漏。

十姊妹

一名佛見笑。汪連仕云。取其根葉陰乾為末。蜜糖湯調服。治傷寒危篤立效。乃元升觀之祕方。

兩韭

汪連仕草藥方云。兩韭生水澤旁。即青茨菇花。去溼之功同茵陳。散一切疔腫。消痔漏明目。

罌粟子油

固精。物運小識

佛前舊供花

雲谷醫抄。治臍瘡爛腿。用佛前多年陳久供花。取來用香油浸貼。即愈。

果部上

延壽果

乃鹿銜草之子。又松潘衛志有延壽果。云果生於土。味甜似山藥。並無樹果。此或名同而物異也。○按鹿銜千金方名鹿藥草。其葉大而面綠背青者為真。蘇恭言有大小二種。保昇言葉似茺蔚。叢生有毛者。吳風草也。此草惟生於秦地者有子。土人名曰延壽果。

仁恕堂筆記。張掖河西地有草根。一種形如黃連。盤根屈曲。有若然。邊人取之。實籩豆用之。供餽遺。名曰延壽果。俗又稱鹿跑草。其味甚甜。

理血中邪溼。溫補下元。去風痺癱瘓痛。小兒食之。定驚悸。三邊紀略。本草逢原云。味微瀋而甘。不特有益老人。而嬰兒先天不足者。尤爲上藥。惜乎南方罕得也。

櫻額

果屬也。產關東烏喇口外。其樹叢生。果形如野黑蒲萄而稍小。鮮實甚美。曬乾爲末。可以致遠。○盛京志。一名稠梨子。實黑而澀。土人珍之。閒以作麪。暑月調水服之。可止瀉。

按宦遊筆記。郁李卽棠棣。結子如櫻桃。南產者酸澀不堪食。盛京出者又名櫻額。味甘鮮。曬乾爲末。更佳。

味甘澀。性溫煖。補脾。止洩瀉。

倒吊果

御製幾暇格物編。俗名吊搭果。形似山梨而小。體微長。味酢。肉多沙。長蒂。諸果始生時皆向上。此果花實皆下垂。故名。生時堅澀。熟乃沙。樹枝葉俱如梨。爲秦中物產。今遵化沿邊有之。而考之書籍草木諸譜。皆不載倒吊之名。惟上林賦云。答選離支。答選音近打拉。張揖注云。答選果名。按梅堯臣牡丹詩。用打拉二字。北人方言以欹垂爲打拉。是答選名果。或因其下垂也。說文海篇俱作榕欐果。今名吊搭。或是答選音之轉耳。

性暖。利胸膈。健脾消食。

飛松子

雲南土司志。邊境各土司深山中。產一種飛松子。結實熟時。人欲取之。子輒飛去。夜則仍歸根下。土人記其處。俟夜過。子掘其根而取之。饋遺以爲珍品。味絕香美。○徐霞客遊記。飛松一名狐實。亦作梧實。正如梧桐子。而大倍之。色味亦如梧桐子。而殼薄易剝。坐密樹中。一見輒伐樹。乃可得。遲則樹卽存。而子俱飛去。一空株矣。故曰飛松。惟巔堂關外野人境有之。其葉如柳。味絕類土豆。○滇略。梧實大如豆。殼脆易剝。不與他處類。俗謂之山松子。亦曰飛松。○朱排山柑園小識。飛松出滇南。似梧桐子稍大而微長。內外色味俱肖。而香美過之。蔓生松樹上。土人甚珍之。

下氣消痰。通和血脈。能返魂。凡有人魂神不安。及驚越失魂。神不守舍。一切等症。此爲要藥。故靈璧趙氏天王補心丹。治怔忡用之。張菴猗言。十香返魂丹。加飛松子殼。更效。

茶朮子

邊輿考。其樹出遼東塞外。高有三尺許。葉如南方棟樹。背有黃白點。花四出。形如手。碧色。或有八出者。結子大如拳。熟便可食。其甘如飴。其樹浸水。可爲油燃燈。入藥用子。治一切病。遼塞無藥。土人有病者。取茶朮子啖之。卽愈。

椰油椰中酒椰膏

臺灣使槎錄云可佐膏火或云用火炙椰其油自出凡揀椰子以手搖之聽水聲清亮則心大而甜其肉厚水聲濁則否○澠水燕談錄椰子生安南及海外諸國木如櫻櫚大者高百餘尺花白如千葉芙蓉一本花不過三五顆其大如斗至差小外有黃毛軟皮中有殼正類檳榔殼上有二穴牙出穴中殼內類蘿菔皮味苦肉極甘脆蠻人甚珍之○劉恂嶺表錄異椰殼中有液數合如乳亦可飲之冷而動氣○廣果錄椰樹高六七丈直竦無枝至木末乃有葉如束蒲長二三尺花如千葉芙蓉白色終歲不絕葉間生實如瓠繫房房連累一房二十七八實或三十實大者如斗有皮厚苞之曰椰衣皮中有核甚堅與膚肉皆緊著皮厚可半寸白如雪味脆而甘膚中空虛又有清漿升許味美於蜜微有酒氣曰椰酒蘇軾詩美酒生林不待饑言椰中有自然之酒不待饑狄而作也○廣東名勝志文昌縣玉陽山椰子最多大三四圍高二三丈通身無枝至百餘年纔有葉三月花連著實房房三十或二十七八子至六月熟七月收

療齒疾凍瘡華夷花治消渴塗髭髮立黑灑水燕

椰中酒 食物考緬甸有樹頭酒即椰子中漿汁也華夷花木考載林邑王與南越王有怨遣刺客匕其首梟之樹上化為椰子樹當刺時王方大醉故椰漿如酒飲之醉人

祛風消水腫止吐血塗頭黑髮然多食昏人動氣增渴性溫故也久服可烏髮食物

椰膏 粵載椰子殼土人取以熬膏色黑如漆塗癬良

椰皮 煮汁止血療吐逆酒水燕 談錄

椰肉 益氣生風酒水燕 談錄

楊梅下疳筋骨疼痛 不藥良方椰子殼燒存性臨燒以滾酒泡服二三錢暖臥取汗其痛即止

宜母果

嶺南雜記似橘而酸又名宜濛子○元吳萊有宜濛熱水歌○粵語宜男子似橙而小二三月熟黃色味極酸孕婦肝虛嗜之故曰宜母元時於廣州荔支灣作御果園栽種里木樹大小八百株以作渴水里木即宜母子也一名黎濛子吳萊詩廣州園官進渴水天風夏熱宜濛子百花醞作甘露漿南園煮成赤龍髓蓋以里木子榨水煎糖也蒙古以為舍里別即渴水也一名藥果當熱時人家競買以多藏而經歲久為尚汁可代醋染大紅以其汁調乃上○藥性考黎濛子大如梅形似橘孕婦宜食能辟暑即宜濛子孕婦食之能安胎故又名宜母

醃食下氣和胃懷孕不安食之良製為漿辟酷暑又能解渴○宜母子以鹽醃歲久色黑可治傷寒痰

火語

天師栗即婆羅子

一名娑羅子。治胃痛最驗。綱目於主治下失載。○通雅。娑羅。外國之交讓木也。葉似柝。皮似玉蘭。色葱白。最潔。鳥不棲。蟲不生。子能下氣。○益部方物記。生峨嵋山中。類枇杷。數葩合房。春開。葉在表。花在中。或言根不可徙。○吳船錄。木葉如海桐。又似楊梅。花紅白色。春夏閒開。長安客話。臥佛寺內娑羅樹二株。子如橡栗。可療心疾。○宸垣識略。娑羅花苞大如拳。葉如枇杷。凡二十餘葉相沓。捧苞類桐花。一簇三十餘朵。經月方謝。○留青日札。娑羅樹出西番海中。子在潯州時。官圃一株甚巨。每枝生葉七片。有花穗甚長。而黃如栗花。秋後結實如栗。可食。正所謂七葉樹也。藥性考。娑羅子一枝七葉九葉苞如人面。花似牡丹。香白。

肉味苦微涼。寬中下氣。治胃脘肝膈膨脹。疝積瘧痢。吐血勞傷。平胃通絡。用陰陽瓦炙灰。或酒煨食俱效。單用不入他藥。或稱天師栗。非也。○葛祖遺方。味甘溫無毒。治心胃寒痛。蟲痛。性溫殺蟲。胃痛。○百草鏡。用莎婆子。即娑羅子也。以一枚去殼。搗碎煎服。能令蟲從大便出。三服除根。

九種心痛。楊春涯驗方。娑羅子即武吉。燒灰沖酒服。

化州橘紅橘類上絲。糖橘紅。橘餅。藥。柑橘餅。青鹽陳皮。橘茗。

嶺南雜記。化州仙橘。相傳仙人羅辨種橘於石龍之腹。至今猶存。惟此一株。在蘇澤堂者為最。清風樓

次之。紅樹又次之。其實非橘。皮厚肉酸。不中食。其皮蓋爲五片七片。不可成雙。每片異者可值一金。每年所結。循例具文報明上臺。屆期督撫差親隨跟同採摘批製。官斯土者亦不多得。彼土人云。凡近州始開。譙樓更鼓者。其皮亦佳。故化皮賈者多。異者甚難得。○關涵嶺南隨筆。化州署橘樹。一月生一子。以其皮入藥。痰立解。後爲風折。卽其地補種。氣味便殊。今稱化州橘紅者。皆以增城香柚皮僞代之。能化物而不能自化。○粵語。化州有橘一株。在署中。月生一子。以其皮爲橘紅。淪湯飲之。痰立消。曩亦進御。今爲大風所拔。新種一株。味不及。化州故多橘紅。售於嶺內。而產署中者獨異。○本草乘雅云。橘柚專精者實。實復專精者皮。皮布細竅。宛如人膚。卽脈絡肉理筋膜子核。各有屬焉。故力能轉入爲升。轉升爲合。卽轉合爲開也。種種形證。悉從入從合。故胸中瘕熱。水穀失宜。神明不通。氣逆及氣臭耳下氣者。出已而降。玉衡機轉之妙用也。○識藥辨微云。化橘紅近日廣中來者。皆單片成束。作象眼塊。或三十五十片。兩頭以紅繩繫之。成一把。外皮淡紅色。內腹皮白色。周身亦有豬鬃皮。此種皆柚皮。亦能消痰。又有一種爲世所重。每個五片如爪。中用化州印。名五爪橘紅。亦柚皮所製。較掌片爲佳。究之異者遠甚也。真化州橘紅煎之作甜香。取其汁一點入痰盂內。痰皆變爲水。此爲上品。○梁氏家藏蘇澤堂化州橘紅。每一個七破。反摺作七歧。曬乾。氣甚香烈。有橘紅歌云。石龍靈異不可測。首向青霄尾潛澤。有時聲吼洪如鵝。有時噴沙白似雪。鳴或宰相應期生。鳴或科甲蟬聯翼。由來州牧履其常。惟恐怪奇

咳愚俗。享碑鼓吹。鎮其頭。重鑊壘石。填其穴。天生靈異。無可憑離。奇屈曲。化爲橘。橘之爲性。溫且平。能愈傷寒。兼積食。消痰止咳。功更奇。誰先辨此真龍脈。價值黃金不易求。寄語人間休浪擲。

治痰症如神。消油膩。穀食積。醒酒。寬中。氣虛者。忌服。解蟹毒。熱烹。編食蟹中。毒橘紅煎湯服。

辰砂五香丸。治翻胃。噎膈。嘔吐。張氏祕效方。用血竭。乳香。沒藥。辰砂。各一錢五分。元胡一錢。化州橘

紅一錢。共爲末。每三分酒服。

羊癩瘋。良方集要。雄黃。天竺黃。川貝母。各五錢。真琥珀一錢。麝香一錢。陳膽星一兩。以上各另研。全

蠟十四個。去足酒洗。遠志肉。甘草汁製。鈎藤。防風。化州橘紅。薑衣。羌活。茯苓。天麻。石菖蒲。各五錢。以上

不可見火。曬乾。蟬蛻三十個。白附子六錢。共爲末。煉蜜爲丸。如龍眼大。每服一九。開水下。

按百草鏡。廣東高州府化州出陳皮。去白者名橘紅。今亦罕得。土人以柚皮代之。出售外方。價亦不貴。

辨別之法。須先看皮色筋味。如皮皺粗。色黃而厚。內多白膜。味反甜帶辛者。乃乳柑皮也。只堪點茶。不

堪入藥。皮極厚而泡鬆。紋極細而色黃。內多膜無筋。味甜多辛少者。乃柚子皮也。性忌冷服。紋細。色紅

潤而皮薄。多有筋脈。味苦辛。入口芳香者。乃真化州橘紅也。入藥以此種爲貴。然其性酸削。能伐生氣。

消痰雖捷。破氣損人。不宜輕用。近日有一種產仁和塘棲鎮蜜橘皮所製。曰甜橘紅。清香入肺。醒脾。消

痰之功。不下化產。而性不峻削。名爲香金板。南人體弱者宜之。○本草乘雅。武林棲水出蜜橘。凡數十

品名金錢穿心者。雖秀色可觀。又不如佛肚臍形。小皮癩。甘美可口。霜降採取。氣足味足。密藏至春。剖皮抽脈。破囊吮汁。亦可振醒精神。爲得句破疑之助。

橘瓢上絲

金御乘云。橘絲專能宣通經絡滯氣。予屢用以治衛氣逆於肺之脈脹。甚有效。綱目橘瓢上筋膜。只引大明治口渴吐酒。而沒其專功。何耶。因仍其說以補之。

通經絡滯氣脈脹。驅皮裏膜外積痰活血。

糖橘紅

仁和塘棲鎮者佳。以皮去白。切小塊。用糖霜製。

味甘辛。性溫。理氣快膈。治嗽消痰。食物宜忌

橘餅

閩中漳泉者佳。名麥芽橘餅。圓徑四五寸。乃選大福橘蜜糖釀製而成。乾之。面上有白霜。故名。肉厚味重。爲天下第一。浙製者乃衢橘所作。圓徑不及三寸。且皮色黯黑。而肉薄。味亦苦劣。出塘棲者爲蜜橘餅。味差勝。然亦不及閩中者。又興化出金錢橘餅。乃取金錢橘製成。小如錢。明如琥珀。消食下氣。開膈。捷於砂仁。荳蔻。又可醒酒。醉後點茶。尤爲妙供。

味甘性溫。下氣寬中。消痰運食。食物黃疸臌脹。除膈止消。經驗廣集

治諸色痢。行篋檢祕。橘餅一兩。圓眼肉五錢。冰糖五錢。水二盃。煎一盃。露一宿。溫服。不露亦可。至重者不過二三服。無不神驗。

治瀉。梁氏集驗。夏月喫瓜菓太多。以致洩瀉不休。用漳州好橘餅一枚。細切薄片。作二次。放茶鍾內。

沖服。○橘餅湯。經驗廣集。治傷食。生冷瓜菓。泄瀉不休。橘餅一個。切薄片。放盤內。以沸湯潑蓋住。泡

汁出。即飲湯。連餅食。一餅可作數次服。

百菓酒。香櫛佛手各二個。核桃肉。圓眼肉。蓮肉。橘餅各半觔。柏子仁四兩。松子三兩。紅棗二十兩。黑

糖三觔。乾燒酒五十觔。浸此酒補虛益腎。乃河中李太守祕方。

藥製柑橘餅

北硯食規。用元明粉半。夏青鹽。百藥草。天花粉。白茯苓各五錢。訶子。甘草。烏梅。去核各二錢。研砂。桔梗

各三錢。以上俱用雪水煎半乾。去渣。澄清。取湯。煎柑橘。炭壘微火烘。日翻二次。每次輕輕細捻。使藥味

盡入皮內。如捻破則不妙。能清火化痰。寬中降氣。

青鹽陳皮

百草鏡。製青鹽陳皮。即蘇州宋公祠遺法也。陳皮二觔。河水浸一日。竹刀輕刮去浮白。貯竹篋內。沸湯

淋三四次。用冷河水洗淨。不苦爲度。曬至半乾。可得淨皮一觔。初次用甘草烏梅肉各四兩。煎濃汁。拌曬。夜露。俟酥捻碎如豆大。再用川貝母去心四兩。青鹽三兩。研爲細末。拌勻。曬露乾。收貯。消痰降氣。生津開鬱。運脾調胃。解毒安神。

橘芥

橘樹上生。如木薑。棗皮紅色。

治乳癰。煎酒服。

荳蔻檳榔

此卽綱目檳榔注內所云蒟子是也。形如雞心。一頭尖。一頭圓。僅如小指大。外有殼包之。殼白色如荳蔻形。尖如橄欖。長不及半寸。藥肆每於荳蔻中檢出。每荳蔻一觔。不過數粒。價亦倍。廣南檳榔亦無有專貨之者。或云。此種始爲雞心檳榔。廣南所市者。皆山檳榔。及大腹子而已。時珍循竺氏說。以山檳榔爲蒟子。恐誤。

治反胃噎膈。餘功與廣檳榔同。

按百草鏡。檳榔今藥肆所市者。形扁而圓大。乃大腹子。俗名雌檳榔。廣東文昌縣出者。名文昌子。尖小者。名主賜檳榔。又名喫子。其形長尖。狀如雞心。內有錦紋。又名雞心檳榔。卽雄檳榔也。另有一種雞心

檳榔來自洋舶。從白荳蔻內揀出。極罕有。形亦長尖。極小。外有殼。儼如棗核。故又呼棗核檳榔。入藥最勝。

耳聾灸法。經驗廣集。用雞心檳榔一個。將臍內挖一窩如錢眼大。實以麝香。坐於臍耳內。以艾炷灸之。不過三四次。即效。

小兒疳積。胡開甫方。史君子五個生。五個熟。荳蔻內檳榔。用薑湯磨汁。空心蘸史君子肉食。一二次即愈。

聾耳出膿。荳蔻檳榔為末。吹入立愈。救生苦海
口瘡。荳蔻內檳榔煨存性。加輕粉敷之。廣果

瑣瑣蒲萄

出土魯番。北京貨之。形如胡椒。係蒲萄之別種也。回疆志。蒲萄一根數本。藤蔓牽長。花極細而黃白色。其實有紫白青黑數種。形有圓長大小。味有酸甜不同。一種色綠而無核。較黃豆微大。味甘美。一種色紫而小如胡椒。即瑣瑣蒲萄。一種色黑。形長寸許。一種色白而大。皆七八月熟。晾乾可致遠。○本經逢原云。瑣瑣蒲萄似蒲萄而瑣細。故名。生於漠北。南方閒亦有之。其幹類木。而係藤本。其子生青熟赤。乾則紫黑。能攝精氣。歸宿腎藏。與五味子功用不甚相遠。凡藤蔓之類。皆屬於筋。草木之實。皆達於藏。不

獨此味爲然。此物向供食品。不入湯藥。故本草不載。近時北人以此強腎。南人以之稀痘。各有攸宜。○五雜俎。西域白蒲桃。生者不可見。其乾者味殊奇甘。有兔眼蒲桃。無核。又有瑣瑣蒲桃。形如茱萸。小兒食之。能解痘毒。于文定筆廬云。瑣瑣卽駸婆之訛。○黎媿曾仁恕堂筆記。瑣瑣蒲萄。于文定引西京羽獵賦。謂瑣瑣當爲駸婆。固屬附會。而以爲別有一種。亦非河西蒲萄。雖引根牽蔓。不異中土。而結實大。長如馬乳。色深紫。味亦殊甘。一枝千百顆。大者在上。細在下。垂取而乾之。大者爲白蒲萄。細者名瑣瑣。非兩種也。故俗呼爲公領孫。惟綠蒲萄則來自西域。非中土所有。

味甘。核細微鹹。○痘學真傳云。味甘酸。性平溫。○百草鏡云。性熱。入脾胃二經。作酒彌佳。治筋骨溼痛。利水甚捷。除遍身浮腫。痘瘡不出。酒研和飲。神效。

強腎。瑣瑣蒲萄。人參。各一錢。火酒浸一宿。侵晨塗手心。摩擦腰脊。能助腎力強壯。若臥時磨擦腰脊。力助陽事堅強。尤爲得力。

稀痘。瑣瑣蒲萄一歲一錢。神黃豆一歲一粒。杵爲細末。一陽夜蜜水調服。并擦心窩腰眼。能助腎祛邪。以北方物專助東南生氣之不足也。然惟稟質素弱者用之有益。若氣壯偏陽者勿服。恐其助長淫火之毒也。

按紫桃軒雜綴。瑣瑣蒲萄神農九草之一。中土久有。不俟博望從西域帶來也。吾里東塔朱買臣墓有

之。戊子，余曾歷平湖幕署，有一枝蔓延滿架，夏開瑣碎花，結實如菉豆，望不可見。吾杭螺螄山汪姓家，亦有此。然食之味薄，不若甘肅者味厚也。入藥自宜以西北者爲優。

南棗 山棗
藏棗

山金華東陽縣茶場，以透明如血，七枚長一尺者佳。陳者入藥。○宦遊筆記：金華東陽縣茶場出棗，其大如拳，核尖細如黍，決之卽脫，清甘香脆。以此名聞天下，明中葉尙存數柯，今此種已絕矣。惟東南諸鄉於高阜地種之，雖不及茶場，亦美甲於他處。其製法不一，未熟輒擊，以湯沃之，使變色，謂之湯紅。乾則其色紫，已熟者名樹頭紅，乾則其色丹。過熟者，以所煮餘汁煮之，色味似蔗糖，謂之糖棗。此則以時食爲美，不作乾也。又有一種棘，差小而圓，味殊勝棗。○物理小識：南棗出蘭溪，搖而知之，其肉離核，味甘微酸，性溫補，赤入心，酸斂肝。

博記單方：眼疾中有一種名紅線，鎖目，乾治法，取南棗核二十一粒，將核截兩斷，去仁淨，以銅綠塞孔中，仍將棗核合上，以紙貼封一起，放爐中燒紅，取出，以盞蓋存性，每日只用七個，研極細末，調生男乳水抹，三日立效。

腸紅下血，南棗五枚，同黃芪二錢，煎湯，五更服，神效。○又方：不藥良方，南棗十枚，槐米一兩，同煎，去米食棗，日三次卽愈。

痔瘡。救生苦海。南棗一枚。去核。龍頭骨一個。搗碎。銅青裝滿棗肉。紮緊。火煨烟盡。伏土存性。研細。用秋海棠煎洗。然後用藥和水敷之。三日消。

除壁蝨。集聽。大南棗去核。入水銀。火煨熏。

走馬牙疳。不藥良方。陳年南棗核。燒灰。研末。摻之。

棗參丸。醒園錄。用大南棗十枚。蒸軟。去皮核。配人參一錢。布包。藏飯鍋內蒸爛。搗勻為丸。如彈子大。收貯用之。補氣最捷。

仙果不饑方。醒園錄。大南棗一觔。好柿餅十塊。芝麻半觔。去皮炒。糯米糝半觔。炒。將芝麻研成細末。棗柿同入飯中。蒸熟。取出去皮核子蒂。搗極爛。和麻米二粉。再搗勻為丸。曬乾收貯。加參更妙。

本經逢原云。古方中用大棗皆是紅棗。取生能散表也。入補脾藥宜用南棗。取甘能益津也。其黑棗動溼中火。損齒生蟲。入藥非宜。

山棗

出廣西肇慶府。葉如梅。果似荔枝。九月熟可食。○柳貫打粵譜。山棗狀如棗而圓。色青黃而味甘酸。出

廣州。

甘溫無毒。生和脾胃。益血壯神。

藏棗

朱排山柑園小識。藏棗來自西藏。實產於天竺。大者長二寸許。形味絕似南棗。能補氣。功同人參。藏中亦不易得。其核似蠶蛹形。而無仁。

補虛勞。定神志。治怯如神。

落花生油

一名長生果。福清縣志。出外國。昔年無之。蔓生園中。花謝時。其中心有絲垂入地結實。故名。一房可二三粒。炒食。味甚香美。康熙初年。僧應元往扶桑。覓種寄回。亦可壓油。今閩省產者。出興化爲第一。名黃土。味甜而粒滿。出臺灣。名白土。味澀而粒細。其油煎之不熟食之。令人瀉。一名土豆。○彙書。近時有一種名落花生者。莖葉俱類荳。其花亦似荳花。而色黃。枝上不結實。其花落地卽結實於泥土中。亦奇物也。實亦似荳莢。而稍堅硬。炒熟食之。作松子之味。此種皆自閩中來。○物理小識。番豆名落花生。土露子。二三月種之。一畦不過數子。行枝如蘆菜。虎耳藤。橫枝取土壓之。藤上開花。絲落土成實。冬後掘土取之。殼有紋。豆黃白色。炒熟甘香。似松子味。又云。番豆花透空入土結豆。當通潤臟腑。○酉陽雜俎。又有一種形如香芋。蔓生。藝者架小棚使蔓之。花開亦落土。結子如香芋。亦名花生。○花鏡。落花生一名香芋。引藤蔓而生。葉極開小白花。花落於地。根卽生實。連絲牽引。土中纍纍不斷。冬盡掘取煮食。香甜。

可口。南浙多產之。○萬歷仙居縣志。落花生原出福建。近得其種植之。○嶺南隨筆。花與葉不相見。爲換錦花。莢與蒂不相見。爲落花生。種法以沙壓橫枝。則蔓生。花生不莢。其莢別在根莖間。亦稱落花生。○逢原云。長生果產閩地。花落土中卽生。從古無此。近始有之。味甘氣香。能健脾胃。飲食難消。運者宜之。或云與黃瓜相反。予曾二者並食。未蒙其害。因表出之。花生殼。韓柳生云。焙研極細末。著人身體。沾肉卽生奇癢。○敏按劉啓堂經驗祕方。長生果一名落花生。又名落地生。不可與黃熟瓜同喫。喫則立死。黃熟瓜卽香瓜。非長而白色。可以醃喫之。黃瓜也。始知俗傳之誤。○兩蓑翁食物便覽。香芋一名落花生。久服多男。

多食治翻胃。然其性能動火生痰。常人只宜少喫。從新云。辛甘而香。潤肺補脾。和平可貴。食物宜忌云。性平。味甘。舒脾。廣志云。暖胃。藥性考云。生研用。下痰。炒熟用。開胃。醒脾。滑腸。乾嗽者宜餐。滋燥潤火。按落花生。乃花謝落土。感土氣而成實。故有入脾和胃之功。又能通肺氣。曾見與化令王翁一子。酷嗜此物。後患軟癱。豈非動火生痰之明驗歟。近見人以花生入糖湯煮。浸醬油入素供。更爲生痰。老人尤不宜多食。

俞友梁有烏鬚簡便方。止用落花生淨肉。炒極焦黑。研極細。熬鬚。一二日後。色黑如漆。

四日兩頭瘡。卽三陰瘡。

安定臣云。昔曾患此。諸方莫療。有人教服炒熟花生。每日食一二兩。不半月而愈。

玉神庵尼清慧言花生人云服之生痰有一大家婦咳嗽痰多醫束手不治庵尼雲上勸服花生每日食二三兩漸覺稀少不半年服花生二十餘觔咳嗽與痰喘皆除想亦從治之法也童鹿菴言花生本有滌痰之功予家凡患咳嗽止用花生去殼膜取淨肉沖湯服咳嗽自安豈非化痰之功善於瓜蒌貝母世俗以火炒食反能生痰又凡被馬踢傷者忌服花生服之瘡愈增痛

花生油

一名果油色白甘平氣腥滑腸下積膩膈生痰

核桃油

好者補火若壞核桃榨取者有毒味劣不宜食

阿月渾子

與榛子同類性更溫良能止痢煖腎開胃除腸穢積得木香山莢能興陽

薯良

形如柚圓蔓生紅色浸酒服能活血藥性考

無漏果

此卽海欖乃鳳尾蕉之子或稱爲棗實非棗也以刀剝去青皮石灰湯淪之蜜浸瓶封可久藏寄遠不壞

原书缺页

原书缺页

菱有多種。老則皆可為粉。造粉之法。與造藕粉同。食菱粉而腹脹者。用薑湯或酒解之。

補脾胃。強脚膝。健力益氣。耐飢行水。去暑解毒。

蒂。疣子。俗名飯館。用鮮水菱蒂搽一二次。即自落。

殼。治頭面黃水瘡。醫宗彙編。隔年老菱殼燒存性。麻油調敷。即愈。

無名腫毒。販翁醫要。老菱殼燒灰。香油調敷。即愈。并治天泡瘡。

指生天蛇。醫宗彙編。以風菱角燈火上燒灰存性。研末。香油調敷。未潰者即散。已潰者止痛。立愈。

治脫肛。張氏必驗方。先將麻油潤溼腸上。自去浮衣。再將風菱殼水淨之。即刻縮上不脫矣。

芡粉

嘉泰會稽志。芡一名雞頭。山陰梅市產之最盛。有數等。小白皮最佳。大白皮中。白皮其皮甚堅難齧。黃

嫩者太軟。皆不逮也。造粉與藕菱同法。

益精氣。強智力。靈耳目。固精添髓。養餘月令

九龍丹。販翁醫要。治腎水不足。邪火淫動。遺精淋濁等症。枸杞酒蒸。金櫻子焙。山榿肉炒。石蓮肉

炒。蓮鬚焙。熟地搗膏。芡粉炒。白茯苓當歸等分。共為末。煉蜜丸。如桐子大。每服三錢。空心白滾湯下。

本草綱目

拾遺卷八

果部下

諸荔枝

陳定九荔枝譜。有奇荔枝能治病。經兵燹後亦僅有存者。今錄之於左以備用。
粵語南方離火之所出。荔枝得離火多。故一名離枝。亦曰麗枝。麗離也。文從兩日。天地之數。水一而火二。故麗從兩日。日爲五行之華。月爲六氣之精。日麗乎支。猶之乎日出於扶桑也。麗枝乃震木之大者。震木以扶桑爲宗子。而麗支其支子。故曰麗支。日出於離。離盡午中。故麗支以夏至熟。離爲坤之中。其色黃。故曰黃離。麗支之核。外赤內黃。則黃離之美也。坤之中其味甘。故曰甘節。麗支之肉少酸多甘。則甘節之吉也。荔枝以臘而萼。以春而華。夏至而翕然。子赤。生於木而成於火也。皮紅肉白。而核復純丹。火包其外。復孕其中也。肉白爲金。金爲內外火所煉。故味醇和而甘。其液乃金水之精。甘又屬土。備五行之粹美。而以火爲主者也。粵以火德王。凡花多朱色。皆火花。實多朱實。皆火實。太陽烈氣之所結。火實之屬。凡百種。而荔枝爲長。火爲母。荔枝則火之長子也。荔枝多食。未嘗傷人。飲蜜一杯卽解。或以青

鹽調白酒飲。或飲荔支酒過醉。則以荔支殼浸水飲之。又荔支多露。有過食者味爽。就樹閒先吸其露。次嚙其香。使氤氳若醉。五內清涼。則可以消肺氣。滋真陰。卻老還童。○荔支歲初而蕾。二月而花發。發時多電。則花落實小。多雨則花腐。少雨則花液相膠而不實。估計者視其花以知其實多少。而判之。藏荔支法。就樹摘完好者。留蒂寸許。蠟封之。乃翦去蒂。以蠟封翦口。以蜜水滿浸。經數月。味色不變。保和枝。產泉郡北陳巖山蓮花峯。實大色黃。可消胸膈煩悶。調逆氣。導營衛。其核燒灰酒下。可已痢。止腹痛。

回春果。產漳郡康仙祠。葉大如掌。色翠。與衆荔殊。其實味苦澀酸辣。不可口。采以浸酒。能已風去癘。治癩如神。葉亦然。以上國產。

紫玉環。產四川瀘洲。曝乾。啖一枚。可除瘴癘。即早行大霧中。嵐氣不得侵也。以上川產。

玉露霜。產廣東新會崖門山。白殼丹肉。不摘。經冬不落。其味甘酸。啖之止嗽。降肺火。療怯症。妃子笑。產佛山。色如琥珀。大如鵝卵。核小如豆。漿滑如乳。啖之能除口氣。使齒牙經宿猶香。

牟尼光。產潮州大浦山中。味如乳。飲之功同參苓。以上廣東產。

墨荔。產廣西平樂萬山中。皮肉俱黑如墨。味臭而苦辣。不可啖。或曰。出賀縣山中。或曰。荔浦脩仁二邑山中多有之。味臭。有大毒。誤食之。必心腐腸爛而死。

按荔枝名品最多。有綠皮者。綠核者。有黃皮者。白皮者。三月四月七月熟者。然其性大約相同。惟此數品。治療各異。故類及之。

殼。痘出無漿。心不爽快。以荔枝殼煎湯飲。不藥良方。○王聖俞云。荔枝能理血透發分標。凡一切疹瘡不能透達。痘出模糊一片者。非此不能解表成漿。

血崩。同壽錄。用荔枝殼燒灰存性研末。好酒空心調服。每服二錢。輕者一服即止。至重者三服愈。

龍眼核殼

綱目龍眼核主治。多言其肉。至其核之功用最廣。止載其能治胡臭。他皆未之及。又不及其殼。今悉採他本補之。

腦漏。黃氏醫抄。用廣東圓眼核。入銅爐內燒烟起。將筒熏入患鼻孔內。數次即愈。

一切瘡疥。高只元傳世方。用龍眼核煨存性。麻油調敷即愈。

治癬。祝氏效方。圓眼核二個。去外黑皮搥碎。雄黃硫黃。陀僧。枯礬。川椒末。各三分。共爲細末。以生薑蘸擦患處即愈。○集聽方。患癬。用龍眼核去外黑殼。用內核。米醋磨搽。

滅斑生髮。張觀齋云。桂圓核仁。凡人家有小子女者。不可不備。遇面上或磕傷及金刃傷。以此敷之。定疼。止血。生肌。愈後無癍。若傷鬢髮際。愈後更能生髮。不比他藥。愈後不長髮也。

小腸疝氣。不藥良方。荔枝核。龍眼核。各七枚。俱燒灰。大茴二粒。炒。共爲末。好酒調下。外用生薑搗爛。

敷腎。卽消。○經驗廣集。治疝氣偏墜。小腸氣痛。神效。荔枝核炒。龍眼核炒。小茴香炒。各等分。爲細末。空心服一錢。以升麻一錢。水酒煮送下。

念珠丸。張氏必效方。治陰疝偏腫。囊中疼痛難忍。乳香去油淨二錢。圓眼核三錢。黃蠟二兩。和藥末。

成丸。彈子大。分爲一百零八丸。蛤粉爲衣。用線穿起。露一宿收貯。遇症每服三九。乳香湯下。

小便不通。用龍眼核去外黑殼。打碎。水煎服。如通後欲脫者。以圓肉湯飲之。

足指癢爛。藥鏡。用桂圓核燒灰。摻之。立效。

無名腫毒。黃氏醫抄。桂圓核以水調塗。俱效。能止折傷出血。療金瘡滅斑。

烟筒傷喉。萬近蓬云。凡烟管誤戳傷喉。出血不止者。用桂圓核去外黑皮。惟取內核仁。焙搗爲極細

末。看喉中傷處。用筆管安末吹之。卽定疼止血而愈。屢試果驗。

治刀傷出血。殷仁趾傳方。以龍眼核炒。磨細敷之。

刀斧傷。黃販翁醫抄。桂圓核不拘多少。用火燒枯存性。研末。摻患處。卽愈。

按陳杰回生集。大興李振祖西平云。龍眼核末敷金刀傷。昔在西秦及巴里坤軍營。救愈多人。查本草綱目及別集本草。俱未紀載。可知世間有用之材。自古迄今湮沒者。不可勝計矣。

龍眼殼。○乃龍眼外裏肉之殼。本鰲黃色。閩人恐其易蛀。輒用薑黃末拌之。令黃且易悅目也。廣中桂

圓多不用薑黃拌。故今廣圓猶存本色。入藥用殼。須洗去外色黃者。敷湯泡傷。行篋檢祕。用圓眼殼煨存性。爲末。桐油調塗患處。卽止痛。愈後又無斑痕。真良方也。泉州府志。龍眼最小者呼鬼眼。龍眼是其中者。今不復識別。

蜜望

粵志。其子五月色黃。味甜酸。飄洋者兼金購之。有天桃與相類。六七月熟。大如木瓜。味甜。酢以羹魚尤善。凡渡海者。食之不嘔浪。

肇慶志。蜜望子。一名莽果。樹高數丈。花開極繁。蜜蜂望之而喜。故名。交廣錄。蜜望二月開花。五月子熟。色黃。一名望果。其類有天桃。正月開花。六七月子熟。年歲荒則結實愈多。粵語云。米價高。食天桃。故廣人貴望果而賤天桃。貴之。故望之。蜂望其花。人望其果也。

止船暈。按船暈。北人謂之苦船。苦音庫。此症多嘔吐不食。登岸則已。胃弱人多有之。蜜望果甘酸。能益胃氣。故能止嘔暈。

蒲桃樹

羅浮志。蒲桃樹高二三丈。其葉如桂。四時有花。叢鬚無瓣。如菊出絨毳。長寸許。色兼黃綠。結實如蘋果。殼厚半指。絕香甜。核與殼不相連屬。搖之作響。羅浮湖中多有之。猿鳥含啄之餘。隨流而出。山人阻水。

芋薺粉

取之動盈數斛。以之釀酒。曰蒲桃春。經歲香不減。作膏尤美。

童北硯食規。出江西虔南。土人如造藕粉法製成。貨於遠方。作食品。一名烏芋粉。又名黑三稜粉。

甘寒無毒。毀銅銷堅。除腹中痞積。丹石蠱毒。清心開腎。去肺胃經溼熱。過飲傷風失聲。瘡毒乾紫。可以

起發。北硯食規

野芋薺

生山土中。春有苗三葉。似韭而細。葉上有光。其根如豆大。年久則愈大。入藥用根。一名山芋薺。

磨粉水中濾過。曬乾點眼。去翳障如神。取樹根

按山芋薺喜燥。其生必於高原。乾土尤最易蕃衍。有人移入園圃。一經汗溼。根即朽爛。然其生不易長。

百年纔如錢大耳。昔客東甌。聞馬氏點眼藥粉為天下第一。見其脩製。乃用此磨粉。合海嶽目珠粉。加

入藥中。著效異常。云其性能去面黝斑痣。消痞。去目星。努肉。較產池澤者尤峻利也。

磨光散。種福堂方。點眼神藥。用野芋薺粉洗淨。去皮。石臼中搗爛。密絹絞汁。如做藕粉法。再用清井

水飛曬乾。爐甘石。用黃連。黃柏。黃芩。甘菊。薄荷煎水煨。再用童便煨一次。將藥水飛曬乾。珍珠。入豆腐

內煮過。研細水飛。每芋薺乾粉一兩。配製過甘石五錢。珠末三錢。各將磁瓶收貯。臨用漸漸配和。加冰

片少許點之。

明目去翳祕方。種福堂方。錦紋大黃一兩。北細辛四兩。將二味用上高泉水一百二十兩。將藥入砂鍋。煎至二十兩。以細絹濾去渣。用大銀盃一個盛藥。盃下以磚三塊放定。盃底下將燈盞注麻油。用燈草七根。燃燈熏盃底內。煎藥成膏。滴水成珠。每膏一兩。用野薺粉五錢。多些亦不妨。冰片三分。和勻作錠。如多年厚翳。每兩加水飛過蟬蛻末五分。須要去頭足泥沙。水洗曬乾爲末。水飛三次用。○又方。野薺粉豬胰各等分。搗和。用雞子殼半個。放藥在內。臨臥合印堂上。俟水流入目中。醫隨淚出。二十日即愈。并治田螺頭眼。

櫻桃核

今人常用以洗疹瘡。服之亦發透疹痘。以其得春氣早。而性熱善達表也。綱目不載。豈以發風熱故耶。逢原云。櫻桃核。今人用以升發麻疹。力能助火。大非所宜。春夏時尤忌入藥。用山櫻桃核佳。發麻疹瘡痘。滅斑痕凍瘡。

出痘喉啞。王永光方。用甜櫻桃核二十枚。砂鍋內焙黃色。煎湯服。眼皮生瘤。醫學指南。用櫻桃核磨水搽之。其瘤漸漸自消。

山櫻桃

有毛。與櫻桃別是一種。

辛平味劣。止瀉腸癖。除熱調中。

栗殼

綱目載其治反胃消渴瀉血。此外無他。不知其能解參之力。勝於萊蕪。故急錄之。○楊春崖驗方。解人參。栗子殼煎湯服之良。

刺菱

沙角

乃小菱也。生杭西湖。裏六橋一帶多有之。以其四角尖如鍼芒刺手。故名。春盡時。兒童採取入市貨賣。菱生水中。根苗與大菱不殊。其葉下有氣管。故其性通肝腎。凡一切病多忌生冷。惟此菱不忌。最能開胃生津。其菱大者如蠶豆。小者如黃豆。味絕鮮美。雖至秋老。亦不甚大。蓋地土使然。誠水仙佳種也。○陳溴花鏡。一種最小而四角有刺者。曰刺菱。野生。非人所植。花紫色。人曝其實爲菱米。可以點茶。味甘鮮。性平無毒。生食補脾健胃。止渴生津。平肝氣通腎水。益血消食。老者煎食。健脾止洩痢。根。利水通淋。

沙角

乃菱中一種小者。止兩角。臨平湖一帶多產之。出嘉興者。名餛飩青。以其似餛飩也。較他菱體小味甘。

沙角較餛飩菱尤小。色紅。味甘異常。

味甘平。大補脾土。不滯氣。餛飩青性寒。生食解積暑煩熱。生津。煮食健脾和胃益氣。花鏡云。過熱而

羹。藥性考。餛飩。沙角。生熱。俱得。老則。甘香。補中益氣。生者解酒。能壓丹石。

烏攪仁

出廣東。今果肆皆有市者。皮黃黑色。肉白。有文層疊如海螺蛸狀。酒筵中以為豆蘆食品。綱目集解下云。烏攪青黑。肉爛而甘。取肉搥碎放乾。自有霜如白鹽。謂之攪醬。其子仁肥大。名攪仁。而主治所載。悉言白攪。即今常食之青果。又所載攪仁可治吻燥者。亦指青菓核中仁而言。非指烏攪仁也。今採嶺南果錄中補其遺。按粵志木語。橄欖有青烏二種。閩人以白者名青果。粵中止名白攪。不曰青果也。白攪利微。人少種焉。烏攪下番禺諸鄉皆種之。種至二年。其秧長八九尺。必擿之。乃結實。擿至三年而子小。收十年而大收矣。其樹本高而端直。多獨幹。至頂乃布枝柯。有雌有雄。雄為主。雌為客。猶婦之歸於夫也。子如棗大。長寸許。光無稜瓣。先生者下向。後生者上向。八九月熟。梯子擊以長竿。或刻其幹東寸許。納以紅鹽。則其榦東子落。刻其幹西或南北亦然。古詩所云紛紛青子落紅鹽也。烏攪子大肉厚。其性溫。故味濇甘以溫。水泡軟。俟紫脂浮起。溢出。乃可食。水冷則生膠。熱則肌膚反實。故必溫水之和。乃醇其性。亦有婉諫之道焉。總二攪論之。白攪雄而烏攪雌。白屬陽而烏屬陰。陽故色白而行氣。陰故色紅。

而補血。惟烏者陰。故有仁可食。白者陽。故仁小而成。此其別也。
仁味甘淡。潤肺下氣。補血殺諸魚毒。

刺梨

宦遊筆記。刺梨形如棠梨。多芒刺不可觸。味甘而酸澀。漬其汁同蜜煎之。可作膏。正不減於檳梨也。花於夏實於秋。花有單瓣重臺之別。名爲送春歸。密萼繁英。紅紫相間。植之園林。可供玩賞。獨黔中有之。移於他境則不生。殆亦類優曇花之獨見於南滇耶。

食之已悶消積滯。記

枇杷核

本經逢原云。枇杷其核大寒。伐肝脾。以之同落蘇入麩醬。則色青翠。同蟹入鍋。則至熟不赤。性寒走肝。可知。敏按石頑所說。以其核能駐色不變。斷爲性寒。不知枇杷獨具先天四時之氣。其性溫平。其核能化一切毛羽。觀花圃人貯雞鵝毛水以灌花者。患其難化。輒擣枇杷核數枚。投於缸水中。不三日。則雞鵝毛皆爛化。知其直走厥陰。更捷利也。

治肝有餘諸症。氣實者可用。

敏按祝士校游戲方。枇杷核煮蛤蜊能脫丁。則其性又善離。蓋枇杷具四時全氣。其實能令分者合。故

肺嗽能斂。核能令合者離。故肝實可疎。一合一離。正見互爲乘除之妙。物理小識。枇杷核能去黴垢。故能化痰。

羊桃

粵語。其種來自大洋。一曰洋桃。高五六丈。大者數圍。花紅色。一蒂數子。七八月間熟。色如蠟。一名三斂子。亦曰山斂。斂。稜也。俗語誤稜爲斂也。亦以其味酸能斂顏色也。有五稜者。名五斂。以糯米水澆則甜。名糯羊桃。廣人以爲蔬。綱目五斂子。卽羊桃。惟言其主治風熱。生津止渴。他功效皆未及。今依粵語補之。○爾雅。長楚。桃芘。註。今羊桃也。或曰。鬼桃。葉似桃花。白子如小麥。亦似桃。陸機疏云。葉長而狹。花紫赤色。其枝莖弱。過一尺引蔓於草上。鄭氏曰。藤生子赤。狀如鼠糞。故亦名鼠矢。兒童食之。一名羊腸。一名御弋。蜀本圖經。子細如棗核。苗長弱蔓生。不能爲樹。今呼爲細子。根似牡丹。羣芳譜。羊桃。福州產。其花五瓣。色青黃。詩。檜風。隰有萋楚。猗儺其枝。卽指此也。

酸甘。瀟平無毒。久食能辟嵐瘴之毒。中蠱者。搗自然汁飲。毒卽吐出。脯之。或白蜜漬之。持至北方。不服水土。與瘡者。皆可治。○嶺南雜記。有食豬肉咽喉腫痛。食羊桃卽解。

藥性考。羊桃生時極酸。不可食。熟則帶甘。過食寒中。內熱者宜之。多食冷脾胃。動洩瀉。可曬乾。歌曰。獼猴桃。寒酸甘。止渴調中。下氣解煩。除熱骨節風痛。能壓丹石。通淋療痔。瓢可煎食。

倒捻子

綱目都念子。卽倒捻子。僅言其治痰嗽。噴氣。暖腹。臍。益肌肉而已。時珍曰。食之必倒捻其蒂。故謂之倒捻子。訛爲都念子也。味甚甘軟。粵語都念子。樸椒叢生。花如芍藥而小。春時開有紅白二種子。如軟柿。外紫內赤。亦小有四葉承之。子汁可染。若胭脂。花可爲酒。葉可麪。皮漬之得膠。以代柿。蘇子。瞻名爲海漆。非漆而曰漆。以其得乙木之液。凝而爲血。可補人之血。與漆同功。功逾青黏。故名。以其爲用甚衆。食治皆需。故名都念。產羅浮者。高丈許。子尤美。嶺南酒有以花爲釀。而雜以諸果者。花則以檳榔花爲最。果則以倒捻子爲最。倒捻子又名黏子。花於暮春。實於盛夏。諺曰。六月六。黏子熟。熟以爲酒。色紅味甘。人與猿猴爭食之。所在皆然。

東坡雜記。吾謫居南海。以五月出陸。至滕州。自滕至儋。野花夾道。如芍藥而小。紅鮮可愛。樸椒叢生。土人云。倒黏子花也。至儋則已結子。爛紫可食。殊甘美。中有細核。嚼之瑟瑟有聲。亦頗苦沁。兒童食之。使大便難。野人夏秋下痢。食葉輒已。

子活血補血。研瀘爲膏餌之。又止腸滑。

甘蔗滓皮

綱目甘蔗條。瀕湖特補蔗滓。言其治小兒白禿。燒烟入目。令目暗。其他未能悉。今復廣之。

救生苦海。收口長肉。背疽惡瘡。用之屢效。收甘蔗滓曬燥。煨存性。研極細。以小竹管如瘡口大者一個。以細夏布紮緊於上。篩藥填滿瘡孔內。膏藥蓋住。自能收口。

醫健云。對口一名鼻疽。用甘蔗滓焙燥爲末。白色狗屎焙末。和勻。將竹管一個。稀絹包竹管頭。入藥篩膏藥上貼之。垂死者亦生。

痘疔。經驗單方。用甘蔗滓曬乾。真香油點燈燒成灰。以津液調勻。銀簪挑破點上。立效。一方加珍珠油胭脂調塗。更效。○敏按蔗有數種。紫皮者名崑崙蔗。青皮者乃扶風蔗也。黃海若云。凡痘疹不出。及悶痘不發。毒盛脹滿者。此痘屬急症。宜青皮甘蔗榨汁與食。不時頻進。則痘立起。其寒散解毒之功。過於蚯蚓白鴿。惜人不知其功用。入藥如用滓亦宜以青皮蔗滓爲上。

蔗皮。綱目止載治口疳。而不知其皮可入香料。海外三珠有四葉香餅。乃用蔗皮。又乾者墊臥。可去鬱熱。本草匯有接氣沐龍湯。亦用其皮。故爲補其說。

臘梨初起。百草鏡紫甘蔗皮煨存性。香油調搽。

接氣沐龍湯。專治陽衰久痿滑精。不用內服。惟主外治。大約患此者或由稟弱。或由縱慾。或憂鬱所致。或心腎不交。用此最妙。紫稍花。甘草。甘遂。良薑。文蛤。母丁香。巴戟。天川。烏附子。吳茱萸。川椒。細辛。淫羊藿。蛇牀子。棟樹子。甘松。各一兩。瑣陽。茯苓。官桂。羊皮。紅蔗皮。滿山紅。罌粟殼。水泡去筋。各二兩。紅豆。

七十粒。須擇酒藥內所用辣者。白頸蚯蚓七條。炙。倭鉛八兩。切薄片。勻七劑。每日一劑。瓦鍋內煎湯。先熏後洗。以冷為度。晚重溫藥湯再洗。如此七日內。禁房事。

坐板瘡。甘蔗皮燒存性。香油調塗。宋寶方

竹衣乖。經驗廣集。此藥治竹衣乖。并無皮膚。膿血淋漓。赤剝楊梅。一切胎毒。用爐甘石煨淬。入黃連汁三次。童便四次。一兩黃藥豬膽塗炙七次。紫甘蔗皮燒存性。孩兒茶。赤石脂。各五錢。菘豆粉炒七分。冰片五分。為末。先用麻油將雞蛋黃煎黑。去黃候冷。調塗即愈。

猴鬪子

宦遊筆記。出臨海深山茅草中。土名仙茅果。秋生冬實。樵人採食。并可磨粉。其性溫補。然城市亦無食之者。綱目有猴騷子。形與此別。又臨海出猴總子。一名土柿。每年九十月間生。形與紅柿同。皆非一物。臨海異物志。猴鬪子如指頭大。味苦可食。他處所無。性溫。暖丹田。益五臟。健脾。增氣力。

瓜子殼

傳信方。治腸紅。不論新久。三服全愈。用地榆炒黑一錢。白薇一錢五分。蒲黃炒黑一錢。桑白皮一錢五分。瓜子殼二兩。煎湯代水。不藥良方。單用瓜子殼一味煎服。治腸風下血。

吐血。不藥良方。瓜子殼一茶鍾。煎湯一盃。喫下。血卽止。

蒲桃殼

止呃忒如神。

橙餅

同壽錄有製橙餅法。方擇半黃無傷損橙子。太青者性硬難酥。將小刀划成梭。入淨水浸去酸澀水。一
二天。每日須換水。待軟取起。擠去核。再浸一。二天。取起。將簪腳插入每縫。觸碎內瓢。然後入鍋用清水
煎之。勿令焦。約有七八分爛。取出。拌上潔白洋糖。須乘熱卽拌。卽日曬之。待糖喫進。再摻再曬。令糖喫
足。將乾糖再塞入橙肚內。略壓扁。入瓶貯用。亦可點湯服。

消頑痰。降氣。和中開胃。寬膈健脾。解魚蟹毒。醒酒。若氣虛瘰癧者勿服。

津符子

產緬甸。見千金方。

味苦平。性滑。主益心血。養肺金。止渴生津液。多食口爽。失滋味。安和五臟。久食輕身明目。治瀉痢不止。
男女虛勞。咳嗽吐膿血。肺癰肺痿。聲啞欲死者。每日喫十枚。一月不聞斷卽愈。

必思答

產回回國地。見忽必烈飲膳正要。

味甘無毒。治調中順氣。滋肺金。定喘急。久食利人。三陰瘡百藥不效。必思答三枚。酒一盞。煎半飲之。即止。

難產不下。或子死腹中。必思答七枚。酒煎服之。即下。又治胞衣不下。

黃皮果

廣志。黃皮果狀如金彈。六月熟。其漿酸甘。似葡萄。與荔枝並進。荔枝壓飢。以黃皮果解之。諺曰。飢食荔枝飽食黃皮。綱目於果部附諸果條下。僅引海槎錄云。出廣西橫州。狀如榛子及小棗。味酸。至其功用並未之及焉。今依廣志補之。

消食順氣。除暑熱。廣志酸平無毒。主嘔逆痰水。胸膈滿痛。虻蟲上攻。心下痛。食物本草

敏按廣東瑣語載果中有白蠟子。與黃皮果絕相似。而味尤勝。諺有云。黃皮白蠟。甜酸相雜。想功效亦不甚遠也。

廣東通志。黃皮果大如龍眼。又名黃彈子。皮黃白。有微毛。瓤白如肪。有青核數枚。甚酸澀。食荔枝太多。用黃皮果解之。

甘劍子

狀如巴欖子。仁附肉。有白鬚。不可食。能發人病。北人呼爲海胡桃。味甘氣烈。治脾胃虛寒。食少洩痢不止。形體尪羸。洩下虛脫。百方不效。用甘劍子七枚。連殼煨爲末。空心酒下。三服卽止。再服調理藥。

揚搖子

生閩越。其子生樹皮中。體有脊形。甚異。長四五寸。味甘無毒。通百脈。強筋骨。和中益氣。潤肌膚。好顏色。○花鏡。此果長五寸。色青無核。臨海異物志。揚搖有七脊。子生樹皮中。其體雖異。味則無奇。長四五寸。色青黃。味甘。

海梧子

出林邑。樹似梧桐。色白。葉似青桐。子如栗。肥甘可食。○南方草木狀。占城卽林邑。產海梧子。與中國松子同。但結實肥大。形如小栗。三角肥甘。樽俎閒佳果也。味平無毒。利大腸。小腸。益智。慧。開心胸。明耳目。心下怔忡。夜多惡夢。健忘。每日空心食海梧子十數枚。月餘自愈。疝氣囊大如斗。海梧子七個。燒灰服之。卽愈。

木竹子

出廣西。皮色形狀如大枇杷。肉味甘美。秋冬實熟。味甘性平。治吐逆不食。關格閉拒不通。脾虛下陷。肛門墜脫不收。清熱涼大腸。去積血。利百脈。通調水臟。止渴生津。解暑消酒。利耳目。治欬嗽上逆。

櫓罌子

桂陽虞衡志。出廣西。大如半升盤。數十房攢聚成毬。每房有縫。冬生青。至夏紅熟。

味甘。補脾胃。固元氣。制伏亢陽。扶持衰土。壯精神。益血。寬痞消痰。解酒毒。止酒後發渴。利頭目。開心益志。

婦人不孕。用櫓罌子浸好酒內三日。日日飲之。百日有孕。又目生翳障。漸漸昏暗。視物不明。櫓罌子浸白蜜內。每日連蜜啖一枚。一月即退。

榿子

出九真交趾。子如桃實。長寸餘。二月開花。連著子。五月熟。色黃。鹽藏食之。味酸如梅。

性涼平。清心潤肺。止渴生津。制亢極之陽光。消炎蒸之暑氣。又降三焦實火。治鼻中出血。又牙宣牙齦出血。用榿子核連仁。燒存性。調水含咽即止。

羅晃子

出廣西。夏熟。味如栗。狀如橄欖。其皮七層。出橫州者皮九層。剝至九層方見肉。故又名九層皮果。

思恩府志。羅見子俗名九層皮。形類蠶豆。可茹。味如煨栗。外有黑殼。連肉有皮九層。故名。產於山樹中。味甘性溫。治臟腑生蟲。及小兒食泥土腹痛。癰痞積硬。

養肝膽。明目去翳。止渴退熱。解利風邪。消煩降火。翻胃吐食。或食下即吐。或朝食暮吐。暮食朝吐。用羅見子七枚。煨存性。每日酒調下方寸匕。服完爲度。即愈。

腹中虻蟲上攻。心下痛欲死。面有白斑。用羅見子牽牛子各七枚。水煎服。蟲自下。

夫編子

南方草木狀。出交趾武平山谷中。三月開花。連著子。五六月熟。入雞魚豬鴨羹中。味最美。亦可鹽食。味甘性平。主寧心志。養血脈。解暑渴。利水道。生津液。止逆氣喘急。除煩清熱。潤肺。滋命門。益元氣。骨蒸勞熱。四肢瘦削如枯柴。用夫編子同白鴨爛煮。不用鹽醬。日日啖之。喫鴨三頭見效。

白緣子

出交趾。樹高丈餘。味甘美如胡桃。

味甘平。主潤肺。止渴清熱消食。祛風暑溼氣。治疥癬及山嵐瘴氣所侵。變成痲瘡。寒熱往來。頭痛痰逆。足膝屈弱難行。寒溼邪氣所侵。用白緣子一片。春爛浸酒。日飲一次。月餘全愈。

繁彌子

廣志狀圓而細。色赤如軟棗。其味初苦後甘。可食。味平無毒。主益五臟。悅澤人面。去頭面諸風。產後痢疾不止。用繫彌子一合。酒水各一盞。煎八分。空心服下。片刻即效。

人面子

出海南。又出廣中。樹似含桃。子如桃實。春花夏實。至春方熟。蜜煎甘酸可食。其核兩邊俱似人面。耳目口鼻無不畢具。

廣志人面子大如梅李。其核類人面。兩目口鼻皆具。肉甘酸。宜爲蜜煎。仁絕美。以點茶如梅花片。光澤可愛。茶之色香亦不變。以增城水東所產爲佳。其核中仁搖之即脫去。他產則否。此樹最宜沙土。沙土鬆易發。數歲即婆娑偃蓋。山民植之以爲利。味甘。性平無毒。醒酒解毒。治風毒著人。遍身疔瘡成瘡。或痛或癢。食之即愈。

難產不下。產母手握人面子一個。單日右手握。雙日左手握。卽下。
嶺南雜記。人面子煮肉及鴨。必用搥爛熬膏。甘酸益津。

四味果

出祁連山。木生如棗。剖以竹刀則甘。鐵刀則苦。木刀則酸。蘆刀則辛。行旅得之。能止飢渴。味甘辛酸無毒。明目養肝。寧神定志。和胃進食。下氣止咳。

腎虛腰痛不能反側用四味果同狗腰子煮熟並食每日一次一月愈。

敏按東方朔神異經云南方大荒有樹名如何結子味如飴有核形如棗子長五尺圍如長金刀剖之則酸蘆刀剖之則辛食之者地仙不畏水火白刃又啓蒙記如何隨刀而改味或曰此卽仙經所謂火棗據此二說卽今四味果也。

千歲子

南方草木狀出交趾蔓生在根下鬚綠色交加如織一苞恆二百餘顆皮殼青黃色殼中有實如栗味亦如之乾則殼肉相離撼之有聲如肉荳蔻○關涵嶺南隨筆千歲子多子根鬚乾則殼肉相離撼之有聲。

味甘平主和中益胃利肺除熱止渴醒酒解暑。

小便閉塞千歲子十數枚打碎水煎清飲下卽通利。

發背惡瘡千歲子不拘多少搗爛如泥調塗三次見效。

侯驪子

蔓生大如雞卵味甘性冷消酒輕身王太僕曾獻之見酉陽雜俎。

甘寒無毒食之不飢延年強健消酒除溼治黃疸小便不利溺如黃金色口渴煩熱齒痛牙宣出血不

止。

小兒重舌木舌。侯騷子核燒灰擦之。或用蜜調塗。亦可。

浮癰發背。侯騷子煎湯飲之。再搗塗之。大效。

仙人掌

乃仙人掌上所生子也。粵語。仙人掌多依石壁而生。葉勁而長。若齟齬狀。開花儼如鳳形。子生花下。名曰鳳栗。葉曰鳳尾。笏發苞外類芋。渠內攢瓣如珠。各擎子珠於掌。一枝一掌。自下而上。子自青赤而黃。有重殼。外厚內薄。熱其仁食之。味甜兼芡栗。可以延年。又名千歲子。此草可辟火。廣人多植之。堂側。性宜沙土。惡肥膩。○明黃佐仙人掌賦序。仙人掌。奇草也。多貼石壁而生。惟羅浮黃龍金沙洞有之。葉勁而長。若齟齬狀。發苞時。外類芋魁。內攢瓣如翠球。各擎子珠如掌然。青赤轉黃。而有重殼。剖之。厚者在。外如小椰。可爲匕勺。薄者在裏如銀杏衣。而裏圓肉。煨食之。味兼芡栗。可補諸虛。久服輕身延年。俗呼爲千歲子。此與蔓生者名同物異也。○雲南通志。仙人掌。葉肥厚如掌。多刺。相接成枝。花名玉英。色紅黃。實似山瓜。可食。

味甘性平。補脾健胃。益腳力。除久瀉。

敏按羣芳譜。仙人掌出自閩粵。非草非木。亦非果蔬。無枝無葉。又并無花。土中突發一片。與手掌無異。

其膚色青綠。光潤可觀。掌上生米色細點。每年只生一葉於頂。今歲長在左。來歲則長在右。層疊而上。植之家中。可鎮水災。如欲傳種。取其一片切作三四塊。以肥土植之。自生全掌矣。近日兩浙亦有。據所載當另是一種。與此全別。或名同物異歟。

酒杯藤子

出西域。藤大如臂。花堅硬。可以酌酒。文章映澈。實大如指。味如荳蔻。食之消酒。相傳張騫得其種於大宛。

甘辛平無毒。消食下氣。消酒止渴。辟邪瘧。消癰腫。殺虻蟲。治尸蛙勞瘵。蟲蠱瘰癧。瘦瘤結核。癰疽潰爛。食果成積。用酒杯藤子燒灰。糖拌。服下五七錢。自效。

飲酒過量成病。用酒杯藤子煎服。極驗。

藥果

關函嶺南隨筆。藥果似橙而味酸。可染紅。

治瘴

筒子

出交趾合浦。藤綠樹木。正月開花。四五月熟如梨。赤如雞冠。核如魚鱗。

甘平無毒。主中惡氣。飛尸邪蠱。心腹卒痛。狂邪鬼神。鬼疫癘瘧。夢寐邪惡氣。心神顛倒不寧。昏冒如癡。治驚癩恍惚。或言語不倫。歌笑不休。用簡子核七枚。燒末入硃砂少許。薑湯下方寸匕。自愈。

嗽子

食物考。甘酸小於沙果。色黃紅黑如櫻桃。顯產於代北。味頗清香。作脯點茶俱可。此與林檎同名異類。本草未分。故正之。多食瀟氣。令人好睡。子宜去盡。食之煩心。

隈支

益部方物略記。生邳州山谷中。樹高丈餘。枝修而弱。開白花。實大如雀卵。狀如荔支。肉黃。膚味甘。味甘無毒。治七種疝氣。及一切瘡瘍疥癬。

以上自津符子至隈支止。諸果品。綱目附錄諸果後。僅載其形狀。不錄其主治。而沈雲將食纂云。諸果都出外國及邊瘴地方。雖不常見。但俱屬異品。不惟可口。兼可療治百病。凡行歷遠方者。即當備其種。流傳中土。有功於世不小。故附錄而兼細核其主治。予因取之以補李氏之遺。至其形狀。綱目已詳載。而復列之者。亦欲覽者便於解悉。後日遇物能名。故不厭重贅也。

呂宋果

本草補。呂宋島中產一果。名加窆弄。外肉而內核。味苦不堪食。其初惟有一處深山峻嶺生此樹。甚高。

大土人多不識。旅人至島百年後始知其中果可用。近三十年頗悉其療治各病。極有奇驗。遂攜至中國。若果之皮肉其效尤捷。有呼爲寶豆者。豆言果之形狀。寶言其貴重也。

治中毒服毒。將果或磨或刮。以清水或清油調服。毒卽吐。蛇蠍蜈蚣等傷。磨清水服之。并刮敷患處。疫疾中風昏仆。磨水服之。腹痛瀉利。磨水服。瘡疾初作時。磨水服。○刀斧傷血漏。刮末敷患處。卽止血止痛。○蛔蟲疳積。磨水服。蟲卽吐出。○難產。磨水服。○頭瘡癢爛。臘梨切碎此果。以油煎之。乘熱徧擦。向火取暖。隨以布向火取熱。覆病人身上而睡。又以被蓋。不見生風。卽愈。○潮熱。磨水服。漸減而愈。

諸穀部

沙米

延綏鎮志。苗莖如麻。葉類艾而稍圓。有刺。高尺許。生子成房。粒細如黍。杵去皮。用羊羹作食。服之不飢。邊外名黍喇棘。○瀚海記。沙蓬米。凡沙地皆有之。鄂爾多斯所產尤多。枝葉叢生如蓬。米似胡麻而小。性暖。益脾胃。易於消化。好吐者多食有益。作爲粥。滑膩可食。或屑之。可充餅餌茶食之需。○人海記。張家口內保安沙城一帶地產沙蓬。實如蒺藜。中有米如稗子。食之益人。○藥性考云。蓬蒿之實。名曰沙米。清熱消風。饑荒食旨。

味甘性溫。通利大腸。消宿食。治噎隔反胃。服之不飢。

西國米

珠兒粉
竹米

嶺南雜記出西洋西國。煮不化。而色紫柔滑者真。僞者以葛粉爲之。○通雅。今南楚兩粵專採葛根作粉食。其粉可作丸。曰葛粉丸。廣人以假西國米。能醒酒。○朱排山柑園小識。西國米來自閩廣洋艘。大如綠豆。以色紫煮不化者真。健脾運胃功最捷。久病虛乏者。煮粥食最宜。益胃和脾。病起宜食。

珠兒粉

洋舶帶來。粵澳門杭寧波乍浦通舶市者皆有。形絕細。如蘇子。勻圓而白。云係外洋人採葛根及薇箕根。或茹粉所造。煮之須滾水沖泡。粒粒分明。如魚子樣。極柔滑。以糖霜和食。或淡食。氣清香。味甘滑。明目。運脾開胃。解酒生津。久服尤能強腎。

東西洋考。大泥。卽古淳泥。今隸暹邏。土產有西國米。亦名沙孤米。其樹名沙孤。身如蕉空心。取其裏皮削之。以水搗過。舂以爲粉。細者爲王米。最精。粗者民家食之。以此代穀。今賈舶慮爲波濤所溼。只攜其粉歸。自和爲丸。○庚申十月。予在陳夔友家。見有胡西菽。盛以玻璃小筆管瓶內。菽白而細。與珠兒粉無別。云得自王撫軍署。可入藥。大能消痰。其甥女一夕患肺風痰喘。危極。兒醫多言不救。用此一錢。調薑汁灌下。其效如神。

竹米

物理小識。竹結實。斑文兩兩相比。謂之竹米。

下積如神。

陳倉米朱公

嶺南記。武昌漢陽門內。舊為陳友諒倉基。甲子年。有掘得黑米者。色如漆。堅如石。炒之即鬆。○秋燈叢話。康熙甲子。武昌郡廣福坊。掘得黑米數十斛。堅如石。炒研為末。治膈症如神。傳為偽陳友諒積粟所。又天門學宮前。明改建北郭倉基地。亦掘得黑米。治疾頗驗。乾隆丙申。黃州重修郡學。疏濬泮池。池底積粟甚夥。色如漆而堅。治病效如前。人爭取之。太守王公廷棟。恐係前人鎮壓物。禁而掩之。敏按酉陽雜俎。乾陘國尸毗王倉庫。昔為火所燒。其中粳米。燠者。於今尚存。服一粒。永不患瘡。炒研。治膈症如神。不藥良方。陳年倉米。治卒心痛。燒灰和蜜服之。即止。

朱公米

南中紀聞。靖州南二十里飛山岩。相傳為元末朱都督屯兵之所。牆礫時有米粒。色微黑而不腐。云是朱公所遺兵糧。游客謁神祠。取輒得之。至今尚存。

療脾疾。

山穀

宦游筆記出塞外。土人名烏爾格納。莖長尺餘。細如草。節如竹。葉亦如竹。每二節一葉。秀穗類蓼花。結粒似穀而色紅。採之曬乾。去其皮。糞粥。粥如穀香。蒙古用以充饑。兼碎麵合茶。商民均雜粟食之。色紅。豔可愛。而味與穀無辨。故名之曰山穀。實生於水濱或山溝爾。

味甘香。行氣利水。清大小腸火。亦補脾胃。

根。蒙古人名墨克爾。外皮微細。內實粉白。味甘美。蒙古生啖。商民合肉熟食。秋冬之際。蒙古搜掘鼠穴。得食物盈筐。內多此物。長二三寸。俱野鼠嚙截運藏者。

味甘生津。滋潤血脈。調營衛利水。

青稞黃稞

藥性考。青稞黃稞。仁露於外。川陝滇黔多種之。味鹹。可釀糟。弔酒。形同大麥。皮薄麵肥。西南夷人倚爲正食。

下氣寬中。壯筋益力。性平涼。除溼。發汗。止洩。多食脫髮。損顏色。

米油

此乃滾粥鍋內煎起沫。鹹滑如膏油者是也。其力能實毛竅。最肥人。用大鍋能煮五升米以上者。其油

良。越醫全丹若云。黑瘦者食之。百日即肥白。以其滋陰之功。勝於熱地也。每日能撒出一盃。淡服最佳。若近人以熟粥絞汁爲米油。未免力薄矣。

味甘性平。滋陰長力。肥五臟百竅。利小便通淋。

精清不孕。紫林單方。用養米粥滾鍋中。面上米沫浮面者。取起加煉過。食鹽少許。空心服下。其精自

濃。即孕矣。

鍋焦

陳久
年糕

一名黃金粉。乃人家養飯鍋底焦也。取僧寺中米多焦厚者入藥。良。

味苦甘。性平。補氣運脾。消食止泄瀉。八珍粉用之。

鍋焦丸。小兒常用。健脾消食。家寶方。用鍋焦炒黃三觔。神麴炒四兩。砂仁炒二兩。山楂四兩。蒸蓮肉

去心四兩。雞脆皮一兩。炒共爲細末。加白糖米粉和勻。焙作餅用。

老幼脾瀉久不愈。梁侯瀛集驗方。鍋焦爲末四兩。蓮肉去心淨末四兩。白糖四兩。共和勻。每服三五

匙。日三次。食遠下。

白瀉不止。種福堂方。乾飯鍋粳二兩。松花二兩。炒。臘肉骨頭五錢。烘脆。共爲末。砂糖調。不拘時服。

脾胃不健。祝氏效方。鍋焦二觔。蓮肉一觔。白糖半觔。蜜一觔。丸如桐子大。每服數十丸。空心白湯下。

玉露霜。治老人脾泄最效。白朮炒二兩。陳皮一兩五錢。蓮肉去心四兩。薏苡仁四兩。炒糯米一升。炒菘豆一升。炒熟。陳米鍋粬一升。炒。糖霜量加。共為末。每用二三錢。滾水調勻服之。行饑檢秘
預稀痘疹。不藥良方。銀花金者不用陰乾。鍋粬每一升。入銀花一兩。共研末。用洋糖或做糕餅。或開水調和。每日令小兒食之。

陳久年糕

燒灰治痢。

阿迷酒

出東洋。氣味香烈。頗醲厚。每服不過半盞。大能助元氣。驟長精神。估舶帶來。凡督撫大員。輒多備貯。為不時之需。或遇要事疲憊。一滴入口。精神百倍。較鴉片尤速。○物理小識。吉利重耐。以紅花。辛胡桃入麴釀者。醫渡數效。

味甘辛竄達。能捷通百脈。益元生氣。每日少飲一二滴。理怯如神。

酒釀草

俗名酒窩。又名浮蛆。乃未放出酒之米酵也。味醲厚。多飲致腹瀉。性善升透。凡火上行者忌之。味甘辛。性溫。佐藥發痘漿。行血益髓脈。生津液。

赤眼淹纏。祝氏效方。杜仲。厚朴。桑白皮。檳榔。各一錢。取雄雞肝一個。忌見水。去紅筋。入白酒釀六兩。

隔湯蒸熟。去渣。以湯肝食下。隔二日再服一次。全愈。

小兒鼻風吹乳腫痛。劉起堂經驗方。用酒釀和菊花葉敷上。立愈。無葉用根。甘菊葉尤佳。搗汁沖和。

服更效。

吹乳方。

周氏家寶。用苧麻根嫩者。炒。和白酒釀少許。共搗爛敷患處。一日夜即消。忌食發物。

頭風。

用蒼耳子。白芷。穀精草。各五錢。川芎三錢。甜酒釀四兩。老酒二盃。煎一盃服。炒淨

夢遺白濁。

酸梅草二錢。孩兒菊二錢。搗取汁。加不見水酒釀。空心量服。教世

難產。

用酒釀麻油。蜂蜜。童便。雞子白。各半盞。煎溫服。即下。

痘出不起。

不藥良方。用狗蠅七枚。冬日取蠅。在狗耳內。搗爛。和酒釀服。即日發起。紅潤可觀。

痘瘡不起。

良方集要。葶薺搗汁。和白酒釀。頓溫服之。但不可頓大熱。大熱則反不妙。慎之。

保元丹。

千金不易方。此丹張氏家傳。已五世矣。黃精一觔。甘枸杞四兩。酒釀五觔。好黃酒五觔。入罐。

煮一炷香。每飲一茶杯。藥渣搗為丸。加胡桃肉八兩。大黑棗八兩。青州柿餅一觔。

酒葷

生酒罈中。不恆有。凡藏酒之家。千百罈酒。間有一罈。啓之中空無酒。下有葷結於中。其葷初結之時。酒。

上薄凝如衣膜。久則漸厚。一二寸。便能滲酒。將酒中精華醇醱之氣。盡攝於膜內。膜乃漸厚。酒亦漸少。久久則酒乾。所存十不餘一。啓視之。其膜如鮮海蜃。滯潤而軟。嗅之作酒香。微帶微蒸氣。識者取之焙乾。乾者如瓜皮。面青黑。背作肉紅色。溼軟如棉。可入藥。蓋酒能生蠶。必繅係新出。未脫火氣。而置酒之地。又為溼熱所蒸。致中變而成此。故造釀家用罈貴舊而不貴新也。金御乘自慈谿歸。帶有酒蠶。出以相示。云彼土亦罕得。間有之。然不多見也。

治一切酒傷酒勞酒疸。因酒成病諸症。服之立效。

神黃豆 扁豆 圓回豆 青花豆 眞甯豆

池北偶譚。產滇之南。徼西南夷中。形如槐角子。視常豆稍巨。用筒瓦火焙。去其黑殼。碾末。白水下之。可永除小兒痘毒。服法。以每月初二日十六日為期。半歲每服半粒。一歲每服一粒。一歲半每服一粒半。遞至三歲服三粒。則終身不出矣。或曰。按二十四氣服之。以二十四粒為度。或云。水畢閉日服之。○珍異藥品云。出雲南近西地方。痘將發未發時。用神黃豆連殼焙炒燥。用豆研細水服。○本經逢原云。神黃豆產緬甸。形如槐子。近時稀痘方用之。一陽日用清水磨服。○痘學真傳云。神黃豆出雲南。能稀痘。生熟各一粒。甘草湯咀服。○寧陽張琰種痘新書云。凡痘自胸以上自臍以下俱有。而中間一截全無者。名兩頭痘。此氣血不能貫通上下。而腰臍之間為寒毒凝滯也。若不急治。七日之後。必變灰白之症。

矣。見點時。急用生芪。當歸。赤芍。桔梗。防風。荆芥。厚朴。續斷。白芷。山楂。木通。神黃豆三十粒。服此中間方有痘。乃可無虞。

南詔備考。普洱府及永昌府皆出神黃豆。能稀痘。青花豆可治瘡。有容帶嶺產神黃豆來。其形如細竹筒。長可三四寸。搖之有聲。其中如竹節。片片相疊。剖出如棋子樣。白色包裹。中含一豆。黃色光亮。形如瓠子。中有線痕。堅實而扁。服之解痘毒。

按神黃豆有二種。百草鏡云。出雲南普洱府。又四川亦產。莢如連翹略短。內有豆。微紅色。產雲南者。形如槐角子。比蠶豆略大。瓦上焙乾。去外黑殼。用二種形狀不同。係地土所產各別。然其稀痘解毒之性則一也。○寶笈方。痘將出時。用神黃豆。按一歲一粒。剝去外殼。并內皮。將瓦焙熟一半。留生一半。茺萎湯調服。毒重者稀。毒輕者更稀。十餘歲者。亦不過七粒。倘未出痘者。亦如法以水調服之。竟不出痘。宜三月三。五月五。七月七。九月九等日。

緬豆

滇略。緬豆如豆。蔓生。子大如栗。斑文點點。咀之傳惡瘡。良。然性迅惡。誤服之。吐瀉致死。五雜俎云。滇中有神黃豆。似五倍子。能令兒童稀痘。然亦不甚驗也。

圓回豆

五雜俎云。出西域。狀如椿子。磨入麵中。極香。能解麵毒。

青花豆

宦遊筆記。雲南永昌府。有青花豆。出於外地。夷人帶來易貨者。治瘡。

真寧豆

出陝西慶陽真寧地。味甘平。能解諸藥毒。

稽豆附

逢原云。細黑豆。一名稽豆。俗名料豆。今人以飼馬。故俗又呼馬料豆。○杭州府志。黑豆之細者曰稽豆。細而扁者曰零烏豆。俗名馬料豆。可肥馬。○從新云。黑大豆之小者爲馬料豆。不知料豆雖小。而形長微扁。與黑豆形迥別。當另是一種。綱目稽豆下。僅載其能去賊風風痺。治婦人產後冷血而已。其他一切功用。全未之及。今爲補之。

味甘溫無毒。壯筋骨。止盜汗。補腎。活血。明目。益精。入腎經血分。同青鹽。旱蓮草。何首烏。蒸熟。但食黑豆。則鬚髮不白。其補腎之功可知。今人以製何首烏。取以引入腎經也。炒焦淋酒。治頭風脚氣。以其直達腎經血分。麥汁服。解烏附丹石藥毒。

藥性考。本經黑大豆。卽今之馬料豆也。其色黑。而形如人腰。故入腎經。益水明目。多服令人身重。一年

後復原。久服身輕。非花豆中之黑大豆也。凡服豆忌菹麻子。厚朴。豬肉。歌云。黑大豆甘。腰子樣式。所以補腎。藥餌宜入。卽是馬料。衰寒炒熱。調中下氣。止痢。蠱急。利水除脹。追風活血。生研敷腫。吞止煩渴。解一切毒。甘草煎汁。傷中淋露。產後諸疾。明目悅顏。製服有益。○又云。稽豆卽小黑豆。因其粒細。稱驢豆。別馬料也。治產後血風冷痛。其粒細不及馬料。歌云。稽豆黑小。甘逐邪風。冷痹血滯。浸酒和融。○雨簍翁食記。小黑豆入鹽煮。久食。大能補腎。○事親述見。稽豆補五臟益中。助十二經脈。調中。煖腸胃。殺鬼氣舒筋。○紫虛子吞豆法。黑料豆淘淨曬乾。以淨瓶裝之。初服每日一粒。以白湯生吞之。次日吞二粒。每日加一粒。至百日吞百粒。從此每日吞百粒。但初起服之。腸胃未剛。每遇大便。須看豆化不化。如豆化。則漸加。倘未化。仍照舊勿加。必待食之能化。然後遞加至百粒爲度。服之能益精補髓。壯力潤肌。髮白復黑。久則轉老爲少。終其身無痰病也。

救生苦海。有嫦娥奔月方。與紫虛吞豆法同。但其法按太陰盈虧之數。初一日吞一粒。逐日加一粒。至望日十五粒而止。十六日又逐日減一粒。至晦日一粒而止。月初則又加起。與紫虛之法微有不同。并附以備用。

煮料豆方。明太醫劉浴德有增補內經拾遺四卷。其種子論後。載有煮料豆藥方云。老人服之。能烏鬚黑髮。固齒明目。當歸四錢。川芎。甘草。廣皮。白朮。白芍。丹皮。菊花。各一錢。杜仲炒。黃芪各二錢。牛膝。生

地熟地各四錢。青鹽六錢。首烏。枸杞子各八錢。同馬料豆煮透曬乾。去藥服豆。○又養復方。馬料豆五升。桑椹半觔。枸杞子四兩。肉蓯蓉半觔。竹刀切去筋。青鹽龍骨各二兩。同豆煮熟。和藥同曬乾。貯罐用常食大有補益。○又方。呂逸儒傳方。何首烏一觔。用馬料豆汁煮。或老酒亦可。要九蒸九曬。枸杞一觔。酒蒸。用乾藥末搗勻曬。馬料豆一斗。再用料豆五升煮汁。以汁煮豆曬乾。九蒸九曬。或用好酒煮亦可。菟絲子一觔。酒煮曬焙。補骨脂一觔。酒洗焙。真川椒四兩。曬烘。青鹽二兩。川牛膝一觔。酒煮焙。煉蜜爲丸服之。○又方。何首烏二觔。青鹽一兩。蠶仁。杜仲。枸杞各二兩。遠志。小茴香。陳皮各一兩。肉蓯蓉。苡仁。香附。白茯苓。川芎各二兩。五味子。牛膝。補骨脂。木瓜各一兩。五錢。歸身三兩。肉桂五錢。防己一兩。二錢。甘草八錢。小黑豆一斗。用水煎藥數十滾。漚出渣。以藥汁煮豆。汁盡爲度。曬乾。每服百粒。開水下。延齡廣嗣仙方。懷生地酒製。何首烏酒煮。旱蓮草。鹿銜草。眞者絕少。用仙靈脾代之。以上各三兩。按四時。乾山藥乳拌。白茯苓乳拌。當歸身酒炒。眞青鹽。以上各一兩。按分至。石菖蒲。菟絲子。肉蓯蓉酒浸去膜。補骨脂。五加皮。骨碎補。淮牛膝。白甘菊。原杜仲。酒炒斷絲。枸杞子。蛇牀子。槐角子。金櫻子。覆盆子。川黃連。建澤瀉。以上各五錢。按十六節。以上二十四味。俱合二十四氣。除去青鹽。鍋內煎汁至半。漚渣。再將渣煎過半。漚清。沖和煎濃。入馬料豆三升七合。女貞子一升七合。按陰陽二氣。二至二分。合年月日時週天度數。餘一合半。以置閏。煮數十滾。將青鹽研細。傾入同煎。以汁盡爲度。取豆曬乾。收貯磁瓶。

每晨四錢。滾湯送下。如遇出門飢餓。即可嚼食代點。此豆謹按陰陽二十四氣。合週天度數。製法得中和補益之妙。久服能令人鬚髮再黑。齒落更生。耳目聰明。手足便利。壯陽補腎。固本還元。多育子息。多增年壽。常服不斷。可成地仙。凡腎虛目暗。上盛下虛者。尤爲切合。

四寶大神丹。家寶方。能治五勞七傷。服藥後。忌腥臭發物房事。馬料豆五升。用混堂油製九次。黃芪八兩。人乳製七次。白當歸酒洗四兩。金櫻子二斗。去內子與毛。外去刺。淘淨熬膏。臨收時。加重便一二盞。聽用。右將前三味和金櫻膏。丸如梧子大。每服三錢。桂圓湯下。

明目補腎。兼治筋骨疼痛。○不藥良方。小紅棗十二枚。冷水洗淨。去蒂。甘州枸杞子三錢。小馬料豆四錢。水二盃。煎一盃。早晨空心連湯共食之。

絕瘡。製首烏。剩下黑料豆。可以絕瘡。凡四日兩頭瘡。用豆煎湯服。卽愈。○截三日瘡。祝穆效方。常山。雲苓。官桂。甘草。檳榔。各三錢。小黑豆四十九粒。酒水各二盃。慢火煎二盃。當晚先服一盃。蓋暖而睡。留一盃。至次日。須將發前早兩個時辰服。要熱服。蓋暖。臥待瘡至。至亦輕鬆。亦有當日而愈。愈後忌房事。戒食生冷。勞碌。風霜。忌食雞羊牛蛋白扁豆半月。永截不發。○又祕方集驗。治瘡。檳榔。蘿蔔子。常山。甘草。各一錢。紅棗四枚。烏梅七枚。馬料豆每歲一粒。水二盃。煎一盃服。忌三日葷油。永不再發。

痰喘氣急。同壽錄。用梨剉空。中心納小黑豆。令滿。留蓋合住。紮緊。糠火烘熟。搗作餅。每日食之。

中風口噤。文堂集驗方。馬料豆一升。煮濃汁如飴。含汁在口。卽能言也。

黑白丸。治痞積。開胃消食。健脾補腎。○百草鏡方。馬料豆。白蒺藜。去刺。各一觔。炒磨末。蜜丸。梧子大。每服二三錢。開水送下。

治陰症手足紫黑。集驗方。黑料豆三合。炒熟。好酒烹滾。熱服。加葱鬚同烹。更妙。

盜汗。文堂集驗方。蓮子七粒。黑棗七枚。浮麥。馬料豆各一合。水煎服。三次愈。

腎虛腰痛。并治陰虧目昏。活人書。用腰式烏豇豆。馬料豆各一兩。煮湯。入鹽少許。五更時乘熱服。忌鐵器。

陰虧目昏。老眼失明。活人書。馬料豆。甘枸杞。女貞子各十兩。陰虧目昏。除女貞子。爲末。煉蜜丸。梧子大。早晚服二三錢。自效。

赤白帶下。白果去皮。煮熟蜜餞。每日清晨喫七枚。再食炒馬料豆一兩。白滾水送下。數日愈。

妊娠腰痛酸軟。產家要覽。馬料黑豆二合。炒焦熟。白酒一大盃。煎至七分。空心下。

治產後中風。口噤目眩。角弓反張。姚希周集驗。用黑料豆。鍋內炒極焦。沖入熱黃酒內服之。立效。再服回生丹。全愈。

華真君三豆湯稀痘。楊春涯驗方。菘豆。赤飯豆。馬料豆等分。每日煮湯與小兒喫。出痘自稀。如遇痘

毒亦用此湯飲之。搗搽敷上。其毒自消。

痘風爛眼。集驗云。風爛眼用醃白梅一個。去核。入綠礬少許。川椒三十粒。以五銖錢二個夾之。用葶

麻紮住。無根水浸洗自愈。若出痘得此症。再加馬料豆一歲一粒。投水中。

眼藥九方。周氏家寶。用馬料豆一升。炒蟬蛻四兩。酒洗去頭足。木賊草四兩。去節。菟絲子一觔。炒。甘菊花四兩。曬乾。白蒺藜一觔。各爲末。水法爲丸。每服二三錢。晚服。滾湯下。如若年高。桂圓湯下。

各種癬。陳別駕彬。曾任太醫院官。有治各種癬方。用馬料豆。以瓦罐。不拘多少。裝入罐內。罐口以銅絲置格定。使豆不能倒出。然後用大高邊火盆一個。盆鑿一孔。將罐倒合孔上。四圍以乾馬糞壅之。火燃罐底。盆底下用磚墊空。安盪一個接油。上火煨。罐內豆自焦。有油從盆底滴入盪中。色如膠漆。以此搽癬。三次即愈。

解藥毒。凡服藥過多。以致頭面浮腫。脣裂流血。或心腹飽悶。臍下撮痛者。用馬料豆。菘豆各四兩。合煎汁。連豆服。病好爲度。

中附子川烏天雄斑蝥毒。不藥良方。馬料豆煎汁服之。即解。

穉豆葉治瘤。急救方。頸後粉瘤。馬料豆葉。辟麝香草。同搗敷患處。其瘤漸軟漸消。破則手擠去粉。疔瘡不破。聽其自消。

蠶豆殼

治癰疽。行篋檢祕。用油鹽蠶豆殼一鍾。麻油浸一週時。取起。將豆殼瓦上焙研爲末。麻油調搽患處。立愈。

膈食。指南云。用蠶豆磨粉。紅糖調食。數次即愈。

小便日久不通。難忍欲死。慈航活人書。蠶豆殼三兩煎湯服之。如無鮮殼。取乾殼代之。

黃水溜瘡。毛世洪經驗集云。凡大人小兒頭面黃水瘡。流到即生。蔓延無休者。用蠶豆殼炒成炭。研

細。加東丹少許。和勻。以真菜油調塗。頻以油潤之。三日即愈。

治漏。種福堂方。用炒熟蠶豆殼磨末。每服三四錢。加沙糖少許。調服。

癢瘡。張卿子外科祕方。用鮮蠶豆搗如泥。塗瘡上。乾即換之。三五次即愈。如無鮮者。用乾豆。以水泡

胖。搗敷亦效。

吐血。張卿子方。以新蠶豆殼四五年陳者。炒煎湯飲之。即愈。

天泡瘡。蠶豆黑殼。燒灰存性。研末。加枯礬少許。菜油調敷。一次即愈。

藥性考云。蠶豆苗。能醒酒。

醬油糟

以麪豆拌罨成黃。鹽水漬成之。伏造者味厚。秋油則味薄。陳久者入藥良。味鹹性冷。殺一切魚肉菜蔬毒。塗湯火傷。多食發嗽作渴。

解食荔作脹。以陳年醬油飲少許。即消。

中輕粉毒。以三年陳醬油化水頻漱之。集簡方

糟油

藥性考。摩風癢。腰膝痛。開胃暖臟。止嘔噦。解蔬菜毒。

腐漿。沫渣。皮乳。
鑄巴。泔水。麻腐。

瀕湖綱目於豆腐集解。註腐皮堪入饌。而漿乳皆遺之。又胡麻亦可作腐。綱目胡麻條亦遺之。今悉爲補。概名曰腐。

腐漿。味甘微鹹。性平。清咽祛膩。解鹽滷毒。藥性考云。味甘微苦。性涼。清熱下氣。利便通腸。能止淋

濁。銀杏研漿。

傷寒十日不汗。張卿子妙方。用末點豆腐漿一大盃。調好白蜜熱服。即出汗愈。神效。

腳氣腫痛難走者。熱豆腐漿加松香末。搗勻敷。過夜即好行走。永無後患。

大便下血。古今良方。荸薺一觔或半觔。豆腐漿不沖水者一大盃。將腐漿頓極熱。搗荸薺汁。乘熱沖

入飲之。

鹽哮。救生苦海。用豆腐漿點糖少許。日日早服一盃。不間斷。過百日自愈。

治黃疸。劉羽儀驗方。每日空心冷喫生豆腐漿一盃。喫四五次自愈。忌食生蘿蔔。

痰火吼喘。經驗廣集。飴糖二兩。豆腐漿一盃。煮化頓服愈。

治勞及自汗。回生集方。用黑豆淘淨。磨成腐漿。鍋內熬熟。結成皮。每食一張。用熱黑豆漿送下。卽效。

○凡人每日清晨喫黑豆腐漿。大有補益。可以免癆病之患。

肺癰肺痿。用芥菜油陳年者。每日將半酒杯沖豆腐漿服。服後胸中一塊必塞上塞下。塞至數次。方

能吐出惡膿。日服至愈。

血崩。不藥良方。生豆腐漿一盃。生韭菜汁半盃。入漿內。空心服一二次。

五妙湯治產後并弱症。郁文虎傳方。用頭鍋腐漿一盃。腐皮一張。生雞蛋一個。打碎。沖入漿內。再加

圓眼肉十四枚。白糖一兩。入漿內滾服。五更空心食。

陳廷慶云。豆腐漿入陰分。瀉火通淋濁。凡淋症用六一散沖腐漿食。最妙。五更沖雞蛋白糖點服。寧嗽

補血。粵人以腐漿煮粥食。名甜漿粥。大能補虛羸。

腐沫。卽豆腐泔水上結沫是也。治鵝掌癬。生手掌及足掌。層層剝皮。血肉外露。此沫熱洗卽愈。

腐渣。此造豆腐所剩之渣。人以飼豬。入藥須用生腐渣。

治一切惡瘡。無名腫毒。神效。不藥良方。用豆腐渣在砂鍋內焙熟。看紅腫處大小。量作餅子貼上。冷即更換。以愈爲度。

大便下血。古今良方。用不見水豆腐渣炒黃。清茶調服。即愈。

治臙瘡裙邊瘡。爛臭起沿。養素園方。生豆腐渣捏成餅。如瘡大小。先用清茶洗淨。絹帛拭乾。然後貼上。以帛纏之。一日一換。其瘡漸小。肉漸平。此費啓彰親試有效之方也。又可敷腳蛙。

腳上皮膚生水孔而皮溼爛者。不藥良方。豆腐渣貼三日。即愈。不要落生水。

腸風下血。慈航活人書。雪花菜。卽豆腐渣。用未曾濾出漿者。帶水鍋內炒燥。爲末。每服三錢。紫血塊者。白糖湯下。紅血塊者。砂糖湯下。日三次。雖遠年垂危者。服之神效。

腐皮。味甘性平。養胃滑胎解毒。

小兒遍身起羅網蜘蛛瘡。燥癢難忍。仁惠編。用豆腐皮燒存性。香油調搽。自愈。

落頭疽。慈惠小編。用壁上蟾子五六隻。腐皮包好。喫完即愈。

冷嗽。劉羽儀驗方。乾豆腐衣。燒灰存性。爲末。熱陳酒調下。喫四五十張即愈。

水臙脹。種福堂方。陳芭蕉扇去筋。燒灰存性。五分。千金子去油殼。二分。五釐。滑石二分。共爲細末。以

腐衣包。滾水送下。十服愈。

腐乳。一名菽乳。以豆腐醃過。加酒精或醬製者。味鹹甘。性平。養胃調中。

腐巴。此卽腐漿鍋底所結焦巴也。入藥曬焙研末。或生搗作丸。皆可用。藥性考名鍋炙。開胃消滯逐積。

治淋濁補血。慈航活人書。有五效丸。用豆腐鍋巴一兩。加川連一錢。同搗丸如桐子大。每服五錢。赤

帶。蜜糖滾水吞下。白帶。砂糖湯下。熱淋尿血。白湯下。腸風下血。陳酒下。血風瘡。先將豆腐泔浸洗去

靨。以布拭乾。用前末藥。卽川連腐巴粉末。丸時留一半。真麻油調搽。乾則再塗。三四次自愈。

翻胃。神方珍記。用豆腐鍋巴。黃色者佳。炒研末。每服三錢。沙糖湯調服。白湯下。

痢疾。神方珍記。陳冬米炒豆腐鍋巴二味。各等分。爲細末。空心白湯調服。二三錢。服後宜餓半日。自

愈。

腐泔。卽豆腐所瀝下之水也。藥性考云。豆腐有鹽滷點者。有石膏點者。俱能清熱。

性清涼。能通便下痰。通癰閉。洗衣去垢膩。

麻腐。乃胡麻小粉所造者。味甘。性平。潤肌滑腸。

解毒。蔣儀藥鏡滋生賦云。麻腐豆粉。清腸清胃。

芝麻殼

此乃脂麻外殼也。綱目載其苗曰青蕒。又有麻枯餅。麻花。麻穢。無麻殼。因補之。

湯火傷。楊春涯驗方。芝麻殼燒存性。研細。遇火傷者。用麻油調搽即愈。倘溼爛。乾搽之。

半身不遂。千金不易方。芝麻殼五錢。酒煎服出汗即愈。

諸蔬部

甘藷
稷粉
甘藷酒

一作甘薯。又名朱薯。以其皮有紅者也。一名金薯。今俗通呼為番薯。或作番茹。有紅皮白皮二色。紅皮者心黃而味甜。白皮者心白而味淡。南方各省俱植之。沿海及島中居民。以此代穀。其入藥之功用亦廣。而諸家本草皆未載。李瀕湖特補列綱目中。惜其所言者。惟補虛乏。益氣力。健脾胃。強腎陰而已。他皆未之及焉。乾隆五十一年冬。今上特允閣學侍郎張若淳之請。勅直省廣勸栽植甘薯。以為救荒之備。陸中丞燿有甘薯錄之輯。所載衛生一門。實足補李氏所未及。因擇錄之。以補其遺。陸公原序云。甘薯。即薯蕷之屬。見於陳祈暢異物志。嵇含南方草木狀。中土之有此物。其來舊矣。第不甚貴重。栽植者少。明季有閩人陳經綸。復自呂宋移其種歸。巡撫金公學曾勸民樹藝。閩人德之。號為金薯。然自是長樂。謝肇淅。黃州李時珍。新城王象晉。各有論述。皆不及經綸事。而其裔孫世元父子。復為金薯傳習錄。

盛侈其先世傳自呂宋之功。一似中國素非所產者。此考證之疎也。夫以一物之微。足以備荒療疾。而又不費功力。其爲功於民食。實不淺尠。前任布政使李公渭。嘗舉以教山東之民。其性又喜沙土高地。於山海之區。尤屬相宜。五雜俎。百穀之外。有可以當穀者。芋也。薯蕷也。而閩中有番薯。似山藥。而肥白過之。種沙地易生。而極蕃衍。饑饉之民。多賴全活。此物北方亦可種也。羣芳譜。朱薯一名番薯。大者名玉枕薯。形圓而長。本末皆銳。皮紫肉白。質理膩潤。與芋及薯蕷自有各種氣香。生時似桂花。熟者似薔薇露。撲地纏生。一莖蔓延數十百莖。節節生根。一畝種數十石。勝種穀二十倍。閩廣人以當米穀。有謂性冷者。非二三月及七八月俱可種。但卵有大小耳。卵八九月始生。冬至乃止。生便可食。若未大者。勿頓掘。令居土中。日漸大。到冬至須盡掘出。不則敗爛。金氏學會曰。薯傳外番。因名番薯。形如王瓜藕臂。如拳如指。如卵如棗。大小不一。實同種別。皮有紫有白。有深淺紅。有濃淡黃。肉亦如之。蒸熟勻膩如脂。甘平益胃。性同薯蕷。海隅人以供饗殮。蔓延極速。節節有根入地。卽結。每畝可得數千觔。勝種五穀幾倍。徐氏元扈曰。昔人謂薯蕷有六利。柿有七絕。予謂甘薯有十二勝。收入多。一也。白色味甘。諸土種中。特爲最絕。二也。益人與薯蕷同功。三也。徧地傳生。剪莖作種。今歲一莖。次年便可種數十畝。四也。枝葉附地。隨節生根。風雨不能侵損。五也。可當米。凶歲不能災。六也。可充籩實。七也。可釀酒。八也。乾久收藏。屑之旋作餅餌。勝用錫蜜。九也。生熟皆可食。十也。用地少。易於灌溉。十一也。春夏下種。初冬收入。枝葉

極盛。草穢不容。但須壅培。不用鋤耘。不妨農。十二也。陸公薯錄有溉種藏製諸法。雖無關於藥病。而有濟於備荒。故併錄之。種薯宜高地沙地。起脊尺餘。種在脊上。遇旱可汲井澆灌。即遇澇年。若水退在七月中。氣候既不及藝五穀。即可剪藤種薯。至於蝗蝻爲害。草禾蕩盡。惟薯根在地。薦食不及。縱令莖葉皆盡。尙能發生。若蝗信到時。急令人發土。徧壅蝗去之後。滋生更易。是天災物害皆不能爲之損。人家凡有隙地。但只數尺。仰見天日。便可種得石許。此救荒第一義也。歲前深耕。以大糞壅之。春分後下種。若地非沙土。先用柴灰或牛馬糞和土中。使土脈散緩。與沙土同。可行根。重耕起要極深。將薯根每段截三四寸長。覆土深半寸許。每株相去縱七八尺。橫二三尺。俟薯生既盛。苗長一丈。留二尺作老根。餘剪三葉爲一段。插入土中。每栽苗相去一尺。大約二分入土。一分在外。即又生薯。隨長隨剪。隨種隨生。蔓延與原種者不異。凡栽薯須順栽。若倒栽則不生。節在土上則生枝。在土下則生卵。約各節生根。即從其連綴處斷之。令各成根苗。每節可得卵三五枚。凡藤蔓已遍地不能容者。即爲游藤。宜翦去之。及掘根時。捲去。藤蔓俱可飼牛羊豕。或曬乾冬月喂。皆能令肥脂。二三月種者。每株用地方二步有半。而卵徧焉。每官畝約用薯三十六株。四五月種者。地方二步。而卵徧焉。畝約六十株。六月種者。地方一步有半。而卵徧焉。約一百六株有奇。七月種者。地方三尺以內。得卵細小矣。畝約九百六十株。種種疎密。略以此準之。九月畦種。生卵如箸如棗。擬作種。此松江法也。金氏曰。薯苗入地即活。東西南北。無地不

宜得沙土高地。結尤多。天時旱澇俱能有秋。養苗地宜鬆。耕過須起町。高四五寸。春分後取薯種科置町內。發土薄蓋。縱橫相去尺許。半月即發芽。日漸蔓延。長一丈或五六尺。割七八寸爲一莖。勿割盡。留半寸許。當割處復發生。生不息。若養薯作苗。須用稍長尺許。密密栽豎。如養葱蒜法。栽莖使牛耕町。寬二尺許。高五六寸。將莖斜插町心。約以七分在町內。三分在町外。町內者結實。町外者滋蔓。每莖相去一尺餘。十餘日。町兩旁使牛耕開令曬。又七八日。以糞壅之。仍使牛培土。每町可得薯三四觔。若雨多。須將薯掇町上。毋令浮根匝地。然實結地內。蟲不能災。葉如食盡。亦能復發。早栽宜稀。晚栽宜密。三四月栽者。實粗大。七八月栽者。實細小。秋末實始加大。冬至前當掘盡。不掘盡亦不能大。熟時須先割薯置町下。俟乾捲起。冬月刈喂牲畜。若北地早寒。則遲一個月栽。早一個月掘。宜遲宜早。亦看天氣寒暖耳。甘薯疏云。江南田汙下者不宜薯。若高仰之地。平時種藍種豆者。易以種薯。有數倍之獲。大江以北。土更高。地更廣。卽其利百倍不啻矣。倘慮天旱。則此種畝收十石。數口之家。止種一畝。縱旱甚。而汲井灌溉。一至成熟。終歲足食。又何不可。取種之法。羣芳譜云。九月十月間掘薯卵。近根先生者。勿令損傷。用軟草包裹。掛通風處陰乾。一法於八月中揀近根老藤。剪七八寸長。每七八根作一小束。耕地作畦。將藤束栽如栽韭法。過月餘。每條下生小卵如蒜頭狀。冬月畏寒。稍用草蓋覆。至來春分種。一法霜降前。取近根卵稍堅實者。陰乾。以軟草作襯。另以軟草裹之。置無風和暖不近霜雪不受冰凍處。一法霜

降前收取根藤。曬令乾。於竈下掘窖。約深一尺五六寸。先用稻糠三四寸。次置種其上。更加稻糠三四寸。以土蓋之一法。七八月取老藤。種入木筩或磁瓦器中。至霜降前。置草簾中。以稻糠襯置向陽近火處。至春分後。依前法種。金氏曰。存薯之法不一。在人變通。或存木斛草園。盜壘竹籠中俱可。但性畏寒。又畏熱。置避風和暖處。用草浮蓋。俾通氣。若封固。則發熱壞爛。敏前在東甌玉環。見其島民少穀食。多以茹爲糧。彼土有地。率多種茹。土人云。其利十倍於穀。以茹糧多者爲富。其收茹之法。多曝乾切條。以竹席圍如囤儲之。久亦不蛀。用則以水煮代飯。云食之多力鮮病。蓋其味甘。能補脾土故也。金氏曰。薯初結即可食。味淡多汁。及時則甜。煨食。煮食。燻食。蒸食。亦可生食。切片曬乾。碾作饅粥。磨作粉餅。滾水灼。可作丸。拌麪。可作酒。春細水濾去渣。澄曬成粉。其葉可作蔬。○范咸臺灣府志。長而色白者是舊種。圓而黃赤者出自文來國。金姓者攜回。故名金薯。○諸羅縣志。他物下種。必用子用仁。或原物根芽。獨薯不然。取一條片片切之。只留皮一面。種之發根生苗。亦一異也。

氣味甘平無毒。主治補中和血。暖胃肥五臟。白皮白肉者。益肺氣生津。中滿者不宜多食。能壅氣。煮時加生薑一片。調中與薑棗同功。紅花煮食。可理脾血。使不外洩。敏按甘藷。俗傳能發諸病。患痔漏者。愈後食之復發。亦以性能下行而滯氣故也。

痢疾下血。傳習錄云。痢疾之起。多因脾胃先虛。而後積滯成痢。其有脾氣虛甚。欲健中焦者。必宜甘

溫之藥。其有命門不暖。欲實下焦者。必宜純熱之藥。至若溼熱所致。煩熱口燥。腹痛純紅。小水黃赤。以及下血者。用此薯蒸熟。以芍藥湯頻頻嚼服。或薯粉調冬蜜服。亦愈。

酒積熱瀉。傳習錄云。泄瀉之症不一。或水土相亂。併歸大腸而瀉。或土不制水。清濁不分而瀉。或小腸受傷。氣化無權而瀉。或真陰虧損。元陽枯涸而瀉者。此皆各從其類治之。若酒溼入脾。因而殮泄者。用此薯煨熟食。

溼熱黃疸。黃疸之症有四。一曰陰黃。由氣血敗也。一曰表邪發黃。即傷寒症也。一曰膽黃。驚恐所致也。更有陽黃一症。或風溼外感。或酒食內傷。因溼成熱。因熱成黃者。用此薯煮食。其黃自退。

遺精淋濁。遺精之與淋濁。症有不同。故治亦不同。然大要責在心脾腎。故凡遇此症。無論有夢無夢。有火無火。或氣淋血淋膏淋勞淋。總宜調養心脾。每早晚用此粉調服。大有奇功。

血虛經亂。婦人血虛。或遲或早。經多不定。故陽虛補其陽。陰虛補其陰。氣滯順其氣。其有不宜辛燥寒涼而宜於清和者。用此薯羹殮頻服。調養其脾。使脾健生化。經期自定。

小兒疳積。疳者乾也。在小兒爲五疳。在大人爲五勞。其病由於哺食乾燥之品。嗜啖肥厚之物。妄服峻利之藥。以致津液乾涸。延而成疳。此薯最能潤燥生津。安神養胃。使常服之。則舊積化而疳愈矣。

甘薯粳。羣芳譜云。造粳將糯米水浸五七日。以米酸爲度。淘淨曬乾。搗成細粉。看晴天。將糯米粉入

生水。和作團子如杯口大。卽將薯根拭去皮。洗淨沙石土。徐徐磨作漿。要極細。勿攪水。將糯團煮熟。撈入瓶中。用木杖盡力攪作糜。候熱得所。大約以可入手爲度。將薯漿傾入。每糯粉三斗。入薯漿一觔。攪極勻。先將乾小粉篩平板上。次將糜置粉上。又著乾粉捍薄。曬半乾。切如骰子樣。曬極乾。收藏。用時慢火燒鍋令熱。下二合許。慢火炒。少刻漸軟。漸發成圓球子。次下白糖芝麻。或更加香料炒勻。候冷極浮。每粳二升。可炒一斗。芋漿山藥漿俱可作。按此物食之。厚腸胃。健腳力。縮痰涎。解毒活血。甚妙。

甘薯粉。功同甘薯。造法。用薯根粗布拭去皮。水洗淨。和水磨細。入水中。淘去浮渣。取澄下細粉。曬乾。同豆粉用。此粉水作丸。與珍珠沙谷米無異。按此粉余前在閩中及玉環俱有。土人造以售客。販行遠方。近日寧波及乍浦多有販客市粉。價賤於麪粉。近日餅餌舖中。率多買此攪和麥麪中。作果餌以售。其粉亦高低不同。有曰淨粉。則依前法所造者。滾水沖之。儼如藕粉。故藕粉店中亦多買此攪和。非有識者莫辨。有曰行粉。則連浮渣一切皆磨細和入。只可作餅餌用。其色亦黃而不白。然其又有甜苦二種。沙土細潔者。則其茹作粉甜。倘先一年種烟其地。次年種茹。則苦澀。人不售之。惟堪作粉。味亦苦矣。但以味甘有清香。化開色如玉者佳。

甘薯酒。和脾暖胃。止瀉益精。造法。用薯根不拘多少。寸截斷。曬乾。甑炊熟。取出揉爛。入瓶中。用酒藥研細搜和按實。中作小坎。候漿到看老。如法下水。用絹袋濾過。或生或煮熟任用。其入甌寒暖。酒藥分

兩下水升斗。或用麴蘖。或加藥物。悉與米酒同法。若造燒酒。卽用薯酒入鍋。如法滴糟成。頭子燒酒。卽用薯糟造。當用燒酒。亦與酒精造燒酒同。此酒福建最多。土人名土瓜酒。燒酒曰土瓜燒。其酒味微帶苦。峻烈不醇。不善飲者。食之頭目微有昏眩。亦無大害。閩中紹酒價貴。此酒值廉。土人相率飲此。亦以餉客。

山百合

此百合之野生者。瓣狹長而味甘。山人採貨之。○藻異云。百合有三種。一名山百合。花遲不香。二名檀香百合。可食。三名虎皮百合。食之殺人。○百草鏡。百合白花者入藥。紅花者名山丹。黃花者名夜合。今惟作盆玩。不入藥。百合以野生者良。有甜苦二種。甜者可用。取如荷花瓣無蒂無根者佳。能利二便。氣虛下陷者忌之。

逢原云。余親見包山土罇中。蚓化百合。有變化未全者。大略野生百合。蚓化有之。其清熱解毒。散積消痰。乃蚓之本性耳。○應驗方。癰疽無頭。野百合同鹽搗爛敷。

甘入肺。清痰火。補虛損。治肺癰。救生苦海。取白花者三兩搗爛。白酒和絞。取汁一盃。不拘時服。七服全愈。

石
衣耳石

台州仙居有之。生峻嶺絕壁海崖高處。乃受陰陽雨露之氣。漸漬石上。年久則生衣。鮮者翠碧可愛。乾者面黝黑。背白如雪。土人以作羹餉客。最爲珍品。煮法用滾水一盃。投鹽少許。泡石衣於中。用手細細擺揉。去其細砂。待軟如餅。其細砂去淨。色卽變紫如玫瑰。必得鹽水。則所銜細砂。始能吐盡。再過清水二三次。以雞湯下食。滑脆鮮美。味最香甜。爲山蔬第一。台州六屬。惟仙居有之。或云各處深山皆有。非仙居人不能取。故仙居人有專業此爲生者。近則一二百里。遠則數百里外。向深巖危壑。人跡莫能躋。攀者壁上始有此物。其取之法。人則藤兜飛架。衣雞毳。躡鞋趨。捷如猿猴。取之則銛鈎鋒鏟輪組。入山有祭。買路有楮。非仙土人莫能盡其術也。然結侶雖多。其采取止許一人往。不得兩人並採。亦奇也。每年必損人。故其值昂。而貪利者且競趨之。

味甘氣清。性寒無毒。清膈熱。利小水。化痰。消癭。結滯氣。有補血明目之功。婦人食之。能潔子宮。易於受孕。男子食。益精增髓。

石耳

羣芳譜。石耳一名靈芝。生天台四明河南宣州黃山巴西西邊。傲諸山石巖上。遠望如烟。廬山亦有之。狀如地耳。山僧採曝。餽遠。洗去沙土。作茹。勝於木耳。○粵志。韶陽諸洞多石耳。其生必於青石。當大雪後。石滋潤。微見日色。則石生耳。大者成片如苔。綠碧色。望之如烟。亦微有蒂。大小朵朵如花。烹之面青紫。

如芙蓉底黑而嫩。每當味爽擷取。則肥厚。見日漸薄。亦微化爲水。凡香蕈感陰溼之氣而成。善發冷氣。多和生薑食乃良。惟石耳味甘腴。性平無毒。多食飢人。能潤肌童顏。在木耳地耳之上。○南粵瑣記。凡青石以烈日輒出汗。汗凝結則成石耳。青爲木氣放生耳。若白石則否。或曰。此亦蕈之類。厚者蕈。薄者耳。或曰。凡乳牀必因石脈而出。不自頑石出。其在陰洞者爲乳牀。在陽巖者爲石耳。石耳之美。見稱於伊尹。其言曰。漢上石耳。蓋上古已珍之矣。

性寒。或曰平。味甘腴。無毒。○藥性考。石耳寒平。石崖懸珥。氣並靈芝。久食色美。益精悅神。至老不毀。瀉血脫肛。灰服愈矣。○名勝志。安吉州梅溪石門中產石耳。食之止熱。

野芋青芋 野芋頭 土芋藤 鬼芋

汜勝之農書。芋有六種。五野芋。六青芋。野芋有大毒。殺人。凡芋三年不收。卽成野芋。性滑。下石毒。服食皆忌之。青芋亦有毒。必須灰汁易水煮之。堪食。只宜蒸啖之。中野芋毒者。令人戟喉音啞。煩悶垂死。以大豆漿或薑汁解之。薑汁亦可。

葛祖遺方。合麻藥。治跌打損傷。痔漏麻風。敷腫毒。止痛。治瘡癬。搗敷腫傷。乳癰。野芋頭和香糟搗敷。

青芋

療冷熱止渴。

土芋藤

土芋即黃獨。俗名香芋。肉白皮黃。形如小芋。一名土卵。與野芋不同。綱目野芋附家芋內。土芋另立一條。可知。然所引僅據陳藏器一說。不知其功能稀痘。小兒熱食。大解痘毒。其藤燒灰傅。痘爛成瘡。可無癍痕。○羣芳譜。土芋其根惟一顆而色黃。故名黃獨。

野芋頭

文堂集驗。一名仙人掌。同野芋一種。但此種葉較小。略似茨菇。葉有尖。此又與草本形如鞋底者不同。
仙人掌形如鞋底。

治諸物食積已成痞塊者。用野芋頭磨爛。和糯米粉淡煮粥。每早食一茶鍾。不用油鹽。十服後。其積自消。試驗無害。集驗。

鬼芋

羅浮志。深谷中產物如薯芋狀。山人得之。剖作四片。入砂盆磨作膠漿。鍋煮成膏。待冷則凝結如餅塊。一復剖為四片。添水再煮成膏。膏成。照前三煮四煮。乃可食令飽。一芋所煮。可充數十人之腹。故稱鬼芋焉。芋有四異。初生不藉根苗。葉上朝露著地。即成種子。一異也。採製不令婦人雞狗見之。見即化水。

二異也。磨時煮時七須順旋。逆之卽化水。三異也。一芋之成。由一而四。四而十六。十六而六十。有六十四。如卦象之數。四異也。開廬山衡嶽各有鬼芋。採製又不同。

野毛豆

野毛豆生園隕中。蔓生。枝細弱。葉細尖。兩兩排枝對生。清明後開淡紫細花。結實亦可。立夏後可採。初生苗絕似金鳳花苗葉。其莢儼似角蒿。中有子二。圓如小菘豆。小滿前後皆黑。老便枯落矣。○生田塍間。莖葉及莢較家者細小。一名勞豆。

沈氏效方。性微寒。平肝火。治疴疾目疾。○百草鏡。治黃白疸。性能發汗。救生苦海。治痘毒。八九月時。田塍邊採。連莖根用。煨存性研。單用其豆更妙。麻油和敷。不問初起日久。未潰已潰。俱效。

按通雅引焦弱侯曰。野田小豆曰瞭。音勞。陳留者舊傳云。赤眉以豎豆與桓牧。隋末子通攻江都。夏侯端採豎豆食之。身之曰野豆也。魯刀切。勞豆。或瞭豎二字之訛也。然考古今註。豎豆一名治豆。葉似葛。而實長尺餘。可蒸食。一名豎菽。綱目鹿藿一名豎豆。又名鹿豆。卽今野菘豆。爾雅釋草。藿鹿藿。注。今鹿豆也。唐書夏侯端傳。搗豎豆以食。則似又非野毛豆之屬。今野毛豆亦名豎豆。豈名同而物異歟。並書之以俟考。

肝疴初起。百草鏡。野毛豆鮮者七錢。乾者五錢。雞肝一具。同煮食。煎服亦可。

野蘿蔔 地骷體 三生蘿蔔

一名紫金皮。又名巴壁虎。○百草鏡云。野萊蕪苗葉根形與家種者無二。肉雖白。而皮色帶黃為異。○

王氏博濟方。以乾萊蕪為仙人骨。俗又呼地骷體。

雁山志。山蘿蔔性寒。狀如圃種者。土人用治癰疽。搗汁服之。渣塗亦可。庚戌。予來臨安。醫內有廢圃。多商陸。土人呼為山蘿蔔。與此名

同物異。

治肺癰。百草鏡。以七枚搗汁服。

地骷體

按地骷體。乃刈萊蕪時偶遺未盡者。根入地。瘦而無肉。老而多筋。如骷體然。故名。能大通肺氣。解煤炭

熏人毒。非乾萊蕪也。王禹中所言。尚未明晰。

痞塊。醫宗彙編。陳年木瓜一個。地骷體。即蘿蔔種枯根。四兩。煎汁。時常服。一小盞。數日除根。氣痞食

痞俱治。

萬應丹。海昌方。治黃疸變為臃脹。氣喘翻胃。胸膈飽悶。中脘疼痛。并小兒疳疾結熱。噤口痢疾。結胸

傷寒。傷力黃腫。并脫力黃各症。用人中白。以露天不見糞者方佳。火煨醋淬七次。一兩。神麴。白菊子。地

骷體。即土中蘿蔔。各五錢。砂仁二錢。以上俱炒。陳香櫞一個。共為末。蜜丸。桐子大。每服三五七丸。或燈

草湯下。或酒下。

三生蘿蔔

此乃人工製造者。唐正聲傳此法。云得自祕授。取水蘿蔔一枚。周圍鑽七孔。入巴豆七粒。入土種之。待其結子。取子又種。待蘿蔔成。仍鑽七孔。入巴豆七粒再種。如此三次。至第四次。將開花時。連根拔起。陰乾。收貯罐內。遇臃脹者。取一枚搥碎煎湯服之。極重者二枚立愈。

南瓜蒂附

綱目南瓜主治。止言補中益氣而已。至其子食之脫髮。今人以爲蔬。多食反壅氣滯膈。昔人皆未知也。吳秀峯言。凡瓜熟皆蒂落。惟南瓜其蒂堅牢不可脫。昔人曾用以入保胎藥中。大妙。蓋東方甲乙木屬肝。生氣也。其味酸。胎必藉肝血滋養。胎欲墮則腹酸。肝氣離也。南瓜色黃味甘。中央脾土之精。能生肝氣。益肝血。故保胎有效。

神妙湯。保胎。用黃牛鼻一條。煨灰存性。南瓜蒂一兩。煎湯服。永不墮。
疔瘡。行篋檢祕。用老南瓜蒂數個。焙研爲末。麻油調塗。立效。

南瓜瓢

治湯火傷。慈航活人書。伏月收老南瓜瓢。連子裝入瓶內。愈久愈佳。凡遇湯火傷者。以此敷之。卽定疼。

如神。

辣茄

人家園圃多種之。深秋山人挑入市貨賣。取以熬辣醬及洗凍瘡用之。所用甚廣。而綱目不載其功用。陳炅堯食物宜忌云。食茱萸卽辣茄。陳者良。其種類大小方圓黃紅不一。惟一種尖長名象牙辣茄。入藥用。○又一種木本者。名番薑。范咸臺灣府志。番薑木本。種自荷蘭。開花白瓣。綠實尖長。熟時朱紅奪目。中有子辛辣。番人帶殼啖之。內地名番椒。更有一種結實圓而微尖。似柰種。出咬嚼吧。內地所無也。○藥檢云。辣茄一名臘茄。臘月熟。故名。亦入食料。苗葉似茄葉而小。莖高尺許。至夏乃花。白色五出。倒垂如茄花。結實青色。其實有如柿形。如秤錘形。有小如豆者。有大如橘者。有仰生如頂者。有倒垂葉下者。種種不一。入藥惟取細長如象牙。又如人指者。作食料皆可用。

食物宜忌云。性辛苦大熱。溫中下氣。散寒除溼。開鬱去痰消食。殺蟲解毒。治嘔逆。療噎膈。止瀉痢。祛脚氣。食之走風動火。病目發瘡痔。凡血虛有火者忌服。○藥檢云。味辛。性大熱。入口卽辣舌。能祛風行血。散寒解鬱。導滯止瀉。瀉擦癬。

百草鏡。熏壁蝨。洗凍瘡。浴冷疥。瀉大腸。經寒癖。

外痔。百草鏡。以象牙辣茄紅熟者。挫細。甜醬拌食。

毒蛇傷。百草鏡用辣茄生嚼十一二枚。卽消腫定痛。傷處起小泡出黃水而愈。食此味反甘而不辣。或嚼爛敷傷口。亦消腫定痛。

祛臭蟲方。經驗廣集用羊骨頭一個。秦椒半觔。共入火盆內。同鋸木屑燒之。門窗閉緊。勿令出烟。其蟲自死。敏按木屑用樟木者佳。

凍瘡。蔡雲白方。剝辣茄皮貼上。卽愈。

痢積水瀉。醫宗彙編辣茄一個爲丸。清晨熱豆腐皮裹吞下。卽愈。

敏按花鏡番椒一名海瘋藤。俗呼辣茄。本高一二尺。叢生白花。秋來結子。儼如秃筆頭倒垂。初綠後朱。紅懸掛可觀。其味最辣。人多採用。研極細。冬月以代胡椒。蓋其性熱而散。能入心脾二經。亦能祛水溼。癸亥予在臨安。有小僕於暑月食冷水臥陰地。至秋瘡發。百藥罔效。延至初冬。偶食辣醬。頗適口。每食需此。又用以煎粥食。未幾瘡自愈。良由胸膈積水變爲冷痰。得辛以散之。故如湯沃雪耳。又名秦椒。李成裕遼載秦椒一名番椒。形如馬乳。色似珊瑚。非本草秦地之花椒。卽中土辣茄也。

龍柏藥性考。秦地乃草本辣椒。綱目諸註。誤爲秦地花椒。不知卽今之辣茄。又名辣虎。性熱味辣。温中散寒。除風發汗。去冷癖。行痰逐溼。多食眩旋。動火故也。久食發痔。令人齒痛咽腫。

刀豆根
附殼

綱目穀部刀豆條發明下註。刀豆本草失載。惟近時小書載其煖而補元陽。近有人燒其子存性。白湯調服。止呃逆有效。故瀕湖特爲增入。而不知其用甚廣。今悉補之。

治頭風。集聽云。刀豆根乃治頭風之神藥。每用須五錢。酒煎服。

治鼻淵。年希堯集驗方。老刀豆文火焙乾爲末。酒服三錢。重不過三服。卽愈。

殼。治腰痛。萬氏家抄。用刀豆殼化灰。好酒調服。外以阜角燒烟熏之。

牙根臭爛。洪氏一盤珠。刀豆殼燒灰。加冰片。擦涎出。卽安。

治久痢。種福堂方。用刀豆莢飯上蒸熟。洋糖蘸食。一二日卽愈。

治婦女經閉。腹脅脹痛欲死。并消血痞。經驗廣集。陳年刀豆殼。焙燥爲末。好酒服一錢。加麝香五釐。

亦妙。

喉癰。張氏必效方。刀豆殼燒灰。以二三盞吹之。立效。

楊梅瘡。萬氏濟世方。當歸。川芎。苡仁。木通。木瓜。生地。熟地。金銀花。防己。防風。荆芥。黃蘗。白芷。知母。甘

草。阜莢。豬苓。去皮。各二兩。人參二錢。山紅花。刀豆殼。各五錢。硬飯團二兩。水煎一鍋濃汁。不拘時當茶

服。忌魚腥生冷。四劑全愈。

地腎

粵志。羅浮多地腎。一名松黃。但松黃未落爲松實。已落而英華未散爲地腎。其狀若彈丸。大者如雞卵。紅黃相錯。一一晶瑩。熟之可入饌。其生無根蒂。散布松下。土鬆石潤處有之。或亦松蕈之類也。乍浦九山補志。松花蕈。山之有松者皆產。惟陳山東麓爲多。三月間松花入土。至四五月經雨後卽生。至八月又生。鮮肥滑嫩。素品之上味也。

葛乳

味甘性平。生津消痰。治溲濁不禁。

一名葛花菜。名山皆有。亦產高州。粵志。高州多種葛。雷州人市之爲絳綌。秋霜時。有葛乳涌生地上。如芝如菌。赤色。味甘脆。微苦。乃葛之精華也。亦曰葛蕈。瀕湖僅據太和山志載其醒酒。與酒積成疾。他皆未及。故特補之。

性涼。解肌熱。散風火。及陽明風熱癩疹。

鮮草果

粵志。人多種之爲香料。卽杜若。非藥中草果也。其苗似縮砂。三月開花作穗。色白微紅。五六月結子。其根勝於葉。

味辛溫。能除瘴氣。久服益精明目。令人不忘。

眞珠菜

六安有眞珠菜。如眞珠。○益部方物略記。眞珠菜。戎瀘等州有之。生水。中石上。翠縷纖蔓。首貫珠。蜀人以蜜熟食之。或以醃煮。可致千里不壞。○黃山志。眞珠菜。藤本。蔓生。暮春發芽。每芽端綴一二蕊。圓白如珠。葉翠綠如茶。連蕊葉。腊之。香甘鮮滑。他蔬讓美。利水通淋。結消腹脹。下氣癢閉。

鷓鴣菜

連江志。生海石上。色微黑。○漳州府志。鷓鴣菜。散碎花。微黑。出漳浦。

療小兒腹中蟲積。食之卽下如神。

葛仙米

生湖廣沿溪山穴中石上。遇大雨衝開穴口。此米隨流而出。土人撈取。初取時如小鮮木耳。紫綠色。以醋拌之。肥脆可食。土名天仙菜。乾則名天仙米。亦名葛仙米。以水浸之。與肉同煮。作木耳味。大約山洞內石髓滴石所成。性寒。不宜多食。四川亦有之。必遇水衝乃得。歲不常有。他如深山背陰處。大雨後石上亦閒生。然形質甚薄。見日卽化。或乾如紙。不可食矣。○梧州府志。葛仙米。出北流縣勾漏洞石上。爲水所漬而成。石耳類也。采得曝乾。仍漬以水。如米狀。以酒泛之。清爽襲人。此原非穀屬。而名爲米。傳云。

晉葛洪隱此乏糧。采以爲食。故名。○嶺南雜記。韶州仁化縣丹霞山產仙米。徧地所生。粒如粟而色綠。煮熟大如米。其味清腴。大抵南方深山中皆有之。○宦遊筆記。出粵東萬仙洞外。有流泉噴薄石上。遂生苔菌之類。其狀如米粒。青色。莖以爲羹。味極鮮美。土人呼爲萬仙米。有未識者。疑是青螺。按韶州府志。丹霞出仙米。頗與此相類。但一生沙土。一生水石。爲異耳。○陸祚蕃粵西偶記。道書寶圭洞天。卽今北流縣勾漏山。洞口前後產葛仙米。采而乾之。粒圓如黍。揉麪釀酒。極芳香。性寒。味甘爽。解熱清膈。利腸胃。

按葛仙米本屬石耳之類。憶庚子歲曾於劉明府席閒食之。時以爲羹。儼如青螺狀。翠碧可愛。味極甘鮮。滑脛適口。入蔬爲宜。藥性考云。清神解熱。痰火能療。或云。久服延年。蓋亦能清臟熱者。

黃矮菜

一名黃芽菜。咸淳臨安志。冬開取巨菜。覆以草。積久而去其腐。葉黃白鮮瑩。故名黃芽。萬歷杭州府志。杭人訛爲黃雅菜。戒庵漫筆。黃矮菜。杭州呼爲花交菜。○羣芳譜。燕京圃人以馬糞入窖。壅培苾菜。令不見風日。長生苗葉。皆嫩黃色。脛美無滓。謂之黃芽菜。乃白菜別種。莖葉皆扁。

甘溫無毒。利腸胃。除胸煩。解酒渴。利大小便。和中止嗽。冬汁尤佳。○食物宜忌。味甘性溫。滑利竅。○陳堯士云。補虛羸。

按黃矮菜有南北二種。南產者。惟杭城太平門外沙地產者爲最。他處悉高大粗鬆。絕無捲心密葉。味亦較遜。北產糧艘帶來者。味更美。質更細。且無粗筋。有重至十餘觔一顆者。南中亦不易得也。陳確齋云。食之潤肌膚。利五臟。且能降氣清音聲。惟性滑洩。患痢人勿服。

白茄
蒂葉

汪連仕方。一名玉盤茄。有大小二種。大者如雞卵。小者如指頭。初生色白。老則皮黃。能入骨追風。治一切癱瘓。根名白風藤。合酒蒸服。茄實蘸硫黃。擦白癩風。除大麻風。東粵茄園產者良。名茄丸。

葉。治腸紅大便下血。劉羽儀驗方。用白茄子葉。經霜方採。刷淨毛。去焦黃葉。陰乾。取三四葉。煎濃湯。如此喫三四次。其血卽止。永不復發。此方曾經邪犬咬過之人勿服。

蒂。治發背及一切毒癰初起。味水軒雜記。用白茄蒂七個。生首烏等分。酒煎服。卽消。

天茄

出廣中。如大拇指。其形如茄。而有稜。黑色。堅如石。擊之不得碎。其蒂黃黑如醬色。一種牽牛花嫩子。蘇人采爲蜜餞入食品者。亦名天茄。大能破氣。與此迥別。

胃脘痛。救生苦海。水磨服之。每服一枚見效。

嫩毒。五雜俎記。關中有天茄。可治嫩毒。

牛心茄子

產瓊州。一核者入口立死。兩核者可以養清解之。入外科膏藥用。麻藥用。此藥只可外敷。不宜內服。

緬茄

高濂珍異藥品云。緬茄。一作沔茄。形如大栗。上有罩帽。如畫皮樣。出滇南緬甸地方。堅如石。○滇略。緬茄。枝葉皆類家茄。結實似荔枝核。而有蒂。土人雕刻其上。而繫之。拭眼去翳。亦解瘡毒。○滇南雜記。緬茄。出緬甸。大而色紫。蒂圓整。蠟色者佳。○粵志。廣東高州府出木茄。上有方蒂。拭眼去昏障。卽緬茄也。水磨塗。治牙疼。抹眼眶。去火毒。又能解百藥毒。

治疔瘡走黃。良朋彙集。此方出寶坻張相公百發百中。真神效方。凡疔瘡走黃。毒攻入內。不知人事。但有氣者可救。用緬茄一枚。以磁盤盛黃酒。將茄放盤內。磨得下。磨不下。只管於酒內磨一鍾。約熟茶時。將酒裝入長頸錫壺內。再入連鬚葱二根。牙咬不令斷。白豇豆七粒。如蕎麥開花時。加蕎麥七粒。別時不用。又用小麥。令衆人口嚼成麵筋。封固壺口。放水鍋內。煮一炷香。取出。熱服。出汗卽愈。

醬茄

此卽人家醬中食茄。入藥宜陳年者佳。

治耳癢出膿。妙藥方。醬茄擠汁滴之。

治牙疼。周氏家寶方。醬茄燒灰存性爲末。掩患處。
腹內繁瘕。壽域方。陳年醬茄燒存性入麝香輕粉少許。脂調貼之。

糟茄

山海草函。燒灰存性。治鵝口疳。

玉瓜

卽廣昌土瓜。出江西。常中丞宦遊筆記。廣昌土瓜。本草不載。形甚拙。圓者如瓠。或磊砢如贅疣。無瓣無瓢。長沙土中。外汙內潔。細肌密理。剖之白如冰玉。入口清甘無滓。消煩釋滯。或熟食之。亦佳。殆瓜中異品也。其性蔓生。春種而秋成。冬初始入市。無種。春深後。切瓜連皮成小塊。用沙土覆於室內。久之芽生。於是就沙地爲窰。令深而寬。藉以茅。欲其中通而根可旁達。旣長。密葉蔓生。纍纍插竹引之上行。培以雞糞。乃繁碩。土人又名玉瓜。抱朴子云。五原蔡誕入山而還。語家人曰。予至崑崙得玉瓜。以玉瓜井水洗之。乃軟可食。是豈其遺種耶。江西他縣亦有產者。然小而渣多。惟廣昌附郭五里內爲佳。予食於元宵後。喜其味美。至郡覓之。東風送暖。瓜卽不可留矣。
味甘性平。調中益氣。舒鬱化滯。消食。清大小腸火。生津滋血。和營衛。熟食補脾健胃。

節瓜

粵草志。節瓜乃冬瓜中一種小者。白皮。蔓地生。一節生一瓜。得水氣最多。故解暑毒。止渴生津。驅暑健脾。利大小腸。

穿腸瓜

吉雲旅鈔。穿腸瓜乃大便解出甜瓜子。生苗結實。土人名糞甜瓜。不拘大小。皆可入藥。採來曬乾。新瓦焙焦爲末。乳鉢研極細。攤地上。出火毒。收貯聽用。但此瓜不易有。須以人力製造。其法。將爛熟甜瓜與七八歲小兒空心帶子食之。令其勿嚼碎子。次日解出大便。子裹糞內。帶糞曝乾。時早卽於本年下出。倘時晚不及生瓜。花亦可用。否則藏於次年下種更好。大人便出者。子亦可種。此瓜生在夏秋。若春冬要用。必須預備。

治痔漏。吉雲旅鈔。有祕授消痔神方。不論遠年近日痔漏。三服除根。用穿腸瓜焙存性爲末。每末一兩。加蟬蛻末三錢五分。以金銀花五錢。浸酒一二日。煎數滾。調藥末。每服二錢七分。空心金銀花酒下。外以白海南花並根葉煎湯。不時先熏後洗。三日卽愈。海南花春冬無鮮者。預收陰乾備用。蓋痔漏乃大腸鬱火。臟腑積熱。發而爲腫。爲痛。爲瘡。久而成管。今用此藥。以散火消毒。去積除壅。其管自退。不問新久。屢試屢驗。忌房事惱怒。煎炒辛辣熱物。並發氣之類。百日永不再發。此方傳自西洋僧。有洋客患痔漏痛甚。不能上海船。其僧出此藥與服。三日卽愈。求其方。送洋布十四。黃金五兩。始得此方。用無不

效。

天骷體

此乃鄉野村中桑樹及屋籬上所掛霜打絲瓜也。其子名烏牛子。

治婦人白帶血淋。臃脹積聚。一切筋骨疼痛。並宜服之。汪連

鬼骷體

汪連仕云。乃殘老之向日葵。其子性烈。通氣透膿。合麝香。急性子。搗爛為膏。貼臍。能落胎。

敏按。冬日桃園中有樹上乾枯殘桃。亦名鬼骷體。與此名同物異。

白鼓釘

宦遊筆記。口外白鼓釘。即內地蒲公英。葉有鋸齒。婆婆鋪地。與內地生者迥殊。內地者。花早開。單瓣。生沙漠者。花開於夏至前。宛似黃菊。一望燦然滿地。其蕊瓣重疊。顏色嬌媚。暮春草甫萌芽。口外啖此味。用之不竭。不啻春韭秋菘也。採食之。清火。亦為通淋妙品。其莖中折斷有白汁。諸蟲盛夏孕育。人手觸之成疾。百藥難效。取汁厚塗。即愈。鄭方升云。一莖兩花。高尺餘者。掘下數尺。根大如拳。旁有人形拱抱。搗汁酒服。治噎膈如神。按上所載。皆綱目未及言者。且口外所產。又與內地異。綱目蒲公英入柔滑類。歸草部。今沙漠所產。人以作菜茹。故入菜部。亦各從其類也。

清火毒鬱熱。通乳通淋。消腫。治膈噎。療一切毒蟲蛇傷。

三寶薑

香祖筆記。產臺灣鳳山縣。相傳明初三寶太監所植。治百病有效。

薑

滇南記。產雲南百夷中。餌一刀圭。終其世斷絕人道。土人以飼牧馬。不之宜也。

川薑

出川中。屈曲如枯枝。味最辛辣。絕不類薑形。亦可入食料用。○包汝楫南中紀聞云。扶叢鄉。獠人。搗木薑。土茶餉。余受其木薑。作羹。味如茱萸醬。卽此物也。

味辛性熱。治胃寒。散冷積。寒癖。痰氣。

沙葱

西北遊記。口外沙石中生野葱。一名楞葱。一名沙葱。石楞中所產。故名楞。沙磧中所產。故名沙。其葉與家葱同。大更過之。味辣於家葱。根絕似蒜頭。大更過之。味亦辣於蒜。善食辣辛者。不能罄一枚。雖細如草莖。攢生於沙磧甚密。醃之調羹。勝如韭。雉羹。兔羹。尤宜。又有沙葱草。與沙葱相似。人食之。心迷亂。馬食之。腹隱痛。惟宜於囊駝。採者折以辨之。沙葱本脆。折易斷。此草柔韌。難折。入藥取根。○西域聞見錄。

丕雅斯類野蒜。頭大如雞子。葉如葱而不中空。味辛。甘肅人呼爲沙葱。回人嗜之。寬中下氣。消食解肌。活血發汗。表風寒。滌宿滯。

風葱

臺志出臺灣。療風疾。

番蒜

徐昆柳崖外編。番蒜出臺灣。番地。外形似木瓜。中似柿。有浮山張氏。宦於閩。一婢食鱉肉。後誤食。竟遂病。面黃腹脹。碗破欲死者數矣。半載後。有饋番蒜者。婢偶食之。遂大瀉。有物如小鱉者數十。少頃。爽然疾若失。方知番蒜可治鱉毒也。

治鱉瘕。解食毒水毒。

蒜梗

此大蒜近瓣處中心短梗也。乾者入藥用。

治瘡成管。年希堯集驗方。用大蒜梗燒灰存性。搽患處。其管自消。

坐板瘡。黃氏醫抄。用蒜梗燒灰爲末。先洗淨去腐。將藥末搽上。

洗漏立驗。良朋彙集云。夏應避試效過。防風。荆芥。地骨皮。川椒。斬艾。瓦松。各五錢。槐條一兩。陳蒜梗。

二兩共入麻布袋內熬滾熱。盪止疼神效。

熏痔瘡。 救生苦海。 蒜梗陰乾。 以火盆置微火。 將梗投入。 移火盆於木桶中。 令患者坐熏之。 四圍以衣被塞緊。 勿走洩烟。 三次自愈。

凍瘡。 種福堂方。 大蒜煎湯洗之。

刺兒菜

西北遊記。 卽內地之紫花地丁。 俗呼刺兒菜。 葉如柳。 有刺毛。 夏開紫花。 生平地者起莖。 生溝壑者起蔓。 內地在在有之。 生口外沙漠者。 花開於夏至後。 大如蒜頭。 色紫可愛。 人多採食之。 暮春萌芽之際。 挖其根。 狀如大枝人參。 色較微白。 巨者如蘆菔。 烹調適口。 誠塞外鮮品。 然乾其根。 帶回內地入藥。 其清火之功。 勝於金銀花。 解毒之用。 更捷於山茨菇。 一物而兼二物之用。 如此。

波斯菜

卽今紅菜。 一名洋菜。 汪連仕云。 生長海陽者佳。 根本紅豔。 色鮮麗。

止血。 治刑杖瘀血攻心。 搗汁沖酒服。 卽散。 可理跌打。

乾冬菜

陳冬菜油。 陳芥菜油。 醬金子。

冬菜乃白菜。杭俗小雪前後。居人率市白菜。以鹽醃之作齋。藏爲禦冬。及春時所食。名曰冬菜。頗利膈下氣。其滷汁煮豆及豆腐食。能清火益肺。誠食中佳品也。至春分後。天漸暖。菜亦漸變黑色。味苦不堪食。以之曬作乾。飯鍋上蒸黑。再曬再蒸。如此數次。乃曝之極燥。貯缶器中。可久藏不壞。名曰徽乾菜。卽乾冬菜也。年久者。出之頗香烈開胃。噤口痢及產麝。以之下粥。大有補益。蓋白菜本能和中下氣。利三焦通二便。含土德之精。有生金之用。乾之則苦。返其初而從母化也。久蒸久曬。則味反甘。全其德。故有中和之運。功與參耆等。惜乎世多忽而不知。余故特爲表之。瀕湖綱目。菘下無乾菜之用。殊爲缺略。近日寬橋人所市者。乃蘿蔔莢所乾。與芥菜乾蒸曬成者。皆不入藥。須人家冬白菜醃作。蒸曬年久者爲佳。○羣芳譜有造黑醃齋法。用白菜如法醃透。取出。挂於桁上。曬極乾。上甌蒸熟。再曬乾收之。極耐久藏。夏月以此齋和肉炒。可以久留不臭。卽今乾冬菜也。

開胃下氣。益血生津。補虛勞。已痰嗽。年久者。泡湯飲。治聲音不出。和酒搗爛。塗湯火傷。

白火丹。黃氏傳方。此症形如水脹。肢體俱腫。皮膚色白。飽脹不食。畏見燈火。用冬菜勿落水。陰乾。陳三年者可用。愈陳愈妙。煎湯洗浴。并煎服之。立消如神。

陳冬菜滷汁

清肺火痰嗽。解咽喉腫毒。

物理小識。鹽乾菜水滴蜈蚣即死。以鹽菜炒雞。蜈蚣亦不食。

陳芥菜滴汁

味鹹性涼。治肺癰喘脹。用陳久色如泉水緩呷之。下痰清熱定嗽。真能起死回生。○作法。以芥滴貯甕中。埋行人處。三五年取用。

糞金子

凡油白菜收子作種者。其中心老根內。必有一子。枯時搖之有聲。剖出名糞金子。以其得糞力。而花實幹中子。又得菜之生氣。大能益人。曰金子。重之也。田種者。其子更佳。○王聖俞云。糞金子在收菜種子時。其中幹內剖出。形如鼠糞而黑色。如麥粒大小。千百幹中。不過數十粒。蓋有生不生之別。不能每幹皆產也。

治血症。取三錢炒研。白湯調服。立愈。

治慢驚神效。王聖俞

麒麟菜

出海濱石上。亦如瑤枝菜之類。瓊州府海濱亦產。周海山墟琉璃國志。載雞脚菜麒麟菜。皆生海邊沙地上。又名鹿角菜。今人蔬食中多用之。煮食亦酥脆。又可煮化為膏。切片食。綱目鹿角菜云。甘大寒滑。

陳芝山食物宜忌云。微鹹性平。大有消痰功用。瀕湖反引孟詵一說。以爲有微毒。不可久食。能發痼疾。且其主治。止載下食風氣。小兒骨蒸。治丹石熱結。解麪毒。何味其功用乃爾耶。茲特表之。○朱排山柑園小識。石花菜生海中沙石間。高二三寸。狀如珊瑚。有紅白二種。洗去沙土。煮化凝成膏。糟醬俱佳。又有細如牛毛者。呼牛毛石花。味稍劣。郭璞海賦所謂土肉石華是也。

味鹹性平。消痰如神。能化一切痰結痞積痔毒。○敏按盛京志。龍鬚菜生於東南海濱石上。叢生。狀如柳根。長者至尺餘。白色。以醋浸食。亦佳蔬也。土人呼爲麒麟菜。出金州海邊。鹿角菜生東南海中。大如鐵線。分丫如鹿角。紫黃色。乾之爲海錯。水洗醋拌。則如新味。今金州海邊有之。據志則似一類二種也。石花膏。毛世洪養生集。治辛苦勞碌之人。或嗜酒多慾。忽生外痔。發作疼痛。步履難移。服此。或大便瀉一遍。或不瀉。亦卽止痛。可以行走。再用搽洗等藥。自能斷根。用麒麟菜洗去灰一兩。用天泉水煮。焯和白糖五錢食之。此方乃李治運臬司傳靈隱寺僧。杭人蕭成子患此症。僧往候。授以此方。服之隨愈。予記之。後治數人多效。

諸筍乾

綱目竹入苞木類。以筍附菜部。所載亦止苦竹。簞竹。淡竹。冬竹。諸筍。且於義類多未詳盡。不知春冬所出。性皆各別。鮮乾諸品。味亦迥殊。則入經絡主治。自不能合一。陳芝山食品。真一筍譜。及食纂所載較

詳。頗近時尚。卽取以補之。

春筍。筍譜。其佳者曰豬蹄紅。冬月卽生。埋頭土中。以鋤掘之。可三寸許。其味極鮮。甲於他筍。未出土名豬蹄紅。若長尺許。則其籜圓。故人名圓筍。亦名蚤筍。蓋冠諸筍而先出者。

味甘辛微寒。下氣養血。利膈消痰。化熱爽胃。解渴利水。療風邪。止喘嗽。

毛筍。卽茅竹筍。筍之大者。筍譜。毛筍爲諸筍之王。其籜有毛。故名。俗呼爲貓筍者。非也。大者重幾二十餘觔。猶未出土。肉白如霜。墮地卽碎。以指搯之。其軟嫩如腐。嗅之作蘭花香。毛筍大者。清明後方有。其出於臘月及正月者。形短小。籜亦有毛。土人名貓兒頭。食之多嘈心。然消痰之力。較勝他筍。味甘性平。利九竅。通血脈。化痰涎。消食脹。多食令人易饑。

鞭筍。卽發於竹邊者。夏秋有之。其生於四月者。曰梅邊。蓋感梅雨溼蒸之氣。而生頗早。味淡肉硬。不如秋生者。筍譜。邊筍。卽毛筍之旁出者。方筍盛時。生氣上升。筍皆豎。生氣旣衰。根旣橫生。盡其力可橫。百十餘丈。至地之邊際。與竹之長短相稱。謂之竹邊。故名邊筍。其狀類鞭。亦名鞭筍。地肥者軟嫩。長尺許。其籜紫色而兼白。其味恬淡而鮮。其氣醇而有蘊藉。不類毛筍之精英盡發洩於外也。味甘性寒。開胃利腸。消痰渴。

冬筍。卽潭筍。沈雲將食纂。貓竹冬生筍。不出土者名冬筍。又名潭筍。

味甘溫。陳芝山宜忌云味甘性寒。利九竅。通血脈。治吐血衄血。及產後心腹痛。一切血症。食之肥白人。食消痰滑腸。

透毒解醜。發痘疹。中諸筍毒者。生薑麻油解。小兒及脾虛者。多食難化。食物宜忌痘疹不出。採未出土多筍

煮粥食。即有生發之意。不藥良方。

青筍。即青竹筍。竹細小。故出筍色青。山閒遍地有之。係野竹所生筍也。即時下俗呼水竹者是也。承胡

謀湖州府志。天目出筍乾。其色綠。聞其煮法。旋湯使急。轉下筍。再不犯器。即綠矣。

味甘。止肺痿吐血鼻衄。治五痔并妊娠。食

青筍乾。即青竹筍。鹽湯煮曬乾者。出杭臨安天目者最佳。色如鸚哥綠。有尖上尖毬子二尖等名。味

鹹甘。性平。爽胃消痰。

鹽筍乾。以春筍鹽湯煮曬而成。有泥黃烏尖直脚等名。

味鹹甘。性平。行氣清痰。

蘅筍乾。以筍用鹽湯煮熟熏乾而成。

味鹹甘。性平。利膈化痰。

羊尾筍乾。主治同。

蘆筍片。俗名素火腿。以毛筍微醃湯煮熏乾而成。

味甘微鹹。性平。利血消痰。

蓂筍片。卽玉版筍。以毛筍淡煮曬乾者。浙閩江西多有。有草鞋底蝴蝶尖玉版等名。湖州府志。蓂筍大者。謂之闊綠。有名泥裏黃者尤美。

味甘性平。治實喘消痰。張石頑云。乾筍淡片。利水豁痰。水腫葶藶丸用之。

紅海粉

蟲語。海珠生嶺南。狀如蛞蝓。大如臂。所茹海菜。於海濱淺水吐絲。是爲海粉。鮮時或紅或綠。隨海菜之色而成。或曬晾不得法。則黃。有五色者。可治痰。或曰。此物名海珠。母如墨魚。大三四寸。海人冬養於家。春種之。瀕湖田中。遍插竹枝。其母上竹枝吐出。是爲海粉。乘溼舒展之。始不成結。以點羹湯佳。治赤痢風痰。

疳積壞眼。慈航活人書。穀精草。小青草。俱炒。青黛水飛。海粉。刺蒺藜。使君子肉。各一兩。爲末。早用羊肝七片。拌藥三錢。蒸熟食。

拾遺卷九上

器用部

番打馬

形長尺許。內藏油膏。外裹椶皮。可代火把。又可鞭馬。番舶上來。哈喇叭出。○方輿勝覽。做打麻。乃樹脂結成。夜點有光。塗舟水不能入。華夷考曰。做打麻。乃樹脂流落膠汁土內。掘出如松香。濕青狀。內有明淨好者。都似金珀一般。出滿刺加國。

性專殺蟲。不可服。有毒。入外科瘡瘍膏用。

治陰癬。救生苦海。用番打馬。和鉛。水銀。雄硫。樟腦。各等分。豬油和搽。效。○癩疥膿瘡。積善堂良方。麻黃膏中用之。○疥瘡。救生苦海。番打馬三錢。楓子肉五錢。水銀。杏仁。蛇牀子。各一錢。川椒。樟腦。雄黃。各二錢。用紅爛蓋油。共研勻。擦之。神效。○治疥瘡。應驗良方。用全蠟。乳香。枯礬。大楓子。蛇牀子。土木鱧。川椒。雄黃。水銀。番打馬。輕粉。樟腦。爲末。用爛油爲丸。擦之。卽效。此方番打馬作番答木。

擦諸瘡。并楊梅風毒。經驗。濟世良方。黃藥去皮一錢。黃連去蘆一錢。川大黃五分。三味另研。雄黃。膽礬。銅青。兒茶。青黛。輕粉。枯礬。各二分。冰片一分半。另研。入大楓子七個。去殼去油。人言壯人七釐。弱者五釐。用番打馬。卽番舶打火把之物。另爲末。瘡毒盛而人壯健能食者。每分五分。毒盛而人弱者。每分用三分。不健不羸之人。每分用四分。和入前藥內。研勻。水銀。壯健人每分用一兩。中等人用五錢。弱極人用三錢。不可多。藥須研極細。否則粒粗。恐傷皮肉。右先將水銀一分。并前藥末一分。入盞內。加真脂。

麻油少許。以指研開。逐漸添油。研至不見水銀爲度。大約如稀糊可矣。於兩手兩足掌後動脈處週圍擦之。每一分藥擦三日。每日早晚各擦一次。每次以七八百擦爲止。大率擦使熱透則住。擦時凡週身破傷處。俱用無麝香膏藥貼之。每日一換。不可經風。避帳幔內。冬月用煖牀厚被褥。卽春夏秋暖時。亦不可見風。擦至七日。必口吐臭涎。若口齒破爛出血者。用黃蜂窩煎湯。候冷漱解。勿嚙下。輕則用花椒湯漱之。擦處多皮破。不可畏痛而少擦。忌魚腥生冷發風等物。及醋茶醬一個月。尤忌房事。其牛肉燒酒團魚之類。忌二三年。若蕎麥麪與羊肉。則終身忌之。每次擦畢。以藍布尺許包裹所擦處。此治楊梅風毒法也。如楊梅瘡初發者。擦五六日全愈。所用藥皆同。惟水銀止用四五錢足矣。不必貼膏藥。○久遠膿瘡。應擦處如有破爛。可於脚手心擦之。其藥料照中等者。亦包布貼膏如前。○下疳及蛙幹重者。亦照中等藥擦治貼膏。○喉內瘡癬潰爛。不能進飲食者。亦照前用中等藥擦。○遍身牛皮風癬。作癢作痛出水者。亦照前用中等藥擦。凡擦藥。仍須內服煎藥兼之。

煎藥方。防風。荆芥。銀花。防己。白芷。連翹。苡仁。白鮮皮。桔梗。川芎。當歸。赤芍。生地。黃連。黃蘗。知母。牛膝。木通。陳皮。羌活。獨活。粉草。梔子。各等分。加土茯苓乾者四兩。鮮者八兩。水六盃煎至三盃。分三次。一曰早午晚服完。自擦起之日。服至七日發口止。虛人加人參二三錢。

痔漏消管藥線。妙靈方。用藥先用燈心試其深淺。頂至極痛處爲準。以藥條如式送入漏口。三日後

又試內根漸漸生肉。條漸漸短。用藥直至滿而止。玉簪花根。白者佳。焙乾四兩。番打馬焙乾三兩。馬兜鈴炒乾二兩。慈石三錢。煨紅醋淬三次。共研極細末。以麪打條。或粗或細。候瘡管用之。通始化去始再插。

廣瘡。仙遺拾珠。用膽礬三錢。皂礬石黃。青黛各二錢。番打馬二錢。硃砂五分。爲末。豬脂一塊。搗勻。夏布包擦手足心。候腹鳴卽止。病自愈。

膿窠瘡。慈航活人書。斑蝥三個。麻黃二錢。番打馬三錢。樟冰五錢。臘豬油二兩。先熬化。次入斑蝥煎焦。撈起。再入麻黃煎焦。撈起。再加番打馬末。同樟冰調勻。搗破瘡頭。以藥點上。立時結痂。次日全愈。

老材香

山陝等省無漆。民間棺殮。俱用松香黃蠟塗於棺內。數十年後有遷葬者。棺朽另易新棺。其朽棺內之香蠟。名曰老材香。土人用合金瘡藥。按脂蠟乃先天流液之精。又得土以固其力。藉血肉餘氣以凝其神。是一物合三才之用。故入藥功效倍於他草木也。○藥性考。北地古棺中松脂。合金瘡藥止血極效。治跌打損骨。止金瘡血出。生肌定疼。神效。盧氏仙方。金瘡鐵扇散中用之。

縛木藤

綱目藤部有省藤。卽紅藤。集解云。堪縛物。主治止言去風殺蟲。無腦漏治法。

治腦漏。急救方。用縛木紅皮藤燒存性爲末。每用酒服三錢。服後覺有一線從鼻至脊背而下股。其腦漏隨愈。一人一年服一次效。

腸癰。經驗廣集。凡腸癰生於小肚角微腫。而小腹隱痛不止。皮色不變是也。紅藤一兩許。好酒二盃。飲醉臥。午後用紫花地丁一兩許。亦以好酒煎。服後痛必漸止。再服。

敗琉璃浮子

係羊角所造。有五色。惟白者入藥。佛前十餘年者良。去淨油垢。新瓦煨研。退管漏湯火傷乳痛。急救方。用琉璃片燒灰存性。食後酒服一錢。卽消。

救生苦海。退一切管祕方。手指甲炙黃研細。象牙剉末研細。山甲炙黃研細。乳香沒藥俱炙。硃砂水飛。舊琉璃燈底。佛前白者。用三十年者佳。如若難得。十餘年者亦可用。打碎。麩炒爲極細末。各三錢。合勻再研。用黃蠟四兩。化和爲丸。如椒大。初服五粒。次服六粒。每日加服一粒。加至十四粒止。共服十日。計服九十五粒。至十一日。每日減一粒。至五粒。仍舊逐日加上一粒。加至十四粒。又逐日遞減一粒。如此週而復始。或服至十四粒。每從五粒服起更妙。每日空心陳酒送下。管漸褪出。褪盡爲度。如若未盡。再從頭服起。神效。祕之祕之。

內消痞管神方。陳直夫躬行錄載此方。治痔管如神。有一小兒從高墜下。傷背脊骨。月餘後。生毒潰。

爛成漏。蛔蟲從漏孔中出。經云。外癰透膜者生。內癰透膜者死。此症已屬不治。直夫用此藥一料而愈。亦奇方也。凡諸般漏管皆可服。不獨痔管耳。琥珀燈心研末。象牙屑焙。血餘。須自製。蝟皮。陰陽瓦合好。泥封煨存性。兩前芽茶。舊琉璃底。剪碎。製法同。蝟皮。蟬蛻炒。人指甲。不拘手足俱可用。瓦上焙。肥爲末。穿山甲炒。肥。當歸。白茯苓。豬懸蹄。甲殼。夾。剪。剪。碎。製。同。蝟。皮。螻。螂。瓦。炙。牛。皮。膠。酒。煮。化。和。藥。如。不。足。加。煉。白。蜜。以。上。之。藥。各。三。兩。小。蜂。房。十。個。製。同。蝟。皮。火。候。更。宜。輕。勿。煨。成。灰。蛇。蛻。十。條。剪。碎。瓦。上。炙。烱。自。作。汁。將。凝。卽。覆。存。性。否。則。過。性。矣。爲。末。同。阿。膠。和。搗。搥。丸。每。日。早。午。晚。服。三。錢。滾。水。送。下。一。料。自。愈。已。驗。過。數。十。人。

痔潰成管。俞曉園鈔方。尅蛇龜活者一個。泥裹。擇朝南牆下背陰處煨。煙盡爲度。去泥用。多年白琉璃底一具。琥珀象牙各三錢。珍珠。西黃。冰片。各五分。爲末。摻之。此藥亦可服。每服九分。

肺癰。傳信方。陳年琉璃煨灰存性。陳年油絮。漆匠店有。煉成和勻。酒服。試驗神效。

尿血。救生苦海。用舊琉璃燈洗淨。剪碎。入磁罐內。泥封。火煨。以紅爲度。待冷取出。酒下三錢。

輕粉結毒。救生苦海。用舊琉璃燈燒存性。研。每服二錢。毒在上者。川芎湯下。毒在下者。牛膝湯下。輕者十日。重者一月全愈。○濟世方。用佛前照過舊琉璃。燒存性。酒調下。日一二次。一月全愈。

凡人火燒。取廟中琉璃浮子。松樹厚皮做的。燒灰放地上。用盤覆蓋灰上。存性。研末。用紅糖真香。

油調傅。

臘利疔。百藥備遺。用陳年佛前琉璃。只取底用。瓦上煨存性爲末。真麻油和搽。

喉癰。選奇方。用陳年琉璃煨爲末一錢。加薄荷末白蓬砂各五分。冰片少許。和勻。吹入立愈。

敗毒散。不問新久腫毒癰疽發背疔瘡。皆治家寶方。琉璃陳年破損者一個。棟樹子四兩。舊髮網巾

一頂。鳳凰衣四十九個。三七一錢。敗龜板炙五個。共爲末。每服五分。棟樹子湯下。

男女臙瘡。家寶方。先用白蘿蔔打爛。貼瘡口上。一日一換。三日毒血去盡。再用後藥。松香一兩。杏仁

三十粒。去皮尖油。黃丹八錢。輕粉五錢。舊琉璃燈三錢。火焙爲末。研細。麻油調搽。一日一換。數次即愈。

癰痛。雲谷醫鈔。多年佛前舊琉璃焙存性。麻油調搽。癰痺即消。

散結核。石臨初結核論。凡馬刀瘰癧一切結核。用破舊琉璃煨存性爲末。每服二錢。取微汗。此物乃

羊角製成。能療節中結氣。佐以養血和榮清熱解毒之品。標本並治。乃佳。○散結湯。熟地。當歸。白芍。川

芎。丹參。丹皮。柴胡。桔梗。元參。白蘇。各等分。水煎。沖琉璃末同服。

頸上癰瘡。舊琉璃燈燒灰。菜油調搽。神效。

長明酒。種福堂方。治痔漏神效。用積年舊琉璃燈。洗淨油膩。火煨研細。以紅酒服四錢。不過七日。管

自退去。

治遍身漏。醫宗彙編云。驗過良方。用陳年琉璃底三錢。人指甲麩皮炒一錢。象牙末一錢。辰砂一錢。蟬蛻去土五分。沒藥去油八分。白礬八錢。如漏在上身。加川芎六分。在下身。加牛膝六分。共爲細末。以黃蠟三兩。溶化入前藥和勻。衆手急丸。如菉豆大。初服七八丸。每日加一九。至十六七丸止。無灰好酒送下。上身飽服。下身饑服。最忌雞及一切有葱之物。

油胭脂

藥性考。油胭脂平。豕膏合就。潤膚胛裂。活血點痘。西北風高。塗舒面皺。不龜手藥。古名非謬。○一名盤兒胭脂。用小錫盤盛。故名。色紅潤如膏。○百草鏡。製造油胭脂法。紅花汁一杯。白蠟二兩。微火熔化。攪勻。傾於磁盤內。待成薄餅。用碾麪杖碾數百遍。則膠黏如膏藥矣。假者係胭脂脚所造。不入藥。治血解毒。治痘疔。塗蜂咬。王氏準繩同珍珠末塗。

治痘瘡燕窩疔。○救生苦海。痘初起時。預免壞眼。用臨清濟寧好油胭脂點眼大皆。○普濟方有四聖丹。治小兒痘中疔。或紫黑而大。或黑壞而臭。或中有黑線。此痘十死八九。惟牛都御史得祕傳此方。點之最妙。用豌豆四十九粒。燒存性。頭髮灰三分。珍珠十四粒。炒研爲末。以油胭脂同杵成膏。先以簪挑破。啞去惡血。以少許點之。卽時變紅活也。

乳頭破裂。油胭脂蛤粉水飛傳之。

不用蛤粉亦可。

治疹子眼。眼科要覽用雞膽將油胭脂調勻塗上。雖眼突出能好。無雞膽用田雞膽代之亦可。

木套皮

古爲屨。今名木套。

治血風瘡。救生苦海用木套皮燒灰。東丹礬各一錢。爲末。菜油和搽。

火漆

火漆乃造胭脂紫梗水。以染脂胚所漉之渣滓也。紫梗本名紫錮。出波斯真臘南番等處。有小蟲如蟻緣樹枝造成。正同造白蠟一般。吾杭造胭脂者。藉以染製。然第用紫梗一味。則色不能紅。必須配以黃葉水同煎。色始紅豔。其所餘之渣。則火漆也。入藥只須研極細用之。中有枝梗不受研者。篩去。

物理小識。火漆一名紫膠。

治血崩。救生苦海。火漆不拘多少。入無油淨鍋內。令化。炒黃煙淨。見白煙起。退火取出。研末。空心時好酒和服三錢。重者不過三服。

腸風下血。不藥良方。火漆三錢。研細末。以豆腐皮分包作三十包。白滾水送下。至重三服即愈。

九種心痛。神方考。用火漆一味。燒灰存性。每服一錢。送下即愈。

七氣罌餅

此乃人家屋簷脊上用壓鎮不祥者。以七小鐔橫疊相聚如七星狀。外以灰泥黏覆。入藥用年久者。王子接絳雪園方。罌小口瓶也。七氣者。日月風雨露霜雪也。七罌人家多置古屋上。廣漢前上層。生餅年深者良。火土結成。堅剛性利。復藉天之七氣。能透骨入髓。理傷續絕。入藥取純鋼。剉生剉末。研至無聲。水飛用。○慈惠編。接骨七釐散。中用朝天寶。即人家屋上瓦。將軍前小瓶也。愈久愈妙。必要取其朝天之得精華者。研末入藥用。

接骨丹。絳雪園方。七氣罌口剉末。水飛一錢。古文錢。有半兩五銖。自秦漢鑄。紅銅者佳。唐時開元錢亦可用。火煨醋淬七次。研至如塵粉。無聲爲妙。用五分。與罌末和勻。每服七釐。先用甜瓜子仁去殼。三錢。嚼爛吐出。拌藥再服下。清酒過口。此方用七氣罌口。古文錢。功專腐蝕壞肉。陳藏器云。能直入損處。錐人斷骨。甜瓜子仁開腸胃之壅遏。通筋骨之機關。因丹藥釐數微甚。助以入胃轉輸。爲丹藥之嚮導也。

紅鴉白鴉

紅鴉乃毛布。今名鴉子。西人多以牛羊毳雜織而成。以茜草染則色紅。

治疔瘡。醫便用紅鴉燒灰。存性五錢。樹上自乾桃子燒灰。存性五錢。爐甘石火煨黃色。置便淬七次。二錢五分。共爲細末。臨搽入片腦少許。其瘡先用椒葱湯洗淨。再搽藥。三次即愈。

血崩。醫便六合散治血崩不止。諸藥不效。用此立止。此急則治其標也。杏仁皮燒存性。香附重便浸三日炒黑。舊紅碇子燒存性。地膚子炒。舊櫻薦燒存性。壯血餘燒存性。蟹殼燒存性。陳蓮蓬燒存性。共爲末。每服三錢。用酸漿草汁一鍾。沖上熱酒一鍾。空心熱服。按此方初服反覺多。以漸而少。由紫色而紅。以至於無。卽止。既止之後。用十全大補湯二十劑調補。方斷根矣。

走馬牙疳。祝氏效方。黃蜆殼煨存性。研末一錢五分。黃連忌鐵器爲末五錢。栝樓根。膽礬煨。五穀蟲。要尾全者佳。瓦上煨存性。紅碇燒存性。以上各五錢。爲末。加冰片二分。和勻。先以米泔水漱口。連吹數次。卽愈。吹後仍用泔水漱口淨去。

治臍血臍溼。救生苦海。用紅碇燒灰油和傅。或用裁衣店中百家碎五色布燒灰摻之。

清香散。治癩疾生牙疳。潰爛臭穢。萬病回春。用乳香沒藥。孩兒茶。輕粉炒。象皮炒灰。象牙焙黃。紅碇炒灰。珍珠焙黃。海巴焙乾。各等分。爲細末。搽患處。立時止痛生肌如神。

白褐

治小兒牙疳。集驗方。銅綠水飛。雄黃水飛。五倍子炒焦。枯礬。白褐燒存性。烏梅肉炙乾。細辛去葉蘆炒。焦胡黃連炒焦。共八味。各等分。用老茶葉葱根煎湯。以雞翎洗去腐肉。見鮮血。然後用此藥搽上。

疔布

粵山錄。出新安南頭。嘗本苧麻所治。漁婦以其破敝者。剪之爲條。縷之爲緯。以棉紗經之。養以石灰。漂以溪水。去其舊染薯蕷之色。使瑩然雪白。布成分爲雙單。雙者表裏有大小絮頭。單者一面有之。絮頭以長者爲貴。摩挲久之。歲蕤然若西氈。起絨更好。或染以薯蕷。則其絲勁爽。可爲夏服。不染則柔。以禦寒。粵人甚貴之。亦奇布也。

小兒服之。可辟邪魅。

舊帽沿

治疳毒。外科正宗。下疳。用油透羅緞舊帽沿。燒灰。杭粉。瓦上煨黃色。等分。研極細。先用紅棗十五枚。甘草三錢。煎湯洗後。搽之。

金瘡。集驗方。用舊氈帽油口沿。燒灰。搽之。愈。

綿珠

綿有木棉絲綿二種。惟絲綿製服則有珠。新製衣每每有絲珠。透出衣外。周履靖羣物奇制云。伏中裝綿布衣。無綿珠。秋冬則有。以燈草少許置綿上。則無珠也。入藥用舊衣內綿珠。取其襲人氣。既久。其新衣透出衣外。綿珠無用也。

治蠍虎咬。香油調塗。神驗。

紅絨

治穉勾瘡。此症小兒月內糞門上忽有瘡孔。即此症也。救生苦海用紅絨燒灰二錢。珍珠五分。輕粉五分。兒茶二錢。血竭一錢。乳香一錢。爲末。乾搽。

棉紗

養素園方。此乃草棉花所紡線也。吳松人以之織布。名曰棉紗。本色者白。或染藍靛作青色。爲婦人縫紉之用。古用木棉。今用草棉。綱目服器部有綿。乃絲綿。故從絲。

性平。能透斑疹。傳信方。風疹斑瘡出不透快。用白棉紗二兩。檉柳一兩。共煎湯浴之。避風。頃刻透發。無檉柳。以櫻桃核代之。亦可煎服。

藍棉紗。此乃經靛染者。煎湯解毒。與藍汁同功。

舊頭繩

百草鏡。俗名紫根。乃婦人以之紮髮。入藥取油。透棄去者良。綱目有巾及織腳布。而無此。

治紅絲疔。蛇傷。紮束肉上。能令毒氣不透。

小兒一切頭瘡。秦中用云。燒灰油塗。立愈。

治難產。經驗廣集。用婦人舊頭繩一條。燒灰。加人參一兩。煎服。不論橫生逆生。服之順流而下矣。神。

奇不可思議。

北雁砂

出關東。菉豆色。如珠顆粒。擲盤中有響聲者真。明目。治一切眼病。洪清遠方。用明目砂五分。用鍼刺入紅者佳。北雁砂三錢。再用羊肝一具。連膽不落水。刺開數路。不要剖開。將二味砂爲末。入肝內。以無灰酒二斤蒸熟。煎剩二盃。空心一服。晚飯後一服。以盡量爲度。羊肝配之一服完。不論眼病內障外障黑暗不明。無不神效。

烏金紙

皮金紙

江浙造紙處。多有兩面黝黑如漆。光滑脛薄。不中書畫。惟市舖用以裹珍寶及藥物作襯紙。又呼薰金紙。以其熏黑槌研而光也。

物理小識。造金箔。隔碎金以藥紙揮巨斧捶之。金已箔而紙無損。紙初褐色。久則烏金色。○魏良宰云。烏金紙惟杭省有之。其造紙非城東淳佑橋左右之水不成。其法先造烏金水刷紙。俟黑如漆。再熏過。以槌石研光。性最堅韌。凡打金箔。以包金片打之。金成箔而紙不損。以市遠方。價頗昂值。蓋天下惟浙省城人能造此紙故也。

治下疳。集聽。用烏金紙銅杓內炒末。加冰片少許塗。

復明散。陳嘉木眼科要覽。專治翳膜遮睛。替者亦可復明。用七八歲童子口中吐出虻蟲一條。用竹刀剖開。清水洗淨。將新瓦以炭火焙乾。勿焦。研極細末。烏金紙包好。再用蓬砂四兩。將虻蟲包藏其中。一七日取出。以骨簪蘸藥點眼。一日三次。後將骨簪腳撥去眼中翳膜。熱水洗之。少頃又點。點亮此藥。無不重明。

皮金紙

又名羊皮金。出廣東。凡金箔店皆有售者。呼皮金紙。

治跌仆擦傷。釘鞋打傷足跟。病久蔭瘡擦痛。并凍瘡足跟。腫爛流水。凡小擦傷刀傷。腫潰紅赤。皮光潮溼。皆效。看患處大小。以此剪取。將金面貼傷處。過宿即愈。毛世洪養生集

舊繖紙

綱目有桐油繖紙。止言治蛙幹陰瘡及疔瘡。汗而已。無他治法。今補之。

治纏腰丹。急救方。用舊繖紙燒存性為末。香油調傅。

對口瘡。祝氏效方。淡底白色者佳。一兩。陳繖紙燒灰五錢。將烏梅肉一兩。先打爛入末。再加生桐油搗勻。傅患處漸愈。

發背立效方。周氏家寶。千年石灰研為細末。鐵杓內炒紫色。傾出磚上。待略冷。微有熱氣。不可太冷。

太熱三錢。大川芎研細末二錢。和勻。入眞麻油五六點。用井水或河水調服。遍身大汗出。卽散矣。若遇惡瘡。可加黑織紙灰三分。照前服。

臙瘡。蔡毓晉方。用人家蓋牆頭舊織。須多年經霜雪者。取織衣依瘡大小。剪成一塊。上用木鍼刺洞。貼上三日。另換一張。每日翻貼。貼上三張卽愈。○集聽方。臙瘡以輕粉豬骨髓研勻。攤舊織紙上貼之。周氏家寶。諸瘡隔紙膏。臙瘡經驗膏。隔紙膏。脱身隔紙膏。俱用舊織紙夾藥貼。

包烟紙

此乃烟鋪內包烟外一層厚白紙。係石灰槽浸造。灰氣未去。紙亦不韌。止可包烟用。名建紙。近人食烟。以其紙擦烟筒頭嘴。令銅潔白。可擦錫器。武原朱進士醒荃言。北方朝士多貯此紙。每日清晨盥頰後。以之拭面。久之能轉黝爲白。令光發如玉。

拭面。去黝黢汗斑。美容顏。發光豔。

粗草紙闊草紙

此乃稻草所造。南貨店以之包物。有厚薄二種。厚者名銅板草紙。入藥用。

發疹瘡。百草鏡。折角草紙半張。南貨店包物厚者是也。煎服。較檉柳尤透發。

小兒臙瘡。不藥良方。急用大草紙燒灰傅之。則不致變瘋癩。或加枯礬。或再加龍骨燒灰等分。入臙

香少許撒之。

腸風下血。不藥良方。粗草紙燒灰。砂糖拌勻。開水服。

貝母團。經驗廣集。治羊兒瘋。百發百中。用川貝母去心一兩。研粉。用羅篩過。鋪大草紙一百張。一層草紙篩一下。百張草紙篩百下。然後用線縫之。入四盃水煮乾。每清早取一張紙成團。煨過。滾湯泡汁飲之。服盡全愈。神妙無比。

廁草紙

此乃坑廁中拭過糞草紙。棄於地者。同壽錄云。傷寒內有一症名咯蒂傷寒。非用此不能除也。覓此紙四十九張。燒灰爲末。水二盃煎一盃。去渣飲之。效。

酒罈上紙

此乃蓋封酒罈口上紙。陳久者佳。以其得酒氣多。微爛不堅韌。又脫去灰性也。

治皮膚閒忽然血濺出。同壽錄。用此紙碎扯如楊花。攤於血出處。卽止。

燒酒草

此卽燒酒罈頭泥中之草。慈航活人書有此一種入藥。故補之。

治剪刀風。活人書云。其症腰生紅瘰。如物纏緊作痛。用鍼挑出血。取此草加鹽擦出汗。卽愈。

古瓦

綱目土部有烏古瓦。不言治癩毒。

治小兒生毒。救生苦海已成形者。用多年古瓦研末。用細茶葉煎極濃汁和傅。留頭即散。

蟾拱癩。用瓦片火燉醋淬七次為末。菜油和搽。

消渴。用舊屋上瓦兩片。洗淨搥碎。以水煮濃汁。食後溫服一小盞。同錄

青龍背

龔廷賢回春云。鍋蓋面上垢膩名青龍背。可治療癰潰爛久不愈者。用此入烏龍膏治之。

烏龍膏。木籠帶殼炒存性。去殼。側柏葉焙。人中血。即亂髮也。燒灰。青龍背。紙錢灰。飛羅麵。各一錢。俱

為末。好陳米醋調成膏。塗瘡上。外用紙貼。

絹篩籬

今呼篩子。有馬鬃織作底者。有絲絹作底者。入藥以絲絹者良。

治過月難產。彙集有急救過月難產仙方。用陳篩籬底一個。捲筒燒盤內。與產婦服。即下。如產生之

兒身上皆有羅。其驗如神。

陳年竹燈蓋

本草綱目 二十九 拾遺卷九 器用部

治多年陰陽諸癬。救生苦海。用陳竹燈盞油透者。入尖底瓶內。瓶口安一鐵絲髻。將地挖一土坑。內安大盃一隻。將瓶倒覆盃上。瓶底朝天。週圍用礬糠填滿燒之。取滴下盃中之油搽之。效驗。○文堂驗集。治癬。多年油竹燈挂一個。火上烤出油汁如膠者良。另將五倍子去蟲炒研爲末。二味和一處。用陳醋火上溫熱。和勻搽之。甚效。

臘梨頭瘡。張子卿祕方集驗。以酒飯店油透陳竹燈臺一個。劈碎裝於瓷瓶內。口上用舊髻鐵絲覆於瓶上。倒轉下。再用一空瓷瓶。以此瓶合於下瓶口上。用火煨之。其汁溜下。取汁搽瘡。其效如神。

腦漏。百草鏡。竹燈絡子十年者。須覓鄉村中有油垢者。勿淨。煨成炭。伏土存性。研細。每用一二錢。包豆腐皮清晨滾水吞下。陸續服盡。自愈。

腸癰肚癰神效方。便易良方云。右脚拘急是腸癰。左脚拘急是肚癰。取數十年舊油印竹燈臺。俗名善福。以一隻燒半過。不用水息悶。合成灰。研爲細末。陳三白酒沖服二錢或三錢。卽愈。王站柱不藥良方云。此藥又治肺癰。極神效。

銅燈盞青

卽盞內之油垢。起銅綠者。入藥良。

治燕窩瘡。救生苦海。本名髮際瘡。生頭枕骨下髮盡處。以銅燈盞內青垢刮下研爛。搽之如神。

料絲

物理小識。滇金齒衛用瑪瑙石英屑汁。以北方天花點之。乃凝練為絲。以作燈。近日丹陽松江皆能作料絲。李西涯書作線絲。大內青瑣即此物。

磨漿。能止血破血。

烏龍翅

汪連仕草藥方。烏龍翅即焦火把。零落泥土中。經霜雪者佳。

治足爛至凶者。燒炭油搽。燒斑痧。粹神鬼箭。神效。

船篷箬

治耳內腫爛脹痛。救生苦海。用多年船篷箬燒灰存性。加冰片少許。研細吹入。

洋船璞

此乃海船底中。閒有櫛木。舟人名曰龍骨。藥生其閒。形如菌蕈。乾之入藥。

治胃脘疼痛。

按潘之恆廣菌譜。舵菜。即海船舵上所生菌也。不可多得。果爾。則宜入蔬部。留以俟考。

櫓箍

治爛串○毛世洪經驗集凡乳癰串爛年久不愈洞見內腑深陷不愈者取搖船之檣上首手捏之處
舊藤箍翦下以陰陽瓦上煨末竹管紮細篩日日搽之如乾處以香油調搽不過半月全愈

漆盤上漆

治羊眼漏 救生苦海此症生足脛骨上生一孔無膿無血惟流清水大痛用多年漆盤刮下漆燒灰
摻之愈

油木梳

木梳以木製成用以通髮黃楊木者能清火石楠木者理風其器以此二木造者爲最餘雜木及駝骨
牛角等梳不入藥或曰牙梳可辟邪皂角木梳不膻髮柏木鉛梳皆能烏髮總不若常用黃楊石楠二
木爲佳也綱目梳篋合一不分所載治法亦夥惟油梳尙遺其功用因補之

治肺痿 救生苦海油木梳須二三十年者一個燒存性滾水和服甜酒亦可

治五淋 同壽錄以多年木梳燒存性空心冷水調下男用男梳女用女梳神效

拗頸 海上名方此病俗呼落枕乃頸項夜閒悞落枕下或偶被閃挫血滯而強作酸疼以舊油梳火
上烘熱梳背於疼處極力刮之自愈

誤食螞蝗 俞潛山云曾誤食此腹中作瀉不時疼痛瀉血以黃土漿水他藥試之多不效有教以取

多年舊油梳燒灰。酒調服。一夕蝗皆化水而下。真神方也。

衣帶

治蛇纏。救生苦海。用繫腰帶煨存性。研細和好醬塗。或加水龍骨和柿漆水塗。

刀鞘

治中惡腹痛。救生苦海。用刀鞘燒灰水服。

舊竹筴

治蜈蚣傷。救生苦海。將小頭燒過伏土。取少許研細傅之。立愈。

草鞋鼻上布

綱目履屨鼻繩下。有草鞋鼻。無取布法。亦不知其有發瘡之功。今補之。

治兒患瘡疹不發。取破草鞋鼻上所衰之布七八條。煎湯服。立效如神。周寶生醫通

織機上草辦

楊春涯驗方。治白蛇纏。此物以陳為好。燒灰存性。麻油調搽。紅蛇纏亦治。

肉臺上屑

綱目故木砧條。列几上屑。止言治噉瘡唇耳等瘡。乾霍亂蟲牙等症。急救方言其治手毒如神。因急補

之。

治手掌連虎口邊腫毒。用豬肉臺上刮下木屑如膏。作餅貼患處。即愈。

吐血。慈航活人書。醃臘肉店中切肉木墩上。刮取肉垢。火上燒枯。勿令成白色。存性研末。酒沖服。

狗咬。楊春涯驗方。刮取切肉墩上油垢。和沙糖拌傅。神效。

盛米栲栳爛籬底

治血臟。楊春涯驗方。用二三十年盛米栲栳一隻。擊碎煎湯服。一二次即消。

爛籬底

此乃人家盛米竹器。浙人呼為淘籬。以竹絲織成。用以浙米者。舊者多用以貯柴灰淋水洗衣。年久則爛。

截經。同壽錄云。婦人行經不止。服此可截。用頭紅花。爛籬底。爛八搭草。鞋鼻子。蓮房。此四味俱燒灰存性。共為末。每服一錢。黃酒送下。不過三服。其紅立止。

砂壺

出宜與紫泥者佳。入藥吸毒用。取其口光滑而薄。不傷肌肉也。

治傷寒不出汗。用吸法。以二砂壺各盛燒酒八分。重湯煮滾。將酒傾去。即將壺口對臍上合住。使吸之。

緊輪換汗出即愈。○瘰癧破爛拔毒法。將先破處麪糊作餅貼上。用小砂壺二個。燒酒煎滾。去酒。以熱壺口覆於麪餅上。熏瘡如拔火壺一樣。壺冷。又易一壺。如此數次。將毒氣拔盡。即愈。熏後用豬膽熬成膏。貼瘡口。此方神效。○治獸蟲咬傷。并風寒一切毒。用砂燒酒壺二個。盛大半壺燒酒。先以一壺火上令滾無聲。傾去酒。即按在破口上。拔出汚黑血。水滿則自落。再以次壺仍按瘡上。輪流提拔。以毒盡爲度。俱見經按王站柱不藥良方。治瘋狗咬傷。用砂壺吸法。與此同。吸後再拔去頂上紅髮。即愈。

靈鶴蓋

李金什曾客淮南。言山陽一帶洲渚皆蘆葦。產鶴多。卵育於中。村人有能識其期者。俟鶴下卵後。竊歸入鍋煮熟。急以涼水沃之。看卵殼不熱。復置其窠。鶴不知而尤煦伏之。過三七日。其卵中黃白復鮮如故。又竊之歸。急煮而又納窠。鶴又伏之。如是者三次。則鶴卵外殼厚如紫玉。而歪成矣。復竊之歸。鋸去其頂。外則鑲飾金玉。令成盃形。名靈鶴蓋。注酒其中。輒有一小鶴影浮酒上。云食之益壽延年。且能治心疾。不易得。有市者價亦不賈。

花簪

安神魂。定心悸。小兒用之。除驚癩。孕婦用之。養胎稀痘。出外帶之。辟蛇蠱及一切毒。

楊春涯驗方。治乳癰初起時。將女人頭帶花簪。對向日中打圈。口中默念天上一朵黑烏雲。地下女子

害乳疼。我今特授金簪上金簪化去永不疼。如此七遍。將簪交付婦人圈患處。卽好。

小兒破鞋

接骨。家寶方。用市鎮上乞小兒破鞋一隻。燒灰白麪等分。好醋調成糊。傅患處。以絹束之。杉木板夾好。須臾。疼止骨接。有聲爲妙。

夏布舊蚊帳

江西麻布染藍。入夏作蚊帳。名夏布。今人以此舊帳作漆器。坯最佳。

治走游風。王化九簡便方。用青夏布舊蚊帳燒灰存性。麻油調傅。如再發再傅。

陰奇癢難忍。不藥良方。用青夏布舊蚊帳燒灰存性。麻油調擦。卽愈。

廁上椽木板

此卽毛坑上椽子。多年爲糞氣熏漬。其解毒之功。不下糞清也。

治紅絲疔。敬信錄。紅絲疔先將鍼挑斷其絲。將多年糞坑上碎木椽子。煨灰研細。用飴糖拌塗留頭。疔卽拔出。

尿板。治手足瘡無力。不能收口。家寶方。用多年尿浸爛白色木板。煨存性爲細末。加冰片搽之。立時收口。

白秋霜

萬表積善堂方。白秋霜。卽多年糞缸底結成白霜。須經風雨者。入藥炭火煨紅。醋淬九次用。綱目人部。溺白涎。爲人中白。乃溺涎也。且所列主治及附方。皆無接骨治傷之說。特補其缺。

治跌撲損傷閃挫。骨傷極重者。研極細末。每服五分。好酒調下。萬

陳海曙云。凡多年廁坑底石板背後。有白胎如雪結其閒。鑿取微有穢氣。陳久亦無。然糞力透石。故其精華凝聚於此。能清火毒。○王聖俞云。一名糞霜。曾見小兒瘡痘初愈者。忽然肺燥咽乾唇裂。目中出火。滿面紅赤。此火毒壅遏未化。滯於上焦。每服此藥一二錢。不數日全愈。○敏按蔣儀藥鏡云。泥宿糞坑之底。疔腫發背。止痛當塗。而霜又其精華也。大抵清火解毒。功用亦不甚相遠。

拾遺卷九中

禽部

燕窩

菜燕窩

一名燕蔬菜。從新云。出漳泉沿海處有之。乃燕銜小魚。春壘之窩中。人取之。閩小記云。燕取小魚。黏之於石。久而成窩。有烏白紅三色。烏色品最下。紅者最難得。能益小兒痘疹。白色能愈痰疾。泉南雜志。閩

之遠海近番處。有燕名金絲者。首尾似燕而甚小。毛如金絲。臨卵育子時。羣飛近沙。沙泥有石處。啄蠶螺食之。蠶螺背上肉有兩筋。如楓蠶絲。堅潔而白。食之可補虛損。已痢勞症。此燕食之。肉化而筋不化。并津液嘔出。結爲小窩。附石上。久之與小雛鼓翼而飛。海人依時拾之。故曰燕窩也。似此則形狀功用時候族類。俱有可信。○嶺南雜記。燕窩有數種。日本以爲蔬菜供僧。此乃海燕。食海邊蟲。蟲背有筋不化。復吐出而爲窩。綴於海山石壁之上。土人攀援取之。春取者白。夏取者黃。秋冬不可取。取之則燕無所棲。凍死。次年無窩矣。○香祖筆記。燕窩紫色者尤佳。○崖州志。崖州海中石島有玳瑁山。其洞穴皆燕所巢。燕大者如烏。啖魚輒吐涎沫。以備冬月退毛之食。土人皮衣皮帽。乘炬探之。燕驚撲人。年老力弱。或致墜崖而死。故有多獲者。有空手而返者。是爲燕窠之菜。○粵錄。海濱石上有海粉。積結如苔。燕啄食之。吐出爲窩。纍纍巖壁之間。島人俟其秋去。以修竿接鏟取之。海粉性寒。而爲燕所吞吐。則暖海粉味鹹。而爲燕所吞吐。則甘。其形質盡化。故可以清痰開胃云。凡有烏白二色。紅者難得。蓋燕屬火。紅者尤其精液。一名燕蔬。以其補草木之不足。故曰蔬。榆肉產於北。燕窩產於南。皆蔬也。○宦遊筆記。燕窩出南海。日本諸國。春間取者色白。爲上。秋間取者色黃。次之。一種微黑而多毛。是揀擇所遺者。價亦不能廉。怯症人久服之。亦能潤肺止咳。功等參苓。○查浦輯聞。南燕歸海外水邊難達。因啄小魚肉作窩。口銜之而飛。飛倦。卽投窩水中。棲止其上。少息。復銜之而飛。故東南風則飄掠近岸。人就取之。○阮

葵生茶餘客話。許青巖信松方伯語予云。燕窩產海島中。窮巖邃谷。足力繩竿之所不及。估舶養小猿猴。善解人意。至山島間。以小布囊繫猿背上。縱之往升木深巖。盡剝塞囊中而歸。猿之去也。苦不得食。三數日始返。海客以果餌充囊中。俾之遠出不餓。拙者出卽剝塞囊中。歸而傾囊。不過數片。爲果餌占地也。其黠者將果餌傾巖竇間。剝塞滿囊。盡燕窩矣。空而復去。尤爲便捷。猿一值數百金。價數倍於拙者云。許謹齋黃門。每晨起食蔗漿燕窩一巨觥。以融軟爲度。謂他人皆生食也。終日不瀉。味甘淡平。大養肺陰。化痰止咳。補而能清。爲調理虛損勞瘵之聖藥。一切病之由於肺虛不能清肅。下行者。用此皆可治之。開胃氣。已勞痢。益小兒痘疹。可入煎藥。或單煮汁服。○從新云。今人用以煮粥。或用雞汁煮之。雖甚可口。然亂其清補之本性。豈能已痰耶。有與冰糖同煎。則甘壅矣。豈能助肺金清肅下行耶。○物理小識。燕窩能止小便數。○逢原云。甘平無毒。烏銜海粉作窩。得風日陽和之氣。化鹹寒爲甘平。能使金水相生。腎氣上滋於肺。而胃氣亦得以安。食品中之最馴良者。惜乎本草不收。方書罕用。今人以之調補虛勞。咳吐紅痰。每兼冰糖煮食。往往獲效。然惟病勢初淺者爲宜。若陰火方盛。血逆上奔。雖用無濟。以其幽柔無剛毅之力耳。○張石頑云。暴得咳嗽吐血乍止。以冰糖與燕窩菜同煮連服。取其平補肺胃。而無止截之患也。惟胃中有痰溼者。令人欲嘔。以其甜膩戀膈故也。○食物宜忌云。壯陽益氣。和中開胃。添精補髓。潤肺。止久瀉。消痰涎。○嶺南雜記。紅色者治血痢。入梨加冰糖蒸食。治

膈痰。

何惠川云。翻胃久吐。有服人乳多吃燕窩而愈者。

老年痰喘。文堂集驗方。用秋白梨一個。去心。入燕窩一錢。先用滾水泡。再入冰糖一錢。蒸熟。每日早

晨服下。勿間斷。神效。

噤口痢。救生苦海。白燕窩二錢。人參四分。水七分。隔湯頓熟。徐徐食之。立效。

素燕窩。月湖筆藪。近時素食中盛行一種素燕窩。寧波洋行頗多。形白而細長。空心虛軟。儼如食舖中餛子而細。有七八寸至尺長不等。望之晶瑩。握之輕虛。每三十餘枝作一束。廚人買得。湯沃之。卽起脹。蕤然凝白。類官燕。以入素饌。爲珍品。食之亦淡而少味。不知何物造成。或曰。糯粉山穀爲之。何以見沸湯反肥美。或曰。銅鉛之苗。產海外深山。食之可明目。近日始知有用者。不知然否。附記俟考。北硯食規。有製素燕窩法。先入溫水一盪。伸腰。卽浸入滾過冷水內。俟作料配菜齊集。另鍋製好。箊籬撈出。燕窩將滾湯在箊籬上淋兩三遍。可用軟而不糊。半燉用。

解食烟毒。

石燕

粵語。產西樵巖穴中。大如乳燕。足生翼末。綱目石燕條。引日華子本草。無治疖之說。今廣人用之頗驗。

故補之。

治兒疳。小兒羸瘦。取食即愈。諺曰。嬰兒瘦。探石穀。即此。

蝙蝠腦

李氏蝠腦丸中用之。治癰疽內陷。服之能令毒不攻心。

石鏞

張氏日鈔。乃大鵬之精也。鵬獨運無雌。海靜不波之日。見影在下。以爲雌也。其精溢出。墮土上爲土鏞。木上爲木鏞。惟石上爲不失本性。最佳。或墮水中。以婦女相衣投水。自能躍出。

按石鏞乃慎恤膠之類。

浸酒服。壯陽。令人有子。以薑酒解之。

鷓鴣涎蛋

鷓鴣形如鵝而色黑面紅。俗呼摸魚公。水鄉人家多養之。以捕魚。十月後飼以狗肉。則身暖不畏寒。雖破冰入水。亦不瘳死。

治腎咳。俗呼頓噎。從小腹下逆上而咳。連嗽數十聲。少住又作。甚或咳發必嘔。牽掣兩脅。涕淚皆出。連月不愈者。用鷓鴣涎滾水沖服。下咽即止。

蛋

能打胎。有不欲留孕者。取一個白水煮服。胎即化為血水。從小便出。多則二服。無有不驗。

翠鳥舌

翠鳥即魚翠也。其舌大而可用。綱目魚狗下。止言其肉可治魚骨哽。而附以翡翠。亦云方書無用此者。其功效大約相同。今為補其舌之用。

鍼頭風。集聽。翠鳥舌一個。以桐油浸曬乾。又浸又曬。硬如三稜鍼。方病發時。將鳥舌於頭上亂鍼。即愈。

白鷓雞

珍異藥品。文首白翼黃足。

治隘痛。

鬱雞

珍異藥品。出廣中。○孫硤川云。此物在山中多食鬱金苗。故肉鬆肥。

解鬱散結氣。

豁雞

出廣中。雞頭而鳥喙。色黃。腹毛純黑。尾長下垂。鳴聲豁豁。性嗜蛇。其哺子時。取雛折其兩足。乃以蛇飼之。三日即復。屢折屢復。捕食之。能治骨節折傷。

雪雞

生西陲。千百成羣。棲止雪中。西域聞見錄。喀什噶爾雪雞羣飛。極肥美。人以爲食。惟性燥耳。入藥雄者良。

媛丹田。壯元陽。除一切積冷陰寒痼癖之疾。較雪蓮尤效。

洋鴨

朱排山柑園小識。洋鴨種出海洋。形如鴨。紅冠羣羽。馴而善飛。雄者重至十斤。雌者如常。其性淫。雌雄相交。日必四五次。故房術用之。卵大如鵝子。味極美。以母雞伏之。約一月餘。則雛出矣。雛極易長大。助陽道。健腰膝。補命門。媛水臟。

烏鴉膽

此乃慈烏之膽。浙東最多。悉體肥黑而大。所在多有。予門人奉化徐朋圭居白巖。其地山僻徑幽。古木叢雜。言其土人有取鴉膽者云。烏鴉膽汁。晝則散注身。自故精聚。而能見烟霄外物。夜則汁歸於膽。取

之法須伺鴉夜睡時乘其罔覺以利刀斷其頭急剖腹取之膽汁全飽並無漏溢然後以線穿陰乾入藥用若取之不得法或鴉被驚覺縱殺得其膽亦空皮無汁不堪用明目開瞽功勝空青點青盲最驗解藤黃毒

爛弦風眼及翳障不藥良方烏鴉膽點之即愈

鵝毛尿管 喉管 蛋殼

綱目鵝下載其毛治射工毒通氣辟癩開噎其屎治小兒鵝口蒼鵝者可傳蟲蛇咬而不知毛可治癰屎更治犬咬悉爲補之

治癰毒 集驗方用鵝毛煨灰一兩明礬二兩研末麪糊爲丸每服二錢好酒下

大麻風 赤水元珠參毛丸治大麻風神效苦參一斤鵝毛八兩煨存性爲末陳米糊爲丸桐子大每服五十九酒送下一日二次

神功至寶丹 王秋泉家傳祕方專治男婦溜膿肥瘡膿窠瘡臘梨頭遍身風癩癰疹疥癬瘙癢異常麻木不仁諸風手足酸痛皮膚破爛陰囊癢極并婦人陰癢溼癢酒丸散擦藥洗貼如神隨病上下茶湯送下日進二次戒暴怒房勞炙煨發毒之物苦參一斤爲末鵝毛香油炒存性六兩黃米糊丸硃砂爲衣此方與元珠治大麻風所用大同小異因並存之

按鵝白者能疎風。瀕湖謂其氣味俱厚。發風發瘡。莫此爲甚。而駁韓悉醫通以爲疎風大悞。殊不知鵝能發瘡生溼。火熏者并發火毒宿疾。害誠有之。而疎風之功。亦不可盡誣。至其毛與肉。則性尤不同。本經逢原云。昔人治癘風方中。取純白鵝通身之毛。及嘴足之皮。與肫肝內皮。固濟煨灰存性。和風藥用之。爲風藥之嚮導也。然不可遺失一處。遺一處。卽不能愈。又不可用雜色者。若有一處色蒼。風愈之後。其處肌膚色黑。正取其疎利而不燥。能和風藥之熾烈。而不用蒼色者。以純白鵝無毒耳。

絕胎方。保和堂祕方。用血管鵝毛燒灰。百草霜各一錢。行經後酒調下。終身無孕。○又周氏家寶方。用鵝毛一把。煨細。茶煎湯。經後服。永不生。此二方雖存。不可輕用。

寶生論。有受打不痛法。用血管鵝毛七根。地龍七條。煨過。同乳香白蠟爲丸。好酒送下。

治癩癰初起。傳信方。白鵝大者二隻。取週身毛翎并口腳黃皮。新瓦焙焦爲末。分作十服。每日食後服之。服完卽愈。

治腫毒。救生苦海。用血管鵝毛一握。銅鍋炒焦。腐皮包裹。酒吞下。卽內消。初起者效。○諸腫毒痛甚。有膿卽潰。無膿卽消。用鵝毛燒灰一兩。雄黃三錢。川烏。草烏。各錢半。黃蠟鎔化。入前藥爲丸。每服一錢。好酒送下。嚴氏方。諸毒內消方。吳涵宇用鵝毛二個。炒。蜈蚣十條。醋炒。穿山甲一兩。炒。殭蠶一兩。炒。全蠍五錢。洗。廣膠二兩。炒。桑黃二兩。炒。羊角屑二兩。炒。共爲末。每服三錢。砂糖調好酒下。以醉爲度。

發背疔瘡。對口風毒。醫宗彙編。穿山甲。蛇蛻。蟬蛻。蜈蚣。俱爲末。鵝毛全副。燒灰存性。全蠍。血管雞毛。二翅。燒灰。人指甲。用十分之一。敗龜板一個。殭蠶。俱爲末。每用一錢。酒下。悞吞銅錢及鈎線。慈惠方。用鵝毛一錢。燒灰。慈石。阜角子。火煨。象牙一錢。燒存性爲末。每服五分。新汲水下。

艾火帶。乃炙火所傷。爛痛不可忍。同壽錄。用雉雞毛同鵝毛。燒灰。傅之。效。

喉螻癬。傳信方。用鵝毛灰三分。兒茶二錢。牛黃三釐。雄黃一錢。人中白一錢半。煨存性。如吃深。加珍珠煨存性一分爲末。先將生桐油探刷一番。後用藥吹入。加膽礬更妙。

鵝屎

救生苦海。治犬咬。以鵝屎傅之。不爛痛。

鵝涎

綱目止載。治咽喉。穀賊。今人治小兒鵝口瘡。甚效。

鵝蛋殼

急救方。癰疽無頭。用新生鵝蛋殼。燒灰存性。爲末。醋調。傅。立出膿血。妙。

鵝腿骨

奇效方。犬傷日久發者。用鵝腿鷹骨煨存性。研末搽之。

鵝喉管

家寶方。治喉症。用鵝喉氣管一個。陰陽瓦炙黃色。冰片一分。共爲細末。吹二三次愈。

治赤白帶。家寶方。取鵝水喉管煨存性。研末。酒調臨臥服之。

鷹吐毛鷹條

百草鏡。鷹每日食雀時。連毛與食。肉化而毛不化。聚成一團。如芡實大。次早吐出。收用入藥。綱目有鷹毛。無吐毛。故補之。○按鷹稟西方兌金之氣。其性猛烈而竄捷。故余居士以其頭治眩暈。王廉以其糞治食哽。皆取其得庚辛銳氣。一往無滯。反胃之症。食而復吐。久積於胃。不能運化。故旋出。大概由於憂鬱者居多。取此復吐之意。而又得其爽猛之性爲治。其義精矣。

治反胃。煨存性研。醫方集聽。查將軍家傳。噎膈方。用牙烏灑出毛肘。卽鷹吐烏毛也。要七個。不可落地。用布接在架中。微火煨燥爲末。服之。營內凡喂毛肘。但在下午。次日天明卽吐出。最易得。不可使肘落地。落地則不驗。

鷹條。本經逢原云。鷹屎中化未盡之毛。謂之鷹條。入陰丹陽丹用。不特取其翻之善脫。以治難脫之病。并取屎中未化之羽。以消目中未脫之翳。可謂妙用。

雄雞卵

茅崑來云。雞本南方積陽之象。於卦爲巽。五更則日臨巽位。故鳴。凡鳥雌卵而雄否。惟雞則雄者開亦生卵。乃陽極而陰乘之。其卵較小於雌雞卵。殼堅如石。殼色微紅。入藥用。可安胎稀痘。○王械秋燈叢話。古北口叭噠嶺。有喇嗎令巡檢張某。市雄雞卵。張笑曰。雄雞焉能生卵。故相難也。曰。非也。俗有斯言。卽有斯物。第覓之可得也。張漫應之。語其役。役曰。聞前村民畜雄雞。連生三卵。衆以爲不祥。嫗異而藏之。命役取送。喇嗎收其一。給價五十金。張詢所用。曰。能醫眼疾。年遠替者。得其汁點之。卽復明。與空青同。○陳藏器本草。今雞有白臺。如卵而硬。有白無黃。云是牡雞所生。名父公臺。二申野錄。成化二十三年。吳縣湯惟信家。雄雞生卵。平湖縣志。萬歷四十八年四月。施太史家。公雞生子。形如雀卵。色紫。史異纂。天啓二年。陝民王進榜家。白雄雞生卵。三岡識略。壬申二月二十九日。提標左營韋元鼎廨中。雄雞連生二卵。述異記。康熙甲戌十二月。松江吳南林家。雄雞生卵。大如鵝蛋。殼甚堅厚。椎破之。亦有黃白。白如凝脂不散。黃帶赤色。○質直談耳。嘉定湖南村民錢嵩家。雄雞生卵。與雌無異。乾隆壬寅夏間事。○紀曉嵐先生云。雄雞卵大如指頂。形似閩中落花生。不能正圓。外有斑點。向日映之。其中深紅如琥珀。以點目皆甚效。德少司空成汪副憲承霈。皆嘗以是物合藥。然不易得。一枚可以值十金。阿少司農迪斯曰。是雖罕睹。實亦人力所爲。以肥壯雄雞閉籠內。縱羣雌繞籠外。使相近而不能相接。久而精氣

團結自能成卵。此亦理所宜然。然雞乘巽風之氣。故食之發瘡毒。其卵以盛陽不洩。鬱積而成。自必蘊熱。不知何以反明目。又本草之所未載。醫經之所未言。何以知其能明目。此則莫明其故矣。汪副憲曰。有以蛇卵售欺者。但映日不紅。卽爲僞托。亦不可不知也。

敏按諸書所載雄雞生卵。自古有之。原非有異。據陳藏器所說。有白無黃。而述異記所載。則有黃有白。想本閒氣所生。其形色亦無一定。乾隆庚戌。臨安慈聖寺有放生雄雞。忽生卵。日產其一。如是旬餘。人以爲異。其卵較小。色紫而殼堅。爲一錫匠索去。予時適館臨安。聞而索之。已無有矣。錫匠徽人。亦云其卵白可入藥。故乞之歸里。然此物又不特入藥。李懷白先生云。曾見喇嗎誦黑經。用雄雞蛋。川中鬼師有用雄雞蛋以行禳者。白蓮教則又需以解魘迷術。今人徒咤其異。而不知天生此正所爲世用也。

安胎。稀痘。開瞽。

本草綱目

拾遺卷九下

獸部

獅子油其

辛温有毒。色微黑者真。善透經絡。凡用勿多。○沈良士云。塗指甲上涼透指甲者真。又方以黍許入沸湯。湯即不沸者真。○逢原云。獅爲百獸之長。性最難馴。一吼則百獸辟易。爾雅言其食虎豹。熊太古言其乳入牛羊馬乳中。皆化成水。西域人捕得。取其油入貢。以供宮人滌除衣垢之用。又能去紙上墨跡。刮少許隔紙熨之。即脫。予嘗試用。垢雖去。而衣易毀。紙易脆。僅供一時之用。雖係方物。方藥罕用。近世醫者以之治噎膈病。蓋噎膈皆鬱疾痰積所致。用取滌痰之意。試之輒驗。由是方家爭爲奇物。但性最猛利。力能墮胎。孕婦忌用。象油亦能去垢滌痰。但不能去墨跡耳。○椿園聞見錄。温都斯坦。西域一大國。從葉爾羌西南行。百日可到。其國西隅有巨澤。圍數千里。澤中有山。圍逾千里。萬峯聳峙。高入雲天。或曰。人間第一高山也。名曰牽各里麻膽達喇斯山。中產獅子。於新月皎潔。輒負難於山中往來。頭大而毛虬。尾形帶黃質黑。章如虎皮。長六七尺。時登山絕頂。望月垂涎。咆哮跳擲。猛飛吞月。有飛去八

九里十餘里而墜死山谷中者。其國人以養獅子爲上戶。每當秋月。其汗使人取獅。以精鐵作柱。大如瓮。密布層遮圍。畜之於中。飼以牛。時而吼如雷霆。滿城震動。人畜不甯。取之法。擇炮手之最精者。開地爲阱。人匿其中。遇有負雛者來。乘其不備。發炮斃之。而取其雛。倘一炮不中。則拋山裂石。而人無噍類矣。○張棗漪有此油。云熬之可挑絲一二尺不斷。他油則不及也。○陳海曙曾在京邸簡親王府見獅油。堅如石。絕如雞卵。白潔可愛。

朱排山柑園小識。獅子油。白膩如豬肪。氣味俱薄。利小便。凡人小便不通。雖腹脹莖痛。病在危急者。以酒或白湯送下三四釐或半分。卽通。嘗有一丐。因受暑熱。遂致小便不通。每月一發。發至二三日後。莖痛如割。至不可忍。屢投繯祈死。人以獅油少許投之。片刻卽通。奏效之速。無逾於此。而本草不著其功用。何哉。豈當時未知用歟。第虛秘者似宜酌而用之。○敏按獅油性最猛烈。內服尤不可單用。更勿多服。嘉慶元年三月。予友邵某得獅油少許。因病欲服之。未果。爲一鄉人轉乞去。市於人。獲重價。其人市得。服半盞許。夜半而死。鄉人懼罪。亦投水死。蓋外用不妨。內服尤宜審慎。以人之腸胃太弱。不任峻利之攻削耳。

消熱結。治膈。大小便不通。 救生苦海。用獅油酒服二三釐。自效。

獅血

沈雲將食物會纂。獅血殺百蟲。燒之去鬼氣。

獅糞

王沂堂藏有獅糞一段。用鐵匣盛之。四圍以鐵屑養之。其形至堅。如鐵石。磨之作紅色。云非鐵屑養。則易朽爛也。

治一切腿足下部惡瘡。年久不愈者。塗之即痂而落。

象糞

象白尾毛。

按象有家野二種。京師者。食俸料。滇廣山產者。食竹木雜草。入藥以野象糞良。京象糞。銷皮坊皆多取。藏黃貂黃狼。能令毛黑如漆。綱目象下。凡牙肉睛皮膽骨俱入藥。不及其糞。爲補之。

治鵝掌風。以象糞燒熏。自愈。

起死回生散。李文炳經驗廣集。治痘瘡至七八日。忽然變黑。收入腹內。遍身抓破。吭喘。死在須臾。服此。從新另發出。立可回生。當歸。川芎。白芍。生地。升麻。紅花。上陷加白芷。下陷加牛膝。遍身黑陷加麻黃。象糞微炒。如一歲兒用二錢。大兒用至三五錢。右剉一劑。水酒各半煎服。從新發出。腳下黑疔。至七八日用鍼挑去。以太乙膏貼之。即拔去毒。連進二三服。

廔疹。良朋彙集方。治小兒大人出廔疹。回在心胸。作喘發燒。用象糞八錢。升麻二錢。水二鍾。煎一鍾。

服。卽刻透出。

象白

乃象交於水。其精浮水面。象房人用磁瓶收貯。入藥傅面不皴。亦可入房藥用。

象尾毛

通雅云。今人剔牙杖。極重象尾。謂可去火。

犴血

孫含懿云。有客自川中來。帶有犴血。言此獸乃星禽。爲天上井宿。五百年一降於世。以濟人。其降也必於蜀。降之前三日。天乃大風。振屋拔木。爲降犴風。左右村落居民。知犴必降。悉遷避之。求鐵工造蓮華箭鏃。如橄欖形。而窪其中。鏃上刻名。以記犴降之日。形如胡犬。有鱗。大十倍於象。首必朝歲星。蹲踞不動。土人從其後射之。矢集其身如猬。三日後乃去。遺矢於地。各認所鏃以歸。矢人無爭者。其鏃頭有血一塊。大如欖核。可入藥。土人亦甚珍寶之。不輕售。自明洪武時曾一降。至今幾四百年。所珍藥亦罕有存者。縉紳舊族或有之。亦寶同和璧矣。

治一切陰疽發背。一切大毒。凡癰疽必死之症。無藥可救者。每以一釐。潰則傅膏外貼。未潰則調酒服。一夕自愈。合治癰等藥。一斤加入分許。卽奏效如神。

醉虎油
膽

三岡識略。壬子正月初十日。福山戍卒遇一醉虎。縛獻王大將軍。韓門將軍剖肉分贈郡紳之小兒。食之可以稀痘。按虎食人與楊柳及狗皆醉。

宦遊筆記。載山人捕虎法云。虎嗜食犬。食之必醉。如人中酒。虎匿深谷峻嶺。往來不時。難尋其跡。人以劣犬縛於山凹。犬嗥不已。虎聞聲而前。果腹而醉。不能遠去。人迹犬血而捕之。則無所遁矣。此縛醉虎之法也。

主稀痘。

虎油

物理小識。虎一身皆入藥。而本草未載虎油之功效。愚於獵戶取其油。以塗臘梨瘡。一二次即愈。亦可治大麻瘋。○藥性考。虎油療禿。塗狗咬傷。五痔下血。反胃。酒管。

虎膽

治打傷垂死。飲食不進。前後不通。乃瘀血在心。命在旦夕。可用此方。虎膽五分。去外皮。用老黃酒在盞內研細爲末。白茯苓二錢。爲末。用熱陳酒調灌。下出可不死矣。

虎脂

治打碎頭骨蓋方。用虎脂一兩，浸好熱酒內，俟化勻服之。汗出爲度。如患處青者不治。

反胃。不藥良方。虎脂八兩，清油一斤，瓦瓶浸一月，密封，勿令洩氣。每以油一兩，入無灰酒一盞，溫服。以瘥爲度。油盡再添。

按虎膽虎脂，綱目雖載其用，而未言及入折傷料之用。此二方出錫山華氏經驗錄，並屢試有效，故補其說以濟急。

鹿胎乳餅

鹿胎乳餅

瀕湖綱目鹿條，精髓筋膽胎糞，俱皆備載。張璐逢原另列鹿胎一條，頗詳辨可採。錄出以補其遺。瑤曰：胎中鹿，其嘴尾蹄胎與生鹿無異者爲真，其色淡形瘦者爲鹿胎。若色深形肥者爲麋胎，慎勿誤用。能損真陽，又璋胎與鹿胎相類，但色皎白，且其下脣不若鹿之長於上脣也。其他雜獸之胎，與鹿胎總不相似也。入藥取真者，酥炙黃用。

氣味甘溫無毒，鹿性補陽益精，男子真元不足者宜之。不特茸角莖胎入藥，而全鹿丸合大劑參耆桂附，大壯元陽，其胎純陽未散，宜爲補養天真，滋益少火之良劑。然須參耆河車輩佐之，尤爲得力。如平素虛寒，下元不足者，入六味丸中，爲溫補精血之要藥。而無桂附辛熱傷陰之患，但慎勿誤用麋胎，反傷天元陽氣也。

鹿乳餅

茗陰札記。孝豐深山產鹿。土人計其產子時。輒於夜半伺其洞側。鹿乳子必五更。乳畢出洞。至暮方歸。每日祇乳小鹿一次。小鹿食乳於腹。結十二小餅。每一時輒消一餅。土人候母鹿出洞。即將乳鹿抱歸。剖腹出餅。持貨遠方爲珍藥。價值兼金。其餅如雲南棋子。大色微黃。乾者作老黃色。腥氣最烈。食之大能強陰。益命門火衰。於老羸最宜。理怯弱虛損。發痘漿。通女子乾血勞。

鹿脛骨

綱目鹿條有骨。乃指全體而言。至脛骨不聞有用法。今時醫有鹿龍散。純取其脛爲用。因載其方以補之。

生肌收口。救生苦海。用斑龍散。取鹿脛骨。溼紙包固。灰火煨之。以黃肥可研爲度。若焦黑色者爲過性。勿用。搽大毒。生肌甚速。

猴經

入藥名申紅。深山羣猴聚處極多。覓者每於草間得之。色紫黑成塊。夾細草屑。云是母猴月水乾血也。廣西者良。

治乾血勞

犬豕胎糞

史長惺有不服藥而點眼發汗方。以初男胎糞煉而升之。加冰麝。破巽收。有當發汗者。男左女右。以乳點之。臥卽汗出。本草所未載。小識云。犬豕初生糞。皆可合煉。不必定嬰孩也。

獮油

獮卽獮字。所在山澤有之。穴居食蟲鼠。劉仲旭云。北直河堤一帶尤多。穴岸而居。最爲堤防之患。守河兵卒多捕之。一說獮入蟄時。必食蜂。始過冬不飢。有人於初冬發其蟄穴。得獮破腹。其肚胃中猶有蜂。獮腹中皮爲蜂螫。輒厚數寸。或藉此不飢。此說亦未可深信。堤民得獮脂。多市煤廠作地燈。非此不可。他油輒爲地風吹滅。惟獮油作燈。能禦地風也。

入膏中。拔溼如神。繆仲淳廣筆記。趙府膏藥中用之。

治頭上白禿。集驗用獮油火烤擦三四次。卽愈。如年久者。恐不生髮。以枸杞子煎湯飲。

痔瘡。劉怡軒云。一切內外痔。獮油塗上立效。

效血胸中哽噎。恍恍如蟲行者。不藥良方。豬獮油入酒和服。或下或吐。或自消也。

海狗油

海狗出遼東登州海中。卽臘肭獸也。綱目載臘肭臍。不言及其油之用。故爲補之。○蓬萊李金什言。其地登州海口。出海狗皮。可作裘帽。俗美其稱曰海龍。卽此。其腎乃藥中臘肭臍。土人取海狗名曰打狗。此物晝夜潛海底。惟葦乳時登島。產子稍大。卽相率入水。人不可得。須冬月極凍時。海崖水口結冰。天晴海狗羣出。處冰上曝日。必候其臥冰時。驟入水。以木棍擊其腰。方可得之。若冰裂或步履有聲。非其睡時。皆不可得。然每年打狗墮水溺死者亦多。因利重。人亦不惜軀命以往。性熱而降。善消利。治三焦濁逆之氣。能清水臟積寒。停飲。觀近海人取鮫魚海參者。用其油滴海面。海水卽清見底。砂石畢見。可知其性之分利也。

近有人自關東帶來。其油綠色如乾糊。以塗皸瘡。卽愈。次年不復發。其性熱烈可知。

狐麝

金沙江志。產東川昭通二府。較常麝香氣尤烈。佩之辟邪。絕惡夢。定魘。

獺糞

綱目獺條。載其尿治魚臍瘡及下痢而已。不知有消瘤之功。今補之。

王氏檢祕。消瘤。用獺糞一兩。天南星三錢。麝香三錢。共研末。醋調塗上。卽愈。

狼脂

本經逢原云。狼性追風逆行。故其糞燒烟。能逆風而上。燒灰水服。治骨鯁。以其性專逆行而無阻滯也。狼脂摩風首推。而本草不錄。亦一欠事。按周禮。冬獻狼。取其膏。聚也。內則。食狼去腸。古人以爲食品。綱目獸部。狼膏下。瀕湖。僅據飲膳正要。載其能潤燥澤肌。塗惡瘡而已。不知其大功用。乃能驅風散逆結之氣。何可昧耶。故急補之。

入風氣膏中。能去積久風痹。調酒服。散逆結之氣。

山羊血油

常中丞筆記。山羊生平樂山崖間。能陟峻坂。躡捷若飛。其血可治跌損傷及諸血症。凡跌撲死者。未絕氣。以一分許調酒飲之。遂甦。神效立見。第捕甚難。每見人。則決驟而去。飈迅非常。非足力所能及。必密布繩網草間。胃其足。始能生得之。刺其心血。待乾凝結成塊。可以攜遠。蓋凡血皆患凝滯。山羊踰高懸險。旦夕不休。則其血活矣。而心爲主。故心血最良。語云。流水不污。戶樞不蠹。觀此益信。○本經逢原云。山羊產瀕蜀諸山中。性善走逐。好鬪。肉能療冷勞山嵐瘴癘。婦人赤白帶下。其心血。瀕湖綱目失載。苗人取血法。以麋竹通節削鋒利。活刺心血。收乾者良。宰取者不堪用。○柑園小識。山羊血產廣西諸土郡。山羊似羊而大。善鬪。能上絕壁。每登高處。失足。或至骨折。少頃如故。喜食三七苗。其血主治損傷極妙。輕者服數釐。重者二三分。以心血爲上。身血次之。色黑有光。而質輕者爲真。○陸祚蕃粵兩偶記。試

山羊血。取雞血半盃。投一粒。過宿變成水。或以久癩臭雞血一塊。投入山羊血。過宿反變成鮮血。乃真。○瀕湖綱目云。山羊。卽野羊也。一名羴羊。非今之家山羊也。時珍於山羊主治條。僅載其肉之功用。不及油與血之用。此並附之。○今人收得乾血成塊者。必用糯米養之。云可久留不枯。

性溫。味鹹無毒。逢原云。爲和傷散血之神藥。其治跌撲損傷。單用酒服取醉。醉醒。其骨自續。每用不過分許。不可過服。雖不耗傷元氣。而力能走散陰血。然必初患便服。得效最速。若過三五日。血凝氣滯。無濟於治矣。價等牛黃。心血亦不易得。滲血丹用之。真虛勞失血之續命丹也。○藥性考。山羊血味鹹。療跌撲損傷。咯吐嘔衄便溺諸血。能止血消瘀。和酒服。其皮作茵褥。愈筋骨疼痛。角作火罐。灸頭風。以入水一絲不散者真。

吐血。蔣莘田經驗方。臨臥時。用廣西真山羊血。每服三分。能引血歸源。不過二三服。其血自止。

黎峒丸。治跌打及一切癰腫。天竺黃八分。牛黃四分。冰片四錢。三七四錢。血竭四錢。兒茶四錢。麝香四分。沒藥四錢。阿魏二錢。雄黃二錢。藤黃四錢。孩兒骨一兩。山羊血製沒藤黃入藥。共爲細末。煉蜜爲丸。如龍眼大。陰乾。外用蠟爲殼封固。三白酒服。

祝氏效方。山羊血能解鮮菌河魴毒。傷損惡血。

治痘內無漿不起發。○集驗良方。用真山羊血三分。用甜酒釀調服。痘漿立起。

太乙神鍼方。人參四兩。三七八兩。山羊血二兩。千年健一斤。鑽地風一斤。肉桂一斤。真川椒一斤。乳香一斤。沒藥一斤。穿山甲半斤。小茴香一斤。蒼朮一斤。真蘄艾四斤。甘草二斤。麝香四兩。防風四斤。以上共爲細末。用綿紙一層。高方紙三層。紙寬裁尺二寸五分。長一尺二寸。將藥末薄薄鋪勻在上。一鍼約用藥七八錢。緊捲如花炮式。務要緊實。兩頭用紙封固。外用印花布包面。亦要齊整好看。此鍼能治一切痛風。寒溼筋骨疼痛諸症。用時將鍼以火烘著。或按穴道。或在痛處下襯。以方寸新紅布數層。將鍼按上。若火旺布薄。覺疼多。墊布數層。但鍼必須三四枝。一鍼已冷。再換一鍼。連進七鍼。無不立驗。

治喉癰。喉症惟此最遲。久則失音。不可救。種福堂方。西牛黃一分。真山羊血二分。川連五分。血珀三分。冰片一分。蓬砂一錢。青果核灰三分。燈草灰五分。共爲細末。每一茶匙藥。用一茶匙蜜。調放舌尖上。徐徐嚥下。一日五次。兩月可愈。或加蜒游梅灰。更妙。

馬氏夾棍神方。吉雲旅抄。山左馬家市夾棍藥極效。方用蝮蛇膽二錢。山羊血一錢半。琥珀一錢。大白頸地龍七條。去泥。珍珠三分。辰砂一錢。兒茶八分。金箔一帖。爲衣。爲細末。蜜丸。桐子大。金箔爲衣。每服一錢五分。好酒下。如不打夾者。用刀破皮藥自出。

治急心痛。集驗方。用山羊血一分。燒酒化下。

中遇邪鬼。醫鈴。此症乃陽氣衰而陰甚。治須急補其陽。以存正氣。則陰邪自平。卽或治痰。然亦當加

意補正爲本人參二錢。當歸六錢。白朮一兩。菖蒲二錢。半夏三錢。白芥子三錢。丹參五錢。阜角刺五分。山羊血八分。附子一錢。此方用山羊血阜角刺爲開關聖品。以通邪祟之要路。半夏白芥消其寒痰。無寒之侵。斷不中鬼。大用參以扶其陽。陽生陰滅。此不易之理也。

救絕仙丹。石室祕錄。此丹專救五絕。及有邪祟昏迷一時卒倒者。皆可灌之。以起死回生。實神奇之極。宜端午日脩合。備用濟急。大可救人。山羊血三錢。菖蒲二錢。人參三錢。紅花一錢。阜角刺一錢。製半夏三錢。蘇葉二錢。麝香一錢。各爲末。密丸如龍眼核大。酒化下。

敏按山羊血以產滇黔及蜀者佳。以其地深山多三七苗。及理血定風諸草。山羊每食之。峒人追逐得之。山羊本迅躍。無一刻之停。其體血自頂貫尾。終日旋運如飛。又被逐捕。則躁性頓發。血隨氣運。矯捷尤甚。黎峒人捕得。以竹鎗刺入其心。取血用。此上品也。其血成條。深紫有光。以少許入水中。自然旋運如飛。蓋矯捷之性猶存也。若網取刀剖而得者。血色黯滯。入水亦不能迅捷。他省產者。亦能如峒苗之合衆追逐。令其騰躍上下。而後刺取其心血。亦可。較次於滇黔山羊血。惟今之各處所獲山羊。皆用網取。其或鎗斃。而後剖其死血。以僞充心血。則力微性緩。更有以他血代充者。則尤屬廢質無用。故今市中每多此物。高索重價。非親歷其地。真知灼見而得者。勿用也。

山羊油

張卿子祕方集驗。治主心疝。用山羊油不落水者。荷葉包裹。挂風處陰乾。不可著雨。遇此症。取三五錢。沖熱酒服。不飲酒者。滾湯亦可。并治諸疝。

按文堂集驗。主心疝。用山羊血。其言與此同。然細釋文義。有不落水句。則用油非血矣。文堂誤以油爲血。故並正之。南方亦有山羊。但不及粵產者。其血尤爲迅捷也。

山羊糞

山羊糞同水粉各一升。浸一夜。絞汁。頓熱。午刻服。治疔瘡。

祝西菴本草。山羊屎煨灰。療潰爛生肌。

入外科收口藥用。祝氏效方。大棗丸。用山羊屎曬乾。入鍋炒炭存性。研細收藏。每久爛不堪。將見內腑者。以大棗去皮核。搗爛如泥。後入前粉。搗至成丸。每服四錢。黑棗湯送下。此物大能斂潰爛諸口。神效無比。

山蓮散。用大活鱒魚一尾。破腹去雜。以山羊屎塞實魚腹。放瓦上慢火炙乾。存性。研末。加麝香一錢。封貯。如遇潰瘍。爛見內腑。止隔一膜者。以此藥摻上。立愈。

雷頭風。祝氏效方云。諸藥不愈。惟山羊糞炒炭研粉甚效。歌曰。雷霆頭裏震。山羊糞有緣。酒送二錢下。不在腦門喧。

治心痛。不論遠年近日。玉泉方。山羊糞七粒。油頭髮一握。同燒爲末。好酒和服。永不再發。

石羊膽

廣東通志。石羊色黑。類人家羊而矯捷。其角燒紙爲火罐。能收頭風。其皮作褥。可愈筋骨疼痛。其血能療跌打損傷。猶秦中山羊也。○肇慶志。石羊出高要山中。似羊而高大。長角厚耳。此羊一孔三毛。服用柔而能久。內兄朱問亭官粵。曾寄石羊膽一對。盛以銀匣。大如小指。以絨線紮其一頭。乃乾者。據言此物不易得。試驗之法。以此膽囊掛胸前。急行不喘者真。治折傷勝於山羊血也。

治一切目疾。勞眼青盲。人乳調點。風火防風汁調點。此物去翳障如神。水調亦可。

跌撲功同山羊血

曹閔亭先生會宦黔中云。邊邑皆產石羊。形小如兔。趨捷難獲。有得之者。須卽破其腹取膽。少遲則裂於腹內矣。其膽乾之。可療肝厥暴絕。酒服一二釐。卽甦。其心血能治真心痛。頗有效。骨皮熬膠。去風活血如神。

山狸

坤輿圖說。利未亞國有山狸。似麝。臍後有一肉囊。香滿輒病。就石上剔出始安。其香似蘇合油。黑色。療耳病。

犀牛皮

物理小識。近有從船上來者。此真是海犀。其皮入藥。

治風活血最效。

貂尾

貂出西北塞外。食松栗。卽南中松狗之類。其行捷。穿樹枝如飛。蓋以尾爲用者。故其力在尾。綱目貂鼠條止載其皮毛。拭目去眵。而遺其尾。故爲補其功用。

凍瘡。用貂尾燒存性爲末。搽爛處。自愈。未破者。用舊貂皮毛煨研。香油和搽。養素圖驗方。

七葛

回疆志。出伊犁西番一帶。用馬乳裝皮袋內。以繩繪口。手提袋提壓半時許。放於熱處。一夜卽成。名之曰七葛。飲之熱而補人。若日日服之。有返老還少之功云。

性熱。補虛羸。長力。怯弱者宜之。

香鼠

珍異藥品云。出雲南。形如鼠。僅長寸許。周櫟園書影云。密縣西山中多香鼠。較凡鼠小。死則有異香。蓋山中之鼠多食香草。亦如獐之有香臍也。山中人捕置篋筒中。經年香氣不散。桂海志云。至小僅如指。

擊大穴於柱中行地上疾如激箭。

治疝甚驗。

鼠血

此乃家鼠血。網目於鼠下。獨遺鼠血。今補之。○本經逢原云。生鼠血。蘸青鹽擦牙。宜有效。牡者良。

貓尿胞。胎。尾。
白松香。

取蒜片擦貓牙。溺卽下。

鳳聯堂驗方。治偷糞老鼠。用貓尿并底泥和勻。圍之立愈。○急救方。塗蠟毒螫傷。○蟲入耳中不出。以貓尿滴之。立死。

貓胞衣

爲治膈噎之神藥。瀕湖綱目。貓下。雖附胞衣。惟引楊氏經驗方。治反胃吐食。燒灰入硃砂服。其他概未之及焉。且取之有法。食之有忌。均爲補之。

膈噎 同壽錄。用貓初生胞衣。以新瓦焙乾。研細末。每服一二分。好酒送下。口含竹筆管。睡。恐咬牙及咳嗽。米不下者。五六服卽愈。取貓胞法。貓將產。以木枷枷之。恐生出卽食也。忌燒酒。

翻胃 鳳聯堂經驗方。貓胞衣三個。好酒洗。用豬肉四兩。淡煮熟。服之。數年者立效。○莫際華云。胃脘

痛非服貓胞不能斷根。

金御乘云。貓胞衣。凡患小產婦。於產後或爲羹或爲末食。嗣後卽不小產。極驗。

貓胎

祝氏效方。治癩癧。用貓胎一個。泥裏煨存性。菜油調搽。

貓尾血

不藥良方。急驚風。剪破貓尾。滴血。沖滾湯下。

白松香

汪連仕云。卽瓦上多年貓糞。色白。火煨用。治鹽哮喘厥作痛。更理瘟疫鼠瘡。立刻見效。

浙驢皮膠

黃雲盛言。近日浙人所造黑驢皮膠。其法一如造阿膠式。用臨平寶莊水煎熬而成。亦黑色。帶綠。頂有豬鬃紋。與東阿所造無二。入藥亦頗有效。蓋阿膠真者難得。有浙膠則較勝於用雜膠也。寶莊在臨平湖西岸。有寶莊泉。土人名爲大力水。云食之多力。向聞虎跑泉水注大缶中。平口投錢於中。能吞一百六十青錢。而水不溢。他水至八十。已浸漫於外矣。故虎跑泉食之益氣力。寶莊水能吞二百青錢不溢。其力更可知。以此水作膠。自可敵伏流之濟水。然予每案此膠於市。遍詢藥客。皆云造者亦少。不易得。

而雲盛言之甚詳。姑存之以備異日考證。

補血潤燥。功同阿膠。治內傷腰痛。強力伸筋。添精固腎。尤別有殊能也。

霞天膏

綱目畜部牛下。附倒倉法。而無霞天膏製法。近時用之頗多。故附錄之。本草經疏亦載爲專品。其法用肥嫩黃牛肉三四十斤。洗極淨。水煎成糜。濾去滓。再熬成膏。用繆仲醇曰。胃屬土。爲水穀之海。無物不受。胃病則水穀不能以時運化。羈留而爲痰飲。壅塞經絡。則爲積痰。老痰結痰等症。陰虛內熱生痰。則爲偏廢。口眼歪斜。留滯腸胃。則爲宿飲癖塊。隨氣上湧。則爲喘急迷悶。流注肌肉。則爲結核。王隱君論人之諸疾。悉由於痰。然而痰之所生。總由於脾胃虛不能運化所致。惟用霞天膏以治諸痰證者。蓋牛土畜也。黃土色也。肉者胃之味也。熬而爲液。雖有形而無濁質也。以脾胃所主之物。治脾胃所生之病。故能由腸胃而滲透肌膚毛竅。搜剔一切留結也。陰虛內熱之人。往往多痰。此則由於水涸火熾。煎熬津液。凝結爲痰。膠固難散者。亦須以此和竹瀝。貝母。橘紅。蘇子。栝樓根。枸骨葉之類消之。或以橘皮。白茯苓。蘇子。白豆蔻仁。半夏。蒼朮爲麴。治脾胃積痰。或以橘皮。貝母。蘇子。栝樓根及仁。蓬砂爲麴。治積熱痰結。

味甘溫無毒。主中風偏廢。口眼歪斜。痰涎壅塞五臟六腑。留痰宿飲癖塊。手足皮膚中痰核。經疏

羊哀

形圓如彈。大小不等。產羊腹。在胃中。惟山羊有之。胡羊不能成也。蓋羊食百草。其精氣聚於胃。久則成此物。俗呼百草丹。亦牛黃狗寶之類。牛黃細膩而疎鬆。且香烈。故以黃名。狗寶花白。而堅凝如石。故以寶名。此則如爛草團成。輕鬆而氣羶。人多惜其不能如牛黃狗寶之精美。而亦產於羊腹。得日月精華。又食異草孕結。乃不堅重香凝。僅成此物。故哀之。因名曰哀。○常中丞宦遊筆記。載軍營於羊腹中得石子。名鮮蒼。形如鴨卵。色紫黃。兩頭有二白圈。圓如黃豆。腰有束帶。寬如韭葉。色青藍。束帶上亦二白圈。質細如玉。滋潤如水。輟耕錄亦載蒙古求雨。取淨水一盆。浸石子數枚。持咒播弄。其石子名鮮蒼。產畜腹中。牛馬皆有。不必定羊也。而羊哀又與鮮蒼異。鮮蒼堅重細潤。此則輕鬆羶臊。亦無束帶白圈。庚戌冬。友人李金什在臨安西關外屠羊肆。見屠者剖一羊。胃中忽湧出一彈。如鴨卵黃。勻圓光潔。浮水盆上。購歸示予。予曰。此羊哀也。氣臊而鬆。非鮮蒼之類。彼云。屠者呼爲百草丹。云業此三十年。止取得三枚。亦不易遇也。此物惟山羊始生。因山羊食百草。偶嚼得異草。或石乳。其膏液注胃中。日久凝成。胃爲精氣往來之所。日爲氣運動。故所結之物多圓如丸。鮮蒼結於腹。不爲氣擾動。故形匾圓如石。金什卽以此贈予。予復取細視。其質鬆而亦堅。嗅之作羊臊氣。外則色澤光膩。儼如油潤。其體質非石非酥。如腐草融結。始信說略所載羊哀如溼茅紙之說爲不謬。因附記於此。以待折衷於格物諸君子。按百

草鏡羊胘結成在羊腹中色微黑可治反胃或卽此歟

解百草藥毒治噎膈翻胃

敏按慈航活人書端五日收羊屎名百草丹可絕瘧與羊胃所積草有別不可不知

蘭薰嘉鄉肉 陳火腿骨 豬項上蹄 雄豬眼梢肉 製火腿法

俗名火腿出金華者佳金華六屬皆有惟出東陽浦江者更佳其醃腿有冬腿春腿之分前腿後腿之別冬腿可久留不壞春腿交夏卽變味久則蛆腐難食又冬腿之中獨取後腿以其肉細厚可久藏前腿未免較遜蓋金華一帶人家多以木甌撈米作飯不用鑊煮飯湯醃厚者以飼豬其養豬之法擇潔淨欄房早晚以豆渣糠屑餵養兼煮粥以食之夏則兼飼以瓜皮菜葉冬飼必以熱食調其饑飽察其冷暖故肉細而體香茅船漁戶所養尤佳名船腿其腿較小於他腿味更香美凡金華冬腿三年陳者煮食氣香盈室入口味甘酥開胃異常爲諸病所宜○東陽縣志薰蹄俗謂火腿其實烟薰非火也醃曬薰收如法者果勝常品以所醃之鹽必台鹽所薰之烟必松烟氣香烈而善入製之及時如法故久而彌旨另一種名風蹄不用鹽漬名曰淡腿浦江爲盛本邑不多○陳遠夫藥鑑浦江淡腿小於鹽腿味頗淡可以點茶名茶腿陳者止血痢開胃如神○陳芝山食物宜忌火腿醃過晾燥高挂至次年夏間者愈陳愈妙出金華府屬邑者佳○常中丞筆記蘭薰金華豬腿也南省在在能製但不及金華者

以其皮薄而紅。熏淺而香。是以流傳遠近。目爲珍品。然亦惟出浦江者佳。其製割於多月用鹽勻稱。使肉堅實不敗。最上者曰淡腿。味美香潔。可以佐茶。各處皆無此製。蓋此地畜豕。闌圈清潔。俟其將茁壯時。卽宰剝醃曬。或曰其豕種原異他處。而又得香溪等水飼之。亦近乎理。○陳瑤藏藥祕訣。凡收火腿。須擇冬醃金華豬後腿爲上。選皮薄色潤。日照之明亮。通體隱隱見內骨者佳。用香油遍塗之。每個以長繩穿脚。排勻一字式。下以毛竹對破仰承。以接油。置之透風處。雖十年不壞。倘交夏入梅。上起綠衣。亦無害。或生毛蟲。見有蛀孔。以竹簞挑出。用香油灌之。如剖切剩者。須用鹽塗切口肉上。荷葉包好。懸之。依此可久留不壞。○朱氏僕葛三言。少時曾傭金華習其業。知醃腿法甚詳云。火腿。金華六屬皆有。總以出浦江湯家村者爲第一。村止一二千戶。皆養豬作腿。其豬不甚大。極重者不過七八十斤。製爲腿乾之。不過三四斤或五六斤不等。四時皆可醃。惟冬腿爲第一。冬醃者。皮細無粟眼。手摸之潤膩。切開無黃臙。爪灣。可久留不蛀。他時者皆易蛀。春腿多粟眼。夏腿爪直。秋腿皮粗。醃法。每腿十斤。用炒鹽四兩。以木刻植如人手掌狀。摻鹽。後用掌檀輕輕揉擦。四圍兼到。俟皮軟如綿。然後入缸。缸面蓋以幹蓼竹匾覆之。待七日後。有滷。翻攪一轉。令上下勻。再以炒鹽四兩。如前法。以手揉醃入缸。十日後出缸。卽用缸中原汁洗淨。一一以草繩縛定。挂懸風處。惟冬醃者不滴油。

味鹹甘。性平。○陳芝山云。和中益腎。養胃氣。補虛勞。○陸瑤云。生津。益血脈。固骨髓。壯陽。止泄瀉。虛痢。

靡勞怔忡。開胃安神。

藥性考。火腿鹹溫。開胃寬膈。病人宜之。下氣療嘔。

腹痛或三四日不止。○筆苑仙丹。火腿肉煎湯。入真川椒在內。撤去上面浮油。乘熱飲湯。立愈。累驗。
久瀉。○救生苦海。陳火腿腳爪一個。白水煮一日。令極爛。連湯一頓食盡。即愈。多則三服。此予宗人柏雲屢試屢效之方也。百草鏡云。火腿出浦江縣。脛骨細者真。陳者佳。皮上綠黴愈重。其味愈佳。須洗去垢及黃油用。

嘉香肉

食物宜忌云。又名家鄉肉。出浦江者最佳。○藥鑑云。家鄉肉。金華屬邑俱有之。秋即醃。給客販入省城。市賣。其肉皮白。肉紅鮮。氣香美。不似他處醃豬肉。色少鮮澤也。但一入杭城店。便加消滷。投缸中浸透。然後出售。蓋不爾。則肉味淡。反不美。而秋時尚暖。不漬透消滷。又易腐臭也。肉爲消滷。食之恐乏補益。不似火腿冬醃。陳久者爲佳。然今店中所售火腿。均以家鄉肉。腿風乾。至次年皮上起綠衣。充陳火腿。賣。人多不察。若療病作食餌。須真金華腿方有效也。

味鹹甘。性平。○陳芝山云。補虛開胃。○百草鏡云。平肝運脾。和血生津。○藥鑑云。滋腎。健足力。敏按芝山所言。乃未經杭肆滷漬之肉。故能補虛。若經滷漬透。便能燻肺。凡肺痿陰虛咳嗽者。恐非所

宜產婦虛勞須補者亦忌。其肥肉得消滷入腹即成痰。體肥作痰者亦不宜多食。倘食之作痰。杏仁研食可解。

附治箭鏃不出方。家寶方。用陳年醃肉。去皮。取紅活美好者。同其肥細切剉濃。將象牙末及人所退爪甲爲末。共爲研細。拌入所剉肉內。再爲勻剉。令其合一。厚傅箭鏃周圍。約一飯頃。其鏃即自迸脫。竟有迸至二三尺遠者。

陳火腿骨

百草鏡云。煨黑研用。治食積及痢。

治痢。救生苦海。用陳火腿骨二根。炭火煨灰。篩過。加上白糖一兩。米湯飲。或滾水或酒調服。無不效。

○又方。治赤白痢。陳火腿骨灰。陳皮。炙草。各一兩。爲末。蜜丸。如綠豆大。空心服一錢。白痢用薑。赤痢用白湯送下。○神錦方。生火腿骨焙燥。研極細末。無灰酒送下。即止。○醫林集祕。用陳火腿骨煨灰六兩。飯鍋巴煨灰五兩。砂仁炒三兩。南山楂炒五兩。共爲末。每服三錢。久痢人參湯下。紅痢。紅糖湯下。白痢。白糖湯下。糞痢。炒焦白朮三錢。煎湯服。霍亂吐瀉。藿香湯下。

噤口痢。筆珠萃。火腿骨煨一兩。蓮肉二兩。木香七錢。烏梅三錢。醋糊爲丸。桐子大。每服七丸。蜒蚌湯下。

大人小兒積食。諸藥不能消者。不藥良方。陳年火腿骨煨黑色。研末三錢。用火腿一斤。煮熟。去汁上肥油。取清湯一盃。將末送下。

鼠咬。救生苦海。陳火腿骨燒灰。香油和傅。

小兒臘梨瘡。販翁醫要。陳火腿骨燒灰。如癢。加礬少許。麻油調傅。不生髮。用老薑擦。

豬頂上蜻蜓骨

燒灰。塗一切頭項疽毒。凡腦疽發對口等症。麻油調傅。立愈。王聖俞手集

雄豬眼梢肉

能拔殭肉。散毒滯。劉羽儀經驗方。治對口癩。用雄豬眼梢肉三錢。剝爛如泥。加滑石末四錢。和勻傅患處。項上以膏藥蓋之。拔去殭肉。放出黃水。即愈。

製火腿法

李化楠醒園錄。有醃火腿法。每十斤豬腿。配鹽十二兩。極多加至十四兩。將鹽炒過。加皮消末少許。乘豬鹽兩熱。擦之。令勻。置大桶內。用石壓之。五日一翻。候一月。將腿取起。晾有風處。四五個月可用。金華做火腿。每斤豬腿配炒鹽三兩。用手將鹽擦完。石壓之。三日取出。又用手極力揉之。翻轉再壓再揉。至肉軟如綿。挂風處。約小雪後。至立春後。方可挂起不凍。○戴義養餘月令。有製火腿法。十一月內。圈豬

方殺下。只取四隻精腿。乘熱用鹽。每一斤肉鹽一兩。從皮擦入肉內。令如綿軟。以石壓竹柵上。置缸內。二十日。次第三番五次。用稻草灰一重間一重疊起。用稻草烟熏一週時。挂在烟處。初夏以水浸洗。仍前挂之。按此乃村鄉土醃火腿法。要不及金華之蘭薰也。然較之杭市醃臘店所買火腿。則又不啻霄壤矣。故並載其法。○造火腿醬法。用南火腿煮熟。切碎丁。如火腿過鹽。先用水泡淡。再煮去皮。單取精肉。用火將鍋燒得滾熱。將香油先下滾香。次下甜醬白糖甜酒。同滾煉好。然後下火腿丁及松子核桃瓜子等仁。速炒翻起。磁罐收貯。其法每腿一隻。用好麪醬一斤。香油一斤。白糖一斤。核桃仁四兩。去皮打碎。花生仁四兩。炒去衣打碎。松子仁去衣四兩。瓜子仁二兩。桂皮五分。砂仁五分。

拾遺卷十

鱗部

肥蛇

雲南志。順甯府出肥蛇。見人則斷。人去復續。取而乾之。可治腫毒。○滇黔記遊。出滇黔土司。長尺餘。伏草莽。見人輒躍起。跌數段。頃復合一色。如白金光亮。悞拾之。觸毒即斃。○陳鼎蛇譜。肥蛇產貴州土司。中長尺有二寸。圓如錢。鼻尖尾禿。背黑腹白。暗鱗點點可玩。見人輒躍起數尺。跌爲十二段。須臾復合。

爲一。不知者悞拾之。卽寸斷。兩端俱生頭。齧人卽斃。出入往來恆有度。捕之者置竹筒於其逕側。則不知而入其中。急持之。方可完。稍緩則碎矣。故名曰脰。予家多蓄奇藥。曾購得其脰。見寸斷處皆光潤如新。截然亦一異也。○查慎行人海記。脰蛇出崑崙山。聞人聲卽寸斷。人伺其斷。鉗取之。須寸各異處。待風乾入藥。若少頃無人聲。寸寸仍續成蛇。

治色癆及驚疑喪膽諸症。玉鏡新談

肉熬膏。箍癰疽。去風癩。其骨醋磨。圍腫毒。良。

接斷骨。滇黔記遊。脰蛇人得而腊之。用接斷骨。價值兼金。視其上中下。治頭腹脛股。無不效。

大麻風。痢。滇略。脰蛇一名片蛇。產順寧大侯山中。長二尺許。遇人輒自斷爲三四。人去復續。乾之。

色如黃金。治惡疽。腰以上用首。以下用尾。又治大麻風及痢。近人貨之爲夾棍藥。

環蛇

蛇譜云。出三佛齊國如環。大數圍至數十圍者。逐獸卽疾走。如轉車輪於千仞山。獸入環中卽斃。其口眼俱生環之半。與尻相對。脂服之。刀劍不能傷。

翠蛇

珍異藥品云。形如曲蟻。長可五六寸。蟠旋作圈。

治癩毒癰疽良。

碧飛

湖州府志。武康山多蝮蛇。名碧飛。大者如團壘。小亦如杯案。斧首出目。鋸齒方文而綬色。厥雄赤紫。厥雌青黑。色皴皴如蜃甲。目光亦如之。山中人謂有目而無視也。春夏布絲草篠。人物觸絲。激射迅於矢。忽不見已。攫肉去矣。殺人至死。霜降絲肥。升高樹杪。施吐白涎。烏鵲下啄。則吞之。惟鹿以爲膳。獵獲之前。左足扼其腰中。首尾盤繞。右足又趾寸解。啖無餘者。人得而腊之。可入藥。凡西北諸山。自餘英嶺而內。皆是物也。

治風痺蝮傷。人被其齧者。還食其肉則生。

敏按湖志所言碧飛。吾杭山鄉多有之。土人名方勝板。以其遍身花紋如錦。中方勝形。匾似板。故名。嚙人最毒。惟野豬能食之。土人言冬日蛇蟄地中。野豕嗅其氣。輒翻石掘土出而啖之。蛇性大熱。野豬食三條。即能過嚴冬。綱目蝮虺爲二。蝮即方勝板。虺即土錦。俗呼灰地匾是也。惡風頑痺。非此猛烈積熱之性驅之。則肢廢者不能復舉。殆以毒攻毒之義。想碧飛或同類而異名者。書此以俟證。

蟒油

爾雅。蝮。王蛇。注。蛇中最大者。故曰王蛇。今深山處處有之。大小不一。色如菜花。蛇而較黃。頭上皆有王字。亦有黑色者。土人名曰烏蝮。捕蛇者有呼蛇法。不拘何種蛇。呼之卽至。末後俟蝮到。則諸蛇皆圍伏不動。聽其擇取。惟不敢傷蝮。蝮傷則諸蛇無主。環起噬人。聞其人云。蝮蛇自有此種。生而皆有王字。故不論大小也。蝮至則諸毒蛇皆不敢傷人。

治漏瘡。集驗。取蝮油。銅鍋內熬熟。隨將黃蠟入油內攪勻。油紙攤膏貼患處。十餘日便封口全愈。
按蝮蛇名王字蛇。其首天生有一王字。予於庚子在奉化長橋。見丐者手握此蛇乞錢。其蛇亦不甚大。性頗馴良。因以千錢買得。縱之。綱目諸蛇獨遺此。因急補之。

斷草烏

粵志。斷草烏。出廣中。蛇也。大僅指許。長五六寸。頭如龍形而小。身純烏。其行也。百草沾之立斷。人見斷草。輒跡得之。故蛇每離地丈許。使身如矢直以入穴。使不沾草。人莫得而跡之。此亦烏蛇中一種。綱目烏稍蛇不載。龍頭者一種。故錄其遺。

治大麻風。煮酒服。

龍涎香

通雅。龍涎有噴。在花面國傍。獨立南海中。彼人言於樹收之。最收香氣。今大內甜香用之。○澳門記略。

大食國產龍涎香爲上。西洋產於伯西兒海。焚之則翠烟浮空。結而不散。坐客可用一翦。以分烟縷。○
嶠南璣記。龍涎香新者色白。久則紫。又久則黑。白者如百藥煎。黑者次之。似五靈脂。其氣近臊。和香焚之。則翠煙浮空不散。試法。將結塊者奮力投沒水中。須臾突起。浮水面。或取一錢口含之。微有腥氣。經宿。其細沫已嘯。餘膠結舌上。取出。就溼秤之。仍重一錢。又乾之。其重如故。雖極乾枯。用銀簪燒極熱。鑽入枯中。乘暖抽出。其涎引絲不絕。驗此。不分褐白。褐黑俱真。海東札記。海翁魚。大者三四千觔。小者千餘觔。卽海鰵也。皮生砂石。刀箭不入。或言其魚口中噴涎。常自爲吞吐。有遺於海濱者。黑色淺黃色不一。卽龍涎香也。聞上淡水有之。欲辨真贋。研入水。攪之。浮水面如膏。以口沫擦成丸。擲案有聲。噙之。通宵不耗分毫者爲真。每兩值數十金。廣志。新安有龍穴洲。每風雨卽有龍起。去地不數丈。朱鬣金鱗。兩目如電。其精華在浮沫。時噴薄如澹泉如雨。土人爭承取之。稍緩則入地中。是爲龍涎。或謂龍涎多積於海上枯木。如鳥遺狀。其色青黧。其香腥雜。百和焚之。翠烟千結。蜿蜒蟠空。經時不散。可以翦分香縷。然多不真。從番舶來者。出大秦波斯。於雨中焚之。膈膊有聲者真。坤輿圖記。龍涎香。黑人國與伯西兒兩海最多。有大塊重千餘觔者。望之如鳥。每爲風濤湧泊於岸。諸蟲鳥獸亟喜食之。汪機本草。龍吐涎沫可制香。○星槎勝覽。錫蘭山國。卜刺哇國。竹步國。木骨都束國。刺撒國。佐法兒國。忽魯謨斯國。溜山洋國。俱產龍涎香。○稗史彙編。龍涎香白者。如百藥煎。而膩理極細。黑者亞之。如五靈脂。而光澤。其氣

近於燥。似浮石而輕香。本無損益。但能聚香耳。和香而用。真龍涎。焚之則翠烟浮空。結而不散。坐客可用。一翦以分烟縷。所以然者。入屨氣樓臺之餘烈也。泉廣合香人云。龍涎入香。能收斂腦麝氣。雖經數十年者。香味仍存。○廣東通志。龍涎在水采者。褐黑色。在山采者。褐白色。○東西洋考。海傍有花。若木芙蓉花。落海。大魚吞之腹中。先食龍涎。花嚙入。久即脹悶。昂頭向石上吐沫。乾枯可用。惟養者不佳。若散碎皆取自沙。滲力薄。○范咸臺灣府志。龍涎香傳爲鯨魚精液。泡水面。凝爲涎。能止心痛。助精氣。以淡黃色嚼而不化者爲佳。出淡水者。皆淡黃色。無黑色。○朱國楨大政記。龍涎香出蘇門答刺國。西有龍涎嶼。峙南巫里大洋之中。羣龍交戲其上。遺涎焉。國人駕獨木舟伺採之。舟如龍形。浮海面。人伏其中。隨風潮上下。傍亦用漿。龍遇之亦不吞也。每一觔值其國金錢一百九十二枚。準中國銅錢九千文。嘉靖三十四年。下戶部取香百觔。遍市京師。不得。下廣東藩司採買。部文至。臺司集議。懸價每觔銀一千二百兩。僅得十一兩。上進。內驗不同。姑存之。亟取真者。部文再至。廣州夷囚馬那別的。貯有一兩三錢。上之。黑褐色。密地都密地。山夷人。繼上六兩。白褐色。細問狀之。黑者採在水。白者採在山。皆真不贗。尋有密地山商再上。通前共得十七兩二錢五分。次年進入內。辨驗是真。許留用。自後夷船閉上。供稍狹。來市始定價。每一兩價百金。龍涎之爲用也。入香合和。能收斂腦麝清氣。雖數十年香味仍存。得其真者。和香焚之。翠烟裊空不散。涎沫有三品。曰汎水。曰滲沙。曰魚食。汎水則輕浮水面。善水者。伺龍

出取之。滲沙則凝積年久。氣滲沙中。魚食則化糞於沙磧。惟汎水者可食香用。又言魚食亦有二種。海旁有花若木芙蓉。春夏間盛開。花落海。大魚吞之。若腹腸先食龍涎。花嚙入。久卽脹悶。昂頭向石上吐沫。乾枯可用。惟糞者不佳。○嶺南雜記。諸香龍涎最貴。市值每兩不下百千。次亦五六十。出大食國。近海有雲氣罩山間。知有龍睡下。或半年一二載。土人守視雲散。則龍已去。必得其涎五七兩或十餘兩。衆共分之。又大洋中有渦旋處。龍在其下。湧出之涎。日燥成片。風漂至岸。取之。又嶺外雜記。龍枕石而睡。涎浮水。積而堅。新者色白。久紫。甚久者黑。氣近燥。形如浮石而輕。膩理光澤。入香焚之。翠烟浮空。結而不散。又出沒海上。吐出涎沫。有三品。一汎水。二滲沙。三魚食。汎水輕浮水面。善水者伺龍出。隨取。滲沙凡風浪飄泊舟嶼。積年氣盡於沙土中。魚食涎作糞。散沙磧。氣腥穢。進貢亦不過四兩。

按龍涎論色。則瑣記言有白與紫黑之分。而札記又有淺黃色。廣志有青黛色。辨真僞。亦諸說互異。大抵不必論其色。總以舍之不耗。投水不沒。雨中焚之能爆者良。東璧綱目。鱗部龍下。龍腦龍胎俱有主治。而於龍涎獨遺之。惟附其名云。龍涎方藥鮮用。惟入諸香云。能收腦麝數十年不散。出西南海洋。春間羣龍所吐涎沫。浮出者。番人採貨之。亦有從大魚腹中剖得者。其狀初若脂膠。黃白色。乾則成塊。黃黑色。如百藥煎而膩理。久則紫黑如五靈脂而光澤。其體細飄似浮石而腥燥。其說亦未確核。蓋所云魚腹中得者。卽札記所云海峽魚之精也。亦名龍涎。出臺灣。不若大洋中產者佳。夫龍腦龍胎。世上所

無龍涎則閩粵貨售者多。東璧何得於罕見者載之。於所有者反略之耶。則甚矣該博之難也。入藥用隔湯頓化如膠糖狀者佳。

氣腥。味微酸鹹。無毒。○藥性考。味甘。氣腥。性瀉。○張瑤實云。夾砂者有小毒。乃土人於砂磧上收取之。入藥須以甘草水煮過用。○酉陽雜俎云。龍蔡遇烟煤則不散。入藥忌鐵器及石膏。

活血。益精髓。助陽道。通利血脈。○廖永言驗方云。利水通淋。散癥結。辟精魅鬼邪。消氣結。逐勞蟲尸疰。○陳良士云。在澳門見倭夷用合舶硫及他藥作種子丸。云漢時術士和丹用此。倭夷皆有其方。祕不傳中國。○札記云。出淡水者。止心痛。助精氣。○周曲大云。龍涎能生口中津液。凡口患乾燥者。含之能津流盈頰。微若有腥氣。粵中夷人合龍涎丸。和以他藥。便不腥。入口亦不耗減。一丸可用數十年不敗。如單用龍涎入藥。須先用雞湯將龍涎制死。則入腹便化。否則入腹絲毫不損。蓋極難化者。方書云。焚之其烟能入水。孟子嘗試之。多不驗。

按龍乃東方之神。其體純陽。能嘘氣成雲。陽之質輕浮。故雲上升。其骨反入手。足少陰厥陰經者。蓋凡知覺運動之物。皆肖陰陽以立體。孤陽則不生。龍秉純陽。而骨反屬陰。入藥能收陽中之陰。治心腎諸病。所謂一陰一陽之謂道也。其質靈。其齒能治魂遊不定。鎮驚癩。凡病在肝。而龍主肝木。治之最神。涎乃陽中之陽。故其氣絕香。龍屬木。木之氣得太陽多者必香。故諸香以龍爲最。得孟水徑撲其中。不落。

空外。龍以水爲用。見水則精入焉。入藥所以能利水道。分陰陽。能殺精魅鬼邪者。亦以至陰之物。見真陽而立解也。

龍泄

河南薛姓客言。曾在嘉興永太守處。見有龍泄結成大塊。其質亦輕。有六七兩及觔許不等。每塊皆起螺旋紋。如象牙花紋。其色有純黑有褐白二種。欲辨真偽。刮屑少許。以滾水泡之。其氣悉瀟而成雲。遇婦人。雲輒撲入髮際。旋繞不散。蓋龍性好淫故也。人服之。入腹亦不耗。惟見雞湯輒化。如服後不食雞湯。次日糞出。其藥仍在。色亦不改。淘出洗淨。復可再用。氣亦不臭。其功效。食之能煖婦人子宮。治男子下元虛冷。入房術中用。又史良宇言。曾見龍血結塊如棋子大。光滑可鑿。觸手冷如冰。夫龍純陽也。而血獨冷。又不解何故。龍泄又何物也。其涎與血。俱不可知。悉存其說以俟證。

西楞魚

坤輿圖說。大東洋海產魚名西楞。上半身如男女形。下半身則魚尾。其骨入藥用。女魚更效。止血治一切內傷瘀損等症。

鱒魚鱗

本經逢原。鱒魚性補。溫中益虛。而無發毒之慮。其生江中者。大而色青。味極甘美。生海中者。小而色赤。

味亦稍薄。觀其暗室生光。迥非常魚可比。○綱目主治。言其肉補虛勞。油塗湯火傷。於集解下記其鱗爲婦人鈿飾。不及入藥功用。○張佳時云。鱗魚須乘活時。拔划水邊二鱗。尖長者佳。若死魚鱗。便減藥力。

湯火傷。逢原云。用鱗魚鱗香油熬塗。立效。茅集之云。鱗魚鱗貼腿瘡疼痛。立效。

治疗。陳氏傳方。疔瘡用鱗魚鱗貼上。則咬緊。先須與酒飯吃飽。然後將魚鱗邊略略揭起些須。用力急揭去。疔根便帶出也。但揭出疔根時。極痛無比。非醉飽。卽暈倒也。○傳氏方。水疔。用鱗魚腮下近腹處。有划水二瓣。瓣間有長鱗二瓣。最佳。但難得。今人以背上大鱗代之。貼上卽消。○毛世洪經驗集。鱗魚靨用手剖下。不可見水。陰乾收貯。此拔疔第一妙藥也。用時以銀鍼撥開疔頭。將一片貼上。以清涼膏蓋之。俟一宿揭開。其疔連根拔出。後用生肌散收功。予治兩貴婦大腳趾患瘡。二三年不收功。將靨一片。以銀花湯浸軟。拭乾貼之。不數日而愈。

下疳。救生苦海。鱗魚鱗焙乾。煨研白色。名白龍丹。敷之卽愈。得此可包醫。

血痣。蔡雲白言。人生血痣。挑破血出不止者。用鱗魚鱗貼之。卽痂而愈。

苦魚

劉基苦齋記。匡山在處州龍泉縣。劍溪之水出焉。注入大谷。其中多斑文小魚。狀如吹沙。味苦而微辛。

可食故名。

解酒毒可以醒酒。

藥性考。苦魚微辛。形細色斑。烹食腴美。消酒除癆。

金魚

此魚自宋南渡始有。一名硃砂魚。乃人家蓄玩於盆盎中者。有三尾四尾品。尾金管銀管之分。有蛋魚。名龍蛋。文蛋。虎頭及鱗諸品。純紅純白。或紅白相間。體具五色。極大者三四寸。小者寸許。綱目金魚條云。主治痢。而所用乃金絲鯉魚。按金魚雖有鯉鯽諸種。殊不知鯉魚中一種紅鯉。名金鯉。鯽魚中一種紅鯽。名金鯽。皆有金魚之名。與此全別。而東璧合爲一。則誤矣。

味苦微鹹。有小毒。食之令人吐。綱目本條氣味下云。甘平無毒。此指紅鯽而言。並非今之金魚也。解服滷毒。用金魚一二枚搗之。灌下。吐出涎水。自甦。

治瘋癩石臍水臍黃疸。慈航活人書。俱用紅色金魚一個。取三尾者。甘蔗大者。一二枚。同搗爛。絞汁服。立刻卽吐出痰涎。愈。

阿羅魚

一首十身。音如吠犬。亦可禦火。珍異藥品。

療癰疽。

漢陂魚

輿地志。鄠縣漢陂出魚。味美。可入藥。

治痔。

四足魚

物理小識。游子六曰。閩高山源有黑魚。如指大。其鱗卽皮。四足。可調粥入藥。

治小兒疳。

河豚目子。

逢原云。挾河豚目。拌輕粉。埋地中化水。拔婦人腳上雞眼瘡。可以脫根。

河豚子

性有毒。可絕壁蝨。行篋檢祕。同蠟殼樟冰各五分。拌棉花子。安牀下。燒烟熏之。

蜆娘魚

三才藻異。產撫仙湖。狀如龜殼。青大如盤。無尾。八足。腹白。

食之辟瘴毒。

蜜姑魚

宦遊筆記。自光溪入四明二十餘里。有蜜巖。峭壁千尋。下臨深溪。窅洞無底。巖顛舊有蜂窠。聚蜂數百萬。其蜜滴下。溪魚食之。故魚味甘絕。曰蜜姑魚。其釣法倍多曲折。魚性極喜苔。須繩懸崖下。有水衣演漾深碧而細者。剝以爲餌。魚性暴。遇釣則跳巖。卒不可制。而蜜巖下溪水清甚。用粗綆。則恐魚之瞥見而驚遊也。用細絲。則又恐不足以勝魚跳巖之力。釣者乃取絲長十餘丈。盤於竿上。遙望見深波中魚翻翹鼓鬣而至。則取絲徐徐放之。如小兒之送紙鳶者。使得縱其所往。魚入鉤。果一躍數尺。翻波跋浪。橫激溪面。其鱗光閃爍。如千片碎金。雜珠顆中。隨風散灑。觀者莫不目眩心動。已而徐徐力倦。乃可取之。

性溫味甘。食之生胃津。益肺氣。補血脈。增髓去熱。除虛羸。壯筋骨。止嗽定喘。功同燕窩蛤蚧也。按此魚最潔。惟食苔蜜。苔寒而蜜溫。得水火既濟之力。大能補土生金。燕窩性清肅而下行。蛤蚧性和中而溫臟。此則故能兼之。眞勞嗽虛羸之食品上藥也。柳崖外編。載張方海浙人。少年讀書四明。嘗斷煖者數月。山礪谷多竹。峭壁有蜜。蜜入江化爲魚。名蜜鮎。張遂掘笋釣鮎而食。自言笋味淡以清。蜜鮎濃而美。有天台胡麻所不如者。嗣後遂輕身耐寒暑。不復思烟火味。據此。則其功用信不誣也。

雪鮎

粵語。鮪魚。廣人池塘多蓄之。以魚秧長成。與鮪性相反。鮪屬土。其性沈。長潛水中。鮪屬水。其性浮。長躍水上。鮪食之。可以實腸。鮪食之。可以行氣。鮪守而鮪行。性各不同如此。其物以冬而肥。故名。喜泳浮波上。得濟流。則跳躍尋丈。生食之。益人氣力。○梧潯雜佩。鮪魚形似鯁。而稍短。味甚美。作膾尤佳。健筋骨。活血行氣。逐水利溼。

帶魚

出海中。形如帶。頭尖尾細。長者至五六尺。大小不等。無鱗。身有涎。乾之作銀光色。週身無細骨。止中一脊骨。如邊箕狀。兩面皆肉裹之。今人常食爲海鮮。據漁海人言。此魚八月中。自外洋來。千百成羣。在洋中。輒啣尾而行。不受網。惟釣斯可得。漁戶率以乾帶魚肉。一塊作餌。以釣之一魚上釣。則諸魚皆相啣。不斷。掣取盈船。此魚之出。以八月。盛於十月。霧重則魚多。霧少則魚少。率視霧以爲貴賤云。綱目無鱗魚條。獨遺此品。故爲補之。○五雜俎。閩有帶魚。長丈餘。無鱗而腥。諸魚中最賤者。獻客不以登俎。然中人之家用油沃煎。亦甚馨潔。○福清志。帶魚身薄而長。其形如帶。無鱗。入夜爛然有光。小者俗名帶柳。○物鑿。帶魚形纖長。似帶。啣尾而行。漁人取得其一。則連類而起。不可斷絕。至盈舟溢載。始舉刀割斷。捨去其餘。○玉環志。帶魚首尾相啣而行。釣法用大繩一根。套竹筒作浮子。順浮洋面。綴小繩一百二十根。每小繩頭上拴銅絲一尺。銅絲頭拴鐵鈎長三寸。卽以帶魚爲餌。未得帶魚之先。則以鼻涕魚代。

之凡釣海魚皆如此。釣期自九月起至次年二月止。謂之魚汛。○朱排山柑園小識。帶魚生海中。狀如鰻。銳首扁身。大眼細齒。色白無鱗。脊骨如篋。肉細而肥。長二三尺。形如帶。亦謂之裙帶魚。冬時風浪大作。輒釣得之。藁爲燻。以致遠。

味甘性平。和中開胃。食物宜忌

帶魚形長扁薄。似帶。色白無鱗。肉細佳。膾醃。鮓風乾。久藏不敗。煎烹味美。多食發疥。註帶魚。脚尾而行。得一可連數十。醃食佳。黑夜有光。故有毒。藥性考

血鱈

出浙江寧波府慈谿縣。以白龍潭產者爲第一。他產者尾尖尙黑。不能通體如硃砂紅也。葛三春言白龍潭血鱈。周身紅如血。每年所產亦稀。取其血沖酒飲。可以驟長氣力。行伍中學習八段錦工夫者。多服之。

增氣力。壯筋骨。益血填髓。

沙魚翅

沙卽鮫魚。種類甚多。皆可食。綱目鮫魚條集解下。瀕湖註云。沙魚腹下有翅。味並肥美。南人珍之。主治下特載其肉皮膽之功用。翅獨略焉。今人習爲常嗜之品。凡宴會餽饌。必設此物爲珍享。其翅乾者成

片有大小。率以三爲對。蓋脊翅一。划水翅二也。煮之折去硬骨。檢取軟刺。色如金者。淪以雞湯。佐饌。味最美。漳泉有煮好。剔取純軟刺。作成團。如胭脂餅狀。金色可愛。名沙刺片。更佳。

味甘性平。補五臟。消魚積。解蠱毒。食物宜忌。益氣開膈。托毒。長腰力。國部食疏。清痰。開胃進食。藥性考

土附

嘉興縣志。一名菜花魚。以其出於菜花時。最肥美。故名。程大昌演繁露。土部。吳興人呼爲鱸鱧。以其質圓而長。與黑鱧相似。其鱗斑駁。又似鱸魚。故兩名之。長興謂之蕩部。又曰蕩魚。湖州府志。鮒魚。今呼土部。此魚質沈。常附土而行。不似他魚浮水遊也。故又名土附。錢塘縣志。土驚。俗名土哺。以清明前者佳。藻異云。吐哺產杭。本名土附。以其附土而生也。色黑味美。兩航雜錄。吐哺。或曰食物嚼而吐之。故名。敏按。美上諸說。皆無杜父之名。而綱目載杜父魚云。其色黃黑有斑。脊背上有鬚刺。螫人。又名渡父魚。黃魴魚。船釘魚。伏念魚。似與土附絕不相類。沈雲將食纂。陳芝山食物宜忌。皆以爲今之土部魚。卽杜父魚也。此乃承山堂肆考之誤。今土部杭城甚多。一年皆有。惟正二三月獨旺。背黑。亦有淡黑帶土黃色者。不聞能刺人。俗云。此魚立冬後則伏土閉眼不食。冬至後出土。附土而行。清明後開眼。遍食小蟲。蝦故有毒。陳芝山云。土部清明後頭上生紅蟲。不可食。細核其形狀食性。與杜父全不相類。何能強合。予故於禽蟲考中魚類辨之甚詳。以杜父入吹沙類。而另立土附本條。蓋不敢附古人而欺後世也。土部

綱目所無。復為補之。

味甘。性溫。○補脾胃。治噎膈。除水腫溼氣。瘕一切瘡疥。此物又能扶陽。其子用燒酒醉食。頗能興腎。與對蝦同功。以其食蝦力也。

子。助相火。煖腰腎。

烏魚蛋

產登萊。乃烏賊腹中卵也。藥性考。以為即雄魚白。味鹹。開胃利水。

青魚膽

梧溽雜佩。青魚膽出藤縣之禰。禰字不見字書。讀如洲。洲在江中。長可五六里許。其上居民甚多。水多石上青苔。此魚食之。其膽極涼。可入藥。他處即不堪用。魚大者百餘觔。漁人網得。必以聞官。割取其膽。乃鬻於市。

白皮子

蟬史。蛇生南海。四月初生如帶。至六月漸大如盤。形似白綠絮。而無耳目口鼻鱗骨。一段赤色破碎者。謂之蛇頭。其肉如水晶。以明礬醃之。吳人呼為水母。鮮久則漸薄如紙。俗呼為白皮紙。按今所云白皮紙。乃海蜇外面之皮。非陳久之海蜇也。一名秋風子。○朱排山柑園小識。海蛇上有白皮。潔白脛美。

過於海蛇。謂之白皮子。○綱目載海蛇名水母。人以石灰礬水醃之。去其血水。色乃白。其形最厚者。謂蛇頭。味更勝云。而不錄其外皮之用。且其言性暖。可治河魚腹疾。而農田餘話云。水母本陰海凝結之物。食而暖。其性未詳。東璧亦無發明。敏會居東甌數年。見土人販蛇爲生者。詢之。據言其物確係海水所結。東南海俱鹹。遇春夏天。雨在海中者。一滴雨水入海。輒有一小泡凝聚海面。初則大如豆。隨波逐蕩。受日烘染。漸長大成形如笠。上頭下脚。塊然隨潮而行。土人撈蛇者。每於海塗間插竹爲小城。以稻草作網圍之。潮長。蛇隨潮而來。入竹城。爲網所絡。不得去。然後取之。以刃劈其中段。晝然而開。有似腸胃穢積者。落落交下。名蜚花。食之亦最美。再以礬灰醃而售之。按海爲陰水。天雨水屬陽。相入而感。便生此物。受太陽真氣。所以日漸長大而性暖也。

味鹹。性溫。消痰行積。止帶祛風。

貼爛腿。救生苦海。用白皮子照瘡大小。剪作膏貼。內摻銀硃。

無名腫毒。集聽方。用白皮子一片。白糖霜揉軟。中開一孔。貼上。重者潰。輕者散。又止痛。

流火。文堂集驗。取海蜚皮薄者貼上。燥則易之。

頭風。貼兩太陽。能拔風溼外出。

膝骸風溼。以白皮子貼之。

消痞。王聖俞云有二方。一用白皮子同葶藶燒酒浸服。一用白皮子葶藶同煮。止食葶藶。自消痞也。
○程克庵云。凡小兒一切積滯。用葶藶與海蜇同煮。去蜇食葶。則諸積自消。亦以積非寒不滯而成。海蜇能暖水臟。葶藶化堅。相因而用。其效故捷也。同壽錄載其方治痞。用大葶藶一百個。古錢二十個。海蜇一觔。皮消四兩。燒酒三觔。共浸。七日後。每早喫四錢。加至十個止。卽愈。

鮫魚

滇程記。雲南百夷中有小孟貢江。產鮫魚。彼夷食之。日御百婦。故夷性極淫。貴賤俱數妻。其地亦產鱉。○說略云。鮫魚產孟貢江。牡者恆多牝而遊。夷人常食其肉。一日能御百女。入藥用雄者。壯陽道。固精髓。八十老翁服之。多子。

介部

海龍

赤嵌集。海龍產澎湖澳。冬日雙躍海灘。漁人獲之。號爲珍物。首尾似龍。無牙爪。大者尺餘。入藥。譯史。此物有雌雄。雌者黃。雄者青。

功倍海馬。益房筍。催生尤捷效。握之卽產。

百草鏡云。海馬之屬有三。小者長不及寸。名海蛆。不入藥。中等者長一二寸。名海馬。尾盤旋作圈形。扁

如馬。其性溫味甘。煖水臟。壯陽道。消瘕塊。治疔腫產難。血氣痛。海龍乃海馬中絕大者。長四五寸至尺許不等。皆長身而尾直。不作圈。入藥功力尤倍。雖同一類形狀。微有不同。此物廣州南海亦有之。體方周身如玉色。起竹節紋。密密相比。光瑩耀目。誠佳品也。○介語。鰕姑一名海馬。其扁如蜈蚣者。燒服。主夜遺。

海牛

本草原始。海牛生東海。海羸之屬。頭有角如牛。故名。其角硬尖銳有紋。身蒼色。有龜背紋。腹黃白色。有筋。頂花點。魚尾。今房術中多用之。

氣味鹹溫無毒。主治益腎。固精興陽。

白鼈

粵志。白鼈可以治痰火。其初得之神授。廣人甚珍之。有口號曰。烏耳鱗。白甲魚。滋陰降火。只須臾。一名玉鼈龍。以其背上偻起如鼈龍也。連首白者良。甲白而首足仍青者不及。補虛勞。愈痰火。滋陰降氣。養血益精。

鼈膽

盧之頤云。鼈無耳。以眼聽。故其目不可警。識精於明。復識於聰也。不惟精專肝竅。膽亦異衆。而味大辛。

穹脊連脅。脅亦少陽膽府所屬。此木金交互。故得聲色疊用。而肝爲膽藏。取決更相親耳。本草乘雅云。味辛。開聲。瞽除癥瘕痞積。瘕肉。惡陰蝕痔核。今人以入房術用。風斯下矣。痔瘡痔漏。家寶方。鼈膽一個。取汁磨香墨。入麝香冰片少許。雞毛蘸塗。物理小識云。鼈膽最辣。通竅尤捷。此人所未知者。

蝗殼

綱目蝗條。止載其肉。云治冷痢。補蓐勞。不及其殼之功用。

治喉風急痹。萬選方。用蝗殼置瓦上。日曬夜露。經年取下。色白如雪。擣細。水漂淨末。曬乾。同冰片吹喉。專治咽喉一切急症。立愈。

海蠅

杭州府志。海蠅。杭俗立夏以爲應時之味。以花椒灑之。麻油拌食。○從新云。比螺蠅身細而長。殼有旋紋六七屈。頭上有鬚。春初蛻起。釘海崖石壁。海人設網於下一掠而取。治以鹽酒椒桂。按海蠅有大如指長一二寸許者。名釘頭螺。温台沿海諸郡多有之。海蠅螺生海塗中。立夏後。有人見其羣變爲蠶。今人所稱豆娘是也。或云。此螺能跳丈許。蓋遷其處。此物又能食蚶。明州奉化多蚶田。皆取苗於海塗種之。久則自大。時田者不時禱視。恐有海蠅苗。蓋蚶不畏他物。惟畏海蠅。蚶田中一有此物。蚶無遺種。皆

被其吮食盡。玉環出者大如指。名釘頭螺。

鹹寒。治瘰癧結核。能降鬱氣。

辟蛆。雲客傳方。立夏日食海螵後。以殼七枚。勿令人見。撒廁中。或馬桶內。暑日不生蛆蟲。頗驗。

吐鐵

沈雲將食物本草曰。吐鐵。海中螺屬也。大如指中。有腹如凝膏白。其殼中吐膏。大於本身。光明潔白。可愛。姑蘇人享客。佐下酒小盤。爲海錯上品。一名麥螺。一名梅螺。產寧波者。大而多脂。餘姚者不及。生食之。令人頭痛。土人以鹽漬之。去其初次涎。便縮可食。○海味索隱曰。土鐵一名泥螺。出寧波南田者佳。五月梅雨後收製。○會稽志。吐鐵歲時含以沙。沙黑似鐵。至桃花時。鐵始吐盡。見只編云。九月可食。蓋此物產泥塗。以泥爲食。八月至九月不復食泥。吐白脂。晶瑩塗上。比他月出者佳。○福州府志。吐鐵爲海錯上品。色青。外殼亦軟。肉黑如鐵。吐露殼外。人以醃藏糟浸。貨之四方。別有小如菉豆者。桃花時方有名。桃花吐鐵。產泉州者。名曰麥螺。○稽弟觀頤錄云。吐鐵出海寧者。無脂多泥。肉韌不堪食。出寧波者。極大。多脂無泥。肉脆。水洗三次。用甜生白酒浸半日。待鹽味出。換白酒釀。加燒酒。或單用燒酒浸。亦可。必多入白糖。藏久不壞。○柑園小識。吐鐵生海中。微似扁螺。殼薄而白。肉青黑色。大者多脂。以鹽漬之。可以致遠。

甘酸鹹寒。補肝腎。益精髓。明耳目。

按吐鐵色青。得甲木之氣。以斥鹵爲食。不復他食。更得土之餘潤而生脂膏。八九月不食土者。以秋金盛而木氣衰。故吐泥而不食。其能補肝腎益精髓。亦猶脾土得養。化津液上升。而并及耳目也。東璧以蓼螺爲泥螺。味酸入肝。二物形質不同。性味亦異。則強合爲一。誤矣。此物又能潤喉燥生津。予庚申歲二月。每患燥火。入夜喉咽乾燥。舌枯欲裂。服花粉生津藥。多不驗。一日市吐鐵食之。甘至夜咽乾亦愈。可知生津液養脾陰之力大也。

田螺涎

保元方。田螺涎能去水腫。用田螺不揀多少。水漂。加香油一盞於水內。其涎自然吐出。取曬乾爲末。每服不過三分。酒調下。水自小便下。氣自大便出。腫卽消。再服養脾胃藥。全愈。

蛤蜊肉

厚殼紫口而圓者曰蛤蜊。綱目本條下。載其肉性寒。而關高武宗痘疹正宗以爲可發疹。及治痘毒入目。取其汁點之。說爲謬。不知其肉惟性寒。方能解熱藥之毒。正取其與丹石相反爲用耳。

治癰疔痘毒。集聽載一捻金方。治一切癰疽腫毒。初起最驗。兼治疔瘡喉風。蛇傷犬咬。及小兒痘毒。乳香一錢。雄黃三錢。血竭錢半。此三味不必製。沒藥一錢。明礬一錢。硃砂三錢。紅信六錢。麝香六分。蟾

酥一錢。蛤蚧肉二錢。蜈蚣三錢。甲片炒三錢。殭蠶一錢。川烏一錢。牙阜四錢。共爲末。以磁罐貯之。大人一分五釐。小人七釐。強者二分亦可。將葱白三寸搗爛。和藥爲丸。好酒服下。取汗。再服。不必汗。

蜆腊

蜆生沙泥中。江湖溪澗多有。其類不一。有黃蜆。黑蜆。白蜆。金口。玉口等名。黃蜆殼薄。肉肥。黑蜆殼厚。肉薄。又番禺章涌地方產無耳蜆。更甘美異常。凡蛤之屬皆能孕子。而黃蜆化蛾而散卵。白蜆藉霧以生。形則又一異。海南介語。蜆在沙者黃。在泥者黑。蜆老則肉出。小蛾而蜆死。小蛾復散卵水上爲蜆。凡南風霧重。則多白蜆。北風霧則否。蓋白蜆之生生於霧。霧味鹹。鹹爲白蜆所生之本。始生時。白蜆之形如霧。自空而下。若無若有人。見以爲霧也。漁人知之。以爲天雨蜆子也。蜆子旣成。以天暖而肥。寒而瘠。在菱塘沙灣。二郡江水中。積厚至數十百丈。是曰蜆塘。其利頗大。綱目蜆下集解。尙欠詳晰。且其主治下。解蠱。并治不服水土。介語。

蚌淚

蚌中水也。蚌生淡水中。色蒼入肝。故有清熱行溼治雀目夜盲之力。綱目載蚌肉及蚌粉功用。獨遺其殼內所含之水。不知此水乃眞陰天一之精。入藥最廣。特爲補其缺。

清熱安胎。消痰除溼。解酒積丹石藥毒。

初生小兒啞驚。逢原云。用活蚌水磨墨滴入口中。少頃下黑糞而愈。
湯火傷。用生蚌炙水塗之。

西施舌

屠本峻曰。沙蛤土匙也。產吳航。似蛤蜊而長大有舌白色。名西施舌。閩部疏曰。海錯出東四郡者。以西施舌爲第一。蠣房次之。西施舌本名車蛤。以美見醴。產長樂灣中。本草從新。西施舌浙温州有之。海泥中似車螯而扁。常吐肉寸餘。類舌。故名。○敏按臨安館劉芳洲明府署中。刻爲諸城相國胞姪。據言介屬之美。無過西施舌。天下以產諸城黃石瀾海濱者爲第一。此物生沙中。仲冬始有。過正月半即無。取者先以石碌礮磨沙岸。使沙土平實。少頃視沙際見有小穴出泡沫。即知有此物。然後掘取之。綱目海蛤蛤蜊條中獨遺此。今依吳氏從新本補之。

甘鹹平。益精潤臟腑。止煩渴。爲補陰要藥。從新

宦遊筆記。西施舌似車螯而扁。生海泥中。一名沙蛤。長可二寸。常吐肉寸餘。類舌。俗以其甘美故名。

石蚶

俗呼龜脚螻。海濱多有之。古未聞入藥。瀕湖獨增此品。止載其能利小便。不知其別有功用。今依介語

補之。

朱排山柑園小識。龜腳螻形似龜脚。生海中石上。殼如麝蟿。其色紫可食。卽石蚶也。江淹有石蚶賦。下寒滯。消積痞。溼腫脹。虛損人。以米酒同煮食。最補益。介

乾鰕鰕米 對鰕鰕子 鰕爪

鰕生淡水者色青。生鹹水者色白。溪澗中出者殼厚氣腥。以其得土氣薄也。湖澤池沼中者殼薄肉滿。氣不腥。味佳。海中者色白肉粗。味殊劣。入藥以湖澤中者爲第一。以鰕煮曬乾去殼。大者曰鶯爪。小者曰鰕米。又鰕子名曰鰕春。錢塘八月潮盛時。江濱人俟潮退後。率於江沙淺水處撈取鰕子。入市貨賣。黠者以腐渣攪和。須取少許置銅銚中。和鹽炒之。色純紅者乃真。多醃藏貯作來春食品。綱目鰕及海鰕分條明晰。於鰕內集解下。載鰕米。海鰕集解下。載對鰕。皆不立主治。僅云充饌品而已。故悉爲補正其缺。

鰕米

味甘性平。逐風痰。胡潛法製編。有蛤蚧鰕製法。云食之補腎益陽。鰕米一斤。蛤蚧二枚。茴香蜀椒各四兩。並以青鹽化酒炙炒。以木香末一兩和勻。乘熱收新餅中。密封。每服一匙。空心鹽酒嚼下。甚妙。

鶯爪

味甘性平。治疣去癬。食物宜忌

治無乳及乳病。鰕米酒。鮮鰕米一片。取淨肉搗爛。黃酒熱服。少時乳至。再用豬蹄湯飲之。一日幾次。

其乳如泉。

宜吐風痰。不藥良方。連殼鰕米半斤。入葱薑醬煮汁。先吃鰕。後吃汁。緊束肚腹。以雞翎探引取吐。

赤白遊風。不藥良方。鰕米搗碎傅之。

鰕子

鮮者味甘。醜者味鹹甘。皆性溫助陽。通血脈。俱見食物宜忌○敏按粵語云。鰕春。非鰕子也。江中有水鱗。大僅

如豆。其卵散布。取之不窮。然則鰕春之性。當與鰕性有別。陳芝山助陽之說。或未加精核耳。

對鰕

粵志。鱉鰕產鹹水中。大者長五六寸。出水則死。漁人以絲黏網。其深四尺有五寸六寸者。仄立海中。絲柔而輕。鱉鰕至則鬚尾穿胃。弗能脫也。兩兩乾之。為對鰕。鮮者肉肥白而甘。○朱排山柑園小識。海鰕磔鬚鉞鼻。背有斷節。尾有硬鱗。多足而好躍。大於溪河所生。長尺餘。鬚可為簪。土人兩兩乾之。謂之對鰕。以充上饌。○宦遊筆記。淮海產對鰕。長數寸。兩兩乾之。勾結如環。烹以為羹。味鮮美。居人往往以享客。且可致遠。或曰。以雌雄為對。但當懷子。既散之後。雌雄亦無從辨。至其出時。自正月望後始。二三四

月大盛。端陽而後即查不可得。亦物理之不可推者也。

補腎與陽。燒酒浸服。

治痰火後半身不遂。筋骨疼痛。醫學指南。核桃仁。棉花子仁。杜仲炒。巴戟。硃砂。骨碎補。枸杞子。續斷。牛膝。各二兩。大鰕米四兩。兔絲餅四兩。用燒酒二十觔煮服。如年高者。加附子肉桂各一兩。酒服完。將渣曬乾爲細末。蜜丸。每服二錢。酒送下。

鰕醬

粵語。鰕醬以香山所造爲美。曰香山鰕。其出新甯大襟海上下二川者。亦香而細。頭尾與鬚皆紅。白身黑眼。初醃時。每百觔用鹽三觔。封定缸口。候鰕身潰爛。乃加至四十觔鹽。於是味大佳。可以久食。解毒樹蠱。廣有毒樹蠱。其樹無花。結子如牛爛。食之立死。以鰕醬解之。

宦遊筆記。遼東大凌河出鰕醬鰕油。皆甘美。平海又出一種小鰕。名紅毛子。作鰕醬尤佳。今浙江甯波及蘇。皆有鰕醬。味亦佳。

石上螺螄

俗名鬼螺螄。形如海螄而小。秋冬常在牆腳石隙中。夏月在溼地青苔上。取用洗去土。治黃疸。慈航活人書。取石上螺螄半盃。搗如泥。無灰白酒頓熱沖服之。

疔。濟世良方黃風膏治疔瘡及頭面熱毒瘡。雄黃一兩。釘銹。白梅肉各五錢。消風散一兩。夏月加鬼螺螄二十個。共研細末。苦鹽瀹調勻。貯瓷罐內。凡患疔腫毒瘡。用銀鍼挑破毒頂。敷上此藥。以綿紙蓋定。其毒收斂不走。三日後即愈。○黃氏醫抄。取細長小鬼螺螄搗爛。連殼敷患處。露頭出膿。次日即可消。

拔疔。保合堂祕方。鬼螺螄一個。荔枝核三個。煨存性。白梅肉六個。共搗爛成膏。貼之。取出疔根後。用八寶丹收功。

鼻疔。慈航活人書。花盆中青螺二三個。同鹽搗塗。立效。

白火丹。集聽丹有五種。青黃赤白黑黃白易治。黑丹莫救。青丹十日內可治。赤丹亦然。俱不可見燈火。食鹽物。治法。取溪澗中鬼螺螄酒煮食。即消。痕瘡氣悶者。食數次愈。

三漏丸。活人書。治穿屁漏。通腸漏。瓜藤漏。皆溼熱之邪毒。殺蟲退管。穩當之劑。土蜂窩煨。鬼螺螄煨。蟬蛻煨。各七錢。乳香沒藥。川草薺酥炙。陳櫻煨。管仲煨。各五錢。豬懸蹄甲煨十個。刺蝟皮炙一個。雷丸三錢。黃蠟四兩。化開。加麻油六七匙。入藥爲丸。桐子大。每服六七十丸。空心白湯下。通經。周氏家寶。鬼螺螄十四個。研碎。油紙攤貼臍上。縛定週時。此螺生在陰處。

雪蝦蟆

憶舊遊詩話。巴里坤雪山中有之。醫家取作性命根源之藥。軍中人爭買之。一枚價至數十金。且不易得也。○朱退谷曾於吳門見之。云遍身有金線紋。其形絕似蝦蟆。

性大熱。補命門。益丹田。能回已絕之陽。功兼參附。火盛者不可服。

內造伏虎丹。祕方集腋。與陽種子。強腎助神。用真川貝母四兩。須四製。第一次用大附子一個。童便

一湯碗。蒸切細乾。燒酒三湯盃。韭菜汁三湯盃。同入砂鍋。將貝母煮乾。去附子不用。第二次用雪蝦蟆

一兩。無則以大蛤蚧一對代之。用石敲碎。亦用燒酒韭菜汁各三碗。同貝母煮乾。去蛤蚧不用。第三次用

吳茱萸一兩。亦用酒韭菜汁各三盃。同貝母煮乾。去茱萸不用。第四次用公丁香五錢。亦用酒韭菜汁各三

碗。同貝母煮乾。去丁香不用。製完。其貝母爛如泥。置石臼中舂。再入真阿芙蓉一錢。乳製蟾酥三錢。麝

香五分。拌勻作條。焙乾收貯。用時唾津磨搽。

雪裏蝦蟆性熱微辛。壯陽卻冷。痿弱能興。藥性

海參

閩小記云。閩中海參色獨白。類撐以竹箴。大如掌。與膠州遼海所出異。味亦淡劣。入藥以產遼海者良。紅旗街出者更勝於綠旗街。有刺者名刺參。無刺者名光參。入藥用大而有刺者佳。一名海男子。有種

糯二種。而黑膩者尤佳。人以腎爲海。此種生北海鹹水中。色又黑。以滋腎水。求其類也。○百草鏡云。南海泥塗亦產海參。色黃而大。無刺。肉亦硬。不中食品。土人名曰海瓜皮。言其如瓜皮之粗韌也。以其充庖煇豬肉食。可健脾。入滋補陰分藥。必須用遼東產者。亦可熬膏作膠用。○藥鑑。海參出盛京奉天等處者第一。色黑。肉糯。多刺。名遼參。刺參。出廣海者名廣參。色黃。出福建者皮白。肉粳。糙厚無刺。名肥阜參。光參。出浙江甯波者大而軟。無刺。名瓜皮參。品更劣矣。○關東韓子雅言。海參生東海中。大小不一。體滑如蠅。能伸縮。羣居海底。遊行迅疾。取參者用海狗油滴水。海水乃清。見底。見有海參。卽入水取之。此物沾人氣便不動。先以兩手探握。置頸兩傍。再取置肋下。次及兩腿膝下。膝皆可夾取。此物一沾人氣卽不動。然後出水。以刀剝去腸胃。石灰醃去腥涎。令體肉緊密。乾之乃縮至寸許。其實生者大如瓜。長尺許也。若乾者寸外。生時體更大可知。○蓬萊李金什言。海參亦出登州海中。與遼東接壤。所產海參亦佳。彼土人言海參多伏海中大石上。水深不可見。取參者必用海狗油滴入水中。則有一盪散開。清澈見底。然後入水取之。每每遭鯊魚毒害。故其價亦不廉。其體生者身多滑涎。去腸胃。以灰醃去腥涎。乾之出售。每多灰鹹氣也。○福山陳良翰云。海參生北海者佳。爲天下第一。其參潛伏海底。至二三月東風解凍時。多浮出水面。在海塗淺沙中。羣乳入水易取。然腹中出子後。惟有空皮。皮薄體鬆。味不甚美。價亦廉。識者賤之。名曰春皮。四五月則入大海深水抱石而處。取之稍難。體略肥厚。至伏月則

潛伏海中極深處石底。或泥穴中。不易取。其質肥厚。皮刺光澤。味最美。此爲第一名曰伏皮。價頗昂。入藥以此種爲上。若秋冬時。則又蟄入海底。不可得矣。○五雜俎。海參遼東海濱有之。一名海男子。其狀如男子。勢然。淡菜之對也。其性溫補。足敵人參。故名曰海參。○藥性考。海參遼產者佳。吳浙閩粵者肥。大無味。虛火燥結。同木耳切爛。入豬大腸煮食。歌云。海參鹹寒。降火滋腎。通腸潤燥。除勞怯症。遼產小佳。刺密。脛硬。南產厚大。肉味稍遜。

甘溫。食物宜忌。味甘鹹。補腎經。益精髓。消痰涎。攝小便。壯陽療痿。殺瘡蟲。

生百脈血。臨安儒醫盛天然語予云。曾往青山里視一婦人病。眼鼻口耳髮根皆出血。下部亦然。其人已昏不知人。詢其夫得症之由。數日前受驚而起。時天酷暑。大旱。又中燥烈之氣。致血溢奔騰。上下散出。卽不救矣。諸醫皆斂手無策。盛有叔曾於郡中得一方。專治此症。幸尙記憶。遂急喚人取山泉一桶。燒酒一觔。挾婦起坐。裸其小腿。先以燒酒淋之。俾酒從踝下卽滴入水桶內。淋訖。然後將腿置水中。一飯頃。其上下血卽止。婦亦甦。面色如粉。急叫人覓壯年乳婦。以乳哺之。再用海參半觔。切片焙爲末。每次調服三錢。日三服。蓋海參能生百脈之血。若失血過多。必須以此補之。其生血之功。捷於歸芍也。治休息痢。宋春暉云。餘姚有孝子某。其父患休息痢。經年垂危。孝子日走神廟。祈求醫藥。如是月餘。一日途遇老人。教以用海參。每日煎湯服。不數日全愈。

治潰瘍生蛆。慈谿楊靜山云。曾有人患癰破爛。內生蟲蛆。纍纍千百計。治以殺蟲藥無效。一老醫以海參片焙末敷之。蛆皆化黃水。然後以生肌膏貼之。愈。據言。凡一切金創及疽毒破爛。交暑內潰生蛆。惟海參末可療。○不藥良方。夏月潰瘍生蛆。係陰溼所化。海參爲末。搽之。或阜螿飛過爲末。搽之。皆化爲水。

隊隊

游宦餘談。隊隊形如壁蝨。生有定偶。緬甸有之。夷婦有不得於夫者。飼於枕中。則其情自合。故不惜金珠以易。○詹景鳳小辨。同年蘇侍御民傑。按雲南還。語予。雲南有小蟲。名曰隊隊。狀如蝨。出必雌雄隨。人偶得之。以賣富貴家。價至四五金。富貴家貯以銀匣。置枕頭內。則夫妻和好無反目。此則物氣之正人也。

入媚藥。治夫婦不和。

風蛤

職方考。閩邵武府出風蛤。類蝦蟆。蛾帽峯麓之數村。每春初東南風起。則此物滿牀廚間。土人取而購之。

性溫暖。治風及手足拘攣折傷。

飯蒼蠅

謝天士云。蟲中各種俱入藥用。惟飯蠅無用。故本草不載其主治。予精思十年。求其主治不可得。嘉慶庚申。偶在東江晤柴又升先生云。昔在台州患面疔。初起即麻木。癢幾入骨。不可忍。山中倉卒無藥。有教以用飯蠅七個。冰片一二釐。同研爛敷之。即不走黃。如言果癢定。次日漸痊。旬日而愈。

束疔根。不走黃。塗瘡疤。即生髮。
吳秀峯用以塗小兒癩。愈後脫疤不長髮。用此搗塗立生。

塞鼻。治拳毛倒睫。藥性考

蠅蜂

粵志。陽春有蠅蜂。嘗附橄欖樹而生。雖有首足。與木葉無別。須木葉凋落乃得之。土人以置篋筒。每遇蠱毒必鳴。鳴則自呼。又以其聲之清濁卜禍福。佩之辟蠱。

蜜蜂

綱目止用子。云入足陽明太陰。而無用蜂者。赤水元珠有治療癩方用之。為補於後。赤水元珠云。蜜蜂同杏仁葉。蝙蝠蛇蛻。治療癩神效。

苦蜜

出處州。劉基苦齋記。匡山之巔。四面峭壁。風從北來。大率不能甘而善苦。故植物中性之苦者。莫不布族而羅生焉。野蜂巢其間。采花髓作蜜。味亦苦。山中方言謂之黃杜。初食頗難。久則彌覺其甘。按綱目。言蜜有黃連蜜。味苦。不知更有天成自然之苦蜜。故補之。除積熱。已煩渴。解熱痢。暑積。驅風丸藥中用之。更佳。老人腸燥。以一盞和酒食。尤宜。

蜜虎

似蜂而大。首尖身圓。狀如橄欖形。有兩翼。亦如蜂翅。遍身生毛。花斑色。尾有短毫。鋪張如鵝尾。鼻上有鬚二根。喜入花心中。以鬚鉤取花蕊而出。其鬚能伸縮屈曲。如象鼻然。以捲物。登州人呼古路哥子。安徽人呼爲蜜虎。養蜜者最忌之。○臺灣府志。蜂虎蟲屬。狀似燈蛾而大。頭有斑點。入蜜蜂窠則盡食其蜂。○汪杭葦言。蜜虎多喜入鳳仙花叢中。散子於葉背。日久生小灰色蟲。如青蠅。體上有黑白斑暈。食其花葉長大。及老則下根底。變爲蛹。頭粗尾尖。如海螵狀。作老黃色。久則蛹出爲蛾。卽成蜜虎。如此循環。生生不已。

治咽喉腫痛生蛾。陳良翰云。蜜虎登州最多。人捕得裝入布袋。懸掛簷下。陰乾。遇有咽喉腫痛。或生單蛾雙蛾。取一枚。瓦上火焙去其週身絨毛。翦去頭足尾翅。再用火焙爲末。加冰片少許。吹入喉中。卽愈。此神方也。又入壯藥用。

治心痛。鞠子靜方。用囓嚼哥。卽蜜虎。五六月飛行牆壁。山東甚多。取置竹筒中。此物難死。必待二十日。方乾死在筒中。自能撲打。體上絨毛盡落。有患心痛者。及腹痛者。瓦焙研末。酒服一二枚卽止。諸城王遜亭云。古路哥有雌雄。雄者身瘦小。雌者腹大。入藥用雄者。以線穿陰乾。可合房術藥用。其老僕王三云。此蟲山東極多。能食蜂。養蜂家最忌之。其蟲口中有黑絲。常捲若入蜂窩。卽吐直其絲。以刺蜂。蜂卽斃。然後食之。蓋蜂鍼在尾。而此蟲之鍼在首。想亦有毒。鍼在尾者陰。在首者陽。以陽尅陰。故蜂爲所刺。無不立斃。其蟲於初秋散子。在豆莢中。則爲豆蟲。如青蠅狀。食豆。在黍稷上。則爲朝天猴。如刺螫狀。後黍葉自下食而上。最爲莊田之患。然可食。莊人候日未出時。此蟲着露體重。翅輕不能飛。易於撲取。人捕得。去其翅。羣置瓦罐內。令其自相撲擲。其體上細毛自落。然後以油鹽椒薑炒食之。味勝蠶蛹。但其體上毛不可着人眼。着眼卽損目。

蟪皮舌

此乃癩蝦蟆皮也。能拔大毒外出。又能回毒。功效不可殫述。綱目蟪條條主治。皆全用。無單用其皮者。惟附方引孫真人千金方中治腸頭推出。用蟪皮一片。燒熏并傅。僅錄其些小功用。反遺其大者。故特著明補之。

貼大毒。能拔毒收毒。○黃汝良行篋檢祕方。載指頭紅腫生毒。用活蟪一隻。生剝皮。將皮外面向患處。

包好。明日其毒一齊拔出。或發背對口等症。毒忽收內。如又起再貼。切記不可將其皮裏面着肉。即咬牢難揭。凡痘疹後回毒。亦可用此治。

瘰癧斂口膏藥。○治瘰癧膿已盡。腫已平。瘡口未斂。以此貼之。○蝦蟆皮二個。要活剝者。鼠皮二張。蛇蛻二條。蜂房大者一個。右四味俱煨灰。將水膠一兩。用井花水一酒鍾。化開後。加蜜一兩。蜈蚣煎麻油一小鍾。攪勻。前四味灰臨起。入麝香一分。將絹攤來。不溼爲度。

靈祕丹藥云。凡患癰疽瘡毒者。用土中大蝦蟆一個。剝全身癩皮。蓋貼瘡口。於蟆皮上用鍼將皮刺數孔。以出毒氣。自覺安靜。且能爬住瘡口。不令長大。又可免蜈蚣聞氣來侵。神妙神妙。

舌

拔疔。外科全書。夏月患疔。用蝦蟆舌一個。研爛。蟾肚皮蓋貼。其根自出。

土檳榔

粵西叢載。狀如檳榔。在孔穴間。得之新者猶軟。相傳蟾蜍矢也。不常有之。

主治惡瘡。

蠟螫黃

物理小識。余岸少養蜘蛛。以小者飼大者。久之以硃砂飼大者。數十日滿身皆赤。其腹有黃。入藥用。去

醫開啓。

藥蜂鍼

物理小識。取黃蜂尾鍼。合硫煉。加冰磨爲藥。置瘡癩之頭。以火點之。灸瘡上。本草未載此法。須先以濕紙覆瘡。先乾者。卽瘡頭灸之。

驢龍

物理小識。驢腹中虻也。方體方目。有足。可以小使。入房術用。與鼻厭黑兜蟲。瓦雀卵衛子。莖墮蛤蚧。吉吊脂同功。

龍蝨

閩小記云。龍蝨形如小蟬。又似金龜而黑色。每八月十三至十五日。飛墮漳州海口。餘日絕無。除面上黝黝赤氣。食之良。兼美男女顏色。活血。

物理小識。智少隨老父福甯。曾見龍蝨。後在姚有僕署中食此。云自濠鏡來。則他處亦出此。何漳獨異也。蓋是甲蟲。大如指頂。甲下有翅。熏乾油潤。去甲翅啖。似火魚之變味。

洋蟲

一名九龍蟲。出外洋。明末年始傳入中國。或云出大西洋。康熙初年始有此物。形如米蟻子。初生蟻如

小蠶久則變黑如豆瓣。有雌雄。今人用竹筒置穀花飼之。性極畏寒。天冷須藏之懷袖中。夜則置衾褥間。否則凍死。得人氣則生。極善衍。有飼以茯苓屑紅花交桂末者。則色紅而光澤可愛。入藥尤良。

性溫。行血分。煖脾胃。和五臟。健筋骨。去溼。搽風。壯陽道。治怯弱。○附治各症兼引。○老人不寐。茯苓引。

○小兒夜啼。硃砂引。○女童夜溺。枸杞引。○少婦陰寒。附子引。○癰疽發背。沈香末引。○舌燥作渴。麥

冬引。○眼目閉痛。甘草引。○耳鳴耳聾。當歸引。○感冒風寒。防風引。○中溼瘧毒。蒼朮引。○跌打損傷。

全蠍引。○酒醉傷人。葛花引。○怒氣傷人。沈香引。○絞腸痧痛。青蒿引。以上十四症。俱用蟲十四個。好

陳酒沖服。

治刀斧傷。用蟲搗敷即愈。○瘋癱。用蟲九個。木香湯送。○打傷。用九個。黑棗薄荷湯送。○黃疸痧。用十

二個。薄荷燈心湯送。○哮喘。用九個。薄荷湯送。○眼脹。用七個。薄荷湯送。○傷食。用九個。薑湯送。○水

毒。用九個。薄荷燈心湯送。○氣痛。用九個。檳榔湯送。○中風不語。用二十四個。薄荷燈心湯送。○小肚

痛。用九個。薑湯送。○急慢驚風。用九個。薄荷杏仁湯送。○喉痛。用二十四個。薄荷銀花湯送。○脾風。用

二十四個。酒送。○胃痛心疼。用七個。木香末沖酒服。○無名腫毒。用十六個。陳酒送。五更服。○痘疹。用

七個。米湯沖服。○膨脹。用二十四個。薄荷陳皮湯送。○嘔吐痰火。用七個。淡薑湯送。○乍寒乍熱。口乾

舌燥。用七個。陳皮半夏煎酒沖服。○五勞七傷。白茯苓三錢。用七個。搗爛。每日空心酒沖服。以復元爲

止。○瘡後寒熱不調。用七個。以未發之先沖酒服。三次卽止。○夢遺白濁血淋白帶。以芡實三錢微炒。研末。白果五枚。去皮心。先將藥搗爛。再加淫羊藿二錢。去邊。廣皮二錢。韭子三錢。同煎。用蟲七個。酒沖服。○赤白帶及產後等症。以香附。炙芪。烏鯛骨。各八分。酒煎。用蟲七個。沖服卽愈。○氣急咳嗽。以川貝母二錢。牛蒡子。當歸。陳皮。淮牛膝。各八分。水煎服。如婦人。去牛蒡子。加益母。炒香附。各三錢。水煎沖服。三次。神效。○腰痛。以破故紙二錢。雄豬腰一對。竹刀剖開去衣。將破故紙內入。酒蒸熟爛。加桔梗二錢。爲末。用七個。搗沖酒服。神效。○痢疾。白痢用紅糖。紅痢用白糖。陳酒沖蟲七個服。○水瀉不止。豬苓。白朮。各一錢。陳酒煎沖七個服之。忌油膩魚腥等物。○偏正頭風。以川芎。防風。荆芥。蟬蛻。各一錢。細辛。八分。陳酒煎沖七個服之。忌生冷葱韭等物。○骨節酸痛。胃寒等症。以川芎。白朮。各八分。酒煎沖蟲七個服。三次卽愈。○吐血不止。喘息燥熱等症。以古墨研濃。貝母三分。研末。蟲七個。陳酒沖服。七次愈。○小便不通。以燈心。車前。各七根。蟲七個。陳酒沖服。○飽悶成痞。肚腹腫脹。用酒沖七個服。三次。○翻胃膈食。以生薑七片。裝布袋內。入糞坑。浸七日。取起。清水洗淨埋土中。一層薑。一層土。七日取起。用陰陽瓦焙乾研末。每次一分。用蟲七個沖酒服。三次愈。○吐血。以藕節。茅草根。洗淨酒煎。用人乳酒各半。沖七個服。三次愈。○筋骨疼痛。以核桃肉三錢。陳酒沖蟲七個服。○勞嗽。以牛骨髓三錢。核桃肉三錢。共爲末。入蟲七個。再搗爲丸。每九三錢。每日五更銜化。一九九日見效。○痿症。蛇牀子三錢。煎湯沖蟲九個。

服三次即愈。久服延年種子。○經水不調。以香附、陳皮、益母草、當歸、元胡索各八分。水煎和酒沖蟲七個。服之即愈。久遠者連服數次。其效如神。○產後崩症。以香附、白芍、益母草、當歸、陳皮、茯苓、白果、蘇木各八分。酒沖蟲七個。服三次即愈。

藥性考。洋蟲色黑。形如壁蝨。活吞數枚。止血勞怯。

養。如蠶砂狀。金御乘云。研末敷金刃傷。立結痂止血。最效。

蟋蟀

綱目於竈馬下附促織。僅列其名。云古方未用。附此以俟考。

性通利。治小便閉。○藥性考。蟋蟀辛鹹溫。能發痘。勝於桑蟲。

治跌撲傷小肚。尿閉不出。○養素園集驗方。用蟋蟀一枚。煎服。立驗。

小兒遺尿。慈航活人書。取全蟋蟀一個。焙末。滾水下。照歲服。如兒十一歲者。每次服一個。服至十一個為止。

個為止。

治男婦小水不通。痛脹不止。○集聽。用蟋蟀一個。陰陽瓦焙乾為末。白滾湯下。小兒半個即通。

催生。趙際昌云。鬪蟲之戲。蟋蟀最盛。其百戰百勝者。俗呼為將軍。其蟲至冬必死。勿輕棄去。留以救

產厄。神驗。凡產不下。用乾者一枚。煎湯服即生。并無橫倒之患。許景尼云。鬪蟋蟀家冬則封盆。待其自死。成對乾之。留為產科痘科用。須成對。

藥者入

治水蠱。朱煥齋任城日鈔云。促織可治水蠱。昔有人患水蠱。百治不效。一日偶飲開水。水中先有促織一對在內。其人倉卒一併吞之。越數日。其病漸消。方知促織可治此症。後傳此方數人。無不驗者。一對不足。連服二三對自效。

蚱蜢

綱目蟲蠹。僅引拾遺佩藥一條。並無主治。

按蚱蜢初夏大火始有。得秋金之氣而繁。性竄烈。能開關透竅。一種灰色而小者。名土礫。不入藥用。大而青黃色者入藥。有尖頭方頭二種。救生苦海五虎丹中用之。治暴疾氣閉。大抵取其竄捷之功爲引也。

味辛平微毒。性竄而不守。治咳嗽驚風。破傷。療折損凍瘡。癰疹不出。

治鷓鴣瘡。王氏效方。鷓鴣瘡。其症咳嗽不已。連作數十聲。類哮喘。非哮喘。小兒多患此。取穀田內蚱蜢十個。煎湯服。三劑愈。○百草鏡云。鷓鴣鬱小兒有之。其症如物哽咽。欲吐難出之狀。久之出痰少許。日久必死。治以乾蚱蜢煎湯服。

破傷風。救生苦海。治破傷風。用霜降後稻田內收方頭灰色蚱蜢。同穀裝入布袋內。曬乾。勿令受溼。

致生蟲蛀壞常曬爲要。遇此症用十數個瓦上煨存性酒下立愈。

痧脹。養素園集驗方用蚱蟓五六個煎湯溫服。

凍瘡。養素園待驗方用方頭黃色蚱蟓風乾煨研香油和搽搽亦可。

小兒驚風。李氏表方用蚱蟓不拘多少煨存性砂糖和服立愈。○一方治急慢驚量大小人多寡用

之煎服。○王立人易簡方用螞蟥焙乾爲末薑湯調服少許立愈。

急慢驚風。百草鏡霜降後稻田中取方頭黃身蚱蟓不拘多少與穀共入布袋內風乾常曬勿令受

溼蟲蛀。遇此症用十個或七個加釣籐鈎薄荷葉各一撮煎湯瀉下渣再煎服。重者三劑愈。李東來常

施此藥。據云山東王蟲尤妙。每服只須二個。○王站柱不藥良方急慢驚風先用白鳳仙花根汁半盞

服下即用方頭蚱蟓焙乾研末滾水調下即愈。

產後冒風。王良生救急方乾蚱蟓數十個瓦上煨存性好酒調服。

灌東子

今名跳蝦蟲。生溼土中。形如跳蚤。而大逾倍。色如蝦青。腹下多足如蝦。善跳躍。兒童以器置於水中。捕得輒投入。便不能躍出。秋時鬪蟋蟀家多畜之。凡蚤遇鬪傷及虛羸。必每日以此飼之。云能益體力也。其性最竄捷。能達透經絡。皮裏膜外。無不行到。

治風痺去溼腫。

燈蛾

今古方無入藥者。祝氏效方有治痔管法。用蛻螂一個。同撲燈蛾十個。放罐內一宿。加麝香一錢。陰乾爲末。吹入管內。自能出水。水乾卽愈。

蠅虎

古今註。蠅虎。蠅狐也。形似蜘蛛。而色灰白。善捕蠅。一名蠅虎子。潛確居類書。一名蠅豹。身黑。嘴有雙肉爪。攫蠅而食。兩目似虎。炯然生光。易曰。震來虩虩。雅俗稽言曰。虩。蠅虎也。常若多懼。故取象焉。○按蠅虎亦蜘蛛之屬。腹亦有絲。而不能結網。惟居牆壁。捕蠅食。其體灰褐色。身上有微毛。嘴有兩鉗。翁吸頻動。跳躍如虎。亦有純白色。兩目朱色。絕可愛。兒童捕置器中。捉蠅以飼之。視其搏躍爲戲。此物未聞入藥。故瀕湖綱目。壁錢。螿。蟻。皆列入。而此獨遺之。今徐氏驗方云。其性頻動而不靜。取以調血脈。治跌打。因錄其方以備品云。

治跌打損傷。徐順之驗方。取蠅虎數個。研爛。好酒下。

竈馬

今之竈馬。俗呼賊郎。又作蟬螂。綱目所謂蜚蠊也。綱目蟲部亦有竈馬。形如蟋蟀。今人名竈壁雞。又與

蟪螂別。瀕湖於蜚蠊條下無治疔疔諸法。今備錄之。

拔疔。集聽竈上蟪螂不拘多少。搗爛敷之。其疔根自出。○卿子妙方。蟪螂蟲其黃紫色甚臭者。取數個。用患者自吐唾沫幾口。研爛敷瘡四圍。頂上露孔。使毒氣從孔出。一日愈矣。○邵仲達方。治疔瘡。取蟪螂大者七個。去頭足殼。將砂糖少許同搗爛。敷疔四圍。露出頭。晝夜即愈。藥性考。竈馬拔刺。搗塗有效。

解諸疔毒。傳信方。竈上紅蟪螂五個。研爛。熱酒沖服。取汗爲度。

紅絲疔。傳信方。蟪螂一個。去頭。和青糖搗爛。搽上。即效。

白火丹。葉氏方。用蟪螂瓦上焙乾爲末。白滾湯服。一二個立效。兼治疔瘡。

對口。活人書。桂州荔枝肉二三枚。蟪螂二三個。同搗如泥敷。露頭。數次即散。

無名腫毒。慈航活人書。蟪螂十個。鹽一撮。同搗爛敷之。留頭。

治諸毒惡瘡。嚴氏家用方。蟪螂搗石灰敷之。

痧症。周廷園方。活蟪螂蟲二三個。用紙包。竈上焙乾。研細。冷水和灌。或吐或瀉。即愈。

吐血。徐雲生方。取蟪螂五個。止去翅淨。在火盆淨瓦上焙乾。爲末。紙包安土上。存性。用溼腐皮包一

個。滾湯吞下。每日如此。吞五日。不可間斷。

氣虛中滿。醫宗彙編以蟬螂七個爲末。用地枯饅煎湯送。數服愈。
臃脹。家寶方。蟬螂一個。焙乾。蘿蔔子一撮。共炒爲末。好酒吞十日。全愈。
一切兒疳。集聽云。凡小兒患疳疾。不拘何等疳。垂死者皆效。取竈上蟬螂焙乾。與之食。患者但聞其
香。不知有腥臭之氣。猶中蠱者。食豆無辛。含礬不苦也。有患此症。治之無不效。只須食一二次。即愈。愈
後體更肥白。且屢試屢驗。○百草鏡云。兒疳初起。用蟬螂去頭足翅。新瓦焙乾。常與食之。百個病愈。

水馬

綱目名水黽。於主治下云。令人不渴。殺雞犬。不知有治痔之功。更爲補之。按水馬四五月內出浮水面。
身硬脚長。池沼中甚多。性喜食蠅。予在甌親見小兒捕之嬉戲。用釣竿繫繩。繩頭穿一蠅。擲水面。誘之
卽來。以四足抱蠅不放。因而獲之。

治痔。東醫寶鑑有水馬散。夏月三伏內。於止水中採婆子。一名水馬兒。高脚水面跳走是也。採取三
十個。用三個紙包。每包十個。於背陰處懸掛陰乾。每包作一服。研爛。空心酒調下。良久乃吃飯。三日連
三服。十日內效。久痔膿血者。二三十服。絕根。

壁蝨

俗呼臭蟲。以其氣腥穢觸鼻。故名。行必南向。爲南方穢溼所產。今江南北人家多有之。稍不潔卽生此

物亦有遠行於旅店驛舍中帶入衣被歸家卽生極易蕃育一日夜生九十九子與蠶斯同其形儼如半粒豌豆老則黑次則棗皮紅初生者色黃而細小其子如蟻子白色卵生與蝨同初生便嚙人生一二日卽能褻殼愈褻愈大漸漸而老色轉紅而黑老者嚙人愈毒多藏藁薦中及壁內或桌櫪牀縫間其身扁而易入至冬則入蟄多藏泥沙山穴中及古樹根下交春皆啓蟄而出入人家壁木內藏性畏蟻山中有一種紅蟻喜食之故近山及山寺僧舍此物甚少有帶入者輒爲山蟻銜去其嚙人尤狡黠不與蚤蝨同昔人謂暑時有五大害乃蠅蚊蝨蚤臭蟲也然蠅蚊迭爲晝夜蠅一揮拂蚊可設帳蝨則暑時裸浴生者絕少蚤則因土溼而生夏時土乾亦不甚患惟此最可憎無分晝夜潛身牀蓐及几闌閒善識人氣伺人一徙倚卽嚙其膏血腫塊纍纍如貫珠然愈爬搔則愈大痛癢難禁小兒肉嫩尤遭其苦輒虯號不已或云其物口有白氣一二寸嚙人能隔蓆穿膚吮血索之不可得在牀褥輒夜聚曉散率其醜類待人倦睡而恣噉焉古方辟除之法甚多無一驗者惟蓆下鋪零陵香草及樟腦可稍殺其勢然隔一二日藥氣滅則橫虐愈甚惟用異揚州安息香塗上好銀硃爲衣燃牀下周圍以蓆護令烟薰透則壁蝨盡死子亦不能復生第香氣惡烈觸鼻令頭痛須熏後停一二日方可臥宿貧家何能辦理古云南方淫氣生短狐此亦淫溼腥穢之氣所感而生凡勤潔之家鮮有之閩人云此蟲滾水泡死者能復生惟以冷水浸死不能復生山堂肆考壁蝨身扁而臭不能跳善齧人名曰莖蚤又名扁蝨

五雜俎。壁蝨。閩人謂之木蝨。多杉木所生。治者以蕎麥藁燒灰水淋之。江南壁蝨多生水中。惟延綏生土中。遍地皆是。入夜則緣牀入幙。嚙人遍體成瘡。雖徙至廣廈。懸牀空中。亦自空飛至。事物紺珠。壁蝨一名壁駝。扁小褐色。殭而嚙人。六書故。扁蝨着牛馬食其血。產薦蓐間。差小。嚙人膚。俗謂薦蠅。又名菱蝨。今人訛爲壁矣。是古人雖有其名。從無入藥者。綱目并不列其品。近來治療有用此者。故錄之。見天下無藥物也。

氣腥。味微鹹。性平。在土者有毒。凡用壁蝨。須置溫水中。令其臭氣洩盡。入藥。

治咽膈。集聽方。用壁蝨十枚。滴花燒酒浸服。

飯館。百草鏡云。用臭蟲研塗。

膿瘡臭爛。西亭藥鏡。用臭蟲同水龍骨搗和。麻油調敷。出盡黃水。立愈。

眼生偷鍼。臭蟲血點之。即散。

海上方。有用壁蝨治小兒驚風。用壁蝨於淨水中漂去臭氣。焙乾入藥。

拔疔。楊氏經驗方。臭蟲同米飯搗勻。搽疔上。能立拔疔根外出。

鯀魚刺戳。醫宗彙編。凹谷茴香葉。使鹽花燒酒搗糊瘡上。如口久爛。用臭蟲剗去頭傳之。

叩頭蟲

形黑如大豆。以手按其身。其頭能俯屈。剝剝有聲。出南方者小而力微。北土者大而力厚。小兒捕之爲戲。入藥用大者。試法。取蟲置桌。翻其背令仰。少頃便跳起三四寸。有跳起過五六寸及尺許者。力更大。網目以之附。蟲蠶後。亦不言主治之功。此蟲北人謂之跳百丈。

治腰腳無力。與山螞蟻子並入壯藥用。百草鏡云。外用可絕瘡。叩頭蟲一個。安眉心。蟲頭向上。膏藥蓋住。過時自愈。

大九丸。彙集。此馮嘉寶方。蒺藜酒洗炒。去酒刺。白茯苓。白芍。菴蓉酒洗。杜仲酥油炒。菟絲子酒煮。續斷。當歸。覆盆子。威靈仙。破故紙。薏苡仁。各一兩五錢。牛膝酒洗。無名異。自然銅醋煨。七次。各一兩。乳香。沒藥。硃砂。飛過。血竭。青鹽。各五錢。天雄二兩。童便浸五日。象鱉一個。去頭足翅。如無。用土鱉代之。跳百丈十個。去足。虎骨二兩。酥油炙。上藥俱爲細末。煉蜜丸。二錢半重。早晚鹽湯或黃酒送下。少時用力行功。散於四肢。

沙雞母

物理小識。土鼈是象房屎中所生。或以旋土成窩者充之。不知旋土窩者乃沙雞母。非土鼈也。

同金墨磨塗口瘡。

禾蟲

閩廣浙沿海濱多有之。形如蚯蚓。閩人以蒸蛋食。或作膏食。餉客爲饈。云食之補脾健胃。廣志。夏暑雨。禾中蒸鬱而生蟲。或稻根腐而生蟲。稻根色黃。蟲乃稻根所化。故色亦黃。大者如筋許。長至丈。節節有口。生青熟紅黃。霜降前禾熟則蟲亦熟。以初二及十五六乘大潮斷節而出。浮游田上。網取之。得醋則白漿自出。以白米泔濾過。蒸爲膏。甘美益人。得稻之精華者也。其醃爲脯作醢醬。則貧者之食。○吳震方嶺南雜記。禾蟲絕類。螞蝗。青黃色。狀絕可惡厭。潮所淹沒。淡水田禾根內出。數尺長至丈餘。寸寸斷皆活。能游泳。午後即敗不可食。滴鹽醋一小盃。裂出白漿。蒸雞鴨蛋牛乳最鮮。○粵錄。禾蟲狀如蠶。長一二寸。無種類。夏秋閒早晚稻將熟。禾蟲自稻根出。潮長浸田。因乘潮入海。日浮夜沈。浮則水面皆繁。采者以巨口挾尾之網繫於杙。逆流迎之。網尻有囊。重則傾瀉於舟。補脾胃。生血利溼。行小便。瘡瘍勿食。能作醢。

茄稗蟲

此蟲生茄稗內梗上。有蛙眼。內卽有蟲。其蟲帶綠色黑嘴者是。

治男女童癆。劉羽儀經驗方云。男女童癆。其症不必如大人咳嗽吐血洩精。只是身體瘦弱。皮毛焦枯。肌膚微熱。急宜早治。用野茄稗內蟲。取數十條。私和在食物之內。與病者吃。數次卽愈。

櫻蟲

滇南各甸土司記。椶蟲產騰越州外各土司中。穴居椶櫚木中。食其根脂汁。狀如海參。粗如臂。色黑。土人以爲珍饌。土司餉貴客。必向各峒丁索取此蟲作供。連椶木數尺解送。剖木取之。作羹。味絕鮮美。肉亦堅韌而腴。絕似遼東海參。云食之增髓益血。尤治帶下。彼土婦人無患帶者。以食此蟲也。

蕉姑

漳泉種蔗田中。出一種蟲。如蠶。食蔗根。名蕉姑。土人食之。味甚甘美。

發痘行漿。托癰清毒。化痰醒酒。和中利小便。

桃絲竹蠹

此桃絲竹上所生竹蠹。李氏草秘云。罨疔瘡痘疔最妙。

牙阜樹蟲

救生苦海云。此樹大如錢。粗者方得有蟲。但取之有法。以利刀速砍其樹。遲則蟲卽下行入根。不可得。其蟲子時下行。過午則上行。須午後伐取。

治一切腫毒初起。其蟲有大小。大者用一條。小者用二條。證輕者用一條。證重者用二條。或三條。搗爛酒調服。已膿者不治。

黃麻梗蟲

須秋時先收取。以葱管藏之。○百草鏡。麻蟲生麻梗近根上一節中。二月化爲飛蟲。穿穴去。山左人每於刈麻時。將蟲連麻梗寸斷。布袋裝盛。帶至南方。貨與養禽鳥家。飼畫眉百翎之用。云其蟲性暖。去風行血。鳥食之可以禦寒。蟲形如小蠶。細長明淨。入藥須連麻梗蒸焙用。如用生者。須以葱藏。治疗。程林卽得方。用黃麻梗內蟲。以葱葉包貯。挂風頭令乾。將疔瘡挑破。以麻蟲少許。入於所挑之處。瘡卽化爲水而愈。○陶節菴治疗蛻螂膏。用蛻螂三個。肚白者佳。黃麻蟲十個。二味搗勻。撥破患處貼之。如患在手足。有紅絲上臂。絲盡處。將鍼挑斷出血。仍用前藥。毒重者更服敗毒藥。○葉氏方。用黃麻梗中蟲一條。焙乾爲末。酒調服下。疔化爲水。

芝麻蟲

生芝麻梗中。三更輒從下而上。至頂食露。五更輒下。取之以夜。性熱助陽。入幃箔用。去痔管。用脂麻蟲。如蠶綠色。取焙乾爲末。開水送下。每日一錢。服七日。其管自出。

桐蛀

李氏草秘。生桐油樹中。卽木蠹也。最治惡腫毒。取七根焙末。沖酒服。卽愈。

牛膝蛀

李氏草秘。蟲生牛膝草節中。香油浸製。
治指頭毒。晝夜痛不可忍者。敷上即愈。

山螞蟻窩子。

朱樂只云。山草中有之。係草樹之葉結成。大者如斗。冬月取之。蟻在土而不在窠矣。○救生苦海。山螞蟻窠。深山內大樹根中有之。十一月或正月草枯時。尋取有二種。一種大如升斗。色黃柔軟。形如乾黃爛葉。又若柔皮紙。窠皮上層層有刷紋成暈。若虎頭。俗呼虎頭螞蟻窠。不知何物所造。惟內中多筋。其筋係松毛草莖之類也。抽去內中筋及泥土用之。一種色白。係是泥土所爲。其形有類松皮。研入藥。久不收口爛瘡。貼之即收口。

治刀傷出血。救生苦海。用山螞蟻窠。抽去內中筋及泥土。包裹傷處。再用布縛。即血止收口。沈氏傳云。冬月用之。有驗如神。

禿瘡。周氏傳方。山螞蟻窠中土。鹽酒調敷。數日即愈。

生皮結靨。○凡瘡膿腐已盡。新肉已生。不肯收口。用山螞蟻搓去草泥等物。扯開貼之。即結靨生肉。○張聖來云。山螞蟻生深山窮谷中。頭如虎。有牙鉗甚銛利。有翼能飛。凡虎食人過飽則醉。醉後即吐。蟻食其唾餘。則形變虎頭而生翼。即以其所吐涎嚼樹汁草漿。和山土釀如泥。緣樹枝成窠。其窠重疊如蜂

窩內有臺。外則黃白紋。大如斗。掛樹枝上。山人見其窠。以烟熏去。蟻採之入藥。

窠敷金刃傷。止血定痛。生肌收口。

窠中臺。治發背。百鳥朝王毒。

窠上緣枝。治蛙脊。

子

白如糶米。俗呼狀元子。大力丸用之。然微有毒。食之作眼。綱目蟻下僅存其名。無主治。近行伍中營醫

以此合壯藥。頗效。

益氣力。澤顏色。

敏按蟻有各種。入藥用窠。則取山蟻窠。蓋山蟻形大。在草中或樹根內作窠。其子粗如粒米。入藥力太

猛。用子以黃色細蟻所生子為佳。蓋此蟻力最大。能舉等身鐵。故人食其子。亦力大也。○宦遊筆記。廣

人美味有蟻子醬。於山閒收蟻卵。淘淨滓垢。鹵以為醬。詫為珍品。則其子亦無毒矣。

蛆窠

王安采藥錄。大窖坑內有蛆蟲窠。如白繭子樣。挂在蓬棵內者。取來淨去泥灰。曬燥焙用。

治臙瘡疔蛙。一切蟲蛙爛孔。外科收口藥用。

疔瘡蛙梗。柴氏獨妙方。用糞坑內蛆蟲窠。在蓬塵內者。形如白繭子而小。取來不拘多少。放在罐中。焙燥爲細末。貯小口瓶內。瓶口以細絲紗包紮覆轉。輕輕敲彈少許藥末於瘡口內。如有小蛙眼藥末不能入。用麥草稈吹藥入細孔內。每日三五次。其蛙爛者。肉孔自能長平。神效無比。

死人蛀蟲

人好

此檢尸場中棺內死蛆也。唐怡士云。凡人死後魂魄散盡。其生氣有未盡者。肉爛後悉腐而爲蛆。攢嚼筋骨。久之蛆亦隨死。故強死者。棺中無不有黑蛆。凡用須問件作於尸場收之。

治大麻瘋癩疾。赤水元珠。治大麻瘋癩疾秘方。用死人蛆蟲。洗淨。鋼片上焙乾爲末。每用一二錢。阜角刺煎濃湯調下。若腫而有疙瘩者。乃陽明經溼熱壅盛。先以防風通聖散服二三帖。然後再服此藥。有補助。以阜鹹爲引。故能達表。能久服之。極有神效。非泛常草木可比也。○醫學指南。有治大麻瘋秘方。用人蛆一升。細布袋盛之。放在急水內流之。乾淨取起。以麻黃煎湯。將蛆連布袋浸之。良久取起。曬乾。再用甘草煎湯浸曬乾。又用苦參煎湯浸曬乾。又用童便浸曬乾。又用葱薑煎湯。投蛆入內。不必取起。就放鍋內煮乾。焙爲末。每一兩加麝二錢。蟾酥三錢。共爲一處。入瓷器內。每服一錢。石薜花煎湯下。花卽山中石上生白薜如錢樣。用蒼耳草煎湯洗浴。然後服藥。七日見效。體壯者一日一服。體弱者二日一服。卽愈。

治勞瘵。能驅尸蟲。以賊攻賊之義。跌躓。絕邪瘡。尸蛀。石疣。驅癆蟲。吳秀峯虛勞論云。癆有蟲。爲溼鬱所化。在外爲蝨。在臟腑爲蟲。用死人身上蛆蟲。製令潔淨。焙乾和藥服之。則癆蟲化爲水下。

人蚘

陳所安今見錄。近有一種不肖奸徒。輒於攢殯左右。勾賄寄戶。寄戶者。以產賃人厝棺。杭人呼爲開寄場。每有七日內之出厝棺木。到場卽被昏夜啓棺。竊取人蚘。貨與方術家及走醫。爲夾棍藥。并治跌打。絕邪瘡等用。予初不解人蚘爲何物。後詢唐博士與宜。博士家有老僕來升。曾見之。云凡人死七日外。遍身肌肉腐如漿。心氣散漫。蒸爲人蚘。形如九龍蟲而小。色赤如血。光滑異常。男女皆有。入藥男棺者佳。其取之法。用大鑽於棺和頭前鑽一大孔。以香精塗孔外。內蟲聞糟氣。皆從孔出。其蟲雖有甲而不能飛。用手搦投入小瓶中。燒酒浸。陰陽瓦上焙乾用。

按人死血肉腐爲蟲。或爲蛆。或爲蚘。形各不一。或云二物並生。或云一物先後互化。又有云。貧窮者多蛆。少蚘。富厚者多蚘。少蛆。第勿深考。並存其說。以俟博雅君子折衷焉。

虹蟲

物理小識。虹爲淫氣。方士於東海見虹處掘地得蟲。紅色。得之入術用。

本草綱目 三十 拾遺卷十 蟲部

爛藥益幃宿同繁稍花功力更大。

本草綱目拾遺跋

本草綱目拾遺十卷。乾隆閒吾杭趙恕軒先生所著利濟十二種之一也。十二種者。醫林集腋。養素園傳。信方。祝由錄驗。囊露集。本草話。申雅。花藥小名錄。升降祕要。攝生閒覽。藥性元解。奇藥備考。及是編也。全目及總序。備載於是編卷首。鮑氏彙刻書目。亦載十二種之目。但有傳鈔本。皆未刻。至嘉慶末年。傳鈔本則止。有是編與申雅二種。其十種已不傳。且是編每藥品下。論列各條。顛倒錯亂。眉目不晰。余因訪知杭醫連翁楚珍。藏其稿本。假閱。乃先生手輯。未繕清本者。初稿紙短。續補之條。皆黏於上方。黏條殆滿。而未注所排序次。故傳鈔錯亂耳。余乃按其體例。以稿本校正。排比傳鈔本之誤。然後各條朗若列眉。還其舊觀。原稿本仍歸返連翁。迨庚申寇亂。翁家原稿本亡失。申雅亦佚。余編繕此本。幸攜帶僅存。得存先生遺著之一。亦足寶重矣。余又聞雍乾閒杭人汪君懷著有草藥綱目一書。哀然大部。與瀕湖綱目等。其稿未傳鈔。訪諸其族人。皆未見。想已湮沒失傳。恨未得其書。與李氏趙氏鼎峙。爲本草之大全也。惜哉。同治甲子秋日。錢唐張應昌仲甫氏撰。

奇經八脈考引

奇經八脈考者。李君瀕湖所撰輯以活人者也。經有正有奇。獨考奇者。奇經人所略。故致詳焉。并病原治法。靡不條具。若指諸掌。豈惟醫學有賴。玄脩之士。亦因以見身中造化真機矣。用心之勤如此。何其仁哉。瀕湖世儒。兼以醫鳴。一門父子兄弟。富有著述。此特見一斑耳。問不佞。嘗推其直諒多聞之益。因僭識簡端。以告後之君子。

明萬歷丁丑小暑日。同里日岩顧問頓首書。

重刻脈學奇經八脈序

余奉中丞夏公教。既刻本草綱目矣。臨川令袁君。與李君時珍鄉人也。復取其脈學與奇經八脈考示余。曰。李君平生學力盡在此。幸併刻之爲全書。余念古良醫治疾。未有不先診脈者。自軒岐已然。辨人鬼。別男女。特其粗爾。微茫呼吸之間。而生死輕重係焉。如濟北才人。顏色不變。而在死法中。其脈病也。故曰。無數者同之。有數者異之。苟不明乎脈之法。則所同者多矣。脈學者。專辨脈訣之誤也。今之醫者。無不誦脈訣。而李君謂非叔和著。特條列而正之。然非李君之言也。宋陳無擇嘗斥爲高陽生作矣。亦非無擇之言也。朱晦翁嘗譏其鄙淺僞書矣。脈訣行而脈經隱。脈訣之誤既明。脈經其可復興乎。奇經八脈者。其名出于難經。而其論原于素問。以非十二經之正。故謂之奇經也。昔淳于意拜受公乘陽慶脈書奇效術。卽此世之醫者。且不能舉其數。況通其義乎。叔和曰。天雨降下。溝渠溢滿。聖人不能圖也。脈絡流溢。諸經不能復拘也。然則八脈可以不講乎。八脈明而脈理盡矣。脈理盡而病無不察。可以窮吾治之方矣。語云。人之所病。病疾多。而醫之所病。病道少。通乎脈學。又通乎八脈之學。道其患少也乎哉。因併刻附于本草之後。

癸卯秋七月上澣長洲張鼎思書。

題奇經八脈考

奇經八脈。聞之舊矣。而不解其奧。今讀瀕湖李君八脈考。原委精詳。經絡貫徹。頓覺蒙開塞決。胸次豁然。誠僊醫二家入室指南也。然匪易牙亦未易昧之。李君博極羣書。參討今古。九流百氏。咸有撰述。此特其一。謝爾。因僭述其概而題之。

隆慶壬申中秋日。道南吳哲拜題。

考證諸書目

黃帝素問 王法

玄珠密語

王宗正 張元素
紀天錫 周與權

仲景傷寒論 成無注

徐氏脈經 文伯

玉函經 杜光庭

勿曉子

診脈須知 劉元實

王貺指迷方

蔡西山脈經

碎金脈訣

楊文德太素脈訣

靈樞經

扁鵲脈經

張滑伯仁 熊宗立

王叔和脈經

巢氏病源 元方

太平聖惠方

脈經手訣 張及

陳言三因方

李希范脈髓

醫學發明 李東垣

張擴太素脈訣

王適齋脈訣

太倉公生死祕要

諸家注解難經 呂廣

華陀脈經

褚氏遺書 澄

外臺祕要 王

諸家注解高陽生脈訣 通真子

南陽活人書 說脈

崔紫虛脈訣

脈理玄祕

楊仁齋醫脈真經

魏伯祖脈說

王世相醫問

皇甫謐甲乙經

楊玄操 龐安時
丁德用 宋廷臣

仲景金匱方

千金方論 孫真

吳廣脈賦

方脈舉要 劉三

脈要新括 通真子

聖濟總錄

蕭世基脈粹

張杲醫說

詹炎舉太素脈訣

陳增壽

沈氏

本草綱目

三十 附錄 奇經八脈考引用書目

脈訣刊誤類同

診家樞要滑壽

儲華谷社疑說

決脈精要家民

醫經小學魏

朱子文集

彭用光太素脈

醫學權輿博

吳草廬集

脈訣圖說朱丹

儒醫精要趙繼

郝貫傳道集

奇經八脈考

奇經八脈總說

凡人一身有經脈絡脈。直行曰經。旁支曰絡。經凡十二。手之三陰三陽。足之三陰三陽是也。絡凡十五。乃十二經各有一別絡。而脾又有一大絡。并任督二絡爲十五也。經作陰 絡陽絡共二十七氣。相隨上下。如泉之流。如日月之行。不得休息。故陰脈營於五藏。陽脈營於六府。陰陽相貫。如環無端。莫知其紀。終而復始。其流溢之氣。入於奇經。轉相灌溉。內溫藏府。外濡腠理。奇經凡八脈。不拘制於十二正經。無表裏配合。故謂之奇。蓋正經猶夫溝渠。奇經猶夫湖澤。正經之脈隆盛。則溢於奇經。故秦越人比之天雨降下。溝渠溢滿。霧霈妄行。流於湖澤。此發靈素未發之祕旨也。八脈散在羣書者。略而不悉。醫不知此。罔探病機。仙不知此。難安爐鼎。時珍不敏。參考諸說。萃集於左。以備學仙醫者筌蹄之用云。

八脈

奇經八脈者。陰維也。陽維也。陰蹻也。陽蹻也。衝也。任也。督也。帶也。陽維起於諸陽之會。由外踝而上行於衛分。陰維起於諸陰之交。由內踝而上行於營分。所以爲一身之綱維也。陽蹻起於跟中。循外踝上行於身之左右。陰蹻起於跟中。循內踝上行於身之左右。所以使機關之蹻捷也。督脈起於會陰。循背而行於

身之後。為陽脈之總督。故曰陽脈之海。任脈起於會陰。循腹而行於身之前。為陰脈之承任。故曰陰脈之海。衝脈起於會陰。夾臍而行。直衝於上。為諸脈之衝要。故曰十二經脈之海。帶脈則橫圍於腰。狀如束帶。所以總約諸脈者也。是故陽維主一身之表。陰維主一身之裏。以乾坤言也。陽蹻主一身左右之陽。陰蹻主一身左右之陰。以東西言也。督主身後之陽。任衝主身前之陰。以南北言也。帶脈橫束諸脈。以六合言也。是故醫而知乎八脈。則十二經十五絡之大旨得矣。仙而知乎八脈。則虎龍升降玄牝幽微之竅妙得矣。

陰維脈

陰維起於諸陰之交。其脈發於足少陰築賓穴。為陰維之郛。在內踝上五寸。膈肉分中。上循股內廉。上行入小腹。會足太陰厥陰少陰陽明於府舍。在腹衷下三寸。去上會足太陰於大橫腹衷。大橫在腹衷下一寸五分。腹衷在日去腹中行四寸半。循脅肋。會足厥陰於期門。直乳下。上胸膈。挾咽。與任脈會於天突。廉泉。上至頂前而終。
天突在結喉下四寸半。宛宛中。凡一十四穴。廉泉在結喉下二寸中央是穴。

陽維脈

陽維起於諸陽之會。其脈發於足太陽金門穴。在足外踝下一寸五分。上外踝七寸。會足少陽於陽交。為陽維之郛。在外踝上七寸。循膝外廉。上髀厭。抵少腹側。會足少陽於居髻。在章門下八寸。循脅肋。斜上肘。

又曰。陰維爲病。苦心痛。治在三陰之交。太陰證則理中湯。少陰證則四逆湯。厥陰證則當歸四逆湯。吳茱萸湯主之。

李瀕湖曰。陽維之脈與手足三陽相維。而足太陽少陽則始終相聯附者。寒熱之證。惟二經有之。故陽維爲病。亦苦寒熱。蓋衛氣晝行於陽。夜行於陰。陰虛則內熱。陽虛則外寒。邪氣在經。內與陰爭而惡寒。外與陽爭而發熱。則寒熱之在表。而兼太陽證者。有汗當用桂枝。無汗當用麻黃。寒熱之在半表半裏。而兼少陽證者。當用小柴胡加減治之。若夫營衛慳卑。而病寒熱者。黃芪建中及八物湯之類。主之。潔古獨以桂枝一證屬之陽維。似未擴充。至於陰維爲病。主心痛。潔古獨以三陰溫裏之藥治之。則寒中三陰者宜矣。而三陰熱厥作痛。似未備矣。蓋陰維之脈。雖交三陰而行。實與任脈同歸。故心痛多屬少陰。厥陰。任脈之氣上衝。而然。暴痛無熱。久痛無寒。按之少止者爲虛。不可接近者爲實。凡寒痛兼少陰及任脈者。四逆湯兼厥陰者。當歸四逆湯。兼太陰者。理中湯。主之。凡熱痛兼少陰及任脈者。金鈴散。延胡索散。兼厥陰者。失笑散。兼太陰者。承氣湯。主之。若營血內傷。兼夫任衝手厥陰者。則宜四物湯。養營湯。妙香散之類。因病藥之。如此則陰陽虛實。庶乎其不差矣。

王叔和脈經曰。寸口脈從少陰斜至太陽。是陽維脈也。動苦肌肉痹癢。皮膚痛。下部不仁。汗出而寒。又苦顛仆羊鳴。手足相引。甚者失音不能言。宜取客主人。在耳前起骨上廉。開口有

空。乃手足少陽陽明之會。

又曰。寸口脈從少陽斜至厥陰。是陰維脈也。動苦癩癩。僵仆羊鳴。又苦僵仆失音。肌肉癢癢。應時自發。汗出惡風。身洗洗然也。取陽白金門。見前。僕參。見陽

瀕湖曰。王叔和以癩癩屬陰維。靈樞經以癩癩屬陰蹻。蹻陽蹻。二說義異旨同。蓋陽維由外踝而上。循陽分而至肩肘。歷耳額而終。行於衛分。諸陽之會。陰維由內踝而上。循陰分而上。脅至咽。行於營分。諸陰之交。陽蹻起於跟中。循外踝上行於股外。至脅肋肩髀。行於一身之左右。而終於目內眦。陰蹻起於跟中。循內踝上行於股內。陰氣行於一身之左右。至咽喉會任脈。而終於目內眦。邪在陰維。陰蹻。則發癩。邪在陽維。陽蹻。則發癩。癩動而屬陽。陽脈主之。癩靜而屬陰。陰脈主之。大抵二疾當取之四脈之穴。分其陰陽而已。

王叔和曰。診得陽維脈浮者。暫起目眩。陽盛實者。苦肩息。洒洒如寒。

診得陰維脈沈大而實者。苦胸中痛。脅下支滿。心痛。其脈如貫珠者。男子兩脅下實。腰中痛。女子陰中痛。如有瘡狀。

素問腰痛論曰。陽維之脈。令人腰痛。痛上怫然腫。刺陽維之脈。與太陽合。臘閒。去地一尺。

王啓玄曰。陽維起於陽。則太陽之所生。並行而上。至膈下。復與太陽合而上也。去地一尺。乃承山穴也。在銳臚之下。分內。閒陷中。可刺七分。

肉里之脈令人腰痛不可以欬。欬則筋縮急。刺肉里之脈為二瘡。在太陽之外少陽絕骨之後。

王啓玄曰。肉里之脈。少陽所生。陽維脈氣所發。絕骨之後。陽維所過分肉穴也。在足外踝直上絕骨之端。如後二分。筋肉分間。刺可五分。

飛陽之脈令人腰痛。痛拂拂然。甚則悲以恐。

啓玄曰。此陰維之脈也。去內踝上五寸。臑分中。並少陰經而上也。刺飛陽之脈。在內踝上一寸。少陰之前。與陰維之會。築賓穴也。○甲乙經云。太陽之絡別走少陰者。名曰飛陽。

陰躡脈

陰躡者。足少陰之別脈。其脈起於跟中。足少陽然谷穴之後。然谷在內踝前下一寸陷中。同足少陰循內踝下。照海穴。

在內踝下五分。上內踝之上二寸。以交信為郄。交信在內踝骨上少陰前太陰後廉筋骨間。直上循陰股。入陰上。循胸裏。入缺盆。上出

人迎之前。至咽喉。交貫衝脈。入頰內廉。上行屬目內眥。與手足太陽足陽明陽躡五脈會於睛明。而上行。睛明在目內眥外一分宛宛中。凡八穴。

張紫陽八脈經云。八脈者。衝脈在風府穴下。督脈在臍後。任脈在臍前。帶脈在腰。陰躡脈在尾閭前。陰囊

下。陽躡脈在尾閭後二節。陰維脈在頂前一寸三分。陽維脈在頂後一寸三分。凡人有此八脈。俱屬陰神。

閉而不開。惟神仙以陽炁衝開。故能得道。八脈者。先天大道之根。一炁之祖。采之惟在陰躡為先。此脈纔

動諸脈皆通。次督脈衝三脈。總為經脈造化之源。而陰蹻一脈。散在丹經。其名頗多。曰天根。曰死戶。曰復命關。曰鄂都。鬼戶。曰死生根。有神主之名。曰桃康。上通泥丸。下透涌泉。倘能知此。使真炁聚散皆從此關竅。則天門常開。地戶永閉。尻脈周流於一身。貫通上下。和炁自然上朝。陽長陰消。水中火發。雲裏花開。所謂天根月窟。閑來往。三十六宮都是春。得之者身體輕健。容衰返壯。昏昏默默。如醉如癡。此其驗也。要知西南之鄉。乃坤地。尾閭之前。膀胱之後。小腸之下。靈龜之上。此乃天地逐日所生。炁根產鉛之地也。醫家不知有此。

瀕湖曰。丹書論及陽精河車。皆往往以任衝督脈命門三焦為說。未有專指陰蹻者。而紫陽八脈經所載經脈。稍與醫家之說不同。然內景隧道。惟返觀者能照察之。其言必不謬也。

陽蹻脈

陽蹻者。足太陽之別脈。其脈起於跟中。出於外踝。下足太陽申脈穴。在外踝下五分陷中。春爪甲白肉際。當踝後遠跟。以僕參為本。在跟骨下陷中。拱足得之。上外踝上三寸。以附陽為郛。在外踝上三寸。足太陽之穴也。直上循股外廉。循脅後腓上。會手太陽陽維於臑膺。在肩後大骨下。肩尖端上行兩骨間陷中。上行肩髃外廉。會手陽明於巨骨。在肩尖端上行兩骨間陷中。會手陽明少陽於肩髃。在肩髃中。取之有骨。上人迎。夾口吻。會手足陽明任脈於地倉。夾口吻旁四分。外近下有微脈動處。同足陽明上而行巨髃。夾鼻孔旁八分。直瞳子陷中。復會任脈於承泣。在目下七分。直瞳子陷中。壅目內眥。與手足太陽足陽明陰蹻五脈會於睛。

明穴見陰從睛明上行入髮際下耳後入風池而終風池在耳後夾玉枕骨下髮際陷中凡二十二穴。○難經曰：蹻脈從足至目長七尺五寸，合一丈五尺。

甲乙經曰：蹻脈有陰陽，何者當其數？曰：男子數其陽，女子數其陰，當數者為經，不當數者為絡。氣之在身也，如水之流，如日月之行不休，故陰脈營其藏，而陽脈營其府，如環之無端，莫知其紀，終而復始，其流溢之氣，內溉藏府，外濡腠理。

二蹻為病

秦越人難經曰：陰絡者陰蹻之絡，陽絡者陽蹻之絡，陰蹻為病，陽緩而陰急；陽蹻為病，陰緩而陽急。

王叔和脈經曰：陰蹻脈急，當從內踝以上急，外踝以上緩；陽蹻脈急，當從外踝以上急，內踝以上緩。

又曰：寸口脈前部左右彈者，陽蹻也；動苦腰痛背痛，又為癩疔，偃仆羊鳴，惡風偏枯，瘡癬身體強，又曰：微瀆

為風癩，並取陽蹻，在外踝上三寸直絕骨是穴。附陽穴也。

又曰：寸口脈後部左右彈者，陰蹻也；動苦癩癩寒熱，皮膚淫癢，又為少腹痛，裏急，腰及髓脊下相連，陰中

痛，男子陰疝，女子漏下不止。髓骨也，邪脈下穴也。

又曰：癩癩瘰癧，不知所苦，兩蹻之下，男陽女陰。

張潔古曰：蹻者捷疾也，二脈起于足，使人蹻捷也。陽蹻在肌肉之上，陽脈所行，通貫六府，主持諸表，故名。

爲陽蹻之絡。陰蹻在肌肉之下。陰脈所行。通貫五藏。主持諸裏。故名爲陰蹻之絡。陰蹻爲病。陰急則陰厥。脛直。五絡不通。表和裏病。陽蹻爲病。陽急則狂走目不昧。表病裏和。陰病則熱。可灸照海陽陵泉。在膝下

外廉陷中。足少陽之合也。筋病治此。陽病則寒。可鍼風池風府。風府在項後入髮際一寸大筋內。宛宛中。督脈太陽陽維之會也。又曰。在陽表者當汗之。在陰裏者當下之。又曰。癩癩晝發。灸陽蹻。夜發。灸陰蹻。

素問腰痛論曰。腰痛不可舉者。申脈僕參舉之。太陽之穴。陽之本也。又曰。會陰之脈。令人腰痛。痛止漑漑然汗出。汗乾令人欲飲。飲已欲走。刺直陽之脈。上三痛。在蹻上郄下五寸橫居。視其盛者出血。

王啓玄云。足太陽之脈循腰下會於後陰。故曰會陰。直陽之脈挾脊下行。貫臀。至膈。循膈。過外踝之後。條直而行者。故曰直陽之脈也。蹻爲陽蹻所生。申脈穴也。蹻上郄下。乃承筋穴也。卽膈中央如外陷者

中也。太陽脈氣所發。禁鍼刺。但視其兩膈中央有血絡盛滿者。乃刺之出血。又曰。昌陽之脈。令人腰痛。痛引膺。目眈眈然。甚則反折舌卷不能言。刺內筋爲三痛。在內踝上大筋前太

陰後上踝二寸所。

王啓玄云。陰蹻起於然谷之後。上內踝之上。循陰股入陰。而循腹入胸裏。缺盆上。出人迎之前。入頰內廉。屬目內眥。會於太陽陽蹻而上行。故病狀如此。內筋卽陰蹻之郄交信穴也。

素問繆刺論曰。邪客於足陽蹻之脈。令人目痛。從內眥始。刺外踝之下半寸。所各二痛。卽中左刺右。右刺

左如人行十里頃而已。

靈樞經曰。目中赤痛。從內眥始。取之陰蹻。文信穴也。

又曰。風痙反折。先取足太陽及腦中。及血絡出血。若中有寒邪。取陰蹻及三毛上。及血絡出血。

李瀕湖曰。足太陽。京骨穴也。在足外側小指本節後大骨下赤白際陷中。鍼三分。灸七壯。腦中。委中穴也。在曲膝後橫文中。鍼三分。陰蹻。取交信穴。見前三毛。大敦穴也。在足指大外側三毛中。肝脈之井也。

鍼三分。灸三壯。血絡者。視其處有絡脈盛滿者。出其血也。

又曰。陰蹻陽蹻。陰陽相交。陽入陰。陰出陽。交於目銳眥。陽氣盛則瞑目。陰氣盛則瞑目。熱厥。取足太陽少陽。

甲乙經曰。人病目閉不得視者。衛氣留於陰。不得行於陽。留於陰則陰氣盛。陰氣盛則陰蹻滿。不得入於陽。則陽氣虛。故目閉也。

病目不得瞑者。衛氣不得入於陰。常留於陽。留於陽則陽氣滿。陽氣滿則陽蹻盛。不得入於陰。則陰氣虛。故目不瞑也。

靈樞經曰。五穀入於胃也。其精粕津液。宗氣分爲三隧。故宗氣積於胸中。出於喉嚨。以養心肺。而行呼吸焉。營氣者。泌其津液。注之於脈。化而爲血。以榮四末。內注五藏六府。以應刻數焉。衛氣者。出其悍氣之慄疾。

而先於四末分肉皮膚之間而不休焉。晝日行於陽，夜行於陰，常從足少陰分間行於五藏六府，今厥氣客於五藏六府，則衛氣獨衛其外，行於陽不得入於陰，行於陽則陽氣盛，陽氣盛則陽蹠陷，不得入於陰，則陰氣虛，故目不瞑也。治當補其不足，瀉其有餘，以通其道而去其邪。飲以半夏湯一劑，陰陽已通，其臥立至。其方用流水千里以外者八升，揚之萬遍，取其清五升，煮之，炊以葦薪火，沸置秫米一升，治半夏五合，徐炊令至一升半，去其滓，飲汁一小杯，日三稍益，以知爲度。故其病新發者，覆杯則臥，汗出則已，久者三飲而已。

李瀕湖云：靈樞有云：足太陽之筋爲目上綱，足陽明之筋爲目下綱。寒則筋急，目不合，熱則筋縱，目不開。又云：壯者血氣盛，肌肉滑，營衛不失其常，故晝精而夜瞑。老人氣血衰，氣道澀，衛氣內伐，故晝不精而夜不瞑。又云：多臥者，腸胃大而皮膚澀，分肉不解，衛氣行遲故也。張子和云：思氣所至，爲不眠，爲嗜臥。巢元方云：脾病困倦而嗜臥，膽病多煩而不眠。王叔和脈經云：水流夜疾有聲者，土休故也。人亦應之。人夜臥則脾不動，搖脈爲之數疾也。一云：脾之候在臉，臉動則知脾能消化也。脾病則臉澀嗜臥矣。數說皆論目閉目不瞑，雖不言及二蹠，蓋亦不離乎陰陽營衛虛實之理，可互考者也。

衝脈

衝爲經脈之海。又曰血海。其脈與任脈皆起於少腹之內胞中，其浮而外者起於氣衝。

一名氣衝，在少腹中兩旁各二寸。

橫骨兩端動脈宛宛中是陽明穴也並足陽明少陰二經之間循腹上行至橫骨足陽明去腹中行二寸少陰去腹中行五寸
 橫骨中行一寸半挾臍左右各五分上行歷太赫橫骨上一寸去氣穴即胞門一名子戶太赫上一寸去
 去腹中行一寸半四滿上中注四滿上商曲商曲上一寸石關石關上一寸通谷陰都上一寸幽門通谷上一寸
 巨關兩旁名至胸中而散凡二十四穴五分關中

靈樞經曰衝任皆起於胞中上循背裏為經絡之海其浮而外者循腹右上行會於咽喉別而絡唇口血
 氣盛則充膚熱肉血獨盛則澹滲皮膚生毫毛婦人有餘於氣不足於血月下數脫血任衝並傷脈不榮
 其口唇故鬚不生宦者去其宗筋傷其衝任血寫不復皮膚內結唇口不榮故鬚亦不生天宦不脫於
 血而任衝不盛宗筋不強有氣無血唇口不榮故鬚亦不生

素問水熱穴論曰三陰之所交結於腳也踝上各一行者此腎脈之下行也名曰太衝

王啓玄曰腎脈與衝脈並下行循足合而盛大故曰太衝一云衝脈起於氣衝衝直而通故謂之衝

素問陰陽離合論曰聖人南面而立前曰廣明後曰太衝太衝之地名曰少陰其衝在下名曰太陰

啓玄曰心臟在南故前曰廣明衝脈在北故後曰太衝足少陰腎脈與衝脈合而盛大故曰太衝兩脈

相合為表裏也衝脈在脾之下故曰其衝在下名曰太陰

靈樞經曰帝曰少陰之脈獨下行何也岐伯曰不然夫衝脈者五藏六府之海也其上者出於頰頰滲諸

陽。灌諸精。其下者注於少陰之大絡。起於腎下。出於氣街。循陰股內廉。斜入臛中。伏行。髀骨內廉。並少陰之經。下入內踝之後。入足下。其別者並於少陰。滲三陰。斜入踝。伏行。出屬跗。屬下循跗上。入大指之間。滲諸絡。而溫足脛肌肉。故其脈常動。別絡結則跗上不動。不動則厥。厥則寒矣。

王海藏曰。手少陽三焦相火爲一府。右腎命門爲相火。心包主亦名相火。其脈同診。腎爲生氣之門。出而治臍下。分三歧。上衝夾臍。過天樞。上至臚中兩乳間。元氣所繫焉。又足三焦太陽之別。並足太陽正路。入絡膀胱。約下焉。三焦者。從頭至心。心至臍。臍至足。爲上中下三焦。其實真元一氣也。故曰。有藏無府。脈訣云。三焦無狀。空有名。寄在胸中膈相應。一云。其府在氣街中。上焦在胃上口。治在臚中。中焦在胃管。治在臍旁。下焦在臍下膀胱上口。治在臍經曰。原氣者。三焦之別使也。腎閒動氣者。真元一氣。分爲三路。人之生命也。十二經之根本也。

李瀕湖曰。三焦卽命門之用。與衝任督相通者。故附著於此。

衝脈爲病

越人難經曰。衝脈爲病。逆氣而裏急。

靈樞經曰。氣逆上。刺膺中陷下者。與下胸動脈。腹痛。刺臍左右動脈。按之立已。不已。刺氣街。按之立已。

李東垣曰。秋冬之月。胃脈四道爲衝脈所逆。脅下少陽脈二道。而反上行。名曰厥逆。其證氣上衝咽不得。

息而喘息有音不得臥宜調中益氣湯加吳茱萸五分隨氣多少用之。脾胃夏月有此乃大熱之證用黃連黃蘗知母各等分酒洗炒爲末白湯和丸每服一二百丸空心白湯下卽以美膳壓之不令停留胃中直至下元以瀉衝脈之邪也蓋此病隨四時寒熱溫涼治之

又曰凡逆氣上衝或兼裏急或作躁熱皆衝脈逆也若內傷病此宜補中益氣湯加炒藥炒連知母以泄衝脈○凡腎火旺及任督衝三脈盛者則宜用酒炒黃蘗知母亦不可久服恐妨胃也○或腹中刺痛或裏急宜多用甘草或虛坐而大便不得者皆屬血虛血虛則裏急宜用當歸○逆氣裏急膈咽不通大便不行者宜升陽瀉熱湯主之。方見開○麻木厥氣上衝逆氣上行妄聞妄見者宜神功丸主之。方見開

孫真人千金方云欬唾手足厥逆氣從小腹上衝胸咽其面翕熱如醉因復下流陰股小便難時復冒者寸脈沈尺脈微宜茯苓五味子湯以治其氣衝其方用茯苓五味子二錢桂心甘草一錢水煎服胸滿者去桂程篋墩曰太平侯病臆中痛喘嘔吞酸臍上一點氣上至咽喉如冰每子後申時輒發醫以爲大寒不效祝橋泉曰此得之大醉及厚味過多子後申時相火自下騰上故作痛也以二陳加苓連卮子蒼朮數飲而愈

素問痿論曰治痿獨取陽明者何也曰陽明者五藏六府之海也主潤宗筋宗筋主束骨而利機關衝脈者經脈之海主滲灌谿谷與陽明合於宗筋會於氣街而陽明爲之長皆屬於帶脈而絡於督脈故陽明

虛。則宗筋縱。帶脈不引。故足痿不用。治之當各補其營而通其膈。調其虛實。和其逆順。筋脈骨肉。各以其時受月。則病已。調肝甲乙。心丙丁。脾戊己。法氣法時。其也。

李東垣曰。舉凡病甚。則傳腎肝爲痿厥。痿乃四肢痿軟。厥乃四肢如火。或如冰。心煩。衝脈氣逆上。甚則火逆。名曰厥逆。故痿厥二病多相須也。經曰。下氣不足。則痿厥心惋。宜以清燥去溼熱之藥。或生脈散合四苓散。加酒洗黃蘗。知母。以洩其溼熱。○李瀕湖曰。溼熱成痿。乃不足中有餘也。宜滲洩之藥。若精血枯涸成痿。乃不足中之不足也。全要峻補之藥。

靈樞經曰。胸氣有街。腹氣有街。頭氣有街。脛氣有街。故氣在頭者。止之於腦。氣在胸者。止之膺與背膈。氣在腹者。止之背膈與衝脈。於臍之左右之動脈。氣在脛者。止之於氣街與承山踝上以下。取此者。用毫鍼。先按在上久。應手乃刺。而與之所治者。頭痛眩仆。腹痛中滿暴脹。及有新積作痛。

素問舉痛論曰。寒氣客於衝脈。衝脈起於關元。隨腹直上。寒氣客則脈不通。脈不通則氣因之。故喘動應手。

王叔和脈經曰。兩手脈浮之俱有陽。沈之俱有陰。陰陽皆盛。此衝督之脈也。衝督之脈爲十二經之道路也。衝督用事。則十二經不復朝於寸口。其人若恍惚狂癡。

又曰。脈來中央堅實。徑至關者。衝脈也。動苦少腹痛。上搶心。有癰疽。遺溺。脅支滿煩。女子絕孕。

又曰。尺寸俱牢直上直下。此乃衝脈。胸中有寒疝也。

張仲景曰。傷寒動氣在右。不可發汗。汗之則衄而渴。心苦煩。飲水即吐。先以五苓散。次以竹葉湯。不可下。下之則津液

內竭。頭眩咽燥。鼻乾心悸。竹葉湯。○動氣在左。不可發汗。汗之則頭眩汗不止。筋惕肉瞤。此為難治。或先用防風白

朮牡蠣湯。次用小建中湯。不可下。下之則腹裏拘急不止。動氣反劇。身雖有熱。反欲拳。先服甘草乾薑湯。次服小建中湯。○動氣在上。

不可發汗。汗之則氣上衝。正在心端。葛根湯。不可下。下之則掌握熱煩。身熱汗泄。欲水自灌。竹葉湯。○動氣在

下。不可發汗。汗之則無汗。心中大煩。骨節疼。頭痛目運。惡寒吐穀。先服大陳皮湯。次服小建中湯。不可下。下之則腹滿。卒

起頭眩。食則下清穀。心下痞堅。甘草湯。心湯。

李瀕湖曰。此乃臍之左右上下有氣築築然牢而痛。正衝任足少陰太陰四經病也。成無己註文。以為

左肝右肺。上心下脾。蓋未審四藏乃兼邪耳。

岐伯曰。海有東西南北。人亦有四海以應之。胃者水穀之海。其輸上在氣街。下至三里。衝脈為十二經之

海。其輸上在於大杼。下出於巨虛之上下廉。膺中者為氣之海。其輸上在於柱骨之上下。前在人迎。腦為

髓之海。其輸上在於蓋。下在風府。○氣海有餘。氣滿胸中。恍惚面赤。氣海不足。則氣少不足以言。○血海

有餘。則常想其身大。怫然不知其所病。血海不足。亦常想其身小。狹然不知其所病。○水穀之海有餘。則

腹滿。水穀之海不足。則饑不受食。○髓海有餘。則輕勁多力。自過其度。髓海不足。則腦轉耳鳴。脛痠。眩冒

目無所見。懈怠安臥。

任脈

任為陰脈之海。其脈起於中極之下。少腹之內。會陰之分。在兩陰之間。上行而外出。循曲骨。橫骨上毛際陷中。上毛際。

至中極。勝下四寸。同足厥陰。太陰。少陰。並行腹裏。循關元。勝下三寸。小腸之會。三陰任脈之會。歷石門。即丹田。一名命門。在勝下一寸。三焦募也。

氣海。勝下一寸。中宛宛。中男子生氣之海。會足少陽。衝脈於陰交。勝下一寸。當膀胱之募。循神闕。勝中。水分。勝上一寸。當小腸下口。會足太

陰於下脘。勝上二寸。當胃下口。歷建里。勝上三寸。會手太陽。少陽。足陽明於中脘。勝上四寸。胃之募也。上上脘。勝上五寸。鳩尾下。巨闕。勝上六寸。心之募也。

鳩尾。勝上七寸。當脊下。中庭。勝上八寸。膻中。玉堂。勝上九寸。紫宮下。紫宮。勝上一寸。華蓋下。璇璣。

天突下。勝上一寸。喉嚨。會陰。維於天突。廉泉。天突在結喉下四寸。宛宛中。廉泉在結喉下舌下中央。上頤。循承漿。與手足陽明督脈會。陷中。

環唇上。至下斷交。復出。分行循面。繫兩目下之中央。至承泣而終。目下七分。直瞳子陷中。二穴。凡二十七穴。○難經甲

乙經並無循面以下之說。

任衝之別絡名曰尾翳。下鳩尾。散於腹。實則腹皮痛。虛則癢搔。

靈樞經曰。缺盆之中。任脈也。名曰天突。其側動脈。人迎。足陽明也。

任脈為病

素問曰。任脈為病。男子內結七疝。女子帶下瘦聚。

又曰女子二七而天癸至任脈通太衝脈盛月事以時下七七任脈虛太衝脈衰天癸竭地道不通故形壞而無子

又曰上氣有音者治其缺盆中謂天突穴也陰維任脈之會刺一寸灸三壯

脈經曰寸口脈來緊細實長至關者任脈也動苦少腹繞臍下引橫骨陰中切痛取關元治之

又曰橫寸口邊脈九九者任脈也苦腹中有氣如指上搶心不得俛仰拘急

督脈

督乃陽脈之海其脈起於腎下胞中至於少腹乃下行於腰橫骨圍之中央繫溺孔之端男子循莖下至

篡女子絡陰器合篡間俱繞篡後屏翳穴前陰後陰之閒也別繞臀至少陰與太陽中絡者合少陰上股內廉由

會陽在陰尻骨兩旁凡二穴貫脊會於長強穴在骶骨端與少陰會並脊裏上行歷腰膪二十一椎下陽關十六椎下命門十四椎下懸樞十三椎下脊中十一椎下中樞十椎下筋縮九椎下至陽七椎下靈臺六椎下衝道五椎下身柱三椎下陶道大椎一椎下

與手足三陽會合上瘧門項後五分會陽維入繫舌本上至風府項後入髮際中一寸會足太陽陽維同

入腦中循腦戶在枕骨上強開百會後後頂百會後一寸半上巔百會中央前頂百會前一寸半額會百會前三寸至神庭額會前二寸直鼻為足太陽督脈之會循額中至鼻柱經素膠鼻準也水溝即人中會手足陽明

至兌端在唇上齒縫中入斷交上齒中與任脈足陽明交會而終凡三十一穴督脈別絡自長強走任脈者由少腹直

至兌端在唇上齒縫中入斷交上齒中與任脈足陽明交會而終凡三十一穴督脈別絡自長強走任脈者由少腹直

至兌端在唇上齒縫中入斷交上齒中與任脈足陽明交會而終凡三十一穴督脈別絡自長強走任脈者由少腹直

上貫膈中央。上貫心入喉。上頤環唇。上繫兩目之下中央。會太陽於目內眇睛明穴。見陰蹠下。上額與足厥陰同會於巔。入絡於腦。又別自腦下項循肩胛與手足太陽少陽會於大杼第一椎下兩旁去脊中一寸五分。陷中內挾脊抵腰中入循膂絡腎。○難經曰：督脈任脈四尺五寸合共九尺。○靈樞經曰：頸中央之脈督脈也。名曰風府。

張潔古曰：督者都也。爲陽脈之都綱。任者妊也。爲陰脈之妊養。

王海藏曰：陰蹠陽蹠同起跟中。乃氣井而相連。任脈督脈同起中極之下。乃水溝而相接。

滑伯仁曰：任督二脈。一源而二岐。一行於身之前。一行於身之後。人身之有任督。猶天地之有子午。可以分可以合。分之。以見陰陽之不離。合之。以見渾淪之無閒。一而二。二而一者也。

李瀕湖曰：任督二脈。人身之子午也。乃丹家陽火陰符升降之道。坎水離火交媾之鄉。故魏伯陽參同契云：上閉則稱有。下閉則稱無。無者以奉上。上有神德居。此兩孔穴法。金氣亦相須。崔希範天元入藥鏡云：上鵲橋。下鵲橋。天應星。地應潮。歸根竅。復命關。貫尾閭。通泥丸。大道三章直指云：脩丹之士。身中一竅。名曰玄牝。正在乾之下。坤之上。震之西。兌之東。坎離交媾之地。在人身天地之正中。八脈九竅十二經十五絡聯轅。虛閒一穴。空懸黍珠。醫書謂之任督二脈。此元氣之所由生。真息之所由起。脩丹之士。不明此竅。則真息不生。神化無基也。俞琰註參同契云：人身血氣往來循環。晝夜不停。醫書有任督二脈。人能通此。

二脈則百脈皆通。黃庭經言皆在心內運天經。晝夜存之自長生。天經乃吾身之黃道。呼吸往來於此也。鹿運尾閭能通督脈。龜納鼻息能通任脈。故二物皆長壽。此數說皆丹家河車妙旨也。而藥物火候自有別傳。

王海藏曰。張平叔言鉛乃北方正氣一點初生之真陽。為丹母。其蟲為龜。即坎之二陰也。地軸也。一陽為蛇。天根也。陽生於子。藏之命門。元氣之所繫。出入於此。其用在臍下。為天地之根。玄牝之門。通厥陰。分三岐為三車。一念之非。降而為漏。一念之是。守而成鉛。升而接離。補而成乾。陰歸陽化。是以還元。至虛至靜。道法自然。飛昇而僊。

督脈為病

素問骨空論云。督脈生疾。從少腹上衝心而痛。不得前後。為衝疝。女子為不孕癰痔。遺溺隘乾。治在骨上。謂橫骨上毛際中曲骨穴也。甚者在臍下營。臍下一寸。陰交穴也。

王啓玄曰。此乃任衝二脈之病。不知何以屬之督脈。李瀕湖曰。督脈雖行于背。而別絡自長強走任脈者。則由少腹直上貫臍中。貫心入喉。上頤環唇。而入於目之內眥。故顯此諸證。啓玄蓋未深考爾。素問曰。督脈實則脊強反折。虛則頭重。高搖之。挾骨之。有過者取之所別也。

秦越人難經曰。督脈為病。脊強而厥。

王海藏曰。此病宜用羌活。獨活。防風。荆芥。細辛。藁本。黃連。大黃。附子。烏頭。蒼耳之類。
張仲景金匱云。脊強者。五瘞之總名。其證卒口噤。背反張而瘞癢。諸藥不已。可灸身柱大椎陶道穴。

又曰。瘞家脈築築而弦。直上下行。

王叔和脈經曰。尺寸俱浮。直上直下。此爲督脈腰背強痛。不得俛仰。大人癩病。小兒風癩。

又曰。脈來中央浮。直上下動者。督脈也。動苦腰背膝寒。大人癩。小兒癩。宜灸頂上三壯。

素問風論曰。風氣循風府而上。則爲腦風。風入係頭。則爲目風。眼寒。

王啓玄云。腦戶乃督脈足太陽之會故也。

帶脈

帶脈者。起於季脅足厥陰之章門穴。同足少陽循帶脈穴。章門足厥陰少陽之會。在季肋骨端。肘尖盡處是穴。○帶脈穴屬足少陽經。在季肋下一寸八

分陷圍身一周。如束帶然。又與足少陽會於五樞。帶脈下維道。寸三分。章門下五分。凡八穴。

靈樞經曰。足少陰之正至膈中。別走太陽而合上至腎。當十四椎。出屬帶脈。

楊氏曰。帶脈總束諸脈。使不妄行。如人束帶而前垂。故名。婦人惡露。隨帶脈而下。故謂之帶下。

帶脈爲病

秦越人曰。帶之爲病。腹滿。腰溶溶如坐水中。溶溶。緩慢貌。

明堂曰。帶脈二穴。主腰腹縱溶溶如囊水之狀。婦人少腹痛。裏急後重。癰瘕。月事不調。赤白帶下。可鍼六分。灸七壯。

張潔古曰。帶脈之病。太陰主之。宜灸章門二穴三壯。

素問曰。邪客於太陰之絡。令人腰痛。引小腹控眇。不可以養息。眇。謂手脇下之空軟處。

張仲景曰。大病瘥後。腰以下有水氣。牡蠣澤瀉散主之。若不巳。灸章門穴。

王叔和曰。帶脈爲病。左右邊臍腰痛。衝陰股也。

王海藏曰。小兒癩疔。可灸章門三壯而愈。以其與帶脈行於厥陰之分。而太陰主之。

又曰。女子經病血崩。久而成枯者。宜澀之益之。血閉久而成竭者。宜益之破之。破血有三治。始則四物入紅花。調黃芪肉桂。次則四物入紅花。調鯪鯉甲桃仁桂童子小便。和酒煎服。末則四物入紅花。調易老沒藥散。

張子和曰。十二經與奇經七脈皆上下周流。惟帶脈起少腹之側季脅之下。環身一周。絡腰而過。如束帶之狀。而衝任二脈。循腹脅。夾臍旁。傳流於氣衝。屬於帶脈。絡於督脈。衝任督三脈。同起而異行。一源而三岐。皆絡帶脈。因諸經上下往來。遺熱於帶脈之間。客熱鬱抑。白物滿溢。隨洩而下。綿綿不絕。是爲白帶。內經云。思想無窮。所願不得。意淫於外。入房太甚。發爲筋痿。及爲白淫。白淫者。白物淫衍如精之狀。男子因

洩而下。女子綿綿而下也。皆從溼熱治之。與治痢同法。赤白痢乃邪熱傳於大腸。赤白帶乃邪熱傳於小腸。後世皆以赤爲熱。白爲寒。流誤千載。是醫誤之矣。又曰。資生經載一婦人患赤白帶下。有人爲灸氣海。未效。次日爲灸帶脈穴。有鬼附耳云。昨日灸亦好。只灸我不著。今灸着我。我去矣。可爲酒食祭我。其家如其言祭之。遂愈。予初怪其事。因思晉景公膏肓二鬼之事。乃虛勞已甚。鬼得乘虛居之。此婦亦或勞心虛損。故鬼居之。灸既著穴。不得不去。自是凡有病此者。每爲之按此穴。莫不應手酸痛。令歸灸之。無有不愈。其穴在兩脅季肋之下一寸八分。若更灸百會穴。尤佳。內經云。上有病。下取之。下有病。上取之。又曰。上者下之。下者上之。是矣。

劉宗厚曰。帶下多本於陰虛陽竭。營氣不升。經脈凝澀。衛氣下陷。精氣積滯於下焦。奇經之分。蘊釀而成。以帶脈爲病得名。亦以病形而名。白者屬氣。赤者屬血。多因醉飽房勞。服食燥熱所至。亦有溼痰流注下焦者。腎肝陰淫溼勝者。或驚恐而木乘土位。濁液下流。或思慕無窮。發爲筋痿。所謂二陽之病發心脾也。或餘經溼熱。屈滯於少腹之下。或下元虛冷。子宮溼淫。治之之法。或下或吐。或發中兼補。補中兼利。燥中兼升。發潤中兼溫養。或溫補。或收澀。諸例不同。亦病機之活法也。巢元方病源曰。腎著病。腰痛冷如冰。身重。腰如帶五千錢。不渴。小便利。因勞汗出衣裏冷溼而得。久則變爲水也。○千金用腎著湯。三因用滲溼湯。東垣用獨活湯主之。

氣口九道脈

手檢圖曰。肺爲五藏華蓋。上以應天。解理萬物。主行精氣。法五行。應四時。知五味。氣口之中。陰陽交會。中有五部。前後左右。各有所主。上下中央。分爲九道。診之。則知病邪所在也。

李瀕湖曰。氣口一脈。分爲九道。總統十二經。并奇經八脈。各出診法。乃岐伯祕授黃帝之訣也。扁鵲推之。獨取寸口。以決死生。蓋氣口爲百脈流注朝會之始故也。三部雖傳。而九道淪隱。故奇經之脈。世無人知。今撰爲圖。并附其說於後。以洩千古之祕藏云。

診左手九道圖

燕窩味補酒用製醫心藥

中央直者手大陽明
口者丸
脈於寸

經外經實州大醫藥醫藥

診右手內外反此

前如外者足太陽
脈於寸

前如外者足太陽
脈於寸

中如外者足陽明
脈於寸

中如外者足陽明
脈於寸

後如外者足少陽
脈於寸

後如外者足少陽
脈於寸

三部俱浮直上直下者督脈

後部中央直者手大陽明

三部俱牢直上直下者衝脈

岐伯曰。前部如外者。足太陽膀胱也。動苦目眩。頭項腰背強痛。男子陰下溼癢。女子少腹痛。引命門陰中痛。子臟閉。月水不利。○浮爲風。○瀹爲寒。○滑爲勞熱。○緊爲宿食。

中部如外者。足陽明胃也。動苦頭痛面赤。○滑爲飲。○浮爲大便秘。○瀹爲嗜臥。腸鳴。不能食。足脛痠。後部如外者。足少陽膽也。動苦腰背胛股肢節痛。○浮爲氣。○瀹爲風。○急爲轉筋爲勞。

前部如內者。足厥陰肝也。動苦少腹痛引腰。大便秘。男子莖中痛。小便難。疝氣。兩丸上入。女子月水不利。陰中寒。子戶閉。少腹急。

中部如內者。足太陰脾也。動苦腹滿。胃中痛。上管有寒。食不下。腰上狀如居水中。○沈瀹爲身重。足脛寒痛。煩滿不能臥。時欬。睡有血洩。利。食不化。

後部如內者。足少陰腎也。動苦少腹痛。與心相引。背痛。小便淋。女人月水來。上搶心胸脅滿。股裏拘急。前部中央直者。手少陰心。手太陽小腸也。動苦心下墜痛。腹脅急。○實急者爲感忤。○虛者爲下利。腸鳴。

女子陰中癢痛。○滑爲有娠。

中部中央直中者。手厥陰心主也。動苦心痛面赤。多喜怒。食苦咽。○微浮苦悲傷恍惚。○瀹爲心下寒。○沈爲恐怖。如人將捕之狀。時寒熱。有血氣。

後部中央直者。手太陰肺。手陽明大腸也。動苦欬逆。氣不得息。○浮爲風。○沈爲熱。○緊爲胸中積熱。○

滿爲時效血。

前部橫于寸口丸丸者任脈也。動苦少腹痛。逆氣搶心。胸拘急。不得俛仰。○脈經云。寸口脈緊細實長下至關者。任脈也。動苦少腹邊臍痛。男子七疝。女子瘦聚。

三部俱浮。直上直下者。督脈也。動苦腰脊強痛。不得俛仰。大人癩。小兒癩。

三部俱牢。直上直下者。衝脈也。苦胸中有寒疝。○脈經曰。脈來中央堅實徑至關者。衝脈也。動苦少腹痛。上搶心。有瘦疝。遺溺。女子絕孕。

前部左右彈者。陽蹻也。動苦腰痛。癩癩僵仆羊鳴。偏枯癱瘓。身體強。

中部左右彈者。帶脈也。動苦少腹痛。引命門。女子月事不來。絕繼復下。令人無子。男子少腹拘急。或失精也。

後部左右彈者。陰蹻也。動苦癩癩寒熱。皮膚強癢。少腹痛。裏急。腰膊相連痛。男子陰疝。女子漏下不止。從少陰斜至太陽者。陽維也。動苦顛仆羊鳴。手足相引。甚者失音不能言。肌肉癢癢。

從少陽斜至厥陰者。陰維也。動苦癩癩僵仆羊鳴。失音。肌肉癢癢。汗出惡風。

釋音

蹻 腳卻 蹻 蹻 四音 舉 蹻 足高也 又 蹻 捷也

跗 音 膚 足 背也

跟 音 根 足 踵也

踝 花 上 聲 足 踝 骨 也

頰音求面頰也
 擴音郭引長之意
 齒音
 膏音高膏肓上兩下也
 築音築氣痛如

頰音上頰也
 隱音遂小
 椎音椎骨也
 僕音僕卑也
 丸音丸脈如珠

郄音郄與隙同
 篲音篲初患切
 髀音髀厭骨也
 溲音溲時出之貌
 洗音洗滌惡寒之貌

罅音罅孔也
 瘰癧音瘰癧足舒縮也
 眈音眈眈不明也
 洒音洒洗

本草綱目 三十 附錄 奇經八脈考

脈訣考證

脈訣非叔和書

晦庵朱子曰。古人察脈非一道。今世惟守寸關尺之法。所謂關者多不明。獨俗傳脈訣詞最鄙淺。非叔和本書。乃能直指高骨爲關。然世之高醫。以其書屢遂委棄。而羞言之。跋郭長陽書

東陽柳貫曰。王叔和撰脈經十卷。爲醫家一經。今脈訣熟在人口。直謂叔和所作。不知叔和西晉時尙未有歌括。此乃宋之中世人僞托。以便習肄爾。朱子取其高骨爲關之說。不知其正出脈經也。

盧陵謝籍翁曰。今稱叔和脈訣。不知起于何時。宋熙寧初校正脈經。尙未有此。陳孔碩始言脈訣出而脈經隱。則脈訣乃熙寧以後人作耳。惟陳無擇三因方書高陽生剽竊作歌訣。劉元賓從而和之。其說似深知脈經者。而又自著七表八裏九道之名。則陳氏亦未嘗詳讀脈經矣。

河東王世相曰。診候之法。不易精也。軒岐微蘊。越人叔和撰難經脈經。猶未盡洩其奧。五代高陽生著脈訣。假叔和之名。語多牴牾。辭語鄙俚。又被俗學妄註。世醫家傳戶誦。茫然無所下手。不過藉此求食而已。於診視何益哉。

雲間錢溥曰。晉太醫令王叔和著脈經。其言可守而不可變。及托叔和脈訣行而醫經之理遂微。蓋叔和

爲世所信重。故假其名而得行耳。然醫道之日淺。未必不由此而誤之也。

七表八裏九道之非

金陵戴起宗曰。脈不可以表裏定名也。軒岐越人叔和皆不言表裏。脈訣竊叔和之名而立七表八裏九道。爲世大惑。脈之變化。從陰陽生。但可以陰陽對待而言。各從其類。豈可以一浮二沈爲定序。而分七八九之名乎。大抵因浮而見者皆爲表。因沈而見者皆爲裏。何拘于七八九哉。廬山劉立之以浮沈遲數爲綱。以教學者。雖似捷徑。然必博學反約。然後能入脈妙。若以此自足。亦畫矣。

櫻寧滑壽曰。脈之陰陽表裏。以對待而爲名象也。高陽生之七表八裏九道。蓋鑿鑿也。求脈之明。爲脈之晦。

謝氏曰。脈經論脈二十四種。初無表裏九道之目。其言芤脈云。中央空。兩邊實。云芤則爲陰。而脈訣以芤爲七表。屬陽。云中閒有兩頭無。仲景脈法云。浮大數動滑爲陽。沈瀯弱弦微爲陰。而脈訣以動爲陰。以弦爲陽。似此背誤頗多。則脈訣非叔和書可推矣。

草廬吳澄曰。俗誤以脈訣爲脈經。而王氏脈經知者。或鮮。脈書往往混牢革爲一。夫牢爲寒實。革爲虛寒。安可混乎。脈之浮沈虛實。緊緩數遲滑瀉長短之相反。匹配自不容易。況有難辨。如洪散俱大。而洪有力。微細俱小。而微無力。芤類浮。而邊有中無。伏類沈。而邊無中有。若豆粒而搖搖不定者。動也。若鼓皮而如

如不動者。革也。俱對待也。又有促結代。皆有止之脈。促疾結緩。故可爲對。代則無對。總之。凡二十七脈。不止于七表八裏九道二十四脈也。詳文

灑湖李時珍曰。脈經論脈止有二十四種。無長短二脈。脈訣歌脈亦有二十四種。增長短而去數散。皆非也。素難仲景論脈。祇別陰陽。初無定數。如素問之鼓搏喘橫。仲景之慄平榮章綱損縱橫逆順之類是也。后世脈之精微失傳。無所依準。因立名而爲之歸著耳。今之學者。按圖索驥。猶若望洋。而況舉其全旨乎。此草廬公說獨得要領也。

男女脈位

齊褚澄曰。男子陽順。自下生上。故右尺爲受命之根。萬物從土而出。故右關爲脾。生右寸肺。肺生左尺腎。腎生左關肝。肝生左寸心。女子陰逆。自上生下。故左寸爲受命之根。萬物從土而出。故左關爲脾。生左尺肺。肺生右寸腎。腎生右關肝。肝生右尺心。詳褚氏遺書

華谷儲冰曰。脈訣以女人尺脈盛弱。與男子相反爲背看。夫男女形體絕異。陰陽殊塗。男生而覆。女生而仰。男則左旋。女則右轉。男主施。女主受。男之至命在腎。處臟腑之極下。女之至命在乳。處臟腑之極上。形氣既異。脈行于形氣之間。豈略不少異耶。此褚氏之說爲有理也。詳疑說

戴起宗曰。脈訣因男子左腎右命。女子左命右腎之別。遂言反此背看。而諸家以尺脈盛弱解之。褚氏又

以女人心肺診于尺。倒裝五臟。其謬又甚。不知男女形氣精血雖異。而十二經脈所行始終。五臟之定位。則一也。安可以女人脈位爲反耶。

丹溪朱雲亭曰。昔軒轅使伶倫截嶰谷之竹。作黃鍾律管。以候天地之節氣。使岐伯取氣口作脈法。以候人之動氣。故黃鍾之數九分。氣口之數亦九分。律管具而寸之數始形。故脈之動也。陽得九分。陰得一寸。吻合于黃鍾。天不足西北。陽南而陰北。故男子寸盛而尺弱。肖乎天也。地不滿東南。陽北而陰南。故女子尺盛而寸弱。肖乎地也。黃鍾者。氣之先兆。故能測天地之節候。氣口者。脈之要會。故能知人命之死生。世之俗醫。誦高陽生之妄作。欲以治病。其不殺人也幾希。

龍丘葉氏曰。脈者天地之元性。故男女尺寸盛弱。肖乎天地。越人以爲男生于寅。女生于申。三陽從天生。三陰從地長。謬之甚也。獨丹溪推本律法。混合天人而關之。使千載之誤。一旦昭然。豈不韙哉。

臟腑部位

紹興王宗正曰。診脈之法。當從心肺俱浮。肝腎俱沈。脾在中州之說。王叔和獨守寸關尺分部位。以測五臟六腑之脈者。非也。

慈溪趙繼宗曰。脈訣言左心小腸肝膽腎。右肺大腸脾胃命者。非也。心肺居上。爲陽爲浮。肝腎居下。爲陰爲沈。脾居中州。半陰半陽。半浮半沈。當以左寸爲心。右寸爲肺。左尺爲肝。右尺爲腎。兩關爲脾。關者陰陽

之界限。前取陽三分。後取陰三分。所謂土居金木水火之中。寄王于四時。不獨右關爲脾也。肝旣爲陰。豈宜在半陰半陽半浮半沈之左關耶。命門卽是腎。不宜以右尺爲診。詳醫要

吳草廬曰。醫者于寸關尺。輒名之曰此心脈。此肺脈。此肝脈。此脾脈。此腎脈者。非也。五臟六腑凡十二經。兩手寸關尺者。手太陰肺經之一脈也。分其部位以候他臟之氣耳。脈行始于肺。終于肝。而復會于肺。肺爲氣所出之門戶。故名曰氣口。而爲脈之大會。以占一身焉。詳文

李時珍曰。兩手六部。皆肺之經脈也。特取此以候五臟六腑之氣耳。非五臟六腑所居之處也。凡診察。皆以肺心脾肝腎各候一動。五十動不止者。五臟皆足。內有一止。則知一臟之脈不至。據此推之。則以肺經一脈。候五臟六腑之氣者。可心解矣。褚儲趙氏不知脈隨五臟之氣行于經隧之間。欲以男女臟腑顛倒部位。執泥不通。戴同父言褚氏倒裝五臟。丹溪別男女尺寸。草廬明三部皆肺。三說皆有真見。學者所當宗師。若夫趙氏所云。蓋本于宋人王宗正難經圖解。豈知脈分兩手。出于素問脈要精微論。而越人推明關脈及一脈十變于難經。非始于叔和也。若如其說。則一脈十變。何從推之。可謂鑿而任矣。○命門卽腎之說。乃越人之誤也。予嘗著命門考。命門三焦客難二說。凡二千餘言云。

瀕湖脈學

李時珍曰。宋有俗子杜撰脈訣。鄙陋紕繆。醫學習誦。以為權輿。逮臻頹白。脈理竟昧。戴同父常刊其誤。先考月池翁著四診發明八卷。皆精詣奧室。淺學未能窺造。多因撮粹擷華。僭撰此書。以便習讀。為脈指南。世之醫病兩家。咸以脈為首務。不知脈乃四診之末。謂之巧者爾。上士欲會其全。非備四診不可。明嘉靖甲子上元日。謹書于瀕湖薊所。

浮陽

浮脈舉之有餘。按之不足。如微風吹鳥背上毛。厭厭聶聶。如循榆莢。如水漂木。如捻蔥葉。

浮脈法天。有輕清在上之象。在卦為乾。在時為秋。在人為肺。又謂之毛。太過則中堅旁虛。如循雞羽。病在外也。不及則氣來毛微。病在中也。○脈訣言尋之如太過。乃浮兼洪緊之象。非浮脈也。

【體狀詩】浮脈惟從肉上行。如循榆莢似毛輕。三秋得令知無恙。久病逢之卻可驚。

【相類詩】浮如木在水中浮。浮大中空乃是乳。拍拍而浮是洪脈。來時雖盛去悠悠。○浮脈輕平似捻蔥。

虛來遲大豁然空。浮而柔細方為濡。散似楊花無定蹤。

浮而有力為洪。浮而遲大為虛。虛甚為散。浮而無力為乳。浮而柔細為濡。

【主病詩】浮脈為陽表病居。遇風數熱緊寒拘。浮而有力多風熱。無力而浮是血虛。○寸浮頭痛眩生風。

或有風痰聚在胸關上土衰兼木旺尺中澁便不流通

浮脈主表有力表實無力表虛浮濕中風浮數風熱浮聚風寒浮緩風溼浮虛傷暑浮乳失血浮洪虛熱浮散勞極

沈陰

沈脈重手按至筋骨乃得經如綿裹砂內剛外柔楊如石投水必極其底

沈脈法地有淵泉在下之象在卦為坎在時為冬在人為腎又謂之石亦曰管太過則如彈石按之益堅病在外也不及則氣來虛微去如數者病在中也○脈訣言緩度三關狀如爛綿者非也沈有緩之益

及各部之沈細綿乃弱脈非沈也

【體狀詩】水行潤下脈來沈筋骨之間奕滑勻女子寸兮男子尺四時如此號為平

【相類詩】沈幫筋骨自調勻伏則推筋着骨尋沈細如綿真弱脈絃長實大是牢形

沈行筋間伏行骨上牢大有力弱細無力

【主病詩】沈潛水畜陰經病數熱遲寒滑有痰無力而沈虛與氣沈而有力積并寒○寸沈痰鬱水停胸

關主中寒痛不通尺部濁遺并泄痢腎虛腰及下元痼

沈脈主裏有力裏實無力裏虛沈則為氣又主水畜沈遇痼冷沈數內熱沈滑痰食沈瀉氣鬱沈弱寒熱沈緩寒溼沈緊冷痛沈牢冷積

遲陰

遲脈一息三至去來極慢經

遲為陽不勝陰。故脈來不及。○脈訣言重手乃得。是有沈無浮。一息三至。甚為易見。而曰隱隱。曰狀且難。是瀉脈矣。其謬可知。

【體狀詩】遲來一息至。惟三陽不勝陰。氣血寒。但把浮沈分表裏。消陰須益火之原。

【相類詩】脈來三至號為遲。小跌于遲作緩持。遲細而難知。是瀉。浮而遲大以虛推。
三至為遲。有力為緩。無力為瀉。有止為結。遲甚為敗。浮大而裏為虛。○黎氏曰。遲小而實。緩大而慢。遲為陰盛。陽衰。緩為衛盛。營弱。宜別之。

【主病詩】遲司臟病或多痰。沈痼癥瘕子細看。有力而遲為冷痛。遲而無力定虛寒。○寸遲必是上焦寒。關主中寒痛不堪。尺是腎虛腰腳重。洩便不禁疝牽丸。

遲脈主臟。有力冷痛。無力虛寒。浮遲表寒。沈遲裏寒。

數脈

數脈一息六至。經脈流薄疾。素問

數為陰不勝陽。故脈來太過。○浮沈遲數。脈之綱領。素問脈經。皆為正脈。脈訣立七表八裏。而遺數脈。止謂于心臟。其妄甚矣。

【體狀詩】數脈息間常六至。陰微陽盛必狂煩。浮沈表裏分虛實。惟有兒童作吉看。

【相類詩】數比平人多一至。緊來如數似彈繩。數而時止名為促。數見關中動脈形。
數而弦急為緊。流利為滑。數而有止為促。數甚為疾。數見關中為動。

【主病詩】數脈為陽熱可知。只將君相火來醫。實宜涼瀉虛溫補。肺病秋深卻畏之。○寸數咽喉口舌瘡。

吐紅欬嗽肺生瘍。當關胃火并肝火。尺屬滋陰降火湯。

數脈主肺。有力實火。無力虛火。浮數表熱。沈數裏熱。氣口數實肺癰。數虛肺痿。

滑陽中

滑脈往來前卻。流利展轉。替替然如珠之應指。脈漉漉如欲脫。

滑為陰氣有餘。故脈來流利如水。脈者血之府也。血盛則脈滑。故腎脈宜之。氣盛則脈澹。故肺脈宜之。○脈訣云。按之即伏。三關如珠。不進不退。是不分浮滑沈滑尺寸之滑也。今正之。

【體狀相類詩】滑脈如珠替替然。往來流利卻還前。莫將滑數為同類。數脈惟看至數間。

滑則如珠。數則六至。

【主病詩】滑脈為陽元氣衰。痰生百病食生災。上為吐逆下畜血。女脈調時定有胎。○寸滑膈痰生嘔吐。

吞酸舌強或欬嗽。當關宿食肝脾熱。渴痢癩淋看尺部。

滑主痰飲。浮滑風痰。沈滑食痰。滑數痰火。滑短宿食。脈訣言關滑胃寒尺滑脾似冰。與脈經言關滑胃熱尺滑血畜婦人經病之旨相反。其謬如此。

瀉陰

瀉脈細而遲。往來難短且散。或一止復來。脈參伍不調。素如輕刀刮竹。脈如雨沾沙。通真如病蠶食葉。

瀉為陽氣有餘。氣盛則血少。故脈來蹇滯而肺宜之。○脈訣言指下尋之似有舉之全無。與脈經所云絕不相干。

【體狀詩】細遲短瀉往來難。散止依稀應指間。如雨沾沙容易散。病蠶食葉慢而艱。

【相類詩】參伍不調名曰瀦。輕刀刮竹短而難。微似秒芒微奕甚。浮沈不別有無間。

細遲短散時一止曰瀦。極細而奕重按若絕曰微。浮而柔細曰瀦。沈而柔細曰瀦。

【主病詩】瀦緣血少或傷精。反胃亡陽汗雨淋。寒溼入營為血痺。女人非孕即無經。○寸瀦心虛痛對胸。

胃虛脅脹察關中。尺為精血俱傷候。腸結澀淋或下紅。

虛陰

虛脈遲大而奕。按之無力。隱指豁豁然空。

崔紫虛云。形大力薄。其虛可知。○脈訣言尋之不足。舉之有餘。止言浮脈不見。虛狀。楊仁齋言狀似柳絮散漫而遲。滑氏言散大而奕。皆是散脈非虛也。

【體狀相類詩】舉之遲大按之鬆。脈狀無涯類谷空。莫把扎虛為一例。乳來浮大似慈蔥。

虛脈浮大而遲。按之無力。乳脈浮大。按之中空。乳為脫血。虛為血虛。浮散二脈見浮脈。

【主病詩】脈虛身熱為傷暑。自汗怔忡驚悸多。發熱陰虛須早治。養營益氣莫蹉跎。○血不榮心寸口虛。

關中腹脹食難舒。骨蒸痿痹傷精血。卻在神門兩部居。

實陽

實脈浮沈皆得。脈大而長。微弦。應指愒愒然。經

愒愒。堅實貌。○脈訣言如繩。應指來。乃緊脈。非實脈也。

【體狀詩】浮沈皆得大而長。應指無虛愒愒強。熱蘊三焦成壯火。通腸發汗始安康。

【相類詩】實脈浮沈有力強。緊如彈索轉無常。須知牢脈幫筋骨。實大微弦更帶長。

浮沈有力為實。弦急彈指為緊。沈而實大微弦而長為牢。

【主病詩】實脈為陽火鬱成。發狂譫語吐頻頻。或為陽毒或傷食。大便不通或氣疹。○寸實應知面熱風。

咽疼舌強氣填胸。當關脾熱中宮滿。尺實腰腸痛不通。經曰。血實脈實。曰脈實者。水穀為病。曰氣來實強。是謂太過。○脈訣言尺實小便不禁。與脈經尺實小腹痛小便難之說相反。溯古不知其謬。謂為虛寒。藥用薑附。愈誤矣。

長陽

長脈不大不小。迢迢自若。朱如揭長竿末梢。為平。如引繩。如循長竿。為病。素問

長有三部之長。一部之長。在時為春。在人為肝。心脈長神。強氣壯腎脈長。帶固根深。經曰。長則氣治。皆言平脈也。

【體狀相類詩】過于本位脈名長。弦則非然但滿張。弦脈與長爭較遠。良工尺度自能量。

實牢弦緊。皆兼長脈。

【主病詩】長脈迢迢大小勻。反常為病似牽繩。若非陽毒癩痢病。即是陽明熱勢深。長主有餘之病。

短陰

短脈不及本位。脈訣：應指而迴，不能滿部。經

戴同父云：短脈只見尺寸，若關中見短，上不通寸，下不通尺，是陰陽絕脈，必死矣。故關不診短。○黎居士云：長短未有定體，諸脈舉按之，附過于本位者為長，不及本位者為短。○長脈屬肝，宜于春；短脈屬肺，宜于秋。但診肝肺，長短自見。○短脈兩頭無中部，有不及本位，乃氣不足以前導其血也。

【體狀相類詩】兩頭縮縮名為短，濇短遲遲細且難。短濇而浮秋喜見，三春為賊有邪干。

濇微動結，皆兼短脈。

【主病詩】短脈惟于尺寸尋，短而滑數酒傷神。浮為血澀沈為痞，寸主頭疼尺腹疼。經曰：短則氣病。

洪陽

洪脈指下極大。經：來盛去衰，問：來大去長。通真

洪脈在卦為離，在時為夏，在人為心。素問謂之大，亦曰鉤。滑氏曰：來盛去衰，如鉤之曲上而復下，應血脈來去之象。象萬物敷布下垂之狀。○癰炎舉晉如衰，疎者非脈。訣云：夏季宜之，秋季冬季發汗通腸，俱非洪脈所宜。蓋謬也。

【體狀詩】脈來洪盛去還衰，滿指滔滔應夏時。若在春秋冬月分，升陽散火莫狐疑。

【相類詩】洪脈來時拍拍然，去衰來盛似波瀾。欲知實脈參差處，舉按弦長恒恒堅。

洪而有力為實，實而無力為洪。

【主病詩】脈洪陽盛血應虛。相火炎熱病居。脹滿胃翻須早治。陰虛洩痢可躊躇。○寸洪心火上焦炎。肺脈洪時金不堪。肝火胃虛關內察。腎虛陰火尺中看。洪主陽盛陰虛之病。洩痢失血久嗽者忌之。經曰形瘦脈大多氣者死。曰脈大則病進。

微陰

微脈極細而更。按之如欲絕。若有若無。經曰細而稍長。又曰氣血微則脈微。

【體狀相類詩】微脈輕微澈澈乎。按之欲絕有如無。微為陽弱細陰弱。細比于微略較粗。細診即見。重按如欲絕者微也。往來如綿而常有者細也。仲景曰脈微如燕上肥者。關氣微紫紫如蠶絲細者。陰氣衰其病得之死。卒病得之生。

【主病詩】氣血微兮脈亦微。惡寒發熱汗淋漓。男為勞極諸虛候。女作崩中帶下醫。○寸微氣促或心驚。關脈微時脹滿形。尺部見之精血弱。惡寒消瘴痛呻吟。微主久虛血弱之病。陽虛惡寒。陰虛發熱。脈訣云。關中日久肝陰竭。瀉下多時骨節枯。

緊脈

緊脈來往有力。左右彈人手。如轉索無常。仲景數如切繩。脈如紐。筆線。

緊乃熱為寒束之脈。故急數如此。要有神氣。素問謂之急。○脈訣言。緊入尺來。崔氏言如棉。皆非緊狀。或以浮緊為弦。沈緊為牢。亦近似耳。

【體狀詩】舉如轉索切如繩。脈象因之得緊名。總是寒邪來作寇。內為腹痛外身疼。【相類詩】見弦

【主病詩】緊為諸痛主于寒。喘欬風痛吐冷痰。浮緊表寒須發越。緊沈溫散自然安。○寸緊人迎氣口分。當關心腹痛沈沈。尺中有緊為陰冷。定是奔豚與疝疔。諸緊為寒為痛。人迎緊盛傷于寒。氣口緊盛傷于食。關緊痛居其腹。尺乃疾在其腹。○中惡浮緊。欬

嗽沈死
皆主死

緩陰

緩脈去來小駛于遲。脈一息四至。張太如絲在經。不卷其軸。應指和緩。往來甚勻。張太如初春楊柳舞風之

象。楊玄如微風輕颭柳梢。滑伯仁

緩脈在卦為坤。在時為四季。在人為脾。陽寸陰尺。上下同等。浮大而奕。無有偏勝者。平脈也。若非其時。即為有病。緩而和勻。不浮不沈。不疾不徐。不微不弱。者。即為胃氣。故杜光庭云。欲知死期。何以取古賢。推定五般土。陽土須知不遇陰。陰土遇陰。當細數。詳玉函經。

【體狀詩】緩脈阿阿四至通。柳梢裊裊輕風。欲從脈裏求神氣。只在從容和緩中。見遲脈相類詩

【主病詩】緩脈營衰衛有餘。或風或溼或脾虛。上為項強下痿痹。分別浮沈大小區。○寸緩風邪項背拘。

關為風眩胃家虛。神門濡泄或風秘。或是蹠跚足力迂。浮緩為風。沈緩為溼。緩大風虛。緩細溼痺。緩濡脾薄。緩弱氣虛。脈訣言緩主脾熱口臭。反胃齒痛。夢鬼諸病。出自杜撰。與緩無關。

乳陰中

乳脈浮大而奕。按之中央空。兩邊實。脈中空外實。狀如慈蔥。

乳慈蔥也。素問無乳名。劉三點云。乳脈何以絕類慈蔥。指下成實。有邊無中。或同父云。管行脈中。脈以血為形。乳脈中空。脈血之象也。○脈經云。三部脈乳。長病得之。生卒病得之。死。○脈訣言。兩頭有中。關無。是脈斷截矣。又言主淋。溼氣入小腸。與失血之候相反。誤世不小。

【體狀詩】乳形浮大更如蔥邊實須知內已空火犯陽經血上溢熱侵陰絡下流紅
 【相類詩】中空旁實乃為乳浮大而遲虛脈呼乳更帶弦名曰革乳為失血革血虛
 【主病詩】寸乳積血在于胸關裏逢乳腸胃癰尺部見之多下血赤淋紅痢漏崩中

弦陽中

弦脈端直以長素問如張弓弦脈經按之不移綽綽如按琴瑟絃琴狀若篠絃脈從中直過挺然指下列

弦脈在卦為震在時為春在人為肝經虛以滑者平實滑如循長竿者病動急如新張弓弦者死池氏曰弦緊而數勁為太過弦緊而細為不及戴同父曰弦而與其病輕弦而硬其病重○脈訣言時時帶數又言脈緊狀繩牽皆非弦象今削之

【體狀詩】弦脈迢迢端直長肝經木王土應傷怒氣滿胸常欲叫翳蒙瞳子淚淋浪

【相類詩】弦來端直似絲絃緊則如繩左右彈緊言其力弦言象牢脈弦長沈伏間又見長脈

【主病詩】弦應東方肝膽經飲痰寒熱瘡纏身浮沈遲數須分別大小單雙有重輕○寸弦頭痛膈多痰

寒熱瘵痕察左關關右胃寒心腹痛尺中陰疝脚拘攣

弦為木盛之病浮弦支飲外溢沈弦懸飲內痛瘧脈自弦弦數多熱弦遇多寒弦大主虛弦細拘急陽弦頭痛陰弦腹痛單弦飲癖雙弦寒癩若不食者木來克土必難治

革陰

革脈弦而乳仲景如按鼓皮丹

仲景曰：弦則爲寒，芤則爲虛。虛寒相搏，此名曰革。男子亡血失精，婦人半產漏下。脈經曰：三部脈革，或有病得之死，卒病得之生。時珍曰：此卽芤弦二脈相合，故均主失血之候。諸家脈書皆以爲芤脈，故或有革無芤，有芤無革，混淆不辨。不知革浮芤，芤虛實形證皆異也。○又按甲乙經曰：渾渾革，至如涌泉，病進而危，弊弊綽綽，其去如弦絕者，死。謂脈來渾渾，革變急如涌泉，出而不反也。王叔和以爲溢脈，與此不同。

【體狀主病詩】革脈形如按鼓皮，乳弦相合脈寒虛。女人半產并崩漏，男子營虛或夢遺。【相類詩】見前

牢陰中

牢脈似沈似伏，實大而長，微弦。經脈

屬論曰：牢而長者，肝也。仲景曰：寒則牢堅，有牢固之象。沈氏曰：似沈似伏，牢之位也。實大弦長，牢之體也。○脈訣不言形狀，但云尋之則無按之，則有云：脈入皮膚，辨息難，又以牢爲死脈。皆孟浪謬誤。

【體狀相類詩】弦長實大脈牢堅，牢位常居沈伏間。革脈乳弦自浮起，革虛牢實要詳看。

【主病詩】寒則牢堅裏有餘，腹心寒痛木乘脾。疝癩癥瘕何愁也，失血陰虛卻忌之。

牢主寒實之病，木實則爲痛。扁鵲云：裏爲虛，牢爲實。失血者，脈宜沈細，反浮大而牢者，死。虛病見實脈也。○脈訣言骨間疼痛，氣居于黃池，氏以爲腎傳于脾，皆謬妄不經。

濡陰即芤字

濡脈極爽而浮細，如帛在水中，輕手相得，按之無有。經脈如水上浮，漚漚。

帛浮水中，重手按之，隨手而沒之象。○脈訣言按之似有，舉還無是，微脈非濡也。

【體狀詩】濡形浮細按須輕，水面浮綿力不禁。病後產中猶有藥，平人若見是無根。

【相類詩】浮而柔細知為濡。沈細而柔作弱持。微則浮微如欲絕。細來沈細近于微。

浮細如綿曰濡。沈細如綿曰弱。浮而極細如絕曰微。沈而極細不斷曰細。

【主病詩】濡為亡血陰虛病。髓海丹田暗已虧。汗雨夜來蒸入骨。血山崩倒溼侵脾。○寸濡陽微自汗多。關中其奈氣虛何。尺傷精血虛寒甚。溫補真陰可起疴。濡主血虛之病。又為傷溼。

弱脈

弱脈極爽而沈細。按之乃得。舉手無有。經脈

弱乃濡之沈者。脈訣言經手乃得。黎氏謂如浮瀉皆是濡脈。非弱也。○素問曰：脈弱以澁是有胃氣。脈弱以澁是謂久病病後老弱見之。順平人少年見之逆。

【體狀詩】弱來無力按之柔。柔細而沈不見浮。陽陷入陰精血弱。白頭猶可少年愁。【相類詩】見濡脈。

【主病詩】弱脈陰虛陽氣衰。惡寒發熱骨筋痠。多驚多汗精神減。益氣調營急早醫。○寸弱陽虛病可知。

關為胃弱與脾衰。欲求陽陷陰虛病。須把神門兩部推。弱主氣虛之病。仲景曰：陽陷入陰。故惡寒發熱。又云：弱主筋。沈主骨。陽浮陰弱。血虛筋急。柳氏曰：氣

虛則脈弱寸短陽虛尺弱陰虛關弱胃弱。

散脈

散脈大而散。有表無裏。脈渙漫不收。崔無統紀。無拘束。至數不齊。或來多去少。或去多來少。渙散不收。如

楊花散漫之象。柳氏

戴同父曰。心脈浮大而散。肺脈短澀而散。平脈也。心脈與散。怔忡。肺脈與散。汗出。肝脈與散。溢飲。脾脈與散。肝脈病脈也。腎脈與散。諸病脈。代散死脈也。難經曰。散脈獨見則危。柳氏曰。散為氣血俱虛。根本脫離之脈。產婦得之。隨生。孕婦得之。隨。

【體狀詩】散似楊花散漫飛。去來無定至難齊。產為生兆胎為墮。久病逢之不必醫。

【相類詩】散脈無拘散漫然。濡來浮細水中綿。浮而遲大為虛脈。芤脈中空有兩邊。

【主病詩】左寸怔忡右寸汗。溢飲左關應與散。右關與散腑附腫。散居兩尺魂應斷。

細陰

細脈小于微而常有。細直而奕。若絲線之應指。經脈

素問謂之小。王啓玄言如莠莖。狀其柔細也。○脈訣言往來極微。是微反大于細矣。與經相背。

【體狀詩】細來纍纍細如絲。應指沈沈無絕期。春夏少年俱不利。秋冬老弱卻相宜。【相類詩】見微

【主病詩】細脈纍纍血氣衰。諸虛勞損七情乖。若非溼氣侵腰腎。即是傷精汗洩來。○寸細應知嘔吐頻。

入關腹脹胃虛形。尺逢定是丹田冷。洩痢遺精號脫陰。脈經曰。細為血少氣衰。有此證則順。否則逆。故吐衄得沈細者。生憂勞過度者。脈亦細。

伏陰

伏脈重按著骨。指下裁動。經脈行筋下。刊

脈訣言尋之似有。定息全無。殊為外顯。

【體狀詩】伏脈推筋著骨尋。指間裁動隱然深。傷寒欲汗陽將解。厥逆臍疼證屬陰。【相類詩】脈沈

【主病詩】伏為霍亂吐頻頻。腹痛多緣宿食停。畜飲老痰成積聚。散寒溫裏莫因循。○食鬱胸中雙寸伏。

欲吐不吐常兀兀。當關腹痛困沈沈。關後疝疹還破腹。

傷寒一手脈伏曰單伏。兩手脈伏曰雙伏。不可以陽證見。陰為診。乃火邪內鬱。不得發越。陽極似陰。伏脈伏必有大汗而解。正如久旱將雨。六合陰晦。雨後庶物皆蘇之義。又有夾陰傷寒。先有伏陰在內。外復感寒。陰盛陽衰。四肢厥逆。六脈沈伏。須投薑附及灸關元。脈乃復出也。若太陽衝陽皆無脈者必死。○脈訣言徐徐發汗。深古以麻黃附子細辛湯主之。皆非也。劉元寶曰：伏脈不可發汗。

動陽

動乃數脈見于關。上下無頭尾如豆大。厥厥動搖。

仲景曰：陰陽相搏。名曰動。陽動則汗出。陰動則發熱。形冷惡寒。此三焦傷也。成無己曰：陰陽相搏。則虛者動。故陽虛則陽動。陰虛則陰動。麗安常曰：關前三分為陽。後三分為陰。關位半陰半陽。故動隨虛見。○脈訣言尋之似有。舉之還無。不難其處。不往不來。三關沈沈。含糊嚮妄。殊非動脈。詹氏言其形鼓動如鉤。如毛者尤謬。

【體狀詩】動脈搖搖數在關。無頭無尾豆形團。其原本是陰陽搏。虛者搖兮勝者安。

【主病詩】動脈專司痛與驚。汗因陽動熱因陰。或為洩痢拘攣病。男子亡精女子崩。

仲景曰：動則為痛。為驚。素問曰：陰虛陽搏。則之崩。又曰：婦人手少陰脈動甚者。妊子也。

促陽

促脈來去數。時一止復來。脈如蹶之趣。徐疾不常。其

脈經但言數而止為促。脈訣乃云并居寸口不言時止者謬矣。數止為促。緩止為結。何獨寸口哉。

【體狀詩】促脈數而時一止。此為陽極欲亡陰。三焦鬱火炎炎盛。進必無生退可生。【相類詩】脈代

【主病詩】促脈惟將火病醫。其因有五細推之。時時喘欬皆痰積。或發狂斑與毒疽。
促主陽盛之病。○促結之因皆有氣血痰飲食五者之別。一有留滯則脈必見止也。

結陰

結脈往來緩時一止復來。脈

脈訣言或來或去。聚而卻還。與結無關。仲景有聚聚如覆瓦。竿曰陰結。鶴鶴如車蓋曰陽結。脈經又有如麻子動搖。旋引旋收。聚散不常者曰結。生死此三脈名同實異也。

【體狀詩】結脈緩而時一止。獨陰偏盛欲亡陽。浮為氣滯沈為積。汗下分明在主張。【相類詩】脈代

【主病詩】結脈皆因氣血凝。老痰結滯苦沈吟。內生積聚外癰腫。疝瘕假為殃病屬陰。

結主陰盛之病。越人曰結甚則積甚。結微則氣微。浮結外有癰積。伏結內有積聚。

代陰

代脈動而中止不能自還。因而復動。其脈至還入尺。良久方來。吳氏

脈一息五至。肺心脾肝腎五臟之氣皆足。五十動而一息。合大衍之數。謂之平脈。反此則止乃見。為胃氣不能至。則四十動一止。肝氣不能至。則三十動一止。蓋一臟之氣衰而他臟之氣代至也。經曰代則胃氣衰。滑伯仁曰若無病。羸瘦脈代者危。脈也。有病而氣血乍損。氣不能續者。祇為病脈。傷寒心悸脈代者復脈。湯主之。妊娠脈代者其胎百日代之生死不可不辨。

【體狀詩】動而中止不能還。復動因而作代看。病者得之猶可療。平人卻與壽相關。

【相類詩】數而時止名為促。緩止須將結脈呼。止不能回方是代。結生代死自殊塗。

促結之止無常數。或二動三動一止。即來代脈之止。有常數。必依數而止。遷入尺中。良久方來也。

【主病詩】代脈元因臟氣衰。腹疼洩痢下元虧。或為吐瀉中宮病。女子懷胎三月兮。脈經曰。代散者死。主洩及便膿血。

五十不止身無病。數內有止皆知定。四十一止一臟絕。四年之後多亡命。三十一止即三年。二十一止二年應。十動一止一年殂。更觀氣色兼形證。

兩動一止三四日。三四動止應六七。五六一止七八朝。次第推之自無失。

戴同父曰。脈必滿五十動。出自難經。而脈訣五臟壽皆以四十五動為準。非子經胃。○柳東陽曰。古以動數候脈。是吃緊語。須候五十動。乃知五臟缺失。今人指到腕臂。即云見了。夫五十動。豈彈指間事耶。故學者當診脈。問證。聽聲。觀色。斯備四診而無失。

四言翠要 宋南康紫虛隱君崔嘉彥希範著。明蕪州月池子李言聞子郁刪補。

脈乃血派。氣血之先。血之隧道。氣息應焉。其象法地。血之府也。心之合也。皮之部也。

資始于腎。資生于胃。陽中之陰。本乎營衛。營者陰血。衛者陽氣。營行脈中。衛行脈外。

脈不自行。隨氣而至。氣動脈應。陰陽之義。氣如雲霧。血如波瀾。血脈氣息。上下循環。

十二經中。皆有動脈。惟手太陰。寸口取決。此經屬肺。上系吭嗑。脈之大會。息之出入。

一呼一吸。	四至爲息。	日夜一萬。	三千五百。	一呼一吸。	脈行六寸。	日夜八百。	十丈爲準。
初持脈時。	令仰其掌。	掌後高骨。	是謂關上。	關前爲陽。	關後爲陰。	陽寸陰尺。	先後推尋。
心肝居左。	肺脾居右。	腎與命門。	居兩尺部。	魂魄穀神。	皆見寸口。	左主司官。	右主司府。
左大順男。	右大順女。	本命扶命。	男左女右。	關前一分。	人命之主。	左爲人迎。	右爲氣口。
神門決斷。	兩在關後。	人無二脈。	病死不愈。	男女脈同。	惟尺則異。	陽弱陰盛。	反此病至。
脈有七診。	曰浮中沈。	上下左右。	消息求尋。	又有九候。	舉按輕重。	三部浮沈。	各候五動。
寸候胸上。	關候膈下。	尺候于臍。	下至跟踝。	左脈候左。	右脈候右。	病隨所在。	不病者否。
浮爲心肺。	沈爲腎肝。	脾胃中州。	浮沈之間。	心脈之浮。	浮大而散。	肺脈之浮。	浮濇而短。
肝脈之沈。	沈而弦長。	腎脈之沈。	沈實而濡。	脾胃屬土。	脈宜和緩。	命爲相火。	左寸同斷。
春弦夏洪。	秋毛冬石。	四季和緩。	是謂平脈。	太過實強。	病生于外。	不及虛微。	病生于內。
春得秋脈。	死在金日。	五臟準此。	推之不失。	四時百病。	胃氣爲本。	脈貴有神。	不可不審。
調停自氣。	呼吸定息。	四至五至。	平和之則。	三至爲遲。	遲則爲冷。	六至爲數。	數即熱證。
轉遲轉冷。	轉數轉熱。	遲數既明。	浮沈當別。	浮沈遲數。	辨內外因。	外因于天。	內因于人。
天有陰陽。	風雨晦冥。	人喜怒憂。	思悲恐驚。	外因之浮。	則爲表證。	沈裏遲陰。	數則陽盛。

內因之浮	虛風所為	沈氣遲冷	數熱何疑	浮數表熱	沈數裏熱	浮遲表虛	沈遲冷結
表裏陰陽	風氣冷熱	辨內外因	脈證參別	脈理浩繁	總括于四	既得提綱	引申觸類
浮脈法天	輕手可得	汎汎在上	如水漂木	有力洪大	來盛去悠	無力虛大	遲而且柔
虛甚則散	渙漫不收	有邊無中	其名曰芤	浮小為濡	綿浮水面	滯甚則微	不任尋按
沈脈法地	近于筋骨	深深在下	沈極為伏	有力為牢	實大弦長	牢甚則實	愒愒而強
無力為弱	柔小如綿	弱甚則細	如蛛絲然	遲脈屬陰	一息三至	小駛于遲	緩不及四
二損一敗	病不可治	兩息奪精	脈已無氣	浮大虛散	或見芤革	浮小濡微	沈小細弱
遲細為瀯	往來極難	易散一止	止而復還	結則來緩	止而復來	代則來緩	止不能回
數脈屬陽	六至一息	七疾八極	九至為脫	浮大者洪	沈大牢實	往來流利	是謂之滑
有力為緊	彈如轉索	數見寸口	有止為促	數見關中	動脈可候	厥厥動搖	狀如小豆
長則氣治	過于本位	長而端直	弦脈應指	短則氣病	不能滿部	不見于關	惟尺寸候
一脈一形	各有主病	數脈相兼	則見諸證	浮脈主表	裏必不足	有力風熱	無力血弱
浮遲風虛	浮數風熱	浮緊風寒	浮緩風溼	浮虛傷暑	浮芤失血	浮洪虛火	浮微勞極
浮濡陰虛	浮散虛劇	浮弦痰飲	浮滑痰熱	沈脈主裏	主寒主積	有力痰食	無力氣鬱

汗後脈靜	暑傷于氣	尸厥沈滑	脈之主病	陽盛則促	陽動汗出	濡小陰虛	洪脈爲熱	長脈氣平	浮弦支飲	瀇脈少血	數脈主腑	沈弦飲痛	沈遲虛寒
身涼則安	脈虛身熱	卒不知人	有宜不宜	肺癰陽毒	陰動發熱	弱小陽竭	其陰則虛	短脈氣病	沈弦懸痛	或中寒溼	主吐主狂	沈滑宿食	沈數熱伏
汗後脈躁	溼傷于血	入臟身冷	陰陽順逆	陰盛則結	爲痛與驚	陽竭惡寒	細脈爲溼	細則氣少	陽弦頭痛	反胃結腸	有力爲熱	沈伏吐利	沈緊冷痛
熱甚必難	脈緩細瀇	入腑身溫	凶吉可推	疝瘕積鬱	崩中失血	陰虛發熱	其血則虛	大則病進	陰絃腹痛	自汗厥逆	無力爲瘡	陰毒聚積	沈緩水畜
陽病見陰	傷寒熱病	風傷于衛	中風浮緩	代則氣衰	虛寒相搏	陽微惡寒	緩大者風	浮長風痲	緊脈主寒	弦脈主飲	滑脈主痰	遲脈主臑	沈牢痲冷
病必危殆	脈喜浮洪	浮緩有汗	急實則忌	或泄膿血	其名爲革	陰微發熱	緩細者溼	沈短宿食	又主諸痛	病屬膽肝	或傷于食	陽氣伏潛	沈實熱極
陰病見陽	沈微瀇小	寒傷于營	浮滑中痰	傷寒心悸	男子失精	男微虛損	緩瀇血少	血虛脈虛	浮緊表寒	弦數多熱	下爲畜血	有力爲痛	沈弱陰虛
雖因無害	證反必凶	浮緊無汗	沈遲中氣	女胎三月	女子失血	女微瀉血	緩滑內熱	氣實脈實	沈緊裏痛	弦遲多寒	上爲吐逆	無力虛寒	沈細痹溼

頭痛多弦	喉痹之脈	癩乃重陰	小便淋瀝	遺精白濁	諸病失血	骨蒸發熱	喘急息肩	霍亂之候	洩瀉下痢	浮滑兼風	火鬱多沈	飲食內傷	上不至關
浮風緊寒	數熱遲寒	狂乃重陽	鼻頭色黃	微瀼而弱	脈必見乳	脈數而虛	浮滑者順	脈代勿訝	沈小滑弱	沈滑兼氣	滑痰緊食	氣口急滑	陰氣已絕
熱洪溼細	纏喉走馬	浮洪吉兆	瀼小無血	火盛陰虛	緩小可喜	熱而瀼小	沈瀼肢寒	厥逆遲微	實大浮洪	食傷短疾	氣瀼血乳	勞倦內傷	下不至關
緩滑厥痰	微伏則難	沈急凶殃	數大何妨	乳滯洪數	數大可憂	必殞其軀	散脈逆證	是則可怕	發熱則惡	溼留滯細	數火細溼	脾脈大弱	陽氣已竭
氣虛弦粟	諸風眩運	痢脈宜虛	大便燥結	三消之脈	瘀血內畜	勞極諸虛	病熱有火	欬嗽多浮	嘔吐反胃	瘧脈自弦	滑主多痰	欲知是氣	代脈止歇
血虛微瀼	有火有痰	實急者惡	須分氣血	浮大者生	卻宜牢大	浮粟微弱	洪數可醫	聚肺關胃	浮滑者昌	弦數者熱	弦主留飲	下手脈沈	臟絕傾危
腎厥弦堅	左瀼死血	浮陽沈陰	陽數而實	細小微瀼	沈小瀼微	土贖雙弦	沈微無火	沈緊小危	弦數緊瀼	弦遲者寒	熱則滑數	沈極則伏	散脈無根
真痛短瀼	右大虛看	滑痰數熱	陰遲而瀼	形脫可驚	反成其害	火炎急數	無根者危	浮濡易治	結腸者亡	代散者折	寒則弦緊	瀼弱久深	形損難醫

心腹之痛。	其類有九。	細遲從吉。	浮大延久。	疝氣弦急。	積聚在裏。	卒急者生。	弱急者死。
腰痛之脈。	多沈而弦。	兼浮者風。	兼緊者寒。	弦滑痰飲。	濡細腎著。	大乃腎虛。	沈實閃肭。
腳氣有四。	遲寒數熱。	浮滑者風。	濡細者溼。	痿病肺虛。	脈多微緩。	或濇或緊。	或細或濡。
風寒溼氣。	合而為痹。	浮濇而緊。	三脈乃備。	五疸實熱。	脈必洪數。	濇微屬虛。	切忌發渴。
脈得諸沈。	責其有水。	浮氣與風。	沈石或裏。	沈數為陽。	沈遲為陰。	浮大出厄。	虛小可驚。
脹滿脈弦。	土制于木。	溼熱數洪。	陰寒遲弱。	浮為虛滿。	緊則中實。	浮大可治。	虛小危極。
五臟為積。	六腑為聚。	實強者生。	沈細者死。	中惡腹脹。	緊細者生。	脈若浮大。	邪氣已深。
癰疽浮散。	惡寒發熱。	若有痛處。	癰疽所發。	脈數發熱。	而痛者陽。	不數不熱。	不疼陰瘡。
未潰癰疽。	不怕洪大。	已潰癰疽。	洪大可怕。	肺癰已成。	寸數而實。	肺痿之形。	數而無力。
肺癰色白。	脈宜短濇。	不宜浮大。	唾糊嘔血。	腸癰實熱。	滑數可知。	數而不熱。	關脈孔虛。
微濇而緊。	未臙當下。	緊數臙成。	切不可下。	婦人之脈。	以血為本。	血旺易胎。	氣旺難孕。
少陰動甚。	謂之有子。	尺脈滑利。	妊娠可喜。	滑疾不散。	胎必三月。	但疾不散。	五月可別。
左疾為男。	右疾為女。	女腹如箕。	男腹如斧。	欲產之脈。	其至離經。	水下乃產。	未下勿驚。
新產之脈。	緩滑為吉。	實大弦牢。	有證則逆。	小兒之脈。	七至為平。	更察色證。	與虎口文。

奇經八脈	其診又別	直上直下	浮則為督	牢則為衝	緊則任脈	寸左右彈	陽蹻可決
尺左右彈	陰蹻可別	關左右彈	帶脈當訣	尺外斜上	至寸陰維	尺內斜上	至寸陽維
督脈為病	脊強癩癩	任脈為病	七疝瘕堅	衝脈為病	逆氣裏急	帶主帶下	臍痛精失
陽維寒熱	目眩僵仆	陰維心痛	胸脅刺築	陽蹻為病	陽緩陰急	陰蹻為病	陰緩陽急
癩癩瘰癧	寒熱恍惚	八脈脈證	各有所屬	平人無脈	移于外絡	兄位弟乘	陽谿列缺
病脈既明	吉凶當別	經脈之外	又有真脈	肝絕之脈	循刀責責	心絕之脈	轉豆躁疾
脾則雀啄	如屋之漏	如水之流	如盃之覆	肺絕如毛	無根蕭索	麻子動搖	浮波之合
腎脈將絕	至如省客	來如彈石	去如解索	命脈將絕	假游魚翔	至如涌泉	絕在勝腕
真脈既形	胃已無氣	參察色證	斷之以臚				

